

Inatsisissatut siunnersuummut oqaaseqaatit

Nalinginnaasumik oqaaseqaatit**1. Aallarniut**1.1. Inatsisissatut siunnersuummut pingaarnertut tunuliaqutaasut

Inatsisartut 1. januar 2011 aallarnerfigalugu atuuttuulersumik inuussutissarsiutinik ilinniartitaanerni suliaasaqarfimmi annertuunik allannguuteqartitsipput, qitiusumik ilinniartfinni siulersuisunik pilersitsinikkut, qularnaarumallugu ingerlatsinerit suliffeqarnermut nukittuumik attaveqartuunissaat. Tamanna pivoq Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat nr. 10, ulloq 19. maj 2010-meersukkut (Inuussutissarsiutinik ilinniartitsineq pillugu inatsit).

Siulersuisut taarserpaat Naalakkersuisut inissisimaffigigaat qitiusumik ilinniartfinni oqartussatut qullerpaatut, inuttaqarlutillu inuussutissarsiortuniit, inuussutissarsiortut kattuffiiniit il.il. toqqaannartumik suliffeqarnermi illuatungeriinnit toqqaarneqartartunik. Qitiusumik ilinniartfiit aaqqissuussinermut tamatumunnga atatillugu pisortat pigisaattut namminersortutut ingerlatsivittut inissisimalerput Naalakkersuisut nalinginnaasumik ilitsersuisinnaanerisa avataanni.

Aqutsinermik aaqqissuussineq atortuulersoq pilersinneqarnermini annertuutigut ilaarsisuvoq Danmark-imi inuussutissarsiutinik ilinniartfinnik, taakkua ingerlatsivittut namminersortutut imminnut pigisutut pisortat ingerlatsiviisa avataaniittut inissisimanerisigut. Ilinniartitaanernik ingerlatsivittut pineqartutulli nunatsinni qitiusumik ilinniartfiit siulersuisunit aqunneqarput. I

Aqutsinermik aaqqissuussinerup siunertarisimavaa ilinniartitaanerni suliniutit pisariaqartitsinerinik tunngaveqarnerulersinneqarnissaat, ullutsinnut naleqqunnerusunik uuttorneqarsinnaasunillu aqutsinikkut atortulersuinikkut, ilutigisaanillu suliffeqarneri illuatungeriit annertunerujussuarmik akuutinneqarnerisigut ilusilersuinerni ilinniartitaanernillu aaqqissuussisarnerni. Ilusiliaq atorneqartoq ilaqarpoq annerusumik kiffaanngissuseqarnerinik, akisussaaffeqarnerunermillu suliaasanik naammassiniartarneranni. Tamatumunnga ilaliullugu aalajangersarneqarpoq qitiusumik ilinniartfiit suliaaminnik naammassiniaasarnerat naammassisassanut isumaqatigiissutitsigut aqunneqalissasut, siulersuisut aamma Namminersorlutik Oqartussat akornanni isumaqatigiissutigineqartartutigut.

Ilutigisaanik naatsorsuutigineqarsimavoq qanoq aaqqissuussisinnaanikkut annerusumik kiffaanngissuseqarnerup ilinniartfiit aqunneqarnerat nukittunerulersissagaa, qularnaarneqassasorlu ilinniartfiit kiffaanngissuseqarnerunerat nukiit aningaasallu

atugassiissutaasartut pissusissamisoornerusumik atorsinnaalissagaat suliniutinillu nutaanik aallartitsisalernissaat.

Tamatumunnga atatillugu naatsorsuutigineqarpoq qitiusunik ilinniarfiit siulersuisui pissusissamisoortumik namminneq soqutigisaqassasut sungiusaammik suliffissanik sapinngisamik amerlanerpaanik pissarsiniartarnissamik, Inatsisartullu tamatumunnga atatillugu qitiusunik ilinniarfinnik pisussaaffiliillutik suliffeqarfinnut ornigullutik sungiusaammik suliffissanik pissarsiniartalissasut, tak. Inuussutissarsiutinut ilinniartitaanernut inatsimmi § 43, imm. 1. Siulersuisut katitsigaanerata taamaasilluni ataatsimut isigisumik aaqqissuussaavoq suliniutitut sungiusaammik suliffissanik amerlanerusunik pilersitsiviusussatut.

Ukiut qulit sinnerlugit qaangiutereersut aaqqissuusseqqinnermiit Ilinniartitaanernut, Kultureqarnermut, Timersornermut Ilageeqarnermullu Naalackersuisoqarfiup naalackersuinikkut tamatumunnga atatillugu kissaataasunik tunuliaqutaqartumik isumaqatigiissuteqarfigaa suliffeqarfik siunnersuisarnermik suliaqartuusoq taaguuteqartoq Implement 2022-mi Inuussutissarsiutinik ilinniartitsineranut inatsisip nalilersuivigineqarnissaa pillugu. Tamanna ingerlanneqarpoq suliamut atasumik neqeroortitsisoqareerneratigut. Tamatumunngalu atatillugu ilisimatitsissutigineqarsinnaavoq inatsisip atortuulernerata kingornagut inatsisiliorneq nalilersuivigalugu suliaqartoqarnikuunngimmat.

Naalackersuisut 2023-mi ukiakkut saqqummiussivigineqarput Implements-imit nalilersuineramik nalunaarusiamik inaarutaasumik: "Inuussutissarsiutinik ilinniartitaanernut inatsimmik nalilersuineq". Inaarutaasumik nalunaarusiaq tamatuma kingornagut aamma suleqatigiissitamut malinnaatitaasumut nassiunneqarpoq, tassani pingaarnertut ilaasortaapput qitiusumik ilinniarfinnit sinniisut, tamatumani aamma taakkunani siulersuisut.

Nalunaarusiami tamatumunnga atatillugu ersippoq paasissutissanik ataatsimoortunik pilersitsineranut atatillugu apersuineramik ingerlatsisoqarsimasoq qitiusumik ilinniarfinniit aammalu Ilinniartitaanernut, Kultureqarnermut, Timersornermut Ilageeqarnermullu Naalackersuisoqarfimmiit sinniisunik.

Ilanngullugulu nalunaarusiami ersippoq siulersuisuni siulittaasut aamma siulersuisuni ilaasortat immikkut ataasiakkaarlugit apersorneqartarsimasut. Forstanderit, rektorit aamma ilinniartitaanerni pisortat ataasiakkaarlugit apersorneqartarsimapput, ilinniartitaanernilu pisortat fokus gruppini taaneqartuni apersorneqartarsimallutik. Tamatumalu saniatigut nalunaarusiami ersippoq ilinniarfiit tamarmik peqataajumallutik akuersisimasut, kisiannili KTI-mi aamma Imarsiornermik Ilinniarfimmi siulersuisut ataatsimut Implements-imut saaffiginnissummut kingornagullu nukingisaarutaasunut akissuteqarsimangitsut. Taamaattoq KTI-mi siulersuisuni ilaasortat ataasiakkaat apersorneqarsimapput sulisitsisunut sinniisutut. Ilutigisaanik nalunaarusiami maluginiarneqarpoq Imarsiornermik Ilinniarfimmi sulisuusut siulersuisut ataatsimiinnerini peqataasartut kisimik Implements-ip saaffiginnissutaanut

qisuariarsimasut, apersuinernilu peqataasimasut, kisiannili Implements-ip siulittaasoqarfimmut saaffiginnissutai akineqartarsimannigitsut.

Naak ajornartorsiutit qitiusut nalunaarusiami suussusilersorneqarsimannigikkaluartut, pingaarnertut oqaatigineqarsinnaavoq nalilersuinerup sukkulluunniit takussutississimannigimmagu uppersaasarsimanaguluunniit inuussutissarsiuutinik ilinniartitaanerit maleruagassaat maanna atuuttut kissaatigineqartutut eqaallisaasimasut pitsaasunillu ineriartornernik pilersitsisimasut inuussutissarsiuutinik ilinniartitaanerni, Inuussutissarsiuutinut ilinniartitaaneq pillugu inatsisip atortuulernerani naatsorsuutigineqartutut. Kiisalu nalunaarusiami aamma takuneqarsinnaavoq qitiusumik ilinniarfiit siulersuisuisa forstanderiisalu kissaatigisimagaat ilinniartitaanernik politikkami anguniakkatut takorluukkat ilaatinneqassasut, aamma nukinnik annertuumik atuiffiusartooq periusissianik, anguniakkanik aamma naammassisassanut pilersaarussianik suliaqartarneq, ilisimanagu siunnersuutit aamma sammiviit siunnerfiusut naalakkersuinikkut kissaataasunut naapertuuttuunersut.

Tamatuma saniatigut Implements-ip nalunaarusiaani oqaatigineqarpoq Naalakkersuisoqarfiup taamatullu siulersuisut isortuutinngikkaat ajornakusoorsinnaasartooq siulersuisuni ilaasortassanik, attaveqaatigiittartunik nukissanillu allanik naammattunik piginnaaneqartunik nassaarniararneq. Tamatumalu saniatigut nalunaarusiami nalunaarneqarpoq misilittagalinnik imaluunniit sinniisutut sulisinnaasunik amigaateqarneq annertuutigut ajornarnerulersitsisartooq ilinniarfiup ulluinnarni ingerlanneqarneranut periusissiaqarnikkullu oqaloqatigiinnissat suliffeqarnermi pisariaqartitsinerit immikkullu ilinniartitaanertigut pisariaqartitat pillugit paasiniaasoqartarneri eqqarsaatigalugit, kiisalu ilinniartitaanerit nutarterneqarnissaannik pisariaqartitsisarnerit eqqarsaatigalugit piginnaasalinnik amigaateqartoqartoq. Ilanngullugulu Implements-ip nalunaarusiaani paasinarpoq paasissutissat pissarsiarineqarsinnaasut naapertorlugit takuneqarsinnaasooq sulisitsisut assut annertuumik sinniisoqartitsilluartut, siulersuisut Kalaallit Nunaanni sulisitsisunit toqqarneqartartut eqqarsaatigalugit, tamannalu aamma siulittaasoqartitsinerni ersarissooq.

Ilanngullugu Naatsorsueqgissaartarfiup kisitsisaataasa takutippaat piffissami matumani Kalaallit Nunaanni sungiusaammik suliffissat atorineqartut 800-t missaanniittut, tamannalu appariarnerusooq inatsisip atortuulernerani kisitsisinut sanilliullugu, taamanikkut sungiusaammik suliffissat 1000-it missaanniimmata. Iluqaqtissaasussaagaluit amigaataasut sungiusaammik suliffissat amerlanerunerisigut piusussaagaluit pisariaqartilersimavaat ilassummik inatsisiliornissaq, Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaat nr. 17, ulloq 27. november 2020-imeersumik. Ilinniartut sungiusartullu atorfinitsinnerini smiley atorlugu aqqissuussineq pillugu Namminersorlutik Oqartussat nalunaarutaat nr. 16, ulloq 16. marts 2022-meersooq, sungiusaammik suliffissat qularnaarumallugit ilutigisaanillu sulisitsisut maani najugalinnik lærlinginiq sungiusaammillu sulisussanik sulisoqarnerulersikkumallugit pilersinneqarpoq. Kiisalu qitiusumik ilinniarfinniit ilinniagaqartut ukiuinut kisitsisit

atuuttuusut paasinarpoq qitiusumik ilinniarfiit assut naammaginangitsumik inuusuttuaqqat siunnerfiusut pillugit iliuusissanik pilersitsisarsimasut.

Sungiusaammik suliffissanik pilersitsiniartarnikkut amigaataasut saniatigut pissutsit ilungersunartut arlaqarsimapput, inuussutissarsiutinik ilinniartitsinerit assut malunnaatilinnik aningaasartuutissanut missingersuusiaasunik qaangiisarsimapput, 2019-imi inatsimmik unioqqutitsineq, siulersuisut aamma allaffissornikkut qitiusumik oqartussaasut naammattumik pissutsinik malinnaallutik paasinninnginneri, nakkutilliinnginnerilu ilinniarfiit aningaasaqarnerannik, aningaasartuutissanik missingersuusiortarnerannik aamma missingersuusiat malitseqartinneqartarnerannik, ilinniakkat pitsaassusissaannik ilinniartullu atugarissaarnissaannik kiisalu pisuni ilinniartut naammagittaalliutaat.

Naak siulersuisut ullumikkut qitiusumik ilinniarfinni ingerlatsinernut qullersaallutik oqartussaagaluartut, tamatumani aamma aningaasaqarnermi, Naalakkersuisoqarfiup ukiup nikinnerata nalaani aningaasartuutissanut missingersuusiat arlaleriarlutik qaangerneqartarnerisa kingunerisaannik Deloitte ikiortigalugu iternga tikillugu aningaasaqarnikkut nalilersuinernik suliassaqaqarfimmi pilersitsipput, qulaajarumallugit qaammarsaavigiumallugillu aningaasartuutissanut missingersuusianik qaangiisarnerit, pinngitsoorumallugulu qaangiisarnerit siunissamat sammisumik suli pisarsinnaaneri.

Tamatumunnga atatillugu oqaatigineqassaaq Inuussutissarsiutinik ilinniartitsinermut inatsimmi § 35, imm. 1 oqaaseqatigiinni siullerni ersimmat siulersuisut qitiusumik ilinniarfiup oqartussaasutut qullersarigai, taakkualu pingaarnertut qullersaasutut akisussaaffigigaat ilinniarfiup ingerlanneqarnera, tamatumani aamma ilinniarfiup ilikkagassatigut - fagitigut – aningaasaqarnikkullu ingerlatsineri, isumagissallugulu ilinniarfiup aningaasaataasa aqunneqarnerat, aningaasaatit ilinniarfimmi siunertaasunut iluaqutaanerpaamik atorneqarsinnaaqullugit. Ilanngullugulu § 34, imm. 2, oqaaseqatigiit aappaanni ersippoq siulersuisut ataatsimut sinniisuusut ilisimasanut ilinniartitaanernik ineriartortitsinermi, pitsaassusissat qularnaarneqarnissaanni, aqutsinermi, aaqqissuussaanermi aamma aningaasaqarnermi, matumani aamma aningaasartuutissanut missingersuusiat naatsorsuutillu nalilersorneqartarneranni kiisalu ilisimasani ilinniartitaanerit pitsaassusissaat eqqarsaatigalugit.

Nalilersuinermi paasinarsivoq qitiusumik ilinniarfik ataaseq kisimi ilassutitut aningaasaliissutinik pisariaqartitsisinnaasoq, aammalu tamanna ilaannakuusumik ilaatigut pisariaqartitsiviusinnaassasoq qitiusumik ilinniarfinni allani marlunni. Taamaakkaluartoq tamatumunnga oqaatigineqassaaq qitiusumik ilinniarfik taanna immaqqa ilassutitut aningaasaliivigineqarnissamik pisariaqartitsisuusinnaasoq saqqummiussimmat atuinikinnerussutinik 8,7 mio. kr.-it missaannik annertussuseqartunik 2023-imi, tamatumalu ilimanaateqartinnngimmagu aningaasartuutissatut missingersuusiaasut appasinaagaasimasinnaaneri.

Ilanngullugulu eqikkaasoqarsinnaasimavoq uteqqiasumik ilassutitut aningaasaliissutissanik Campus Kujallermi pisariaqartitsisarsimaneq annerusutigut tunngaveqartarsimasoq pissutsinik atuuttunik maluginiaanninnermik aaqqissuussamik malinnaanikkut isertitsiviusussanik suliaqartarnikkut, minnerunngitsumillu aningaasartuutitut tunngasuni, aningaasaqarnermillu aqutsineq malitseqartitsisarnerillu aaqqissuussaasimannngitsut.

Kiisalu akissarsianut tunngasunik kisitsisit paasissutissat tunuliaqutaasut ersersippaat sulisuusut ilaat ataasiakkaat qaffasingaatsiartunik ukiumut akissarsiaqartartut, agguaqatigiissitsilluni akissarsiaasunut sanilliullugit. Taamaasilluni 2022-mi sulisuusut 8 ukiumut isertitaqartarput 1 mio. kr.-it aamma 1,8 mio. kr.-it akornanni. Tamatumunnga atatillugu nalilerneqarpoq akissarsiat qaffasissusiat annerusutigut tunngaveqartoq pissusissamisuunngitsumik skemanik pilersaarusiortarnermik, ingerlatsivinni pisortaasut qulliusut maluginiarsimarpasinngisaannik.

Aningaasaliissutinik qaangiisarnernut tunngatillugu assersuutitut innersuunneqarsinnaavoq Campus Kujalleq, tassani 2022-mi atuinerussutaasut kinguneqarmata ilassutitut aningaasaliissutinik 7,2 mio. kr.-inik annertussusilinnik. 2021-imi Campus Kujallermi atuinerussutaapput 8 mio. kr.-it missaat, 7,4 mio. kr.-it missaat 2020-mi, 1,7 mio. kr.-it missat 2019-imi aamma 3,7 mio. kr.-it missaat 2016-imi. Ilanngullugu ilutigisaanik oqaatigineqassaaq atuinikinnerussutaasartut assigisaanik isortortutut isigineqarmata, atuinikinnerunerup ersittumik takutittarmata aningaasatigut aqutsinerup amigaataanera, tassani pineqarmata piginnaanernik amigaateqarneq aningaasaliissutinut naapertuuttumik ingerlatsisussaaneq eqqarsaatigalugu ("aningaasartuutissanut missingersuusiat eqqorlugit)". Tamatumunnga atatillugu assersuutitut eqqaaneqarsinnaavoq Niuernermik Ilinniarfiup 2022-mi takutimmagu atuinikinnerussutaasoq 11,2 mio. kr.-it missaaniimmat aamma 2021-mi 8,1 mio. kr.-it missaaniimmat. Taakkua saniatigut KTI 2023-imi saqqummiivoq nikingassutinik atuinikinnerunikkut 8,7 mio. kr.-it missaannik, aamma INULI-p 2023 naavaa 1 mio. kr.-it missaannik atuinikinnerulluni, naak ilinniarfik ilassutitut aningaasaliiffigineqarsimagaluartoq 2,7 mio. kr.-it missaannik.

Kiisalu pissutsit atuuttut pisariaqartilersimavaat Ilinniartitaanerumut, Kultureqarnermut, Timersornermut Ilageeqarnermullu Naalakkersuisoqarfiup ukiut 2022-23-p nikinneraniit annertuunik nukinnik atuiffiusumik annertusisamik Campus Kujallermik nakkutilliineq qaammatikkaartoq ingerlatarilermagu, aningaasartuutaasimasut malitseqartillugit ataatsimiittarnertigut, ingerlanneqartartumik ilinniarfiup ulluinnarni aqutsisui peqatigalugit, siulersuisut peqataaffiginngisaannik. Annertusisamik qitiusumiit aqutsineq tamatumunnga atatillugu isumaqarfiginarpoq iluaqutaasumik sunniuteqarsimasoq, aningaasaqarnikkut unammilligassat eqqarsaatigalugit.

Nalunaarusiat tunuliaqutaralugit eqikkaalluni oqaatigineqassaaq paasinarmat inuussutissarsiutinik ilinniakkanik aaqqissuusseqqinneq 2011-meersoq sukkulluunniit

inuussutissarsiutinik ilinniakkat kivinnekqarnerannik iluaqusernekqarnerannilluunniit kinguneqarsimangitsoq, aaqqissuusseqqinnerit pilersinneqarneranni siunnerfiusutut.

1.2. Inatsisissamik piareersaasiornermi qulequttat pingaarnerit

Siunnersuut aallarniummi eqqaaneqartutut aallaaveqarpoq Naalakkersuisut ulloq 23. oktober 2023 aalajangernerannik Inuussutissarsiummik ilinniakkanut inuutissarsiutinullu pikkorissartitsisarnernut nutaamik inatsisissatut siunnersuusiornissamik. Siunertaavoq toqqaannarnerusumik ilinniartitaanikkut takorluukkat anguniakkallu aamma suliniutissat, matumani aamma inuiaqatigiinni nalorninaateqartunik ajornartorsiutit sungiusaammik suliffissaqartitsinermi aamma inuusuttuaqqat immikkut siunnerfiusut sullinneqartussat aamma qitiusumik ilinniarfiit ingerlatsineri, matumani ilanngullugit periusissiani pissutsit, anguniakkat aamma naammassisassanut pilersaarusiata kiisalu qitiusumik ilinniarfiit aningaasaqarnikkut ingerlatsinerisa aqunneqarneri naammassisaqarfiunerusunik aaqqissuunneqassasut.

Ilanngullugu Naalakkersuisut ilinniartitaanernut periusissiamik nutaamik suliaqarneranni nalilernekqarsimapput ukiuni aggersuni suliffeqarnermi unammilligassaalersussat, naatsorsuutigineqarmat naapertuutinnngitsumik inissisimasoqalissasoq nutaamik ilinniagaqarsimasut amerlassusaatigut aammalu suliffeqarnermi pisariaqartitsinerit eqqarsaatigalugit, inuiaqatigiinni innuttaasut sumi nunassittarnerini isiginiarlugit siunnerfilersuinissat, tulleriarinissat aamma naleqqussaansat ilinniartitaanertigut neqeroorutaasunik nunarput tamaat ataatsimut isigalugu. Unammilligassat tamakkua taamaattumik suussusilersorneqassapput, suliassaqarfinni pineqartuni nunami tamarmi suliniutinik aallartitsisarnissat aaqqissuukkumallugit. Tamatumunnga aamma atatillugu naliliisoqarsimavoq suliffeqarnermi assigiinngisitaartut amerliartornerat ilinniartitaanerni ilinniakkanik assigiinngisitaarnerusunik aamma pisariaqartitsinernik kinguneqassasut. Piartuaartut imaapput suliassaqarfiit assigiinngitsut akimorlugit suliniutit pingaaruteqarnerulissasut, tamatumani minnerunngitsumik ilinniagaqartartut immikkut pisariaqartitsisartut eqqarsaatigalugit, tamatumalu pisariaqartillugu qitiusumiit aqutsinerup ataqatigiissaarinerullu annertunerulernissaa nunami tamarmi atortinneqartussanik suliniutinik nutaanik aallartitsisarnerni.

Siunnersuummi oqaasertalersuineri aaqqissuusinnernilu taakkua saniatigut isummersorneqarsimapput Napatitsinermut Siuariartortitsinermullu Pilersaarummi Takorluukkat Tunngaviillu 2. Tassani tikkuarneqarpoq pisariaqartitsineq ilinniarsimassutsit piginnaasaqassutsillu annertusarneqarnissaannik, ilinniartitaanernilu neqeroorutit inuiaqatigiinni pisariaqartitsinernut naleqqussarneqarnissaat pisariaqartinneqartoq, qularnaarumallugu suliffeqarnermik inuussutissarsiutinillu ingerlatsinerup eqaatsuunissaat, inuiaqatigiinni sulisussannik naleqquttunik piginnaanilinnik peqarnissaa eqqarsaatigalugit. Ilutigisaanik ilanngullugu eqqaaneqarpoq qitiusumik ilinniarfiit lærlinginik sungiusaammik suliffissaqartitsinermi akisussaaqataatinneqassasut, imaalillugu sungiusaammik suliffissaqartitsineq aamma ilinniagaqartut lærlingit sullinneqarnerat tamakkiisumik

qitiusumik ilinniarfinnut suliaasaatilerlugu. Pilersaarummi aamma ilanngunneqarpoq aningaasaliissutiniq qularnaarisooqartariaqartoq qitiusumik ilinniarfikkaarumik sungiusaammik suliffeqartunut siunnersuisarnermullu immikkoortortaqaqalernissaannut.

Sungiusaammik suliffissanut tunngatillugu apeqqutit tamatuma saniatigut eqqartorneqarput ulloq 18. oktober 2023 ilinniartitaaneri periusissiaq pillugu workshop-eqartitsinerimi, qitiusumik ilinniarfiit aamma Ilinniartitaanermut, Kultureqarnermut, Timersornermut Ilageeqarnermullu Naalakkersuisooqarfiup peqataaffigisaannik. Tassani immikkut aallunneqarpoq sungiusaammik suliffissat amerlanerusariaqarnerannut apeqqut, tamatumani aamma inuusuttuaqqat meeqqat atuarfiannik qimatseqqammersut, suliaassallu kikkunnit suliarineqarnissaasa sumut inissinneqarnissaat.

Eqqaaneqartut Naalakkersuisut 2022-mi aalajangerput nalilersuisitsinissamik, qulaajaavigiumallugu Inuusutissarsiuutiniq ilinniartitaanermut inatsimmi siunnerfiusut naammassineqarsimanersut. Naalakkersuisut pingaartissimavaat nalilersorneqassasoq siulersuisut sulinerat siunnerfiusunut naapertuunnersoq, qularnaarisooqarnissaanik suliamik ilinniarsimasunik amerlanerusunik sulisussaqaqalernissamik, amerlanerusunik aamma pitsaanerusunik sungiusaammik suliffissaqarnissaanik, kiisalu ataatsimut isigisumik ilinniartitaaneri pitsaanerulersinneqarnissaat. Naalakkersuisut ilanngullugu nalilerpaat inatsisiliornikkut naapertuutinngitsunik aaqqissuussineqartoq, nalilersuinertigut aaqqissuusseqqinnikkullu iluarsiivigineqarsinnaasunik.

Kingornatigut Inatsisartut nunatta karsiata naatsorsuutaanik 2021-moortunik november 2022-mi suliaqarnermut tapiliullugu, - tassani ilaatigut Campus Kujallermut atatillugu sakkortuunik isornartorsuisooqarnikuusoq, tassani suli aammaarluni aningaasaliissutaasut sinnerlugit annertuunik 2021-mi atuisooqarnikuusoq aalajangiunneqarpoq kukkunerisuiusut Deloitte qinnuigineqassasoq iternga tikillugu nalilersuinermik ingerlatsiviup aningaasaqarneranut atatillugu suliaqartoqassasoq, tamatumani minnerunngitsumik qitiusumik ilinniarfiit arlaqartut aningaasaqarnikkut unammilligassaqaqalersimaneri eqqarsaatigalugit aamma. Siunertaasoq tassaavoq aningaasartuutissanik missingersuusianik qaangiisarnerit sunik pissuteqarnerisa paasisaqarfiginerunissaat, pinngitsoorniarlugu aamma siunissami assinginik pisoqartannginnissaa.

Deloitte-ip 2023-p upernaami ingerlappaa suliaasaqarfinni pineqartuni aallarniutaasumik suliaasaqarfimmi misissuineq, aamma taaneqartoq immikkoortoq siulleq. Tamatuma kingornagut suliaasaqarfimmi itinerusunik nalilersuisooqarpoq aningaasaqarnermik aamma aningaasartuutiniq aqutsinermik, taaneqartumik immikkoortut aappaat, ilumini pingasunik immikkoortoqartumik.

Siullermik ataqatigiinnerit aningaasaliissutini aamma aningaasartuutini piusut ingerlatsivinni immikkut toqqarneqartuniittut misissuivigineqarput, siunertaralugu paasinarsinneqassasoq maanna aningaasaliissutaasut naammattuuneri. Tamatumunnga atatillugu suliaasaqarfinni

immikkoortunik suussusilersuisoqarpoq paasiumallugu sumi aningaasaliissutaareersut iluanni naammassisaqarnerulersitsisoqarsinnaanersoq, kiisalu piviusunngortitsinernut sakkussanik aalajangiussisoqarluni.

Ilutigisaanik ingerlatsisoqarpoq annertusisamik kisitsisinik paasissutissanik nalilersuinernik, minnerunngitsumik akissarsiaqartitsinermi, kiisalu apeqqarissaarnernik ingerlatsisoqarluni ingerlatsivinni immikkut toqqaneqartuni arfinilinni. Apeqqarissaarnerni pineqartumi sammisat ilaatigut imaqarput aningaasartuutit qanoq ineriartorneri, - allanngoriartorneri – periaasissat aningaasaqarnikkut atukkani malitseqartitsisarnermi aamma periaasissat skemanik vagteqartuusarnernilu periaasissat. Taakkua saniatigut ingerlaavartumik killiffiusut pillugit Naalackersuisoqarfilla ataatsimiittoqartarpoq, soorluttaaq Deloitte peqataasoq malinnaasutut alapernaattutut aningaasaqarneq pillugu seminareqartitsinermi qitiusumik ilinniarfinnut tunngatillugu ulloq 13. juni 2023.

Deloitte-p nalilersuinerisa tamatumunnga atatillugu aamma suussusilersorpaat pissusissamisunngitsut pissutsit arlaqartut, maanna ingerlatsiviit aamma Naalackersuisoqarfiup akornanni suleqatigiinnermiittut, nalilersuinermilu siunnersuuteqartoqarpoq suleqatigiinnerup nukittorsarnissaanut periaasissanik. Ilaatigut tamatumani pineqarput suliniutissat aallartinneqareersimasut. Tamanna aamma atasuuvoq qitiusumiit aallartinneqarnikummata qaammatikkaartunik aningaasartuutissanut missingersuusianik malitseqartitsisarnerat, toqqaannartumik aaqqissuussaasartut assersuutigalugu Campus Kujallermi ulluinnarni aqutsisut peqatigalugit. Siunnersuutaasuni aamma ilaapput suliaqartarneq ingerlatitseqqittarnerlu ataatsimut tamanut atuuttunik malittarisassanik, qaammatikkaamik ingerlatsivikkaartumik ataatsimeeqateqartarneq, aaqqissuussinerit aalajangersimasut ilusissat immikkoortiterinerillu, kikkut sunik suliaqartussaanerannut malittarisassat ersarissut akisussaaffiillu allaaserineqarneri, isumaliuteqaqqinnerlu ukiumoortunik aalajangersimasunik ingerlatsivinnut tikeraarneqartarneri eqqarsaatigalugit. Tamatumunngalu ilaliullugu angorusunneqarpoq qanittumik attaveqatigiittarneq allaffissuarmi qitiusumik ingerlatsisuusut aamma ingerlatsiviit ataasiakkaat sulisuisa akornanni. Tamanna kissaataavoq siunnerfigalugu nukinnik aningaasanillu naammassisaqarfiunerusumik atuisoqarnissaa, aamma pilersitsiumalluni periarfissanik pitsaanerusunik nakkutilliinermik ingerlatsisarnissanut, aningaasaqarnermut tunngasuinnaanngitsuni, kisiannili aamma ilinniartitaanerit pitsaassusissaat eqqarsaatigalugit.

Siunnersuullu ilanngullugu pingaarnertut aamma siunertaqarpoq eqaallisaanissamik siuariartortitsinissamillu sungiusaammik suliffissanut atatillugu apeqqutunik, naalackersuinikkut suliaqartunit angisuumik sammineqartumi. Siulersuisoqarnermik aaqqissuussinerup minnerunngitsumillu naalackersuinermik suliaqartunit akuleruttoqannginnissanik periaasiusup ajornarnerulersissimavaa Naalackersuisut sammisamik tamatumunnga iliuseqarfiginnissinnaanerat, tassunga ilaalluni § 43, imm. 1-ip toqqaannartumik inuussutissarsiutinik ilinniakkanut atatillugu. Tamanna aamma ersippoq

Naalakkersuisut aamma Kultureqarnernut, Ilinniartitaanermut, Ilageeqarnermut Iisimatusarnermullu Ataatsimiititaliallu akornanni oqallinnermi, inuussutissarsiutinik ilinniartitsinermit inatsimmik allannguinnissamut atatillugu. § 43, imm. 1-imi takuneqarsinnaavoq ilinniarfiit pisussaaffeqartut sungiusaammik suliffissanik isumaginnittarnissamik, kiisalu aamma suliffeqarfinnut orniguttarluni sungiusaammik suliffissanik aqutissiuussisarnissamik. Aalajangersakkamut oqaaseqaatini ersippoq qitiusumik ilinniarfiit aqunneqarnerannik aqqissuussinermut atatillugu naatsorsuutigineqartoq tunngaviusutut, minnerunnigsumik qitiusumik ilinniarfiit siulersuisuisa suliffeqarfinnik oqaloqateqartarnernik tunngaveqartunik suliassap tamatuma annertusiartortumik sulissutigineqaannarnissaa aqutissiuukkumaaraat. Tamatumunngalu atatillugu nassuerutigisariaqarpoq aalajangersagaq siunertaasutut sunniuteqarsimannigitoq.

Taamaattumik inatsisissamut siunnersuutip piareersarneqarnerani immikkut qitiutinneqarpoq sungiusaammik suliffissanik pisariaqartinneqartunik amerlassusilinnik pilersitsisoqarsinnaangornissaa, suliassarli maanna inatsisaasumik tunngavilimmik naammassineqarsimannigitoq. Tamanna aamma atuuppoq inuusuttuaqqanut immikkut sullinneqartussatut siunnerfiusunut, aamma suliassaasoq apeqqusersorneqartoq, maanna aqutsinermit inatsisaasup iluani naammassiniarneqarsimannigitoq. Tamatumunnga atatillugu oqallisigineqartarpoq “putu” inuussutissarsiutinik ilinniartitaanerniittoq, inuusuttuaqqat 16-iniit 18-inut ukiullit ilinniagaqartut akornanni peqannginnerat pissutigalugu, soorluli taakkua inuussutissarsiutinut ilinniartitaanerni tammaannarsimasut.

Maanna atuuttuusut inatsisit taamaasillutik iluaqutissartalinnik sunniuteqarsimannigillat inuusuttuaqqanut ilinniartitaanertigut sullisissallugit immikkut siunnerfiusunut tunngatillugu, tassami inuussutissarsiutinik ilinniartitaanerit annertunerpaatigut isumaqarfiginarmata ilinniagaqalerumasunik ukioqqortunerusunik ilinniagaqalersitsisartutut. Tamatuma ullutsinni pisariaqalersissimavaa immikkut pisariaqartitsinerup sulissutigineqarnissaa, tamannalu pisimavoq siunnersuusiornikkut sungiusaammik suliffeqartitsinermit ataqatigiissaarinermik aqqissuussinermik pilersitsinikkut qitiusumik ilinniarfinni tamani, siunnerfigalugu suliffeqarfinnut namminernut ornigulluni pisariaqartunik sungiusaammik suliffissanik pilersitsisoqartalernissaa. Aqutsinermit peqqussutissatut nutaatut aqqissuussinissamut ilutigisaanik ilutigisaanik kinguneqassaaq allaffissornikkut qitiusumik oqartussaasut ajornannigsumik ilitsersuinissamut pisinnaatitaalernissaat, suliassat naammassineqartarnissaasa nakkutigineqarneranut atatillugu.

Ilanngullugulu ilisimatitsissutigineqarsinnaavoq nunamut tamarmut atuuttumik ilinniartitaanernut siunnersuisoqatigiinnik pilersitsisinnaaneq ulloq naallugu workshop-ertoqarnerani oqaluuserineqarmat Nuummi 7. november 2023, soqutigisaqartut tamarmik peqataaffigisaannik. Workshop-imi immikkut aallunneqarput sammisat siunnersuisoqatigiit siunertassaannut, suliassaannut, ilaasortatigut katitsigaanissaannut, ilaasortat toqqarneqartarnissaannut, siunnersuisoqatigiit aqqissuussaannut aamma soqutigisaqartunik allanik suleqateqarnissaannut sammisut.

Kiisalu ilanngullugu ilisimatitsissutigineqassaaq Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfiup aamma Isumaginninnermut, Ilaqutariinnut, Suliffeqarnermut Nunamullu Namminermt Naalakkersuisoqarfiup ulloq 14. november 2023 siunnersuut ataatsimiissutigimmassuk, tamatumunngalu atatillugu ilaatigut isumaqatigiissutigalugu suleqatigiittoqarnissaa ataatsimut attuumassuteqarfiusuni.

1.3. Siunnersuut ataatsimut isigalugu

Inatsisissamut siunnersuutitut suliniut isigineqassaaq atasutut Naalakkersuisut kissaataannut qularnaarinissanik aaqqissuussinernik naammassisaqarfiunerusartunik, inuussutissarsiutinik ilinniakkanut atatillugu, matumani aamma qularnaariniarnermik nakkutilliinernik pitsaannerusunik, ilinniakkat pitsaassusissaat eqqarsaatigalugit, ilinniakkanut politikkimini anguniakkanut aammalu nukiit aningaasallu atorneqartarnerannut atatillugu. Inatsisissamut suliniutaasoq manna ilutigisaanik isiginiarneqassaaq tunuliaqutaralugu inuussutissarsiutinik ilinniartitaanernik aaqqissuusseqqinneq 2011-imeersoq arlaannaatigulluunniit inuussutissarsiutinik ilinniakkat kivitsivigisimanngimmatigit, aamma neriorsuutaasutut siunnerfiusut aaqqissuusseqqinnermut atatillugu eqqarsaatigalugit.

Aammaarlugu, siunnersuummi siunertaavoq qitiusumik ilinniarfiit ilaaleqqinnissaat qitiusumik allaffissuarmi allaffissornermit oqartussaavigineqartunut ilaaleqqissasut, taamaasillunilu ilinniartitaanernik *ingerlatsiviit* pineqartut inatsisitigut inissisimalissallutik Namminersorlutik Oqartussat nalinginnaasumik allaffissornermik quleriiaakkamik aaqqissuussaaneranni, assigalugit soorlu ilinniarnertuunngorniarfiit. Tamatuma kingunerisaanik siulersuisut ingerlatsivimmi oqartussaasuni qullersaajunaassapput, pisortanilu oqartussaasut qitiusumik ilinniarfiit toqqaannartunik forständerinut peqqussuteqartarnertigut ilersuutitsigullu aqulissallugit. Taamaasillutillu Qitiusumik Ilinniarfiit ingerlatsineri, matumani aamma periusissiaat, anguniagaat naammassisassanullu pilersaarutaat qaninnerusumik atalissallutik ilinniartitaanertigut naalakkersuinikkut takorluukkanut anguniakkanullu qitiusunut.

Tamatumunnga ilaliullugu naatsorsuutigineqarpoq avataaneersut fagitigut tunniussassat qitiusumik ilinniarfinnut annguttalerumaartut ilinniartitaanernut siunnersuisoqatigiinnigortussat suliaasigut, aamma suliffeqarnermut ilinniakkanullu aalisakkanik nioqqutissiornermi siunnersuisuusussaniit, naatsorsuutigineqartunit soqutigisaqartunik naleqquttunik inuttalersukkamik pilersinneqartussatut. Ilutigisaanillu periarfissaalissaaq soqutigisaqartunik toqqaannartumik oqaloqateqartarneq.

Inuussutissarsiutinik ilinniartitsinerit pillugit inatsimmi pisinnaatitsissutitut aalajangersagaq § 4-mi siunnersuisoqatigiinnik aamma ataatsimiititalianik pilersitsisinnaanermut inuussutissarsiutinik suliaasaqarfimmi apeqqutinik suliaqartarnissamut, aamma tamatumunnga atatillugu suliffeqarnermut inuussutissarsiutillu ineriartornerannut, ilutigisaanik siunnersuutigineqarpoq annertusineqassasoq ilinniartitaanernut

suliassaqarfimmut tamarmiusumut, taamalu inuussutissarsiutinut ilinniartitaanernut sammisuinnaangitsunut. Tamatumani siunertaavoq pilersitsinissaq aaqqissuussinikkut pisinnaatitsissummik aningaasanut inatsimmi 2024-moortumi kontup pingaernerup 40.01.03 - imi eqqaaneqartumut ilinniartitaanernut atatillugu siunnersuisoqatigiinnut. Tamatumunnga atatillugu ilaatigut atuarneqarsinnaavoq: “Aningaasaliissutitsigut immikkut aningaasaliisoqassaaq ilinniartitaanermut siunnersuisoqatigiinnik pilersitsinissamut ingerlatsinissamullu. Ilinniartitaanernut siunnersuisoqatigiit arlaannaannulluunniit atasuunngitsutut siunnersuisoqatigiussapput, fagitigut qaffasissumik inissisimasunik inuttaqartut, aammalu nunanit tamalaaniit peqataaffigineqartut, Aningaasarsiornermut Siunnersuisoqatigiinnik akisussaaffigissavaat ilinniartitaanernut atatillugu siunnersuutiniq tigussaasunik suliaqartarnerit, siunnerfigalugu siuarsaanissaq fagitigut qaffasissumik inissisimanissamik, naammassisaqarfiunerusumillu ilinniartitaanernut aningaasaliissutiniq atuisoqartarnissaa.

Allannguinerit kingunerisaannik qitiusumik ilinniarfinni siulersuisut qullersaallutik oqartussaasutut inissisimaneri Naalakkersuisut taarseriarpaat. Aaqqissuussineq taamaasilluni imaalissaaq Naalakkersuisoqarfik suliani susassaartoq taartaassasoq. Tamatuma kingunerissavaa qitiusumik ilinniarfiit Namminersorlutik Oqartussat nalinginnaasumik ilitsersuisinnaassusia iluaniilissasut. Tamanna ilutigisaanik kinguneqassaaq pisariaarutissammat naammassisassanut isumaqatigiissuteqartarnej, anguniakkat angusassatullu kissaatigineqartut suliassannik naalakkiisarnermik tunngaveqalissasut.

Tamatuma saniatigut siunnersuut imaqarpoq malittarisassanik pilersitsinissamik ingerlatsilernissanillu sungiusaammik suliffissanut ataqatigiissaarinermik. Aaqqissuussineq pineqartoq tassaasinnaavoq qitiusumik ilinniarfikkaartumik suliassaq, imaluunniit pilersinneqarlunilu ingerlanneqartussaq ingerlatsivittut ataatsitut arlaqartutulluunniit, qitiusumik ilinniarfinnik kiffartuussisuusussatut. Sungiusaammik suliffissanut ataqatigiissaarinermik aaqqissuussinermi pingaarnertut suliassaassapput sungiusaammik suliffissanik sapinngisamik amerlanerpaanik pilersitsiortornissat. Tamanna ingerlanneqassaaq suliffeqarfinnut namminernut orniguttarluni ingerlatsinertut, ilutigisaanillu ataqatigiissaarinermik ingerlatsivik inuussutissarsiutinik ilinniakkani ilinniagaqartunut attaveqartuussalluni.

Ilanngullugulu ilutigisaanik erseqqissarneqassaaq siunnersuummi pineqarmata qitiusunik ilinniarfiit aqunneqarnerannik aaqqissuussineq, taamaattumillu immikkut ilinniakkanik allannguuteqartitsisinnaanernut tunnganani.

Kiisalu siunnersuut aamma siunertaqarpoq malittarisassani maanna atuuttuusuni naapertuutinngitsunik aaqqissuussinernik iluarsiiviginninnissanik.

2. Siunnersuummi immikkoortut pingaernerit

2.1. Inatsisit atuuttut

Inatsisit maanna atuuttut tassaapput Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat nr. 10, ulloq 19. maj 2010-meersoq, kingullermik allanngortinneqartoq Inatsisartut inatsisaatigut nr. 25, ulloq 13. juni 2023-meersukkut (Inuussutissarsiutinik ilinniartitsinernut inatsit).

Inuussutissarsiutinik ilinniartitsinerit pillugit inatsit imaqarpoq malittarisassanik ataatsimut inuussutissarsiutinik ilinniartitsinerni atuuttunik, tamatumani aamma inuussutissarsiutinik ilinniartitsinerni aamma inuussutissarsiutini pikkorissartitsisarnerni, aalajangersaallunilu ingerlatsivinni killiliussassanik qitiusunik ilinniartitsinerni aamma inuussutissarsiutinik ilinniartitsinerni allani.

Inuussutissarsiutinik ilinniartitsinernut inatsisip atortuulernermini 1. januar 2011 allanngortippai qitiusumik ilinniartitsinerni namminersortunngortillugit pisortanit pigineqartut Naalakkersuisunit nalinginnaasumik suliassanik ilitserneqarsinnaanngitsut. Ilinniartitsinerni allanngortinneqarnerisa kingunerisaanik taakkua namminersortutut immikkut ingerlatsivinnngorput, inatsisit naapertorlugit imminnut aquttut, siulersuisoqarlutik qullersaallutik oqartussaasunik.

Ilinniartitaanernilli ingerlatsivinnut pingaarnertut killiliussaasut, aningaasaqarnikkut tunngavigisaat aamma pisussaaffiit ingerlaqqittumik aqunneqarput Namminersorlutik Oqartussat suliassaqarfimmuut tunngatillugu inatsisiliornerisigut, inatsisinullu atasunik nalunaarusiortarnerisigut. Tamatumalu saniatigut ingerlatsiviit aningaasaqarnermikkut ingerlaqqittumik Namminersorlutik Oqartussani atuuttut malittarisassat iluanniipput, soorluttaaq ilinniagaqartunut atatillugu qullersanut naammagittaalliorsinnaanermut malittarisassat atuuttut. Inatsisiliornerilli taamaakkaluartoq ilinniartitaanernik ingerlatsivinnik annertuumik kiffaangissuseqartitsipput, suliassannik ingerlatsinernut atatillugu.

Ilinniartitaanernik ingerlatsiviit ilutigisaanik pisortanut atasuupput, ingerlatsineri annertunerisigut pisortanit aningaasalersugaammata, soorluttaaq ingerlatsiviit ilinniartitaanernik ingerlatsisuusut, inuiaqatigiit susassaqaqfigisaannik. Tamakkualu saniatigut ilinniartitaanernik ingerlatsiviit aqunneqarput malitassaqaqarlutik pisortat isumaqatigiissutaannik, tamatumani aamma aningaasarsiat pillugit isumaqatigiissutinit, pisissaaffeqarlutik Namminersorlutik Oqartussani atuuttut aalajangersakkat aningaasartuutissanik missingersuusiortarnernut, naatsorsuusiortarnernut aamma naatsorsuutinik naammassineqarsimasunik saqqummiussisarnerni. Ilanngullugu qitiusunik ilinniartitsinerni pisortani inatsisitigut ingerlatsinerit iluanni malittarisassat iluanniipput, tasanilu atuulluni Pisortat ingerlatsineranni suliassat suliarineqartarnerat pillugu Inatsisartut inatsisaat, Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat aamma Inatsisartut Ombudsmandiat pillugu Inatsisartut inatsisaat.

Inatsisiliani ilanngullugu aallaaviuvoq ilinniartitaanerit ilinniarfinni ilusilersorneqartassasut suliffeqarnermi illuatungeriinnit eqeersimaartumik peqataaffigineqartumik, periaatsillu imaallutik ilinniartitaanernut pilersaarutit qitiusumik ilinniarfini ulluinnarni aqutsisunit suliarineqartarlutik, qitiusumillu oqartussaasunit akuersissutigineqartarlutik, soorluttaaq qitiusumik oqartussaasut nakkutilliinernik suliaqartartut.

Ilinniartitaanernik ingerlatsiviit imminnut aquttuunerisa kinguneraat Namminersorlutik Oqartussat ersarissunik inatsisitigut pisinnaatitaaffeqanngikkunik ilinniarfinnik ilitersuisinnaasanninneri, siulersuisut qitiusumik ilinniarfinni qullersaallutik oqartussaammata. Taamaakkaluartoq Namminersorlutik Oqartussat qulaaniit ataatsimut isigisumik ilinniarfinni ingerlatsinernik nakkutilliisussaapput, ilinniakkat imarisaanut aammalu aningaasaqarnikkut. Tamatumunnga pissutaavoq qitiusumik ilinniarfiit suli inuiaqatigiit suliassaataannik suliaqartuuneri, ilinniartitaanernik ilinniartitsinernullu attuumassutilinnik kiffartuussinernik, Namminersorlutik Oqartussanit inuiaqatigiit sinnerlugit tapiiffigineqartartunik.

Naak qitiusumik ilinniarfinni ingerlatsinernut atatillugu akisussaaffik inatsisit atuuttut naapertorlugit siulersuisut susassa qarfigigaluaaraat, tunngaviusutut aallaaviusimavoq Namminersorlutik Oqartussat politikikkut aalajangikkanik anguniakkat qulequtaasut pingaarnerit ilinniartitaanernullu killiliussat aalajangersartaraat, assersuutigalugit ilinniartut tiguneqartussat amerlassusissaat, ilinniakkat imaat pingaarnerit aamma aaqqissuussaaneri, soraarummeersitsisarnerit, nakkutilliineq, nalilersuisarnerit aammalu pitsaassusissat qularnaarneqartarneri il.il. Ingerlatsinissanut isumaqatigiissutit ilinniarfinni siulersuisut aamma qitiusumik oqartussani allaffissuaqarfiup akornanni naammassisassanut isumaqatigiissutitigut aalajangersaavigineqartarput, ilinniakkalli imaannut killiliussatut isumaqatigiissutaasut aamma ilinniakkat aaqqissuussaaneri, ilinniartitaanernut pilersaarutitik akuersissuteqartarnerit nalunaarummik tamatumani atuuttumik tunngavilimmik ingerlanneqartarlutik. Tamatumunnga atatillugu ataatsimut isigisunik eqikkaasoqarsinnaavoq pingaarnertut aalajangersagaasartut qitiusumik oqartussaneersut, assersuutigalugu ilinniartitaanernut periusissiat, ilinniartitaanernut pilersaarusiatic, iliuusissanut pilersaarusiatic il.il. sunniuteqangaarsimarpasinnigitsut inuussutissarsiutinik ilinniartitaanerit aaqqissuunneqartarneranni aqunneqarnerannilu.

Kiisalu aamma inatsit maanna atuuttuusut akuersissutigineqarneranni naatsorsuutigineqarsimavoq pilersitsisoqarumaartoq pitsaassusissanik assigiissaagaasunik, pisortani suliassa qarfimmu akisussaasut ilinniarfiillu akornanni, ilinniarfiilli namminneq akornanni, tamannali aamma piviusunngortinneqarsimannigilaq.

2.1.2. Siulersuisut

Aaqqissuusseqqinnerup 2011-mi sukarsua pingaarneq tassaavoq siulersuisunik pilersitsineq. Aallarniummi eqqaaneqartut qitiusumik ilinniarfinni oqartussaasut qulliit tassaapput siunersuisut. Siulersuisut katitsigaaneri ilinniartitaanernik ingerlatsivikkaartumik

malitarisassani nalunaarsorneqarsimavoq, taakkualu naalackersuisoqarfimmit oqartussaasumit akuerineqartarput. Malittarisassat imaqarput aalajangersakkanik suliffeqarnermi kattuffiit sorliit ilinniartitaanernut ingerlatsiviup siulersuisuinut ilaasortassanik toqqaasassanersut. Tamatumalu saniatigut Inuussutissarsiutinik ilinniartitsinerit pillugit inatsimmi aammalu malittarisassani aalajangersagaqarpoq siulersuisuni ilaasortat piginnaanerisassaat, arlaannaannulluunniit atasuunnginnissat aamma ilinniarfimmi aningaasaqarnermut ingerlatsinermullu akisussaasuunissaat pillugit. Professioneliusumik siulersuisunit aamma ulluinnarni aqutsisuusunit ingerlatsisoqarnissaani pineqarput suleqatigiinneq aaqqissuusineq, pitsaassusissanik qularnaarisarneq aamma sulisorisanik aqutsineq. Tamatumunnga atatillugu atuarneqarsinnaavoq siulersuisut katitsigaassasut inunnit 5-iniit 7-inut, siammasissumik sinniisuusunit ilinniarfimmi soqutigisaqartuniit aammalu ilinniarfimmi sulisut sinniisoqarfigisaannik.

Kiisalu aamma inatsisini ersippoq forständerimit inassuteqaataasut tunngavigalugit aalajangersaasassasut ukiumoortumik ilinniarfiup ingerlatsinissaanut pilersaarutinik. Kiisalu aamma siulersuisut forständerimit inassutigineqartunik tunngaveqartumik aalajangiiffigisassavaat ilinniarfiup piginnaasaqarfiulersussat ilinniartitaanerit neqeroorutigisassai, aamma ilanngullugit ilinniartitaanertigut suliniutaasussat allat, kiisalu aamma suliniutissat aningaasatigut isaatitsissutaasussat, allallu ingerlatassat tamatumunnga atatillugu naleqquttut. Tamatumalu ilutigisaanik siulersuisut Namminersorlutik Oqartussallu naammassisassanut atatillugu isumaqatigiissuteqartassapput, tunuliaqutaralugit forständerip naalackersuisoqarfiullu akisussaasuusup akornanni isumaqatigiinniarsimanerit.

Kiisalu Inuussutissarsiutinik ilinniartitsinermut inatsimmi § 43, imm. 1-imi eqqaaneqartutut sungiusaammik suliffissat isumagineqartussaasut inuussutissarsiutinut ilinniarfinnit aammalu qitiusumik ilinniarfinnit, ilinniarfiillu pisussaaffigigaat suliffeqarfinnut orniguttarlutik sungiusaammik suliffiusassanik pilersitsisarnissat. Siulersuisullu qitiusumik ilinniarfinni qullersaallutik oqartussaasuummata tamatumani pineqarput suliassat siulersuisut piviusunngortinneqarnissaat isumagisassagaat.

Kiisalu aamma siulersuisut isumagisaraat fagitigut immikkuullarissunik suliassat, assersuutigalugu ilinniartitaanernut pilersaarutinik suliaqartarnerit. Pisunili namminerni amerlanertigut imaattarpoq ilinniartitsisut imaluunniit ilinniarfimmi ilinniartitaanernut akisussaasuusooq ilinniartitaanernut pilersaarussianik suliaqartuusartoq.

Kiisalu aamma siulersuisut aalajangiinissanut oqartussaaffimmik tigummisuupput makkunani:

- Suliffeqarfinnik akuersissuteqartarnek
- Sungiusaammik sulinikkut ilinniartitsineq
- Nunani allani suliffeqarnissanik
- Soraarummeernernik - svendeprove-nik - akuersissuteqartarnek
- Ilinniakkamik nuussisinnaaneq aamma piffissamik ilinniarnermik sivikillisaaneq
- Piffissap ilinniagaqarfiusup sivitsorneqarnissaa

- Lærlingip aamma suliffeqarfiup akornanni saqitsaassutaasut

Suliassat aalajangigassartallit pissusiviusuni suliarineqartarput inassuteqaataasunik tunngavilinnik, qitiusumik ilinniarfimmi ulluinnarni pisortaasunit/aqutsisuusunit suliaasartunik. Tamatuma saniatigut siulersuisut pisussaaffiit ilaat aalajangersimasut qitiusumik ilinniarfiup forstanderianut pisussaaffiutissinnaavaat.

Naalackersuinermik suliaqartunit akuliuffigineqannginnissamik ileqqoqarnerup kingunerisaanik allaffissornikkut qitiusumik oqartussat pisussaaffiginngilaat atorfinitsitsisarnerit aamma soraarsitsisarnerit qitiusumik ilinniarfinni forstanderiusunik. Tamannami naapertuutissanngilaq siulersuisut ilinniarfinni pineqartuni qullersaallutik oqartussaanerannut, taamaassimanngikkaluarpalli Namminersorlutik Oqartussat suli oqaasissaqarsimassagaluarlutik malittarisassiornernut ilitsersuisarnernullu, ilinniarfinni pineqartuni forstanderiusunik atorfinitsitsisarnikkut soraarsitsisarnikkullu. Ilutigisaanik qitiusumik ilinniarfimmi forstanderiusup ilinniarfimmi sulisut atorfinitsittarpai, tamatumani ilanngullugit pisortatut aqutsisuusut sinneri, soorlu tullersortaasoq allallu.

Inuussutissarsiutinik ilinniartitsinerit pillugit inatsimmi § 31, imm. 2-mi ersippoq siulersuisut aalajangiineri aalajangertarnerilu, taakkua inatsisunik malinnittuusimagaangata naalackersuisoqarfimmut qullersaasumut maalaarutigineqarsinnaanngitsut, inatsisini pineqartuni allatut ersarissunik allassimasoqanngippat. Naammagittaalliutit imaluunniit maalaarutit naalackersuisoqarfimmut qullersaasumut ingerlatinneqarsinnaapput, assersuutigalugu ilinniarfiup akisussaaffini paarinerluppagu. Naalackersuisoqarfiup oqartussaasoq taamaalinerani pineqaatissiissutissanik assigiinngitsunik pilersitsisinnaavoq, ilinniakkanik akuersissutigineqartartunik atorunnaarsitsilluni, annertusisamik nakkutilliinermik pilersitsilluni, pisunilu annertunerusuni sakkortunerusunuunniit ilinniarfik allaffissornikkut aqutarilersinnaallugu. Tamatuma saniatigut Naalackersuisoqarfik oqartussaasoq peqqussutinik suliaqarsinnaavoq ilinniartitaanernik pisariaqartunik ingerlassisoqarnissaanik. Kiisalu aamma pisuni immikkut ittuni siulersuisunut ilaasortat taarserneqarsinnaapput, tamatumani aamma siulersuisut tamarmiusut, siulersuisutut akisussaaffigisaminnik naammassinnissimanngippata. Tamatumani pineqarpoq immikkut ittumik oqartussanut pisinnaatitaaffik, atorneqarsimanngisaannartorli, aamma pisuni annertoorujussuarnik aningaasartuutissanut missingersuusianik qaangiisoqarfiusuni, imaluunniit aningaasaliissutitaqanngitsunik atuiffiusimasuni.

2.1.3. Inatsisartut inatsisaata atuuttup aaqqissuussaanera

Inuussutissarsiutinik ilinniartitsinerit pillugit inatsisip kapitalia aallarniutaasoq imaqarpoq aalajangersakkanik tunngaviusunik, inuussutissarsiutinik ilinniartitsinerit siunertaat aamma taaguusersuutit “tunngaviusumik inuussutissarsiutinik ilinniartitsineq” taamatullu ”inuussutissarsiutinik ilinniakkat allat”. Tamatumalu saniatigut allaaserinnittoqarmat qitiusumik ilinniarfik qanoq isumaqarnerisooq taamatullu aamma inuussutissarsiutinik ilinniarfik qanoq isumaqarnerisooq pillugit.

Inuussutissarsiutinik ilinniartitsinerit pillugit inatsimmi kapitali 2-p nalunaarpai ileqqussat tunngaviusut arlaqartut Naalakkersuisut aqutsinerminni pisinnaatitaaffiiniittut, ilinniartitaanernik akuersissuteqartarnikkut, ataatsimiititalianik pilersitsisinnaanikkut aamma ilinniartitaanerit imaannik aqqissuussisarsinnaanikkut. Assersuutigalugu Inuussutissarsiutinik ilinniartitsinermut inatsimmi § 4 ersareqqissaamik Naalakkersuisunut pisinnaatitsissuteqarpoq siunnersuisoqatigiinnik aamma ataatsimiititalianik pilersitsisinnaanernik, inuussutissarsiutinik ilinniartitsinernik suliassaqaqarfimmiittunik, kiisalu suliffeqarnerup aamma inuussutissarsiutit ineriartorneranni inisisimasunik suliaqartussanik. Ilutigisaanillu Naalakkersuisut nakkutilliisutut pisussaaffii allaaserineqarlutik.

Kapitali 3-mi pineqarput aalajangersakkat ilinniakkani tiguneqarsinnaanermut piumasaqaatinut tunngasut.

Kapitali 4 inuussutissarsiutinik ilinniartitsinerit aqqissuussaaneritut tunngavoq, tamatumani aamma ilinniarfiit aamma sungiusaammik sulisarluni ilinniagaqartarnej, aamma Naalakkersuisut pisinnaatitaanerit aqqissuutissallugit tunngaviusutut ileqqussat ilinniartitaaneriittut, aalajangersakkallu kapitalimi 5-imiittut ilinniartitaanerit imaannut atatillugu piumasaqaatinut tunngasuullutik.

Kiisalu aamma Inuussutissarsiutinik ilinniartitsinerit pillugit inatsimmi kapitalimi 6-imi arlaqartunik aalajangersagaqarpoq, tak. §§ 28-42, immikkut qitiusumik ilinniarfinnut atuuttuusunik, erseqqissaasunik qitiusumik ilinniarfiit Namminersorlutik Oqartussat allaffissornikkut ingerlatsiviisa nalinginnaasut avataanni inisisimasuusut. Taamani inatsisiliornermi inatsisiliami tamanna nutaaliornuvoq, malunnaatilimmillu annertusisitsinerulluni, siusinnerusumi malittarisassanut atuuttuusunut Inatsisartut peqqussutaatigut nr. 2, ulloq 3. maj 1999-imeersumi, inuussutissarsiutinik ilinniartitsinernut inuussutissarsiutinilu pikkorissartitsisarnernut tunngatillugu. Tamatumunnga atatillugu taamani malittarisassiaasut siulliupput inuussutissarsiutinik ilinniartitsinermik suliani killiliussatut malittarisassiaasartuni.

§§ 28-29 kapitalimi tassani sammisaqarput qitiusumik ilinniarfiit siunertaannik aamma suliassaannik, § 30-ilu aalajangersaalluni Naalakkersuisut aamma qitiusumik ilinniarfiit siulersuisuisa naammassisassanut isumaqatigiissummik ukiuni 4-ni atuuttussamik suliaqartarnissaat pillugu, qitiusumik ilinniarfiit suliassaat ersarinnerusumik aalajangersarumallugit, tamatumani aamma sulianut aqqiissutissat, kiisalu nalunaarsorlugit naammassisassanut isumaqatigiissut minnerpaatut sunik imaqassasoq, siulersuisunullu pisussaaffiliisussaalluni ukiumoortunik nalunaarusiortarnissamik, naammassisatut isumaqatigiissummiittut qanoq naammassineqarsimaneri pillugit. Aalajangersagaq aamma imaqarpoq Naalakkersuisunut pisinnaatitsissummik nalunaarusiornikkut naammassisassanut isumaqatigiissutip imarisassaanut malittarisassiornissamik, atorneqarsimasumik Qitiusumik

ilinniarfinni angusaqarnissamik isumaqatigiissutit pillugit Namminersorlutik Oqartussat nalunaarutaat nr. 26, ulloq 23. december 2010-meersup suliarineqarnerani.

§ 30-p kinguneraa siulersuisoqarluni aqutsinermik aaqqissuussineq, qitiusumik ilinniarfinni qullersatut oqartussaasunik, taannalu ilassuserneqarluni kontraktinik isumaqatigiissuteqarnikkut ingerlatsiviit Namminersorlutik Oqartussat ilitsersuisinnaatitaanerisa avataani inissisimasuunerannik tunngaveqartumik – isumaqatigiissutit aqutsinerup ilaatut aaqqissuussaallutik. Isumaqatigiissutit pineqartut inatsisitigut pituttuisutut isumaqatigiissutaanngillat, assersuutigalugu pinngitsaaliinikkut atortinneqarsinnaasut imarisaat tunngavigalugit. Tamatumunnga ilassutitut oqaatigineqassaaq naammassisassanut isumaqatigiissutit siunnersuisartut Implements-imeersut nalunaarutaat naaportorlugu naatsorsuutigisatut atortinneqarsimanngimmata, nalinginnaasumillu pimoorussaannngitsutut isigineqarsimarpasillutik, qitiusumit aqutsinermi sakkussatut pinnagit, taamalu aamma naammassisassanut isumaqatigiissutissat ilaannikkut isumaqatigiissutigineqarsimasarnatik.

Ilanngullugulu § 31-mi atuarneqarsinnaavoq kalaallini qitiusumik ilinniarfiit pisortanit pigineqartut namminersortutut ilinniartitaanermik ingerlatsivittut inissisimasuusut, aammalu ilinniartitaanermik ingerlatsivinni taakkunani aalajangikkat allaffissornikkut oqartussanut allanut suliaassanngortinneqarsinnaanngitsut, eqqaassanngikkaanni lærlinginut atatillugit inatsisitigut naammagittaalliutaasut.

Kiisalu aamma § 32 sammisaqarpoq qitiusumik ilinniarfinni siulersuisut isumaqatigiissuteqarsinnaaneri suliaassat aalajangersimasut ataatsimoorullugit qitiusumik ilinniarfiit allat peqatigalugit suliarineqartarsinnaasut, pisinnaatitsisoqarlunilu tamatumunnga atatillugu malittarisassiorsinnaanermut.

§ 34-mi aqunneqarput apeqqutit qitiusumik ilinniarfinni siulersuisussanik toqqasarnermut katitserisarnermullu tunngasut, siulersuisullu piffissaq atuuttarfiat, Naalakkersuisut periarfissaat siulersuisunik atorunnaarsitsisinnaanermut aamma siulersuisut qitiusumik ilinniarfiup malittarisassaanik suliaqartarnerat akuersissuteqartarnerallu. Tamatuma saniatigut imm. 7-imi aalajangersagaq pisinnaatitsivoq Naalakkersuisut malittarisassiorsinnaanernik siulersuisut akissarsiaasaat il.il. pillugit, atorneqartumik nalunaarusiornermut Qitiusumik ilinniarfiit siulersuisuisa akissarsiaat aningaasartuutinullu taartisiassaataat pillugit Namminersorlutik Oqartussat nalunaarutaat nr. 25, ulloq 23. december 2010-imeersumik.

§ 35-mi sammineqarput siulersuisut akisussaaffii aamma apeqqutit pisussaaffinnut pingaarnernut tunngasut. Tamatumunnga atatillugu qitiuvoq ingerlatsinermut akisussaaneq qitiusumik ilinniarfinni ingerlatsineq pillugu siulersuisuniimmat, Naalakkersuisuni pinnani.

§ 36 aamma siulersuisut suliaassannut ilinniartitaanermik ingerlatsiviup suliaani fagitigut naammassisassanut tunngasuvoq, tamatumani aamma qularnaarumallugit ilinniartitaanerit

pitsaassusissaat ilinniartitaanerillu aaqqissuukkumallugit inuiaqatigiinni pisariaqartitsinernut naapertuuttunik. Ilutigisaanik aalajangersagaq aamma imarpoq, tak. tassani imm. 2 aamma 3 fagitigut immikkut sammisassanik aalajangersimasunik, tassuunalu qitiusumik ilinniartit siulersuisui akisussaallutik ilinniartitaanernut pilersaarusanik suliaqartarnernut, sungiusaammik sulisussaanermut pilersaarutinik aammalu svenditut misilitsittoqassappat taakkununga maleruagassanik. Tassaniippoq aamma imm. 3-tut aalajangersagaq, siulersuisut aalajangiisarnernut pisinnaatitaaffiat, tak. aamma oqaaseqaatit nalinginnaasut immikkoortuni nr. 2.1. nr. 5, inatsisinut atuuttunut tunngatillugu. Kiisalu aamma imm. 4 imaqarpoq aalajangersakkamik qitiusumik ilinniartit siulersuisuisa namminneq aaqqissuussinnaagaat suliassat qanoq agguataarneqartarnissaat, ilinniakkat fagitigut pitsaassusissaasa qularnaarneqartarnissaat eqqarsaatigalugit, aamma suliffeqarnermi pisariaqartitsinernut naleqquttuuneri eqqarsaatigalugit.

Ilinniarfimmi nukiit aningaasaatillugu qanoq iluaqutigineqarnissaat, tamatumani aamma pisortanit aningaasaliissutit ersippat § 37, imm. 1-imi, tassuunalu siulersuisut akisussaaffigaat aningaasaliissutaasut sumut atugassatut aningaasaliissutaaneri naapertorlugit ingerlatsisoqartussaasoq. Ilangullugulu ersippoq siulersuisut qullersaallutik akisussaaffigigaat aningaasaliissutaasut agguataarneqartarneri. Tamanna paasineqassaaq ataatsimut aningaasartuutissanut, ineriartortitsinermut aningaasartuutissanut aamma suliassaqarfinnut assigiinngitsunut immikkoortiterisarnerit eqqarsaatigalugit.

Aalajangersakkami imm. 2 tunngasuvoq pisortaqarfiit oqartussaasut ilitersuisinnaanermik pisinnaatitaaffiisa ikittuinnaat ilaattut, qitiusumik ilinniarfimmi siulersuisuusut tungaannut, isumaqarlunilu siulersuisunut pisussaaffeqartoq sammisani ersarinerusunik nalunaarneqartuni piunasaqaataasunik malinnittarnissamik. Tamatumani pineqarsinnaapput aningaasaliissutinik atuinissat, soorluttaaq tunngasuusinnaasut pissutsinut Namminersorlutik Oqartussat nakkutilliisussaataitaanerannut. Ilutigisaanik kinguneritinneqartussanik arlaqartunik aalajangersagaqarpoq, pissutsit pineqartut pillugit eqqortumik periaaseqartoqarsimangippat. Aalajangersagaq isiginiarneqassaaq ilinniartitaanernik ingerlatsiviit pisussaaffigisaannit inuiaqatigiinnut sammisuni pisortaniillu aningaasalersugaanerusuni.

Kiisalu aamma aalajangersakkami pineqartumi imm. 3-mi ersippoq Naalakkersuisut aalajangiisinnaasut siulersuisut tunuarnissaannik. Aalajangersakkami tassani pineqarput pissut naapertuuttumik ersittut siulersuisut iliuusaasa imaluunniit iliuuseqannginnerisa ilinniartitaanermik ingerlatsiviup ataannarsinnaanera ulorianartorsiortikkaat, imatut paasillugu ilinniartitaanermik ingerlatsiviup suliassaminik ingerlatsisinnaajunnaarsinnaanera, imaluunniit ingerlatsiviup sulisuminut akissarsisitsisinnaajunnaanera.

Tamatumalu saniatigut § 38 killilersuivoq forständerip akisussaaffiinik siulersuisut tungaannut, aalajangersagarlu ilutigisaanik forständerip siulersuisunut ilumoortussaananeramik pisussaaffeqartitsivoq, siulersuisunit anguniakkat piviusunngortinneqarnissaanni. Aalajangersagarlu tamatumunnga atatillugu aamma nalunaarsuivoq forständerip suliassaanik,

kiisalu aalajangersakkap immikkoortuani 3-mi ersilluni forständerip atorfinitsittarlugillu soraarsittarai qitiusumik ilinniarfimmi sulisuusut sinneri.

§ 39 imaqarpoq killiliinermik qitiusumik ilinniarfiit imminnut aqussinnaassusianni, aalajangersakkami ersimmat qitiusumik ilinniarfiit pisortat piisut inuiaqatigiinni ilinniarititaanernik ingerlatsivittut sulii Namminersorlutik Oqartussani sulisunut atugassarititaasunik atuuttunik malinnittussaasut. Tamanna taamaasilluni isumaqarpoq Namminersorlutik Oqartussat isumaqatigiinniartarnernut immikkoortortaqaarfiata qitiusumik ilinniarfinnut atatillugu isumaqatigiinniartarnerit isumagisarigai. Taamaasilluni malittarisassani atuuttuni allangortoqanngilaq.

Qitiusumik ilinniarfiit pisussaaffeqarnerat Namminersorlutik Oqartussani atorfeqartitsinermut atugassarititaasunik, atorfeqarnermi aamma soraarsitsinerni ilaatigut tunngaveqarpoq ataatsimut tunngaveqarpoq aningaasartuutissanik aqutsinissamik, aamma Namminersorlutik Oqartussat ataanni sulisuusut tamarmik assigiinnik atugassaqaartitaanissaannik.

Kiisalu aamma § 40-mi ersippoq qitiusumik ilinniarfiit ingerlatsinerat nunatta karsianiit tapiissutitsigut allatigullu ingerlatsisoqarpat ingerlatsinikkut isertitaniit aningaasalersorneqartassasoq, tapiissutissallu annertussusissaat Inatsisartunit aalajangersarneqartassasut.

Aningaasaliissuteqartarnermut tunngasunik apeqqutit taamaasillutik ataatsimut Inatsisartunit akisussaaffiupput aningaasanut inatsimmik tunngaveqartumik. Ilanngullugulu Inatsisartut inatsisaannik akuersissuteqarnermut ilaliullugu eqqussisoqarnikuuvoq malittarisassanik, suliniutit ingerlanneqartut aallaavigalugit aningaasaliissuteqartarnernut aaqqissuussinermik. Tamatumunngalu atatillugu suliarineqarnikuullutik qanoq ittunik ingerlatsisoqarnissaanik aallaaveqartunik aningaasaliissuteqartarnernut ileqqussanik, ilinniarititaanernik ingerlatsiviit kinaassusersiunngitsunik objektiviusunik tunngaveqartunik aningaasaliiffigineqartarnissaannik ilinniarfiup ingerlatsineranut (ingerlatat aamma aningaasaliissutissanut annertussusilerikkat akissat) inatsisitigoortunik aningaasaliissuteqartarnikkut aaqqissuussaasunik. Tamanna tunuliaqutaralugu ullumikkut sulissutigineqarpoq aningaasaliissutissat katitserneqartalernissaat tunngaviusunik tapiissutininik aamma taxameterimik tunngaveqartunik. Taamaakkaluartoq malugeqquneqassaaq aningaasaliissuteqariaatsit taakkua atortuulersinneqanngimmata inuussutissarsiutinik ilinniarititsinermik inatsit atuuttoq tunngavigalugu, taamalu tunngaviusutigut atasuunani ilinniarititaanernik ingerlatsiviit qanoq ittunik killiliussanik atugassaqaartitaanernik qitiusumik ilinniarfinnut aqutsisuusunut.

§ 41-mi aqunneqarput periaasiusut aningaasartuutissanut missingersuutinut tunngavissat nalunaarutigineqartarneranni, aalajangersakkamilu imm. 2 siunertaqarluni qularnaarinissamik aningaasartuutissanut missingersuusiasut immikkoortinneqartassasut qitiusumik ilinniarfiup

ilinniartitsinermik ingerlanneranut tunngasunut aamma allatigut ingerlatsineranut tunngasunut, tamatumani qanorluunniit ittunik allatigut ingerlatsinerit eqqarsaatigalugit.

Kiisalu § 42 imaqarpoq malittarisassanik qitiusumik ilinniarfiit naatsorsuusiortarnerannut, tamatumani aamma kukkunersuisarnermut, tamakkiisumik Namminersorlutik Oqartussani kukkunersuisoqarnermut aalajangersakkanik tunngaveqartuusussat. Aalajangersagarli taamaakkaluartoq aamma malittarisassanik imaqarpoq naatsorsuuserinikkut immikkoortitsisoqarnissaanik qitiusumik ilinniarfiup ilinniartitaanertigut ingerlatsineranik aammalu allatigut ingerlatsinernik, tamatumani aamma allatigut ingerlatat suussusii naapertorlugit tamarmik immikkut naatsorsuusiugassaanerannik, tamakkualu aamma Naalackersuisunit maleruagassiorneqarsinnaallutik. Ilanngullugulu aamma aalajangersakkap immikkoortuani 5-imi ersippoq ilinniarfiit tunngaveqartunik sinneqartoorutit aamma amigartoorutit ukiumut tullermut nuuttarsinnaagaat. Tamatumanili Inuussutissarsiutinik ilinniartitsinermut inatsimmi 2010-miit atuuttumi aallaavimusimavoq sinneqartoorutinik amigartoorutinilluunniit nuussisarsinnaanerup ersarinnerusumik aningaasanut inatsisikkut maleruagassaqartinneqarnera. Taamaakkaluartoq paasinarsisimavoq sinneqartoorutinik amigartoorutinilluunniit nuussisarnerit amerlasuutigut pisarsimasut isumamineertumik maleruagassanillu tunngaveqanngitsunik.

Kapitalimi 7-imi malittarisassani pineqarput qitiusumik ilinniarfiit aammalu inuussutissarsiutinut ilinniarfiit. Ilaatigut § 43, imm. 1-imi ersippoq ilinniarfiit pisussaaffeqarneri sungiussaammik suliffissanik isumaginnittussaaneramik, kiisalu ornigulluni sungiussaammik suliffiusussanik pilersitsiniartarnissamik. Aalajangersakkamut nassuiaatitut oqaaseqaatini ersippoq qitiusumik ilinniarfinnut aqutsinikkut aaqqissuussinermut atatillugu aallaavittut naatsorsuutigineqartoq minnerunngitsumik qitiusumik ilinniarfiit siulersuisui suliffeqarfinnik oqaloqateqartarnernik tunngaveqartunik tamatumani annertusisanik suliniuteqartussaasut.

Ilanngullugulu § 44-mi aqunneqarput suliffeqarfinnik sungiussaammut suliffiusussatut akuersissuteqartarnerit, taakkualu § 45 naapertorlugu Naalackersuisunut ingerlateqqinneqarsinnaallutik.

Ilanngullugulu kapitali 8 imaqarpoq lærlingitut ilinniagaqartunut atatillugu inatsisitigut qanoq inissisimanermut aalajangersakkanik. Malittarisassat taakkua ilaatigut imaqarput § 46-mi aalajangersakkanik tunngaviusunik inuussutissarsiutinik tunngaviusumik ilinniagaqartarnernut tunngatillugu, lærlingitut ilinniagaqarnissamut isumaqatigiissuteqartarnermik imaluunniit ilinniagaqarnissamut isumaqatigiissuteqartarnermik, pineqarsimanngippata inuussutissarsiutinik ilinniakkat ilinniarfimmi namminermi sungiussaammik sulisarnermik imallit. Kiisalu ilinniagaqartoq pisussaaffeqarpoq § 47 naapertorlugu ilinniarfimmi atuartinneqartarnissamik, tamatumunnga atuuttut malittarisassat naapertorlugit aaqqissuussaasumik.

Kapitalimi tassani aamma ilaapput § 48-mi aalajangersakkat ilinniagaqartut ilinniartitaanermiit peqataajunnaarsinneqarsinnaanerinit, ilinniarfimmi ileqqorissaarnissamut ileqqoreqqusanik unioqquutitsisoqarsimatillugu, imaluunniit atuartitaanermiit peersinneqarsinnaaneq. Aalajangersakkap imm. 2-ani Naalackersuisunut pisinnaatitsisoqarpoq takkuttarnissamut pisussaaffik pillugu malittarisassiornissamut, napparsimalluni peqanngittarnerup uppersarneqarnissaanut malittarisassiornissamut, pineqaatissiissutissanut malittarisassiornissamut, tamatumani aamma atuartitsinermut takkutinnitsoornernut kiisalu aamma anisitaanernut malittarisassiornissanut. Pisinnaatitsineq taanna atorneqarsimanngilaq.

Kiisalu § 49-mi aalajangersarneqarput lærlingit isumaqatigiissuteqartarnerannut aamma ilinniagaqarnissamut isumaqatigiissuteqartarnernut piumasaqaatit qitiusut. Tamatumani ilaatigut pineqarput ilulissanut piumasaqaatit naalackersuisoqarfiup akisussaasuusup formularilianik akuersisarneranut, aamma ilinniagaqartut minnerpaatut ilisimatinneqartarnissaannik ilinniagaqartup akissarsiarisassai pisinnaatitaaffigisaalu pillugit.

§ 50-imi aalajangersarneqarpoq ilinniagaqartut pisinnaatitaaffigigaat sungiusaammik sulinermi isumaqatigiissutit naapertorlugit akissarsiaqartitaanissaq, aamma periarfissaasut immikkut tapiissutinik pisartagaqarsinnaanermi, tak. ilinniagaqarnerisuteqarnermut inatsisit aamma malittarisat allat. Kiisalu aamma aalajangersakkap imm. 2-ani ersippoq Naalackersuisut aalajangiiffigisinnaagaat ilinniagaqartut aalajangersimasut akissarsiaqarsinnaaneri ilinniagaqarnerisutitut taarsiullugit.

Tamatumalu saniatigut § 51-imi ersippoq ilinniagaqartumut atugassarititaasunik aqutsineq tassaasoq ilinniagaqartup aamma sulisitsisup akornanni aaqqissuunneqartussa, immikkoortumilu 2-mi nalunaarneqarluni sungiusaammik suliffeqartarneq taamaallaat ilinniakkamut sammisusassasoq, qularnaarisussaallunilu ilinniartup piginnaanerisassaanik, ilinniakkamut naapertuuttumik atorsinnaasuusussat.

§ 52 imaqarpoq aalajangersakkamik piffissap ilinniagaqarfiusup sivikillineqarsinnaaneranut, malittarisassallu § 53-imiittut aqullugu piffissap sungiusaammik suliffiusup sivitsorneqarsinnaanera. Tassungalu ilassutitut § 54-imi ersippoq brancheudvalgi imaluunniit qitiusumik ilinniarfiup siulersuisuisa pisuni immikkut ittuni, siunnersuummi §§ 52-53-imi pineqanngitsuni piffissaq ilinniagaqarfiusoq sivikillisinnaagaat sivitsorsinnaalluguluunniit. I

§ 55 aqutsisuuvoq lærlingit isumaqatigiissutaannik aamma ilinniagaqarnermut isumaqatigiissutinik, tamatumani aamma pissutsini lærlingip isumaqatigiissutaata aamma ilinniagaqarnermut isumaqatigiissutip inatsisitigut pituttuisuusup ilinniagaqartup aamma suliffeqarfiup akornanni taamalu taakkua iluanni aaqqissuussineruneranik, § 56-ilu imaqarluni malittarisassanik nalinginnaasunik unioqquutitsinernilu periaasissanik.

§ 57-imi pineqarput kingunerisassai ilinniartup atuartitsinermit peqataaqusaajunnaarnerata takkuttarnissamut piumasaqaataasunik naammassinnittannginnikkut malittarisassanillu atuuttunik malinninnginnikkut, imaluunniit ilinniartup soraarummeernernut misilitsinnernulluunniit marloriaq sinnerlugu peqataasimanerani angusisarani, immikkullu periarfisseqqinneqarnissamut akuerineqarsinnaanngippat.

Inuussutissarsiutinik ilinniakkanut inatsimmi § 58-imi pineqarput aalajangiisarnerit isumaqatigiinnginnerni ilinniagaqartup aamma sungiusaammik suliffiusup akornanni, nalinginnaasutigut suliffeqarnermi akerleriissutaasunik sulinermik inuussutissarsiteqartut sulisisullu akornanni suliaqartarnernut malittarisassanut tunngasuusut.

§ 59 aqutsivoq ilinniagaqartut sillimmasiisarnikkut isumannaarunneqartarnerannik, ilinniakkap ingerlanerani pisartunut, § 60-ilu Naalackersuisunik pisinnaatitsilluni malittarisassiornissamut ilinniagaqartup aamma suliffeqarfiup akornanni pissutsini. Pisinnaatitsissut iluaqutigineqarsimangilaq.

Kapitali 9 imaqarpoq malittarisassanik inuussutissarsiutinik ilinniakkani suliassaqarfimmi pikkorissartitsisarnernut tunngasunik, tamatumani aamma ataatsimut isigisunik ileqqussanik pikkorissartitsisarnernut pineqartunut tapiissuteqartarnerni, inuussutissarsiutinik ilinniartitaanerit iluanni inuit pikkorissartinneqartarnerannut atatillugu.

Kiisalu kapitalimi 10-mi naammagittaalliuteqarsinnaanermut periarfissaqartitsisoqarpoq, aammalu kapitalimi 11-mi atortuulersitsinermit, piffissamut ikaarsaariarfiusumut atorunnaarsitsinernullu malittarisassaqluni.

Ilutigisaanillu oqaatigineqassaaq Inuussutissarsiutinik ilinniakkannut inatsit imaqanngimmat misiliilluni aaqqissuussisarnissanut pisinnaatitsissummik.

2.2. Siunnersuut

Siunnersuut tunngaviusumik inatsimmut atuuttumut allannguutissatut siunnersuutitut suliarineqarsimasinnaagaluarpoq, tassami allannguutit inuussutissarsiutinut ilinniakkanut inatsimmut atuuttumut sanilliullugu taamaallaat ilinniartitaanernik ingerlatsiviit malittarisassaannut tunngasuummata, taakkualu atorunnaarsinneqarlutik. Kisianni allannguinerne pineqarmata Inuussutissarsiutinik Ilinniakkanut Inatsimmi immikkoortut qitiulluinnartut, sanilliullugit inatsimmik allanngortitsinermit inatsimmi pingaarnerusumi 1. januar 2011-mi atortuulersumi, naliliisoqarsimavoq eqqornerusoq siunnersuut inatsisaasussatut pingaarnertut aaqqissuutissallugu.

Siunnersuutip immikkoortuisa aaqqissuunneqarneranni sannaanilu annerusutigut Inuussutissarsiutinik Ilinniartitsinermit inatsit atuuttoq malinneqarpoq. Taamaasilluni tamanna atuuppoq kapitalini 1-5, 7-8 aamma 9-11, taamaattorli kapitalit 9-11-allanngortinneqarlutik siunnersuummi kapitalitut 11-13-itut. Ilutigisaanik kapitali 6

annertuutigit annikinnerulersinneqarpoq, aalajangersakkat amerlassusaannut tunngatillugu. Inuussutissarsiutinik Ilinniartitsinermik inatsimmi kapitalimi 6-imi taamaasilluni taamaallaat § 28 qitiusumik ilinniarfiit siunertaat, § 29 qitiusumik ilinniarfiit suliassanik allanik ingerlatsisinnaanermut periarfissaat, § 38 qitiusumik ilinniarfiit forstanderiat aamma § 40 qitiusumik ilinniarfiit aningaasalersorneqartarnerat ingerlateqqinneqarput siunnersuummi kapitalimi 6-imi, imaalillugit § 32, § 34, § 35 aamma § 37. Kiisalu ikkussisoqarpoq nutaannik kapitalinik 9 aamma 10.

Kiisalu aamma piginnarneqarpoq taaguutaasoq “qitiusunik ilinniarfiit”, apeqquaatinnagu Inuussutissarsiutinik Ilinniakkanut inatsimmi § 3-mi immikkoortitsineq, taamaattumillu allannguinerup kinguneraa taamaallaat qitiusumik ilinniarfiit pineqarnerat. Taamatut aaqqissuussisoqarpoq naak qitiusumik ilinniarfiit siulersuisoqarunnaassagaluartut oqartussaasunik qullersatut, Inuussutissarsiutinik Ilinniartitsinernik inatsimmi § 35, imm. 5 naapertorlugu forstanderimik atorfinitsitsisartunik. Tassami forstanderi inatsimmik allannguinermi qitiusumik tunngaveqartumik inissisimasuussaaq naalakkersuisoqarfimmit akisussaasumit atorfinitsinneqartartoq, taakkunungalunala nalunaartartuusoq.

Kiisalu pisinnaatitsissutitut aalajangersakkat siunnersuummi ikilineqarput, paasinarsisimammat pisinnaatitsissutitut malittarisassaartoq pissutsini assigiiaani.

Tamatuma saniatigit eqqaaneqartutut aallarniummi siunnersuutigineqarpoq § 4-p annertusineqarnissaa, ersarissumik pisinnaatitsineq siunnersuisoqatigiinnik aamma ataatsimiititalianik pilersitsisinnaanermut siunissami, ilinniartitaanernik ingerlatsiviusuni tamani. Tamatumungalunala ilassutitut § 4, imm. 2-mi pisinnaatitsissutitut aalajangersagaq aamma aqutsissutaasinnaalissaaq ilinniartitaanernut siunnersuisoqatigiinnik pilersitsinermut, ilinniartitaanernut tamarmiusunut atuuttuusumik, inuussutissarsiutinut ilinniakkanuinnaangitsoq. Tamatuma qularnaassavaa fagitigit pissarsiassat soqutigisaqartunit naleqquttuneersut, taavali “siulersuisut” aamma ”brancheudvalg” inatsimmiit peerneqarlutik.

Taamaasilluni siunnersuut imaqarpoq nutaaliornermik qitiusumik, ataqatigiissitsinermik ilinniartitaanernut siunnersuisoqatigiinnik nutaani aamma inuussutissarsiutinik ilinniartitaanertigit suliniutinik, avataaniittunik fagitigit ilisimasalinnik akulerussisarnerit eqqarsaatigalugit, qularnaarlugillu periarfissat fagitigit iluaqutissanik taakkualu ilinniarfinnut apuunneqartarnissaa. Ilinniartitaanernut siunnersuisoqatigiinngortussat saniatigit isumaliutaavoq ilisimasatigit pissarsiassat anguneqartarsinnaasut siunnersuisoqatigiinnik aaqqissuussinikkut, suliffeqarnermi aamma aalisakkanik suliffissuaqarnermut ilinniartitaanerneersunik, naatsorsuutigineqartumik susassaartunik naleqquttunik inuttalittut pilersinneqartussatut. Ilutigisaanik qitiusumik ilinniarfimmi forstanderi periarfissaqassaaq ingerlaavartumik soqutigisaqartunik oqaloqateqartarnissanut.

Siunnersuutip § 33-ia sungiusaammik suliffissanut ataqatigiissaarineramik ingerlatsivik aamma tassaavoq inuussutissarsiutinik ilinniartitsinerami nutaaliernerit pingaartut ilaat.

Aalajangersagaq qularnaarissaaq, suliffissanut sungiusaammik qitiusumik ataqatigiissaarivimmik pilersitsisoqarnissaa ingerlatsinissamillu ilinniarsiit tamakkerlugit, suliffeqarfinnut namminernut ornigulluni sungiusaammik suliffissanik sapinngisamik amerlanerpaanik pilersitsisoqartarnissaa. Tamatumunnga tunngavilersuutaavoq matumani pineqarmat suliassaq qitiulluinnarluni inissisimasooq, naammassineqarsimanngitsorlu maanna atuuttut inatsit tunngavigalugit, tak. minnerunngitsumik inuussutissarsiutinik ilinniartitsineramik inatsimmi § 43, imm. 1, tassani ersimmat sungiusaammik suliffissat isumagineqartussaasut inuussutissarsiutinut ilinniarfinniit aamma qitiusumik ilinniarfinniit, ilinniarsiitullu pisussaaffigimmassuk suliffeqarfinnut orniguttarluni sungiusaammik suliffiusussanik pilersitsisoqartarnissaa.

Aalajangersagaq naammassineqarsinnaavoq assersuutigalugu aaqquissuussinikkut qitiusumik ilinniarsiikkaartumik ataatsimoorussamik ilinniartut sungiusaammik suliffissaannut ataqatigiissaarivinnik pilersitsisarnerit. Sungiusaammik suliffissanik ataqatigiissaarineramik suliarsi suliassat pingaarnersarissavaat sungiusaammik suliffiusartut pisariaqartunik amerlassusillit pilersinneqartarnissaat, tamatumani ilaatigut aallaaviussaaq suliffeqarfinnut, inuussutissarsiortunut aamma pisortaarfinnut il.il. ornittarneq, kiisalu inuussutissarsiutinik ilinniartitaaneri ilinniagaqartunut attaveqartuuneq.

Aalajangersakkami imm. 2 naatsorsuutigisaqarpoq suleqatigiittoqarnissaaq sungiusaammik suliffissanut ataqatigiissaariviup aamma forständerip akornanni, forständerip pisussaaffiit arlaqartunut atatillugu, siusinnerusukkut siulersuisunit isumagineqartussaasimasuni. Tamatumunngalu atatillugu forständeri malunnaatilimmik annertussusilimmik nammineerluni aalajangiisinnatitaassaaq.

Matumani suliassat makkua pineqarput:

- Sungiusaammik suliffissat suliffeqarfiit akuerineqartarneri
- Sungiusaammik sulinnissamut pilersaarutit akuerineqartarneri
- Nunani allani sulisinnanerup akuerineqartarnera
- Suliamik ilinniarsimasutut – svende-tut – misilitsinnernik ingerlatsisarnerit
- Ilinniartut sungiusaammik sulinnissap ilaanik ingerlatsinnginnissaaq akuersissuteqartarnikkut allatigut suliffeqareersimanermik tunngaveqartuni
- Isumaqatigiissutaasunik akuersissuteqartarneq piffissap ilinniagaqarfiusussap sivitsorneqartarnerinik piffissamit peqanngiffiusartumit sivisunerusumik
- Piffissamik ilinniagaqarfiusumik sivitsuisarnikkut, Lærningip aamma sungiusaammik suliffiusup akornanni akerliittoqartillugu.

Aalajangersagaq naapertorlugu aalajangiisinnatitaaneq siammassissumik inissisimavoq sungiusaammik suliffissanut ataqatigiissaarineramik aaqquissuussinerup inassuteqaataanik tunngaveqartartumik.

Kiisalu oqaatigineqassaaq qitiusumik ilinniarfiit Namminersorlutik Oqartussat allaffissuaqarneranni aaqqissuussinerit taaneqartartut - hierarkii - iluanni inissisimalissammata, naalakkersuisoqarfinnilu pineqartuni oqartussaasut ilitsersuisarnerisa ataaniilissallutik.

Ilutigisaanik naammassisassanut isumaqatigiissutit pisariaarutissapput, tassami anguniakkat aamma anguneqartussatut kissaatigineqartut naalakkiutinik tunngavilimmik aaqqissuunneqarsinnaalissammata, taamaattumillu inuussutissarsiutinik ilinniartitsineq pillugu inatsimmi atuuttumi § 30 naammassisassanut isumaqatigiissusiortarneq Naalakkersuisut aamma siulersuisut akornanni ingerlateqqinneqassanani.

Assigisaanik aamma ingerlateqqinneqassanngillat aalajangersakkat maanna atuuttuusut §§ 31-37 qitiusumik ilinniarfiit aaqqissuussaananerat. Taamaasilluni pisariaqassanngilaq aalajangersakkat piunnarnissaat, taakkua ersersitsisuummata qitiusumik ilinniarfiit ingerlatsivittut immikkuullarissumik inissisimanerannik, assersuutigalugu § 31 qitiusumik ilinniarfiit pisortat pigisaattut namminersortutut inissisimaneri.

Aamma taamatut ippoq qitiusumik ilinniarfiit siulersuisuisa periarfissaat isumaqatigiissuteqartarnissanut, suliassat ersarinnerusut qitiusumik ingerlatsiviunngitsunut ingerlatseqatigiiffinnulli allanut suliassiissutigisarlugit, tak. § 32. Naalakkersuisut siunissami immikkut ittunik pisinnaatitsissutitaqanngitsumik qularnaarsinnaavaat qitiusumik ilinniarfiit akornanni suleqatigiittoqarnissaa, taakkua Namminersorlutik Oqartussat iluanni ilitsersuisinnaanerup iluaniissammata.

Tamanna aamma atuuppoq § 33-mi ataatsimoortitsinermi, tak. ersarinnerusumik matuma kingulii. Inatsisartut inatsisaanni atuuttumi qitiusumik ilinniarfinnik namminersortunngorsaaneq naatsorsuutigisaqarpoq ersarissunik maleruagassaqaarnissaanik, Naalakkersuisut aaqqissuussinerit iluanni ataatsimoortitsilissappata, tak. § 33. Malittarisassat nutaat tunngavigalugit Naalakkersuisut namminneq aalajangersinnaavaat inuussutissarsiutinik ilinniartitsinerit aqunneqarnissaat, matumani aamma qitiusumik ilinniarfiit qassiunissaanni.

Kiisalu ingerlateqqinneqanngilaq § 34, aqutsisuuosq qanoq aaqqissuussinikkut qitiusumik ilinniarfiit siulersuisui toqqarneqartassanersut katitsigaassanersullu, siulersuisut piffissaq atuuffigisassaat qanoq sivisutigissanersoq, siulersuisut tunuartinneqarsinnaanerannik periarfissaq, aamma siulersuisut maleruagassiortarnerat qitiusumillu ilinniarfiup malittarisassaanik akuersissuteqartarnerat. Assigisaanik atuuppoq § 35, tassani ersimmat siulersuisut qitiusumik ilinniarfimmi oqartussaasuusut qullerpaat, nalunaarneqarlutillu siulersuisut akisussaaffeqarfii allatigullu pingaarnertut akisussaaffigisaat. Tamatumunnga atatillugu siunnersuummi qitiuvoq Naalakkersuisut inatsimmik allannguinnikkut siulersuisut qullersatut oqartussaaneriniik taarsermatigit, tak. aalajangersakkami imm. 1, aammalu

ilutigisaanik ingerlatsinermik akisussaaffik tigullugu, qitiusumik ilinniarfiup ingerlatsineranut atatillugu.

Taamaattumik § 36 aamma ingerlaqqissanngilaq, siulersuisut suliassaannut atasoq ilinniartitaanernik ingerlatsiviit fagitigut imarisaanut atasoq, aamma § 37, ilaatigut ilinniarfiit nalilinnik pigisanik atuinissaannut atasoq, tamatumani aamma pisortanit aningaasaliissutinut, aamma assersuutigalugu Naalakkersuisut qisuariarsinnaanerannut siulersuisut tungaannut, iliuutsit imaluunniit iliuseqannginnerit ilinniartitaanermik ingerlatsivimmik nalorninartorsiortitsilissappat, ilinniartitaanermillu ingerlatsiviup suliassani sularisinnaajunnaassappagit, imaluunniit ilinniartitaanernik ingerlatsiviup sulisut akissarsiassaak akilersinnaajunnaassappagit.

Taamaakkaluartoq ilutigisaanik oqaatigineqassaaq § 38 ingerlateqqinneqarmat § 35-tut ilassuserlugu forstanderip atorfinitsinneqartarnera soraarsinneqartarneralu Naalakkersuisut suliassarigaat. Aalajangersakkamilu ilanngullugu aalajangiunneqarpoq forstanderip Naalakkersuisut tungaannut akisussaaffigisai, aalajangersagarlu ilutigisaanik imaqarluni forstanderip Naalakkersuisunik naalagaqartuuneranik malinnittussaananeranillu, forstanderip Naalakkersuisut anguniagaannik piviusunngortitsiniartussaananeratigut. Aalajangersakkami tamatumunnga atatillugu forstanderip suliassai nalunaarsorneqarput, kiisalu imm. 5-imi ersilluni forstanderip qitiusumik ilinniarfimmi sulisut sinneri atorfinitsittarlugillu soraarsittarai. Pisinnaatitsinerlu taamaattoq aammattaaq atuuppoq ilinniarnertuunngorniarfinni, rektorip assigisaanik pisussaaffeqarfigisaanik.

Ikaarsaarnissamut atorfinitsitsisarnernut soraarsitsisarnernullu oqartussaassuseq eqqarsaatigalugu siulersuisuniit Naalakkersuisunut oqaatigineqassaaq, tamanna tunngavissaqartitsisimangitsoq immikkut malittarisassiornissamut, assersuutigalugu forstanderit atorfeqareersut atugaasa ajorseriannnginnissaat eqqarsaatigalugit, allatigulluunniit ajoqutaasinnaasut eqqarsaatigalugit. Tamatumani pissutaavoq forstanderit atugassarititaasut pissutsillu allat atorfeqarnermi eqqarsaatigalugit malittarisassat atuuttut naapertorlugit, tak. § 39, aamma siunnersuummi ilaareertussaammata aalajangersakkanit Namminersorlutik Oqartussat ataanni atorfeqartunut atuuttuni, atorfinitsitsisarnerit soraarsitsisarnerillu eqqarsaatigalugit. Taamaattumik forstanderit pineqartut atorfeqarnermi atukkatik allannguuteqartinnagit ingerlaqqissapput. Pissutsillu aamma tunngaveqassanngillat Suliffeqarfinnik tunniussisoqartillugu sulisut inatsisitigut inissisimanerat pillugu Inatsisartut peqqussutaata nr. 7, ulloq 5. december 2008-meersup, allanngortinneqarneranik Inatsisartut inatsisaanni nr. 12, ulloq 1. juni 2017-imeersumi aalajangersakkanik. (Suliassaqarfinnik tigusinermut atatillugu sulisunut tjenestemanditut atorfeqartitaanngitsunut atornerarnera). Tamatumunnga pissutaavoq matumani sulisitsisumik allanngortitsisoqanngimmat, suliassaqarfinnik tigusinermut atatillugu pisartunitulli, forstanderit suli Namminersorlutik Oqartussani atorfeqartuussammat.

Tamatuma saniatigut siunnersuummi ilanngussisoqarpoq nutaamik § 36-mik, tassuunalu

forstanderip siulersuisuusimasut suliaat tigussallugit, ilinniartitaanernut pilersaarutissanut siunnersuusiortarneq eqqarsaatigalugu. Kiisalu forstanderip aalajangiiffigisassavia piginnaangorsarfiusunik qitiusumik ilinniarfimmi ilinniartitaanerit, ilinniartitaanertigut suliniutissanik allanik aallartitsisarnerit, kiisalu aamma aningaasatigut isertitsissutaasussanik suliniutinik il.il. ingerlatsisarnerit. Aammattaaq forstanderip akuerisartussaavai ilinniagareriikkat ilinniakkap nutaap ilaatut nuunneqartarnissaat aammalu piffissap ilinniagaqarfiusup sivikillineqarsinnaanerit sivitsorneqarsinnaanerannulluunniit apeqqutit, aamma ilinniagaqartup piffissap atuartitsiviusup ilaanik ingerlatsisussaannnginnissaa, allatigut ilinniagaqareernernik tunngavilinnik.

Kiisalu aamma atorfissaarutissaaq inuussutissarsiutinik ilinniartitsinernut inatsimmi atuuttumi § 39, qitiusumik ilinniarfiit Namminersorlutik Oqartussat allaffissornikkut ingerlatsiviinut pulatinneqarnerisigut, taamaattumillu aalajangersagaq ingerlateqqinneqassanani. Eqqaaneqareersutut siuliani aalajangersakkami ersippoq qitiusumik ilinniarfiit pisortat ingerlatsiviisut suli malittussaammatigut atugassarititaasut Namminersorlutik Oqartussani sulisunut atuuttut.

Kisianni ingerlateqqinneqassaaq § 40 siunnersuummi § 37 qitiusumik ilinniarfiit ingerlatsineri aningaasalersorneqassasut nunatta karsianiit tapiissutitsigut aammalu allatigut ingerlatsisoqarpat tassanngaaniit isertitanit, nunattalu karsianiit tapiissutit annertussusissaat Inatsisartunit annertussusilerneqartarlutik.

Tamannali atuutinngilaq § 41-mut, aqutsisuusumut aningaasartuutissanut missingersuusiat annertussusissaannik aalajangersaasarnermi, aamma qularnaarisarnermi missingersuusiani immikkoortinneqartassasut qitiusumik ingerlatsivinni atuartitsinernik ingerlatat aamma allatigut ingerlatat, matumani aamma allatigut ingerlatat assigiinngitsut tamarmik immikkut naatsorsuutaasigut. Tamatumani pissutaavoq qitiusumik ilinniarfiit Namminersorlutik Oqartussat allaffissornikkut aaqqissuussineranni pisariaqartitsinngimmata immikkut aaqqissuussanik aqunneqarnissaat, assersuutigalugu ilinniarfiit immikkut missingersuusiortarnermut maleruagassaqarnerisigut. Assigisaanik atuuppoq § 42-mut, qitiusumik ilinniarfiit naatsorsuusiortarnerannut tunngasuni, matumani aamma kukkunersiuisarnermi, aamma ingerlateqqinneqanngitsunik. Tamatuma aamma assigaa aalajangersakkami imm. 4, ilinniarfiit sinneqartoorutiminnik aamma amigartoorutiminnik aningaasanut ukiumut tullermut nuussisarnerat, aaqqissuussineq taanna aamma ingerlateqqinneqanngilaq, tassami tamanna ataatsimut isigisumik apeqqutaammat Naalackersuisunit nalilersorneqartartoq, soorluttaaq tamanna aningaasanut inatsisikkut aqunneqartussaasoq.

Siunnersuullu ilanngullugu aamma immikkut qitiusumik nutaaliornermik ilaqarpoq, ilinniartitaanernut siunnersuisoqatigiit nutaat aamma inuussutissarsiutinik ilinniartitaanerni suliniutit imminnut atassuserneqarnerinik, ilisimasanik avataaneersunik akulerussisarinnikkut, periarfissakkullu qularnaarinissamik fagitigut ilisimasat ilinniarfinnut

ingerlaqqittarnissaannik. Ilinniartitaanernut siunnersuisoqatigiinngortussat saniatigut isumaliutaavoq ilisimasariaqartut ilassutissat pissarsiariniarneqartarnissaat siunnersuisutut katersuuttarfikkut suliffeqarnernut aamma aalisakkerinermik ingerlatsiviusuni ilinniartitaanernut atatillugu, naatsorsuutigineqartunik ingerlatsisuusut naleqquttut akornanneersunik inuttalersugassatut. Kiisalu naatsorsuutigineqarpoq qitiusumik ilinniarfimmi forständerip periarfissaqarfīgissagaa soqutigisaqartunik ingerlaavartumik oqaloqateqartarnissaq.

Kiisalu siunnersuummi kapitali 7 imarisamigut annertunerusutigut Inuutissarsiutinik ilinniartitsinermi inatsisaasumi kapitalip 7-ip assigaa.

Siunnersuummi kapitali 9 aamma kapitali 10 paarlattuanik nutaaliornerrupput, sammisaqarlutillu malittarisassanik nakkutilliisutut suliani aamma pitsaassusissanik ineriartortitsisarnernik kiisalu misileraanernik aamma ineriartortitsinikkut suliaqartarnernik.

Kiisalu Inuutissarsiutinik ilinniartitsinermik inatsimmi kapitali 9 aamma 10 inuussutissarsiutinik ilinniartitsinermi pikkorissartitsisarnernut aamma naammagittaalliuteqartarnernut atatillugit aalajangersakkat siunnersuummi kapitalimi 11 aamma 12-imi ingerlateqqinneqarput, siunnersuummilu kapitali 13 imaqarluni atortuulersitsinermik, piffissami ikaarsaariarfiusumi atugassarititaasunik aamma atorunnaarsitsinermut aalajangersakkanik.

3. Aningaasaqarnikkut aamma allaffissornikkut pisortanut kingunerisassai

Siunnersuummi pingaarnertut angorusutat ilagaat qularnaassallugu qitiusumik ilinniarfinnik aqutsineq pitsaanerusoq. Tamatumani pineqartut arlariupput, aningaasaqarnikkut malinnaaneq isumannaallisaanerlu pitsaanerusut, siunissami missingersuusianik sanioqqutsisarnerit pinngitsoorumallugit. Tamatuma assigaa pisariaarutissammat allaffissornikkut /ingerlatsinikkut aaqqissuussinerup siulersuisoqarnikkut annertusarneqarnissaa, aaqqissuusseqqinnermi siuliani qitiusimasutut.

Siunnersuutigineqartoq aqutsinermik aaqqissuussinissaq nutaaq kinguneqassaaq, Qitiusumik ilinniarfiit siulersuisuisa akissarsiaat aningaasartuutinullu taartisiassaat pillugit Namminersorlutik Oqartussat nalunaarutaat nr. 25, ulloq 23. december 2010-meersoq naapertorlugu aaqqissuussaasartunik akissarsiaqartitsisoqartarunnaassammat. Malittarisassat naapertorlugit aningaasartuutit annertussusaat tunngaveqarpoq aningaasaliissutinik, aamma aningaasatigut isertitsissutaasartunik suliassanik ingerlatsisarnernik ingerlatsivinni pineqartuni, taakkualu aningaasanut inatsisiliorfiusumi kingullermi annertussuseqarlutik minnerpaamik 40 mio. kr.-it missaannik, taamaannatilluunniit.

KTI-mut ilinniartitaanernik ingerlatsiviusumut kisimi minnerpaamik aningaasatigut 40 mio. suliamegut isaatitsisartumut, aaqqissuussineq kinguneqassaaq minnerpaamik 120.000 kr.-inik siulersuisunut akissarsiasaraluartigut sipaaruteqarnernik. Tamatumani tunngaviuvoq

siulersuisuni siulittaasup ukiumut kr. 40.000 akissarsiarisarmagit, siulittaasup tulliaata kr. 30.000 aammalu siulersuisunut ilaasortat 10.000 kr.-it. Taakkua saniatigut sipaaruteqartoqassaaq angalanernut aningaasartuutitut, nerisaqarnermut aamma najugaqartarnernut aningaasartuutitut, tak. nalunaarummi § 3, taanna naapertorlugu naatsorsuutigineqarluni ukiumut 150.000 kr.-it missaat atorneqartartut, kiisalu allattoqarfeqarnermut aamma allaffissornermut aningaartuutit ukiumut 10.000 kr.-it missaat, taakkualu ataatsimut KTI-mi sipaaruteqarfiussallutik 280.000 kr.-it missaannik.

Ilinniartitaanernik ingerlatsiviit sinnerini sipaarutaasussat siulersuisut akissarsiaannut siunnersuut naapertorlugu ukiumut 90.000 kr.-iussapput. Taakkunaniipput siulittaasumut akissarsiaritit 30.000 kr.-it, 22.500 kr.-it siulittaasup tullianut aamma 7.500 kr.-it siulersuisuni ilaasortanut. Taakkualu saniatigut ilanngunneqassapput aamma sipaarutissat angalanernut, nerisaqarnermut unnuisarnernullu, tak. nalunaarummi § 3, ukiumut 150.000 kr.-inut missiliuunneqartut, kiisalu allaffissorneq 10.000 kr.-it, taamalu tamanna ataatsimut ilinniarfiit sinnerini 250.000 kr.-it missaannik naleqassalluni.

Sungiusaammik suliffissanut ataqatigiissaarinermik aaqqissuussineq naatsorsuutigineqarpoq annerpaamik ukiumut 500.000 kr.-inik akeqartussatut, aaqqissuussineq ilinniarfimmi sulisussamik nutaamik atorfinitsitsinissamik suliassamik pineqartumik suliqaartussamik aallaaveqassappat, apeqqutaallutik atorfinitsinneqartussap fagitigut piginnaasatigullu tunuliaqutarisassai. Taakkua tamarmik siulersuisunut aningaasartuutaasartuniit tiguneqassapput, taamalu naatsorsuutigineqarluni ilinniartitaanernik ingerlatsivinni ilanngaattissat ilanngaatigereerlugit ukiumut 220.000 kr.-it aamma 250.000 kr.-it missaannik ilinniarfinnut aningaasaliissutitut naleqassasoq. Aningaasaliissutissalli eqqaaneqartut taamaakkaluartoq naatsorsuutigineqarput ikinnerungaatsiartussatut, pineqarmat suliassaq pisiviusunngortinneqarsinnaasoq aaqqissuussaannikkut naleqqussaannerit aqutugalugit. Tamatumunngali atatillugu taamaattoq ilanngullugu ilutigisaanik oqaatigineqassaaq suliassap sularineqartarnissaani aallaaviussanngimmat ilinniarfinni ataasiakkaani inummik nutaamik atorfinitsitsisoqarnissaanik. Suliassat taamaasillutik inummit imaluunniit inunnit arlaqartunit sularineqartarsinnaapput, ilinniarfinnik arlaqartunik sullissisuusartunik. Kiisalu ilanngullugu naatsorsuutigineqarpoq suliassat maanna sulisooreersunit pisariaqartunik piginnaaneqartunit sularineqarluarsinnaasut.

Aqutseriaasissamik aaqqissuussinerulertussatut siunnersuutaasoq aamma naammassisassanut isumaqatigiissuteqartarnernut atatillugu allaffissorinikkut pisariillisaatinik kinguneqartussaavoq, qitiusumik ilinniarfinni namminerni aammalu Naalakkersuisoqarfimmi, pisariaarutissammat naammassisassanut isumaqatigiissutissanut atasunik suliassanik suliqaartarnerit.

Kiisalu siunnersuut forständerimut periarfissaqartitsilissaaq nukissanik forständerip nukiit siulersuisunik kiffartuussinermut atortarunnaassammagit.

Kiisalu aamma naatsorsuutigineqarpoq siunnersuut aningaasaqarnikkut aamma allaffissornikkut Namminersorlutik Oqartussanut aamma kommuninut kinguneqartussatut, piffissap ingerlanerani innuttaasut amerlanerusut piginnaaneqarfiulersussanik ilinniagaqartalissammata. Tamanna nammineq ilalersuisuussaaq inuiaqatigiinnut imminnut napatissinnaanerusunut.

4. Aningaasaqarnikkut aamma allaffissornikkut inuussutissarsiortunut kingunerisassai

Naatsorsuutigineqanngilaq siunnersuut inuussutissarsiortunut aningaasaqarnikkut kinguneqartussatut, kisianni naatsorsuutaavoq inuussutissarsiutinik ilinniartitsineq siunnerfeqarnerulissasoq, inuussutissarsiortut pisariaqartitsinerat isigalugu. Tamatumalu saniatigut naatsorsuutaavoq ilinniartitaanernik neqeroorutit sukkanerusumik inuiaqatigiit ineriartornerat naapertorlugu naleqqussarneqarsinnaalissasut, aamma tassani pisariaqartitsinerit isigalugit.

5. Avatangiisinut, pinngortitamut aamma innuttaasut peqqissusiannut sunniutaasussat

Siunnersuut avatangiisinut pinngortitamullu sunniuteqassanngilaq.

6. Innuttaasunut sunniutaasussat

Naatsorsuutigineqarpoq siunnersuut siunnerfiusutut sungiusaammik suliffissanik amerlanerusunik pilersitsisoqartalerneranik kinguneqarumaartoq, tamannalu inuussutissarsiutinik ilinniartitsinerni ilinniartut aallartittartut amerlanerulernissaannut aqutissiuussissaaq. Tamatumalu saniatigut naatsorsuutigineqanngilaq siunnersuut innuttaasunut allaffissornikkut kinguneqartussatut, kisiannili naatsorsuutigineqarluni ilinniartitsinerit pitsaassusissaannik kivitsinermik kinguneqartussatut, ataatsimullu inuussutissarsiutinut ilinniartitaanernik pitsaanagerusunik suliffeqarnermi pisariaqartitsinernut naapertuuttunik.

7. Allatigut pingaarutilinnik kingunerisassai

Inatsissisamat siunnersuut allatigut immikkut pingaarutilinnik kinguneqartussaannngilaq.

8. Pisorta qarfinnik aamma kattuffinnik tusarniaanerit il.il.

Siunnersuut piffissami 18. december 2023-miit 18. januar 2024-mut tamanut ammasumik tusarniaasarnernut quppersakkami saqqummersinneqarpoq, aammalu toqqaannartumik tusarniaavigineqartussanut tusarniaassutigineqarsimalluni, tak. ilanngussaq 2, tusarniaanerit pillugit.

Inatsisissatut siunnersuummi aalajangersakkanut ataasiakkaanut namminernut oqaaseqaatit

Kapitali 1-imut

Kapitali aallarniutaasoq imaqarpoq aalajangersakkanik tunngaviusunik arlaqartunik, siunertaasunut inuussutissarsiutinik ilinniartitsinernik ataatsimut aaqqissuussinerni pikkorissartitsisarnernilu inuussutissarsiutinik ilinniartitsinernut tunngasuni, aamma suussusilersuinernik taaguutinillu “inuussutissarsiutinik tunngaviusunik ilinniartitsinerni” aammalu “inuussutissarsiutinik allatigut ilinniartitsinerni” kiisalu “qitiusumik ilinniarfimmi”.

§ 1-imut

Aalajangersagaq ingerlatitseqqippoq annerusutigut Inuussutissarsiutinik ilinniartitsinerit pillugit inatsisartut inatsisaanni § 1-imik, allaaserisaqarlunilu inuussutissarsiutinik ilinniartitsinerit aaqqissuussaananeranni tunngaviusunik inatsisip atuuffigisasaanik. Aalajangersagaq tamatumunnga atatillugu inatsisip teknikkikkut ilitsersuutaani allannguuteqartinneqarpoq siunertamut aalajangersakkamiit atuuffiusussanut tunngasumik aalajangersaganngorlugu.

Imm. 1-imut

Imm. 1-imi erseqqissarneqarpoq ingerlaqqittumik Naalakkersuisut pingaarnertut akisussaasuunerat, inuussutissarsiutinik ilinniartitsinerit aamma pikkorissartitsisarnertit inuussutissarsiutinik suliassaqaarfimmi aaqqissuunneqartassasut ingerlaavartumik ilinniartitaanerit ataqatigiissillugit. Aaqqissuussinerit suliffeqarnermi pisariaqartitsinernik isiginiaasuussapput, namminersortut inuussutissarsiutinik ingerlatsiviini aamma pisortat ingerlatsiviini.

Tamatumalu saniatigut aalajangiusimaneqarpoq inuussutissarsiutinik ilinniartitsinerit aaqqissuunneqartassasut piffissamilu sumiluunniit suliffeqarnermi pisariaqartitsinernut naapertuuttunik. Aalajangersakkamut atuuttumut atatillugu “Inatsisartut” taarserneqarput “Naalakkersuisut” atorneqalerluni, tassami ilinniartitaanerni suliniutit Naalakkersuisut inuussutissarsiornikkut aamma suliffeqarnikkut politikkiannik ersersitsisuusussammata. Tamatuma saniatigut inuussutissarsiutinik ilinniartitsinerit qularnaassavaat ilinniagaqartut pitsaanerpaanik sakkussaqaalernissaat suliffeqarnermi unammilligassanik naapitsisarnissaminni, maannakkuinnaanngitsoq, kisianni aamma siunissami. Ilutigisaanik aalajangiunneqarpoq Naalakkersuisut ilinniartitaanernik aaqqissuussinerit qularnaarumallugit atussagaat ilinniartitaanertigut aamma pikkorissartitsisarnertigut neqeroorutit.

Imm. 2-mut

§ 1, imm. 2, aamma annerusutigut ingerlatitseqqinneruvoq Inuussutissarsiutinik Ilinniartitsinernik Inatsimmi aalajangersakkanik, imaqarlunilu siunnerfiusunut

oqariartuummik isiginiagassat pingaartinneqartussat ilinniartitaanerit aqqissuunneqarneranni eqqarsaatigalugit. Takuneqarsinnaavoq ilinniartitaanerni tamanut neqeroorteqassasoq, tamatumani aamma periarfissanik inuussutissarsiummik ilinniakkamik naammassisaqarnissamik imaluunniit inuussutissarsiutinut pikkorissartitsineri peqataanissamut, aammalu ilinniakkat aamma pikkorissartitsinerit nunatsinni suliffeqarnermi peqataanissamut piginnaangorsaataassasut. Taamaakkaluartoq aalajangersakkap mattutinngilaa isiginiagassanik allanik pingaartitsisoqarsinnaanera, inuussutissarsiutinik ilinniakkamik aqqissuussinermi. Inuussutissarsiutitsigut suliniutit allat, assersuutigalugit inoqutigiaanut ataatsimoortunut sammititaasinnaasut, assersuutigalugu inersimasunnngoreerluni ilinniagaqarniartunut, pissutsit atuuttut naapertorlugit Inatsisartut inatsisaatigut aqquutissuunneqarsinnaassapput.

Imm. 2, nr. 2-mi ataatsimut katinneqarput inuussutissarsiutinik ilinniartitsinerimut inatsimmi § 1, imm. 2, nr. 2 aamma nr. 4, taamaasillunilu taanna ingerlateqqinneqarani.

Nr. 1

Aalajangersakkami pigiinnarneqarpoq pisussaaffik piviusumik ilinniagaqartitsinissamut qularnaarisussaq, inuusuttuaqqat meeqqat atuarfiata kingornagut ilinniagaqarnissamik imaluunniit pikkorissarnissamik neqeroorfigineqartarnerisigut aqqissuunneqartussaq: Kiisalu aalajangersakkami pineqarpoq pisussaaffik qularnaarisooqarnissaanik arlaqartunik qinigassanik periarfissaqartitsinissamik. Ilinniakkat imatut aqqissuunneqassapput ilinniagaqarsinnaanernut allanut ammaassisuusunik, assersuutigalugu Danmark-imi.

Nr. 2

Aalajangersakkami ataatsimut allanneqarput nr. 4-miittut aalajangersakkat ilanngullugit, aalajangersakkat imarisamikkut tunngaviusutigut assigiissuteqarmata. Kiisalu aamma inuussutissarsiutinik ilinniartitsinerit qularnaarneqassapput ilinniagaqartut pisariaqartunik piginnaaneqalertarnissaat, fagitigut pigisassaasut saniatigut, ilinniagaqartut pigisariaqarmatigut nalinginnaasunik paasinninnerit inuiaqatigiinniittut ineriartornermiittullu. Ilutigisaanik ilinniartitsinerit tunniussisassapput ilinniagaqartut inuttut ineriartuutissaannik, ilinniartullu sakkussalersortassallugit piginnaanernik suliffeqarnermi siunissami aamma piumaneqalertussanik, aamma ingerlaqqilluni ilinniagaqarsinnaanernut, nunatsinni namminermi aamma nunani allani.

Nr. 3

Nr. 3-mi aalajangersarneqarpoq tunngaviulluinnartoq, tassalu ilinniartitaanerit suliffeqarnermi pisariaqartitsinerit naleqqussagaassasut. Ilanngullugulu aamma erseqqissarneqarpoq pisariaqartitsineq allannguajaatsutut oqaatigineqarsinnaanngitsoq, kisiannili allanngorartuusoq, teknikkikkut ineriartorneq allatigullu ineriartornerit eqqarsaatigalugit, tamakkualu ilinniartitaanerit pilersarusiortarneranni isiginiarneqartassasut. Pineqartut saniatigut ilanngunneqarpoq ineriartortitsisarneq "innovationi" tunuliaqutaralugit tusarniaanernit akissutaasut KNQI-miit. Taamaaliornikkut ersersinneqarpoq inuussutissarsiutinik

ilinniartitsinernik ingerlatsivinni aamma sammineqartussaasut isumassarsianik nutaaliernerit, tigussaasunik aaqquissuussinertigut piviusunnigortinneqarsinnaasut.

§ 2-mut

Imm. 1-imut

§ 2, imm. 1 allannguuteqanngitsumik ingerlatitseqqinneruvoq Inuussutissarsiuutinik ilinniartitsinermut inatsimmi § 2, imm. 1-imik, inatsimmik allannguinnermi kingullermi pisumik, Inatsisartut inatsisaatigut nr. 25, ulloq 13. juni 2023-meersukkut. Tamatumunnga atatillugu aalajangiusimaneqarpoq inuussutissarsiuutinik tunngaviusunik ilinniagaqartarnek tassaammat sunniivigeqatigiittarnikkut ingerlanneqartartoq paarlakaattumik sungiusaammik sulisarnerup ilinniarfimmilu atuarternerup akornanni, piffissani sivisunerusuni sivikinnerusuniluunniit.

Imm. 2-mut

§ 2, imm. 2-mi ingerlateqqinneqarpoq taaguut “inuussutissarsiuutinik ilinniartitsinerit allat”, paasineqartartut inuussutissarsiuutinik ilinniakkatut pingaarnertut ilinniarfimmiluu atuagarsornikkut ingerlanneqartartut. Taamaattoqartarpoq naak piffissani sivikitsuinnarni aamma sungiusaammik sulisoqartarsinnaagaluartoq. Tamatumani pineqarsinnaapput sungiusaammik suliffeqarnerit qaammatini arlalinni. Kiisalu aamma immikkoortitsineq qitiusumik ilinniarfinnik aamma inuussutissarsiuutinik ilinniarfinnik peerneqarpoq.

§ 3-mut

Aalajangersagaq annertuutigut allannguuteqartinneqarpoq Inuussutissarsiuutinik ilinniartitsinernik inatsimmi § 3-mut sanilliullugu, inuussutissarsiuutinik ilinniarfiit peerneqarmata ingerlatsivinnut taaguutitut siunnersuummi, taamalu qitiusumik ilinniarfiit kisimik pineqalerlutik.

§ 3-p oqaasertalerneqarnerata ersarissassavaa qitiusumik ilinniarfinnik paasinninneq suussanersoq, tak. aamma nalunaarneqartut immikkoortumi siullermi siunnersuummut tunuliaqutaasut pillugit nalinginnaasunik oqaaseqaatini.

Tamatuma saniatigut ilisarnaataavoq ilinniarfiit siulersuisunit aqunneqarunnaarneri, qitiusumillu ilinniarfiit siunissami naalakkersuisoqarfinni ingerlatsiviit ataaniilernerit, taamaasillutillu allaffissuarmi qitiusumi ilitsersuisinnaatitaanerit iluanniilernerat.

Kapitali 2-mut

Kapitalimi allaaserineqarput tunngaviusumik ileqqusut Naalakkersuisut aqutsinikkut pisinnaatitaaffiini ilinniartitaanernik akuersissuteqartarneri, ataatsimiititalianik

pilersitsisarnermi aamma ilinniakkat imaannik aqutsineranni. Ilutigisaanik aamma Naalakkersuisut nakkutilliisutut pisussaaffii allaaserineqarput. Kiisalu inatsisip pitsaassusissaanik misissueqqinnerup kingunerisimavaa § 4-p qulequtaata allanngortinneqarnera, Inatsisartut inatsisaannut atuuttumut atatillugu nutaamillu qulequtsiisoqarluni §§ 5-7-imi.

§ 4-mut

Imm. 1-imut

Aalajangersagaq annertunerusutigut tassaavoq ingerlatitseqqinneq Inuussutissarsiutinik ilinniartitsinermik inatsimmi § 4-mik. Aalajangersagarli allanngortinneqarpoq siunnersuisoqatigiinnik aamma ataatsimiititalianik pilersitsisarnernut, ilinniartitaanerni ataatsimoortuni ingerlatsinermut atatillugu, inuussutissarsiutinik ilinniartitsinerit kisiisa pinnagit. Aalajangersakkami atuuttumisullu aalajangersakkami ersippoq ataatsimiititaliat pineqartut aalajangiisinnaassuseqartinneqarsinnaasut, suliassaqarfinni aalajangersimasuni. Taamaasilluni pineqartut saniatigut aalajangersakkami siunnerfiuvoq ataatsimiititalianik pilersitsisarnernut tunngavissanik aqqissuussineq, pisariaqartitsineq naapertorlugit inuit katersortarumallugit immikkut assigiinngitsunik ilisimasallit, apeqqutaatillugu sammisat suut pineqarneri. Aalajangersakkami pineqarput ataatsimiititaliat ataavartussat kiisalu aamma ataatsimiititaliaagallartussat. Ilanngullugu naatsorsuutigineqarpoq ilinniartitaanernut siunnersuisoqatigiisusssanik pilersitsisoqarnissaa, tak. tamanna pillugu nalinginnaasunik oqaaseqaatiniittut.

Imm. 2-mut

Aalajangersagaq tassaavoq allannguuteqartumik Inuussutissarsiutinik ilinniartitsinermik inatsimmi § 4, imm. 2-mik ingerlatitseqqinneq. Aalajangersagaq ilaatinneqarpoq qularnaarumallugu pisinnaatitsisoqarnissaa nalunaarusiornikkut malittarisassiorsinnaaneq, siunnersuisoqatigiinnik aamma ataatsimiititalianik pilersitsisarneri, aamma taakkua suliassaat il.il. Pisinnaatitsissut assersuutigalugu atorneqarsinnaassaaq malittarisassiornernut ilinniartitaanernut siunnersuisoqatigiit katitsigaanissaannik aamma suliassaannik. Aammattaq siunertaavoq pisinnaatitsissutitut aalajangersakkap taarsissagaa 2024-mut aningaasanut inatsimmi oqaasertaliussaasoq, allaffissornikkut ilinniartitaanerni siunnersuisoqatigiit ersarinnerusumik aqunneqarnissaannut tunngasoq. Naalakkersuisut taamaalinerani malittarisassiorsinnaalissapput ilinniartitaanerni siunnersuisoqatigiit arlaannaannulluunniit atasuunngitsut pillugit, fagini ilisimasatigut qaffasissumik inissisimasumik, nunanit tamalaaniit aamma peqataaffigineqartumik, tunngavigalugu iluatsittumik Aningaasarsiornermut Siunnersuisoqatigiit iluatsilluartumik atuuttuusut. Tamatumunnga atatillugu aalajangersaasoqarsinnaavoq siunnersuisoqatigiit tigussaasunik inassuteqaateqartarumaartut ilinniartitaanernik suliassaqarfimmut atatillugu, fagitigut qaffasissusissat suli qaffasinnerulersikkumallugit, aamma ilinniartitaanernut aningaasaliissutaasartut suli pitsaanerumik iluaqutigineqaqqullugit. Tamatumani ilaassapput siunissami ilinniartitaanertigut neqeroorutaasarumaartut, aamma malittarisassat

siunnersuisoqatigiit ilinniartitaanerit pillugit oqallinnermi tunniussaqaqtarnissaannut tunngavissat.

§ 5-imut

Pineqarput kinguneqartitsilluni iluarsiiisutit Inuussutissarsiutinik ilinniartitsinermik inatsimmi § 5-imik. Kiisalu maanna atuuttumi imm. 5, AEU-mik ingerlatsinernik taaneqartut ingerlateqqinneqanngillat, taakkua qitiusumik ilinniarfinnit aamma inuussutissarsiutinik ilinniarfinnit neqeroorutaajunnaarmata. Aalajangersakkami maanna atuuttuusumi ersippoq qitiusumik ilinniarfiit imaluunniit inuussutissarsiutinik ilinniarfiit inuussutissarsiutinik ilinniartitsinerup ilaatut ingerlassinnaasaraat Akuerisaasut Inuussutissarsiutinik ilinniartitsinernut piareersaateqartitsinernik fagit, misilitsinnertalinnik.

Imm. 1-imut

Aalajangersakkami imm. 1 annerusutigut allannguuteqanngilaq maanna atuuttumi § 5, imm. 1-imut sanilliullugu. Aalajangersagaq isumaqarpoq Naalackersuisut pisinnaatitaalersut ilinniakkanik pilersitsisarnissanik aamma atorunnaarsitsisarnissanik. Tamanna pisassaaq anguniakkanik pingaarnernik § 1-imi tunngaveqartunik nalilersuinikkut inuiaqatigiinni pisariaqartitsinernik ilinniakkanik qanoq ittunik piffissami pineqartumi pisariaqartitsisoqarneranik. Ilanngullugu ilinniakkap pitsaassusissaa ilinniakkamut aningaasartuutissanut sanilliunneqartarsinnaavoq, tamatumani inuussutissarsiutinik ineriartornerit qanoq innerat naliliinnermi isiginiarneqassalluni, aamma suliffeqarnermi ilinniakkanik pisariaqartitsinerit. Naalackersuisut tamakkua tunuliaqutaralugit pilersitsisinnaapput, allannguisinnaapput aamma atorunnaarsitsisinnaapput ilinniakkanik, ilinniarfiit pineqartut inuussutissarsiutini sammiviisa iluini.

Imm. 2-mut

Imm. 2 aamma allanngortinneqarpoq tunuliaqutaralugu qitiusumik ilinniarfiit aamma inuussutissarsiutinik ilinniarfiit akornanni immikkut isiginiaasernerit peerneqartut. Aalajangersakkami pineqarput ilinniartitaanernut pilersaarutit, imm. 1-imut atatillugu ilinniartitaanernik pilersitsisarnernut atasut.

Aalajangersagaq isumaqarpoq Naalackersuisut akuersissutigisarmatigit qitiusumik ilinniarfiit ilinniartitaanernik pilersaarutit suliaat. Tamanna pisarpoq akisussaasutut oqartussaasut ingerlatsivianni, qitiusumik ilinniarfiit ilinniartitaanernut pilersaarusiainnik nassiussivigisagaanni. Akuersissuteqarnissamut oqartussaassutsimiippoq ilinniartitaanernut pilersaarummut tamarmiusumut oqartussaassuseq ilinniakkat ataasiakkaarlugit, nutaanik pilersitsinernut taamaallaat tunnganani. Taaguut “ilinniartitaanernut pilersaarusiaq” suli paasineqartarpoq imatut, ilinniakkat aqqissuussaeneri fagini ilinniartitaanernut ingerlatsiviusumi ilinniarneqartussani, ilinniartitaanernut pilersaarutit ilinniakkanik ingerlatsinerit immikkoortuinut assigiinngitsunut ataatsimut tunngasuusarput, matumani aamma sungiusaammik sulisoqartarpat sungiusaammik sulinnermi ingerlatassat.

Aalajangersagaq isigineqassaaq tunuliaqutaralugu forstanderip nalinginnaasumik ilisimasassat annertuut pigisarmagit, ilinniakkap imarisassaanut piumasaqaatini, suliffeqarnermi pisariaqartitsinerinik tunngaveqartunik, taamaattumillu taanna pitsaanerpaanik tunngavissaqartarmat ilinniakkap immikkoortuisa qanoq naleqqutsigisarnerinik.

Aqutseriaaseq matumani atorneqartoq pissuteqarpoq, pisortani sulianut oqartussaasut immikkuualuttortalersukkanik nalunaarutunik suliaqartannginneranik, ilinniakkat imarisaasigut aqutsissutaasussanik, ilinniakkat ataasiakkaarlugit, kisiannili tamatuma paarlattuanik suliassaqaarfiit akimorlugit atuuttunik nalunaarusiortoqartarmat. Taakkunani ersarissunik aalajangersaasoqartarpoq ataatsimut isigisunik malittarisassanik, inuussutissarsiutinut sammisuni tunngaviusumik ilinniakkani tamani, ersarissunillu maleruagassiortoqartarluni sunik ilinniarfiit ilinniartitaanernut pilersaarutini ilanngussisassaneri pillugit. Tamanna isiginiarneqassaaq aallaavigalugu amerlasuutigut inuussutissarsiutinik ilinniakkat sukkaasumik ingerlanneqartarneranniit, nalunaarutissanullu missingersuusiaasut assersuutigalugu ukiup ataatsip matuma siornagut suliaasimasut nutaanngilereersimasassammata nalunaarut suliluunniit atulinngitsaq. Taamaattumik allaffissornikkut isigalugu pisortani qitiusumik oqartussaasunut ajornakusuussaaq immikkuualuttortalersukkanik ilinniakkat imarisassaannik nalunaarusiornikkut aqutsisinnaaneq, inuussutissarsiutinik ilinniakkat ataasiakkaarlugit, isiginiaraanni sukkaasuisut ilinniakkat imarisaannut piumasaqaatit allannguuteqartarnerannut. Taamaattumik aalajangersaasoqarnikuvoq periaasissanik eqaannerusunik, imaalillugu qitiusumik ilinniarfinni forstanderiusut ilinniartitaanernut pilersaarutunik suliaqartarlutik, tak. § 36, imm. 1 soqutigisaqartunik naleqquttunik isumasiuereernikkut.

Ilinniartitaanernut pilersaarusiit ilaatigut imaqaassapput fagit allaaserineqarnerinik, ilinniakkami pineqartumi ingerlanneqartussanik, imaalillugit assersuutigalugu fagit tunngaviusut, immikkoortuni fagit, faginik immikkut ittunik peqarpat taakkua aammalu fagit nammineq toqqagassat il.il.

Naak Naalackersuisut nalinginnaasumik ilitersuisussaataitaneranniikkaluartoq aalajangersakkami nalilerneqarsimavoq pissusissamisoornerusaq ersarissumik nalunaassallugu Naalackersuisut periarfissaat qitiusumik ilinniarfimmut inerteqqutigineqarsinnaasoq qitiusumik ilinniarfiup ilinniartitaanernut pilersaarusiorsinnaanera, imaluunniit pilersaarummik allannguisinnaanera.

Imm. 3-mut

§ 5, imm. 3, periarfissaliivoq Naalackersuisunut ersarinnerusunik maleruagassiorsinnaanernut, ilinniartitaanerik pilersitsinissamut akuersisarnermut, taamaatitsisarnermut aamma ilinniagassanik akuerisaareersimasunik tunuartitsisarnermut. Ilutigisaanik atugassarititaasussanik aalajangersaasoqarsinnaavoq ilinniartitaanerini

pilersaarutit akuerineqartarnerannut, piumasaqaatinik assigiinngitsunik pilersitsinertigut, taakkunani suut takuneqarsinnaanissaannik.

Aalajangersagaq pisinnaatitsiviuvoq ilinniartitaanernut pilersaarutit pillugit nalunaarusiortarnernut. Taamaaliornikkut Naalakkersuisut pisinnaatinneqarput malittarisassanik pilersitsisinnaanermut, piumasaqaateqarfiusunik ilinniartitaanernut pilersaarusiati qanoq ilusilersorneqartarnissaannik. Taamaaliornikkut pilersitsisoqarsinnaavoq assersuutigalugit ilinniagassat assigiinngitsut akimorlugit nalunaarusianik, allaaserinnittunik paasissutissat qanoq ittut ilinniartitaanernik ingerlatsiviit ilinniartitaanernut pilersaarusiani nalunaarsortassaneraat, aamma fagit suut ilinniartitaanernut pilersaarusiani allaaserineqartussaasersut. Kiisalu aamma aalajangersarneqarsinnaavoq ilinniartitaanernik pilersaarusiati ilassutitut imaqartassasut suliffeqarnermi ilinniakkat qanoq ittut pisariaqartinneqarneri pillugit, ilinniartitaanerit neqeroorutigineqartut qanoq aningaasartuuteqarfiusassanersut, ilinniartussaqaassuseq allallu. Aamma aalajangersagaliortoqarsinnaavoq ilinniartitaanernut pilersaarutit suliarineqartarnissaannik soqutigisaqartut suliami naleqquttut peqatigalugit, ilinniagassanilu pineqartuni nalunaarsorsimasassapput soqutigisaqartut kikkut akulerinneqartarsimanersut, ilinniartitaanernut pilersaarusianik suliaqarnerni.

Ilinniartitsisut qanoq piginnaaneqarnerannik innersuussineq paasineqassaaq piumasaqaatinik ilinniakkamut aalajangersimasumut atatillugu aalajangersaasinnaanernut atasumik, atuartitsisartut ilinniartitsisuusartullu eqqarsaatigalugit, assersuutigalugu taakkua piginnaasassaannut ilinniagarisimasatigut piumasaqaataasinnaasunut.

Tamatumunnga atatillugu oqaatigineqassaaq Inuussutissarsiutinut ilinniartitaanernut pilersaarutit pillugit Namminersornerullutik Oqartussat nalunaarutaat nr. 11, ulloq 17. april 2009-meersoq suli atuuttuummat.

§ 6-imut

Aalajangersagaq ilaannakuusumik ingerlatitseqqinneruvoq Inuussutissarsiutinik ilinniartitsinermut inatsimmi § 6-imik. Aalajangersagaq atuuttoq imm. 2 nalunaarusiornikkut aqutsisoqarsinnaanerani inuussutissarsiutinik ilinniartitaanerni suliaasaqarfimmik, aamma siulersuisut aamma ataatsimiititaliani ilaasortat akissarsiaqartinneqarsinnaaneri peerneqarpoq. Aamma taamaappoq aalajangersakkami imm. 3, Naalakkersuisut malittarisassiorsinnaanerannut pisinnaatitsissutaasoq ilinniakkanut ataasiakkaanut pineqartunut atasoq, tamanna imm. 1-imi ersereermat. Aalajangersakkami atuuttumi imm. 4 Naalakkersuisut ilinniarfinnik ilinniartitsinermillu nakkutilliinissaannik aalajangersagaq siunnersuummi ingerlatseqqinneqarpoq § 7-itut.

Imm. 1-imut

Aalajangersakkami imm. 1 ilaannakuusumik Inuussutissarsiutinik ilinniartitsinermit inatsimmi § 6, imm. 1-imi ingerlatitseqqinneruvoq, erseqqissaanertalimmik ilinniagassanut aalajangersimasunut tamanna aamma atuuttusoq. Aalajangersakkallu ilutigisaanik Naalakkersuisut periarfissaqartippai aalajangersagaliorsinnaanermut, inuussutissarsiutinut ilinniakkanut arlaqartunut tamarmiusunulluunniit atuuttunik. Tamatumani pineqarsinnaapput nalunaarusiornikkut malittarisassat soraarummeertarnernik aaqqissuussinernut atuuttut, ilinniartitsisut piginnaanerisassaat, sungiusaammik suliffissanik akuersissuteqartarnerni suleriaasissat, ilinniagaqartut atuartitsinermi peqataasarnissaat allallu pillugit. Aalajangersagaq isumaliutaavoq atortinneqarsinnaasutut ilinniagassanut aalajangersimasunut tunngatillugu, naliliisoqarsimappat pissusissamisoornerussasoq aqutsineq nalunaarusiornikkut ingerlanneqassasoq, ilinniartitaanernut pilersaarutinik tunngaveqanngitsumik.

§ 7-imut

Aalajangersagaq allannguuteqanngitsumik ingerlatitseqqinneruvoq Inuussutissarsiutinik ilinniartitsinermit inatsimmi § 6, imm. 4-mik. Aalajangersarneqarput ileqqussat tunngaviusut Naalakkersuisut nakkutilliinissamik pissusaaffeqarnerannut inuussutissarsiutinik ilinniartitaanernik suliassaqaqfimmi, ilanngullugu ilinniartitaanernik ingerlatsiviit pineqartut ingerlatsinerannik aamma ilinniartitaanernik suliaqarnerannik, minnerunngitsumik tunngaveqartumik ilinniartitaanerit inuiaqatigiinni pissusaaffiunerinik. Taamaasillunilu Naalakkersuisoqarfik oqartussaasoq pissusaaffeqarpoq akulerussinnaanermut iliuuseqarsinnaanermillu isumaqatigiinngitsoqarsimappat malittarisassanut attuuttunut atatillugu, assersuutigalugu Inatsisartut inatsisaannik unioqqutitsisoqarsimappat, imaluunniit inatsisartut inatsisaannik tunngavilinnik malittarisassanik unioqqutitsisoqarsimappat.

Kapitali 3-mut

Kapitali imaqarpoq aalajangersakkanik aaqqissuussinernik ilinniakkanut isersinnaanermut piumasaqaatinik aqutsineq pillugu. Aalajangersagaq isigineqartussaavoq tunuliaqutaralugu Inatsisartut inatsisaat atuuttussaammat inuussutissarsiutinik ilinniakkanut assigiinngitsunut amerlasuunut, taamaattumillu ilinniakkamut isersinnaanermut piumasaqaatit ataasiakkaat inatsisissamut siunnersuummi eqqartorneqanngillat. Piumasaqaatit assigiinngitsorujussuusinnaapput, apeqqutaallutik ilinniakkat suut pineqarneri. Taamaattumik pisariaqarpoq assigiinngisitsineq piumasaqaatinik ilinniartitaanernut assigiinngitsunut ataasiakkaanut piumasaqaataasartunik. Kapitalip qulequtaanni ilassutaavoq “ilinniagaqarnissamut tiguneqarneq” siunnerfigalugu qularnaarinissaq eqqornerusumik kapitalip imaasa nalunaarsorneqarnissaat.

§ 8-mut

Aalajangersagaq ilaannakuusumik ingerlatitseqqinneruvoq Inuussutissarsiutinik ilinniartitsinernut inatsimmi § 7-imik. Pisinnaatitsissutitut aalajangersagaq aalajangersakkami atuuttumi imm. 2, taamaattoq nuunneqarpoq aalajangersakkami imm. 5-imut.

Imm. 1-imut

Aalajangersakkami ersippoq ilinniagaqalernissamut piumasagaatit pineqartut nalunaarsorneqarsimassasut ilinniartitaanernut ingerlatsiviup suliarisimasaani ilinniartitaanernut pilersaarusiani. Naalackersuisut taamaasillutik nakkutilliisinnaapput ilinniakkanut ataasiakkaanut isersinnaanermut. Aalajangersagaagaluortoq ilinniakkamut isernissamut piumasagaatit ilinniartitaanernut pilersaarutiniittut naalackersuisoqarfimmit oqartussaasumit akuerineqartussaasut aalajangersakkamit peerneqarput, tamanna ilaareermat pisinnaatitsinermi ilinniartitaanernut pilersaarutininik akuersisarnernut § 5, imm. 2-mi.

Imm. 2-mut

Siunnersuummi § 8, imm. 2, tassaavoq ingerlatitseqqinneq Inuussutissarsiutinik ilinniakkanut inatsimmi § 7, imm. 3-mik, pikkorissartitsisarnerit piareersaasut pikkorissaasullu ilinniagaqartumik inuussutissarsiutinut ilinniakkamik naammassisaqarsinnaanermut. Ilinniagaqartup naalackersuisoqarfimmit oqartussaasumit akuerisaasumik pikkorissarneq naammaginantumik angusaqarfigalugu naammassisimaguniuk, taava ilinniagaqartoq isersinnaalissaaq inuussutissarsiutini tunngaviusumik ilinniakkamut imaluunniit immikkut aaqjissuussamut isernissamut pikkorissarnissamut, tak. imm. 5. Naliliisarneq suna naammaginantuunersoq qitiusumik ilinniarfimmit aalajangerneqassaaq. Taamaattoq inuussutissarsiutinik ilinniakkanut isersinnaanermut aallaaviussaaq ilinniagaqartup lærlingitut ilinniagaqarnissamut isumaqatigiissut atsiorsimassammagu, imaluunniit ilinniagaqarnissamut isumaqatigiissuteqassalluni, ilinniagaqartussap ilinniakkamik allartitsinneginnerani, tak. inuussutissarsiutinik ilinniagaqalersarnermi aalajangersakkat nalinginnaasut, aamma immikkut sanioqqutsisinnaanermut periarfissat § 9-mi. Aalajangersakkap innersuussinera § 11-mut pissuteqarpoq ilinniagaqarsinnaanermut periarfissat killiligaasinnaanerannik, ilinniagaqarfiusussami pineqartumi tiguneqarsinnaasunut inissat killeqarsinnaammata killiisuullutillu, assersuutigalugu init atorneqartussat killiliinerisigut, ilinniakkamik naammaginantumik ingerlatsisinnaanermik. Aamma imaassinnaavoq inissat killilerneqarsimasut suliffeqarnermi taamaallaat pineqartumik ilinniarsimasut killeqartut atorfissaqartinneqarpata.

Imm. 3-mut

Matumani ingerlateqqinneqarpoq Inuussutissarsiutinik ilinniartitsinermut inatsimmi § 7, imm. 4, inatsimmik allanguinermi kingullermi ikkunneqartoq, Inatsisartut inatsisaatigut nr. 25, ulloq 13. juni 2023.

Ersarissumik aalajangersarneqarpoq isernissamut piumasaqaatit atugassarititaasut § 7, imm. 4-mi, inuussutissarsiutinik ilinniakkanut isersinnaanermut qinnuteqartut lærlingit ilinniagaqalernissamut isumaqatigiissummik atsiugaqareertarnissaat, imaluunniit ilinniagaqarnissamut isumaqatigiissummik atsiugaqareertarnissaat, aaqqissuussineq aalajangersakkanik sanioqqutsisinnaaneq pillugu § 9-mik ilaasimanngikkaangat. Ilutigisaanillu erseqqissarneqarsimavoq lærlingit isumaqatigiissut imaluunniit ilinniagaqarnissamut isumaqatigiissut tiguneqannginnermi atsiorneqareersimassasoq.

Imm. 4-mut

Imm. 5 suliareqqitamik ingerlatitseqqinneruvoq § 7, imm. 5-imik Inuussutissarsiutinik ilinniartitsinermit inatsimmi, atuuttuullunilu inuussutissarsiutinik tunngaviusunik ilinniartitsinerit ilaanni piumasaqarfiusuni ilinniagaqartup atuarfimmit naammaginartunik aallaaveqareernissaanut, atuarfimmi inaarutaasunik soraarummeerutiti fagini aalajangersimasuni eqqarsaatigalugit. Aalajangersagaq mattussinngilaq ilinniagaqartussat tiguneqarsinnaanerannik, kisiannili aalajangiunneqarpoq ilinniartitaanermik ingerlatsiviup ilinniagaqartussamik tigusisussap aalajangersinnaagaa ilinniagaqalersussap ilinniakkamik aallartitsinnginnermini aallartissinnaanermut piumasaqaatit pikkorissarnermi naammassisimassagai, inuussutissarsiutinik ilinniartitsivimmi ingerlanneqartussamik. Ilutigisaanik erseqqissarneqarpoq periarfissaqartoq pikkorissarnerit ingerlassinnaanerinit ilinniakkamik ingerlatsineq nangillugu, ilinniagaqartoq eqqarsaatigalugu isernissamut pikkorissarsimanissamik naammassinnissimasussaq, inuussutissarsiutinik ilinniakkamik aallartitsereernermit. Tamatumunnga pissutaasinnaavoq kingusinnerusukkut paasinarsinnaammat ilinniagaqartup naammattunik piginnaaneqarfiginngikkai inuussutissarsiutinut ilinniakkamik naammassisaqarsinnaanermut piumasaqaataasut.

Imm. 5-imut

Aalajangersakkami imm. 2 allannguuteqarani Inuussutissarsiutinik ilinniartitsinermit inatsimmi § 7, imm. 2 ingerlateqqinneqarpoq, Naalakkersuisullu pisinnaatillugit aalajangersagaliorsinnaanermik, piumasaqaatit qanoq ittut qinnuteqartumit naammassineqarsimassanersut toqqaannartumik inuussutissarsiutini tunngaviusunik ilinniakkanut isersinnaanissamut. Tamatumunnga atatillugu naatsorsuutigineqarpoq ersissatut malittarisassani pineqartuni, ilinniagaqartut meeqqat atuarfianniit inaarutaasumik misilitsissimasuunissaat. Ilanngullugulu aamma inuussutissarsiutinik ilinniakkat ilaanni piumasaqaataassaaq ilinniakkamut isernissamut atasumik pikkorissarnermik naammassisaqarsimanissaq. Ilutigisaanik naatsorsuutigineqarpoq Naalakkersuisut inuussutissarsiutinik ilinniakkanut isernissanut aalajangersagaat attuumassuteqassasut ilinniagaqartussat meeqqat atuarfianni karakteriitut, kiisalu naliliinernut ataatsimut isigisumik piukkunnassusianik. Aalajangersakkamik tunngaveqartumik malittarisassanik aalajangersaasoqarsinnaavoq qinnuteqartunik nalilersuisarnerit pillugit, tamatumanilu aamma ilinniagaqalernissamut misilitsittarnerit pillugit.

Imm. 6-imut

Siunnersuummi § 8, imm. 6, allannguuteqanngitsumik ingerlatitseqqinneruvoq Inuussutissarsiutinik ilinniartitsinermit inatsimmi § 7, imm. 6-imik. Aalajangersakkamik oqaasertaliinermi “. sinnaavumik atuineq” pissuteqarpoq isiginiaanermik inuussutissarsiutinik ilinniakkat sinnerinut atatillugu Naalackersuisut akuersisinnaasut isersinnaanermut piumasaqaatinik naammassinnittoqarsimanissaanik. Aalajangersakkami aallaaviuvoq inatsisitigut isumannaatsumik inissisimasoqarnissaanik, ilinniagaqartup naatsorsuutigisinnaassammagit isernissamut piumasaqaatit ersarissut, Namminersorlutik Oqartussanit akuerineqartartuni ilinniakkani, ilinniagaqalertussap qinnuteqarfigissallugit kissaatigisinnaasaani. Aalajangersagarlu aamma ilanngullugu atortinneqarsinnaavoq ilinniagaqalernissamut misilitsinermit maleruagassiornermit.

§ 9-mut

Pineqarpoq ingerlatitseqqinneq Inuussutissarsiutinik ilinniartitsinermit inatsimmi § 7a-mik, ikkunneqartumik inatsimmik allannguinermit kingullermi Inatsisartut inatsisaatigut nr. 25, ulloq 13. juni 2023-meersukkut.

Imm. 1-imut

Matumani pineqarpoq pisinnaatitsineq Naalackersuisut siunnersuummi § 8, imm. 3-mi ersarissunik isernissamut piumasaqaataasunik sanioqqutsisinnaanerannut.

Immikkut akuersissuteqarsinnaanermut periarfissami siullermi § 9, imm. 1, nr. 1-imiittumi innersuussisoqarpoq § 13, imm. 2-mut, ilinniarfimmi sungiusaammik suliffeqartarnermit sammisumi. Tamatumani paasineqassaaq sungiusaammik sulineq ilinniarfimmi namminermi ingerlanneqartoq, suliffeqarfimmi ingerlanneqarani lærlingitut isumaqatigiissummik tunngaveqartumik. Ilinniarfimmi sungiusaammik sulineq ingerlanneqarsinnaavoq ilinniakkamut malittarisassat naapertorlugit, ilinniartitaanermut pilersaarummi aalajangersagaasut ilinniakkamut pineqartumut atasut. Tamatumalu saniatigut ilinniarfimmi sungiusaammik sulisitsinissaq pisariaqalersinnaavoq pisuni lærlingitut isumaqatigiissutaasumik imaluunniit ilinniagaqarnissamut isumaqatigiissutaasumik tassangaannartumik atorunnaarsitsisoqarsimatillugu, tamatuma ilinniagaqartumut tutsinneqarfigisinnaanngisaanik, ilutigisaanillu ilinniarfiup periarfissaqarfigisaani ilinniartumut neqerooruteqarsinnaanermik sungiusaammik sulinerup ilinniarfimmi namminermi ingerlassinnaaneramik. Tamatumunnga atatillugu aaqqissuussineq ingerlatitseqqinneruvoq maanna aaqqissuussinermit ilinniakkani sungiusaammik sulinerup ilinniarfimmi ingerlanneqarfigisinnaasaanik.

§ 9, imm. 1, nr. 2, aalajangersakkami nr. 1-ip assigisaannik aalajangiivoq qanoq Naalackersuisut § 8, imm. 3 sanioqqussinnaaneratt pillugu.

§ 9, imm. 1, nr. 2-mi taamaasillutik pineqarput siumoortumik aalajangiisinnaaneq ilinniagassaq aallartinneqarsinnaasoq lærlingitut isumaqatigiissuteqareernani imaluunniit

ilinniagassamut isumaqatigiissuteqareernani, naak inuussutissarsiutinik ilinniagaq ilinniarfimmi sungiusarnermik ingerlatsiviususaaq pineqaraluartoq. Aalajangersagaq taamaasilluni periarfissaqartitsivoq suliffeqarfimmi sungiussaammik sulinermut taarsiullugu assersuutigalugu ukiumi ataatsimi tunngaviusumik ingerlatsiviusinnaasoq. Aalajangersakkap kinguneraa taamaattoqarpat sungiussaammik sulinertaanik nuussisoqassasoq ilinniakkap ukiuani siullermi, kingusinnerusukkut ingerlanneqartussamik.

Aalajangersakkap kingunerinnigilaa lærlingitut isumaqatigiissuteqarnissamik imaluunniit ilinniakkamut isumaqatigiissuteqarnissamik piumasaqaatit inuussutissarsiutinik ilinniakkani atorunnaarnerat, kinguneraali ilinniagaqartup lærlingitut isumaqatigiissuteqarnissaa imaluunniit ilinniagaqartutut isumaqatigiissuteqarnissaa ilinniakkami kingusinnerusukkut, taamalu piumasaqaat lærlingitut isumaqatigiissuteqarnissamik imaluunniit ilinniartutut isumaqatigiissuteqarnissamik piumasaqaat suli atuummata. Kisianni suliffeqarfimmi sungiussaammik sulinermik ingerlatsinissaq ilinniakkap ingerlanerani kingusinnerusukkut pisussaavoq.

Innersuussinerup § 5, imm. 2 aamma § 36, imm. 1-imut assigaa akuersissuteqarneq imm. 1, nr. 2 tunngavigalugu pisussaammat Naalakkersuisut akuersinerisigut ilinniartitaanermik ingerlatsiviup ilinniartitaanernut pilersaarutitut ilinniakkamut pineqartumut suliarisimasaanik. Innersuussinerup erseqqissaatigissavaa § 8, imm. 3-mik sanioqqutsineq pisussaammat suliarilluagaasunik aaqqissuussaasunillu periaasissanik suliaqareernikkut, suliamut atasunik pissutsinik ilanngussilluni. Periarfissaq aalajangersagaq naapertorlugu malitassamik pingaarnermik sanioqqutsisinnaanermut § 8, imm. 3-mi, taamaattumik iluaqutigineqarsinnaanngilaq immikkut akuersissuteqartoqarnissaanik qinnuteqaammik nassiussinerinnakkut, tassanngaannartumik pisariaqartitsilernermik pissuteqartumik, tunngaviusumik ilinniartitsisoqarnissaanik atuartitsiviusumik.

Aalajangersakkami siulliusoq oqariartuut “saaq” siunertaqarpoq oqarniarneq naatsorsuutigisaqarnermik ilinniagaqartup immikkut akuersissuteqartoqarneratigut aamma inuussutissarsiutinik ilinniakkami tunngaviusumik ilinniagaqarnissami tiguneqartoq, ilinniagaqalersussap aamma ilinniagaqalersinnaanermut piumasaqaataasut ilinniartitaanermut pilersaarusiimiittut naammassisimappagit, Naalakkersuisunit akuerineqartartut, tak. imm. 1, nr. 2.

Imm. 2-mut

Aalajangersakkap imm. 2 Naalakkersuisunik periarfissaqartitsivoq piumasaqaateqarsinnaanermut qanoq § 8, imm. 3-p saneqqunneqarsinnaanerata aaqqissuunneqarsinnaanera pillugu. Tamatumunnga atatillugu aalajangersaasoqarsinnaavoq ilinniarfimmi sungiussaammik sulisitsinissamut, tak. imm. 1, nr. 1, aamma ilinniartitaanerit tiguneqartarnerit piffigisagaat siumoortumik lærlingitut isumaqatigiissuteqareernani imalluunniit ilinniagassamut isumaqatigiissuteqareernani.

Ilanngullugu aalajangersagaq atortinneqarsinnaavoq atasumik imm. 1, nr. 2-mi eqqaaneqartumut sanioqutsisinnaanermut pisussaaffimmik qularnaarinissamik siumoortumik lærlingitut isumaqatigiissuteqarnissamik imaluunniit ilinniakkamut isumaqatigiissuteqarnissamik. Naalakkersuisut tamatuma kingorna akuersinissamut imm. 1, nr. 2 naapertorlugu piumasarissavaat ilinniartitaanermik ingerlatsiviup piumasaqaatit ersarinnerusut naammassisimassagai. Tamatumani pineqarsinnaapput ilinniartitaanermik ingerlatsiviup paasisareersimanissaa qanoq ilinniagaqalersussap lærlingitut isumaqatigiissuteqareernani imaluunniit ilinniakkamut isumaqatigiissuteqareernani qularnaarniarneraa lærlingitut isumaqatigiissuteqarnissaq imaluunniit ilinniakkamut isumaqatigiissuteqarnissaq ilinniakkamik ingerlatsinerup ingerlanerani kingusinnerusukkut. Tamanna assersuutigalugu pisinnaavoq pilersaarummik suliaqarnikkut, qanoq lærlingitut isumaqatigiissuteqarnissap imaluunniit ilinniagaqarnermut isumaqatigiissuteqarnissap naammassiniarneqarnera. Kiisalu aamma piumasaqaateqartoqarsinnaavoq ilinniartitaanermik ingerlatsiviup takussutississagaa ilinniartitaanerit neqeroorutigineqartut naammassisinnaaneritut pisariaqartunik nukissaqarneq, tamatumani aamma ilinniartitsisussaqarneq, ininik ilinniartitsivissaqarneq, atortorissaarutininik peqarneq, ilinniartunut ineqarfuteqarneq il.il.

§ 10-mut

Aalajangersagaq ilaannakuusumik ingerlatitseqqinneruvoq § 8-mik maanna Inatsisartut inatsisaanni atuuttumi, aalajangersagarlu pisariaqarnera naapertorlugu iluarsaataalluni ilinniartitaanermik ingerlatsiviit taaguutaannut atatillugu, maanna taamaallaat qitiusumik ilinniartinnik pineqartunik, inuussutissarsiutinik ilinniartit pinnagit, tak. § 3. Taamaattumik maanna atuuttoq imm. 4 aamma 5 ingerlateqqinneqanngillat. Kiisalu aamma aalajangersakkami atuuttumi imm. 2 Kalaallit Nunaata avataani ilinniagaqarnissanut tiguneqartarneq ingerlateqqinneqanngilaq, tamatumani apeqqutit nunatta avataani ilinniartitaanermik ingerlatsivimmi ilinniagaqartussanik tiguisarnermut tunngasuummat.

Imm. 1-imut

Aalajangersakkami imm. 1 tassaavoq ingerlatitseqqinneq § 8, imm. 1-imik Inatsisartut inatsisaanni maanna atuuttumiittumik, kisiannili siunnersuummi aalajangersakkami naleqqussaanernik iluarsiisoqartarluni innersuussinerni, aammalu qitiusumik ilinniartit kisimik pineqarnerat pillugu.

Aalajangersakkami aalajangiunneqarpoq inuussutissarsiutinik ilinniakkamut qinnuteqartut tamarmik ilinniagaqalernissamut piumasaqaatinik naammassinnittut, pisinnaatitaaffigaaq tiguneqarnissartik. Tamannali taamaakkaluartoq isiginiarneqassaaq § 11-mut atasumik, tassani Naalakkersuisut ilinniagaqalersussanik tiguisinnaanernik killiliinernut maleruagassiorsinnaammata. Aalajangersakkallu tamatuma saniatigut ilinniagaqalersinnaasut pisinnaatitaaffilinnilai ilinniartitaanermik ingerlatsivimmi aalajangersimasumi tiguneqarsinnaanerannut. Tassami erseqqissarneqarpoq ilinniartitaanermik ingerlatsiviup

qinnuteqarfigineqartup assersuutigalugu tiguneqarsinnaasut killeqarnerannik peqquteqartumik ilinniartumik qinnuteqartumik tiguisinnaangikkuni, taamaallaat isumagisussaagaa ilinnialerniartup ilinniarfimmi allami ilinniakkap pineqartup assigisaanik ingerlatsiviusumi tiguneqarsinnaanera isumagisassarigaa. Ilinniartunngorsinnaasut killeqarsinnaaneranni innersuussisinnaatitaanerup aamma tunngavigaa pissusissamisoorsinnaammat ilinniartup ilinniarfimmi sungiusaammik suliffiulertussamut qanittumiittumi ingerlatsisinnaanera, imaluunniit angerlarsimaffigisamut qanittumiinnera.

Imm. 2-mut

Aalajangersakkami imm. 2 ingerlatiteqqinneruvoq Inuussutissarsiutinik ilinniartitsineranut inatsimmi § 8, imm. 3-mik, tunngallunilu Naalakkersuisut pisinnaatitaanerannut malittarisassiorsinnaaneranut ilinniarfinni suleqatigiittarnerit pillugit, ilinniakkanik neqeroortarnerni aamma inissanik agguaaassisarnerni ilinniagaqalertussanillu tiguisarnerni. Tamatumani ilanngullugit pineqarput pissutsit aamma Naalakkersuisut aqussinnaasaat Naalakkersuisut nalinginnaasumik ilitersuisussaataitaanerannik tunngaveqartumik, tamatumalu kingunerisaanik ataatsimut pisinnaatitaaneramik suliassanik ilinniarfiit akornanni agguaaassisarnermut.

Periarfissaq malittarineqartussanik ataatsimut isigisunik aalajangersaasinnaaneranut tamatumunnga atatillugu atatiinneqarpoq, aallaavigalugu kissaateqarnek qularnaarinissamik pissutsit ersittuunissaannik, matumani aamma nukit piusut iluaqutigineqarsinnaasut naammassinnissinnaassuserlu piginnarumallugit. Assersuutigalugu aalajangersaasoqarsinnaavoq erseqqilluartunik malittarisassanik, ilinniarfiup ilinniarfiilluunniit arlaqartut suleqatigiissutigisassagaat ilinniagaqalertussat ilinniakkani aalajangersimasuni aallartitsisussat, siunnerfigalugu aallartittussat ataatsimut ilinniarfimmi ataatsimi katersorneqarsinnaanerak nukissanik iluaqutissanik pilersitsiumalluni. Tamatuma kingornagut ilinniartitsineramik ingerlatsiviusoq ilinniagaqalertussanik ilinniarfimmu allamut ingerlatitsisimasoq aallussisinnaalissaaq ilinniakkamik allamik. Taamaasillutik Naalakkersuisut maleruagassiorsinnaapput ataatsimut ataatsimoortitsilertarnernik, nunap immikkoortuini katersuutsitsisarnernut ilinniartitaaneramik, tamatumani aamma malittarisassanik ilinniakkat suut ilinniartitaaneramik ingerlatsiviup neqeroortutigisinnaassanera imaluunniit neqeroortutigissanera pillugit.

§ 11-mut

Aalajangersagaq ingerlatiteqqinneruvoq Inuussutissarsiutinik ilinniakkanut inatsimmi § 9-mik.

Aalajangersagaq siunnerfeqarpoq qularnaariniarnermik ilinniarfiup naammassisinnaasat sinnerlugit tiguisassannginnissaanik, ilinniartitaanerit ingerlanneqarnerannut akornusiinngitsumik. Eqqaaneqartoq kingulleq assersuutigalugu pissuteqarsinnaavoq

ilinniarfiit ilinniartitsinermut avatangiisinik naammattunik peqannginnerannik imaluunniit nammattunik ilinniartitsisussaqaannginnermik, ilinniartitaanerup naammaginartumik ingerlassinnaanissaanut, soorluttaaq aalajangersagaq atorneqarsinnaasoq ilinniagassanik annertuumik suliffissaaleqiffiusunik killiliinissanut. Siunnerfiuvoq killiliisarneq pisassasoq kvote-nik annertussusiliisarnikkut, imaalillugu ilinniagaqalertussat assersuutigalugu karaktererinnerusut salliutinissaat aallaaviusinnaanngorlugu.

Kapitalimut 4-mut

Kapitali 4 annertunerusutigut ingerlatitseqqinneruvoq Inuussutissarsiutinik ilinniakkanut inatsimmi kapitalimik 4-mik, tunngasuullunilu inuussutissarsiutinik ilinniakkat aaqqissuussaaneritut, tamatumani aamma paarlakaattumik ilinniarfimmi ilinniagaqartarnerup sungiusaammillu suliffeqartarnerup aaqqissuunneqartarnerinik, aamma Naalakkersuisut periarfissaannik aaqqissuussisarnissanut ilinniartitaanerni periusissanik pingaarnernik. Tamanna aamma atuuppoq ilinniakkat qanoq sivilisussuseqarnissaanut atatillugu, ilinniakkanik sivikinnerulersitsisinnaanermut periarfissani aamma ilinniagaqalertussanut immikkut ittunik aallaaveqartunut aaqqissuussisarnernut, soorluttaaq tunngaviumik ileqqusooq ilinniakkanut akiliuteqarani ilinniagaqartarnermik ileqqusut kapitalimi ilaasuut.

§ 12-imut

Aalajangersagaq ilaannakuusumik ingerlatitseqqinneruvoq Inuussutissarsiutinik ilinniakkanut inatsimmi § 10-imik, ilanngunnagit imm. 1 aamma 2 aalajangersakkami maanna atuuttumi ingerlateqqinneqaanngitsut, tassami annerusutigut taanni uteqqiinnerummat § 2-mi nassuiaatinik.

Imm. 1-imut

Imm. 1 allannguuteqarani ingerlatitseqqinneruvoq Inuussutissarsiutinik ilinniartitsinermut inatsimmi § 10, imm. 3-mik. Aalajangersakkap kinguneraa Naalakkersuisut akuersissutigisinnaammassuk inuussutissarsiutinik ilinniakkat ilaasa ingerlanneqarsinnaanissaat ilinniarfinni allani aamma ingerlatsivinni allani, Inatsisartut inatsisaanni pineqartuni qitiusumik ilinniarfinni pinnani. Akuersissuteqarneq tunngaviumik pisarpoq pisortaqaqfimmit suliaasaqaqfimmu akisussaasumiit. ilutigisaanillu akuersissuteqartoqarsinnaavoq inuussutissarsiutinik ilinniakkap suliffeqaqfimmi ingerlanneqarsinnaanera. Taamaasilluni aalajangersakkami periarfissaatinneqarpoq suliffeqaqfiit inuussutissarsiutinik ilinniartitaanernik ingerlatsiviusinnaanerat. Taamatut akuersissuteqarsinnaanermut aallaaviussaaq suliffeqaqfiup pineqartup ilinniagassaq nammineq aningaasalersussagaa ingerlatissagaalu. Taamaattoq Inatsisartut aningaasanut inatsisikkut tapiissuteqarsinnaapput ilinniakkap piviusunngortinnissanut.

§ 13-imut

Imm. 1 allannguuteqaanngitsumik ingerlatitseqqinneruvoq Inuussutissarsiutinik ilinniakkanut inatsimmi § 10, imm. 4-mik, oqaluttuassartaalu aallaaveqarluni Inatsisartut Kultureqarnermut Ilinniartitaanermullu Ataatsimiititaliaata apeqquteqaammik 1996-imi saqqummiussaaniq, sungiusaammik suliffeqarfinni suliffissat amerlineqarnissaannut periarfissat pillugit. Ilinniakkamik aallartitsisartut amerlanerulersikkumallugit aalajangiisoqarpoq Saviminilerinermik Ilinniarfimmi aamma Sanaartornermut Ilinniarfimmi sungiusaammik sulisarneq misiligutitut aallartinneqassasoq. Tamanna tunuliaqutaralugu aalajangersagaq manna ilanngunneqarpoq. Ilutigisaanik Naalakkersuisut pisinnaatinneqarput aaqqissuussinermut atatillugu maleruagassiornissamut, periaatsit ilinniartitaanernik ingerlatsivinni aalajangersimasumik aaqqissuussininnngussappata.

Imm. 2-mut

Aalajangersagaq ingerlatitseqqinneruvoq Inatsisartut inatsisaanni maanna atuuttumi § 10, imm. 4, oqaaseqatigiit aappaanik. Aalajangersakkap Naalakkersuisut pisinnaatippai malittarisassiornissamut ilinniarfimmi namminermi sungiusaammik sulisarnermut, ilinniarfinni taamaattunik aaqqissuussinerit aalajangersimasunik ingerlanneqalissappata.

§ 14-imut

Aalajangersagaq siunnersuummi § 14-imiittoq annerusutigut ingerlatitseqqinneruvoq Inuussutissarsiutinik ilinniartitsinermut inatsimmi § 11-imik.

Imm. 1-imut

Aalajangersagaq imm. 1-imiittoq ataatsimut pisinnaatitsissutitut malittarisassiaavoq, isigineqassallunilu siunnersuummi § 6-imut atasumik. Taanna tassaavoq ataatsimut Naalakkersuisunut pisinnaatitsissut malittarisassiornissamut ilinniakkanut ataasiakkaanut. Aalajangersakkamut maanna atuuttumut sanilliullugu iluarsisuteqartoqarpoq, tassami aalajangersaaneq pisassanngimmat brancheudvalg-imiit imaluunniit qitiusumik ilinniarfimmi siulersuisut inassuteqarnerisigut.

Nr. 1

Aalajangersakkami erseqqissaavigineqarpoq Naalakkersuisut aamma pisinnaatitaaffigigaat ilinniartitaanerup sivisussusissaata aaqqissuussaaneratalu aalajangiiffigisarnissaat, matumani aamma qaqugukkut ilinniarfinni ataasiakkaani namminerni ilinniartitsisoqartarnissaa aammalu qaqugukkut sungiusaammik sulisoqartarnissaa. Taamaasilluni aalajangersagaq isigineqarsinnaavoq pisinnaatitsissutitut aqutsinissamut ilinniakkani ataasiakkaani pineqartunik pissutsinik.

Naak Naalakkersuisut maleruagassiortarnissanut pineqartunut pisinnaatitaaffimmik tigungminnituugaluartut, naatsorsuutigineqarpoq piviusumik siunnersuummut

aalajangersakkami ilinniartitaanermik ingerlatsiviit ilinniartitaanermut pilersaarutissat suliarisassagaat, takukkit minnerunngitsumik § 5, imm. 2 aamma § 36, imm. 1, pisortani sulianut oqartussaasut nalinginnaasumik periaaserisassagaat suliarisassagaallu malinnaaneq ilinniartit ilinniartitaanernut pilersaarutitik suliaqarnissamik pisussaaffeqarnerminnik naammassinnittarnissaat, tunngaviusunillu piumasaqaatinik naammassinnittarnissaat. Taakkunaniipput ilinniartitaanerit sivilissusissaat aqqissuussaanerilu. Kisiannili aalajangersagaq aamma atorpeqarsinnaavoq nalunaarusiornikkut malittarisassiornermut, tamanna pisariaqartoq paasinarsissappat. Aalajangersagarlu aamma isigineqassaaq tunngavigalugu Naalakkersuisut pisinnaatitaanerannik fagini aalajangersimasuni pisinnaasassanik aqutsisinnaanermik, ilinniakkani ataasiakkaani namminerni § 25 naapertorlugu.

Nr. 2

Siunnersuummi § 14, imm. 1, nr. 2, ingerlatitseqqinneruvoq Inuussutissarsiutinik ilinniartitsinermit inatsimmi § 11, imm. 1, nr. 2-mik. Tamatumunngalu ilaatigut oqaatigineqassaaq Naalakkersuisut aalajangersagaliorsinnaammata ilinniartitaanerit ilaanniit peqataanginnissamut, assersuutigalugu ilinniagarereersimasanik nuussisarnermut – merit – nalunaarusiornikkut. Ilutigisaanillu Naalakkersuisut aalajangersagaliorsinnaapput ilinniartitaanernut immikkut aqqissuussaasussanut, inunnut immikkut ittunik aallaaveqartunut atatillugu. Tamatumani pineqarsinnaapput siusinnerusukkut naleqquttumik suliaareersimasut imaluunniit ilinniagaareersimasut ilinniakkamut maanna ingerlanneqartumut atatillugu. Aalajangersakkamillu tunngaveqartumik assersuutigalugu nalunaarummik suliaqartoqarsinnaavoq, assersuutigalugu inersimasutut lærlingiusarnermut tunngatillugu. Ilaatigut tamanna tunuliaqutaralugu Inersimasunik ilinniartitsinerit pillugit Namminersorlutik Oqartussat nalunaarutaat nr. 9 ulloq 9. maj 2016-imeersoq atortuulersinneqarsimavoq.

Kiisalu aamma Naalakkersuisut aalajangersagaliorsinnaapput aqutsissutaasussamik ilinniakkanut immikkut aqqissuussaasunut aalajangersimasunut, aammalu soorlu ilinniartitaanerit ileqqussanik tunngaviusunik pilersitsinerit, aqqissuussaasunut inunnut immikkut aallaaveqartunut tunngaveqartunullu, tamatumanilu aamma inersimasunik ilinniartitsinerit - lærlinginut – tunngasuni. Ilutigisaanillu oqaatigineqassaaq ilinniagareriikkani nuussisarnermut - merit - atatillugu nalunaarusiaq imaqarsinnaammata ileqqussanik aalajangersimasunik ilinniakkanik sivikinnerulersitsisarnerit atasunik.

§ 15-imut

Aalajangersagaq tamakkiisumik atueqqinneruvoq Inuussutissarsiutinik ilinniartitsinerit inatsimmi §12-imik. Aalajangersagaq tunngasuuvoq pisunut ilinniartitaanerit ilaasa imarisamikkut imminnut qanittutut isigineqarfigisaanni, imaalillugu Naalakkersuisut ilinniakkanik gruppikkaarlugit aqqissuussinnaatillugit ilinniartitaanerit aqunneqarnerinik

ataatsimoortumik gruppini pineqartuni. Tamatumunnga atatillugu oqaatigineqassaaq ilinniakkami ilaasinnaammata fagit arlaqartut imminnut qanittut.

Imm. 2-mut

Aalajangersakkap assigaa Inuussutissarsiutinik Ilinniartitsinerit pillugit inatsimmi § 12, oqaaseqatigiit aappaat, maanna immikkoortutut immikkut aaqqissuunneqartoq.

Aalajangersakkap oqariartuutigaa ilinniakkat ilaat ilinniakkani assigiinngitsuni fagitigut assigiaartarsinnaanerat.

§ 16-imut

Aalajangersagaq ingerlatitseqqinneruvoq Inuussutissarsiutinik ilinniartitsinerit pillugit inatsimmi § 13-imik. Aalajangersakkap Naalackersuisut pisinnaatitaanerak killilersorpaa, ilinniakkat imarisaasa aqussinnaanerinut atatillugu, soorlu siunnersuutigineqarpata ilinniartitaanernut pilersaarussianik suliaqarnerni, tak aamma § 36, imm. 1, ilinniakkamut aalajangersimasumut pilersaarummik suliaqarnermut tunngatillugu. Aalajangersakkami ilinniakkami piumasaqaatit aaqqissuunneqarput, ilinniakkap suliaasaqarfimmi atorneqarnerminilu naammattumik siammasissuseqarnissaa, imaluunniit tunngavissiiinnaanera ingerlaqqittumik ilinniagaqarnissamut, matumani aamma qaffasinnerusumik ilinniagaqarnissamut.

§ 17-imut

Aalajangersagaq pisariaqarnera tunngavigalugu iluarsisusikkamik ingerlatitseqqinneruvoq Inuussutissarsiutinik ilinniartitsinerit pillugit inatsimmi § 14-imik, pisinnaatitsillunilu Naalackersuisut pilersitsisinnaanerannik immikkut ilassutitut pikkorissartitsisarnernik ilinniagaqartunut inuussutissarsiutinut ilinniakkamik aallartitsisimasunut, ingerlaqqinniartunullu inuussutissarsiutinut ilinniakkami allami. Tamatuma saniatigut ilinniagaqartut inuussutissarsiutinik ilinniakkanik ingerlatsisut imaluunniit immikkut ittunik allatigut suliffeqarnermi aallaaveqartut inuussutissarsiutinut ilinniakkamik allamik aallartitserusuttut, pikkorissartitsinermi peqataasinnaapput. Aalajangersagaq ingammik siunnerfeqarpoq ilinniakkap nutaannngilisoorfigisaani, taamalu suliamik ilinniarsimasut sulisartut gruppit pisinnaasanik pigisaqarfiginngisaanni suliffeqarnermi piumasarineqartuni. Gruppi matumani pineqartoq taava pikkorissarnermi peqataanikkut piginnaasaminnik inuiaqatigiinni pisariaqartitsineranut naleqqussaasinnaapput.

§ 18-imut

Aalajangersagaq pisariaqarfiisigut iluarsisanik naleqqussagaalluni ingerlatitseqqinneruvoq Inuussutissarsiutinik ilinniakkanut inatsimmi § 15-imik.

Imm. 1-imut

Aalajangersakkap imm. 1-iani erseqqissaatiginneqarpoq ileqqusoq tunngaviusumik, tassalu maani nunami ilinniartitaanerit annertunerpaatigut atuisunut akeqanngimmata.

Aalajangersagarlu aamma uteqqiineruvoq § 3-mik, maanna atorunnaarsinneqarsimalersumik Kalaallit Nunaannut pisinnaatitsissutitut inatsimmi 29. november 1978-imeersumik inuussutissarsiutinik ilinniartitaanerit pillugit. Tamatumalu saniatigut oqaatigineqassaaq oqariaaseq “atuarfimmi ilinniartitsineq” atorneqarmat “atuartitsinermit” atornagu.

Taamaasilluni erseqqissarniarneqarpoq akiliutitaqanngitsumik ilinniartitsineq atuartitsinerinnaanngitsumik imaqartarmat, atuarfimmi ilinniartitsinerup ilagisarmagu atortussat atorneqartut, tak. aamma imm. 2.

Imm. 2-mut

Nalinginnaasunik atuartitsissutaasartunik oqaatsimi paasineqassaaq atuartitsissutitut ilinniagaqartup nalinginnaasup pisariaqartitai ilinniakkamik naammassisaqarumalluni. Taamaasilluni ilinniarfiup pisussaaffingnilaa immikkut ittunik atuartitsinermit atortulersuusersuinissaq, assersuutigalugit ikiorsiissutissanik immikkut ittunik innarluuteqarnermik pissuteqartumik atugassiissutigisariaqartunik. Taamatut immikkut ilinniartitsinermit atortorissaarutit pisariaqartinneqartut allatigut aningaasalersorneqartarput. Tamakkua nalinginnaasumik annerusutigut isumaginnittoqarfimmit imaluunniit peqqinnissaqarfimmit aqunneqartarmata. Soorlu imm. 2-mi takuneqarsinnaasoq, aalajangersagaq isiginiarneqassaaq imm. 3 ilanngullugu.

Imm. 3-mut

Imm. 3 ilinniartitsinermit atortussanut immikkut ittunut sammititaavoq, ilinniagaqartup nammineq pigiligassaanik, soorluttaaq ersersinneqartoq ilinniagaqartut taamaallaat killeqartumik ilinniartitsinermit atortussanik namminneq isumaginnittussaasartut. Tamanna minnerunngitsumik imaqarpoq akiusunik naliliinermit, atortussat pissarsiassat ilinniagaqartumut artornassanngimmata. Ilanngullugulu oqaatigineqassaaq naalackersuisoqarfiup oqartussaasup pisussaaffik ilinniarfinnut ingerlateqqissinnaammagu, tamanna periaaseq ukiualunni atuussimammat.

Imm. 4-mut

Aalajangersakkap imm. 4 taamaallaat sammititaavoq ilinniarfinnut Naalackersuisunit § 12, imm. 1 naapertorlugu akuerisaasunut, imatut paasillugu ilinniarfiit allat § 3-mi ilaangitsut, soorluttaaq aalajangersagaq suliffeqarfinnut aamma sammisinnaasoq. Ilanngullugulu aalajangersagaq taamaallaat sammisaqarpoq ilinniarfinnik, ingerlatsivinnik aamma suliffeqarfinnik, qitiusumik ilinniarfinniit taamatut tapiiffigineqartanngitsunik.

§ 19-imut

Imm. 1-imut

Aalajangersagaq ingerlatitseqqinneruvoq Inuussutissarsiutinik ilinniartitsinermit inatsimmi § 16-imik, Naalackersuisunillu pisinnaatitsilluni ilinniarfimmi atuartitsinermit aningaasartuutissanik inuinnaat /namminersortut aningaasaliisarnersigut matussutissarsiorsinnaanermut.

Imm. 2-mut

Aalajangersakkap imm. 2-ata kingunerisaanik Naalackersuisut malittarisassaliorsinnaapput, periarfissaqarpat aningaasartuutissat agguataarumallugit Namminersorlutik Oqartussat aamma suliffeqarfiup arlaqartulluunniit akornanni.

Kapitalimut 5-imut

Kapitali 5 aqqissuussinerit kingunerisaannik iluarsiiusersukkamik ingerlatitseqqinneruvoq Inuussutissarsiutinik ilinniartitsinermit inatsimmi kapitalimik assinganik. tamatuma saniatigut malugeqquneqassaaq inussutissarsiutinik ilinniakkat tamarmiunngimmata sungiusaammik suliffeqartitsiviusartut. Tamanna ilaatigut atuuppoq ilinniagareriikkat qaavatigut ingerlaqqiffiusumik ilinniakkani aamma imarsiornermi ilinniartitaanerni, taamaattumillu kapitalimi 5-imi aalajangersakkat tamarmik ilinniakkanut tamanut naleqquttuunatik. Kingulliullugit eqqaaneqartut aamma atuupput ilinniartitaanermik ingerlatsivinni ilinniakkanut atasunik aalajangersakkani, ilinniagassanik tunngaviusumik suussusilersuiviusimasuni, suliassaqarfimmut atasuni fagini allani, fagini immikkut ittuni aamma fagini nammineq qinerneqarsinnaasuni. Imaanngilarlu inuussutissarsiutinik ilinniagassat tamarmik qinigassanik fageqartartut. Tamanna pillugu ersarinnerusumik aalajangersakkani namminerni paasissutissaqarpoq.

§ 20-imut

Aalajangersagaq annertunerusutigut ingerlatitseqqinneruvoq Inuussutissarsiutinik ilinniartitsinermit inatsimmi § 17-imik, siunertanillu qulequtaasunik inuussutissarsiutinik ilinniakkani nalunaarsuisuulluni.

Imm. 1-imut

Imm. 1 sanilliunneqassaaq § 1-imut, tassani nalunaarneqarmata inuussutissarsiutinik ilinniartitsinermit aqqissuussinerni siunertat, § 5, imm. 3-mik tunngaveqartumik nalunaarusiornikkut ilinniartitaanermut pilersaarusiortarnermik aalajangersaaviusoq. Ilutigisaanillu ilinniartitaanerup siunertaa isiginiarneqassaaq atasumik ilinniartitaanerup imaanik aqutsinermit siunnersuummi § 6-imik tunngaveqartumik. Tamatumalu saniatigut erseqqissarneqassaaq pissusissamisoortunik ataqatigiittoqassammat sungiusaammik sulinerup

ingerlanneqartarneranik aamma ilinniarfimmi ilinniakkamik ingerlatsinermi. Tamannalu assersuutigalugu isumaqarpoq piginnaasat ilinniagaqartup ilinniarfimmiinnermini pissarsiarisartagai misilinneqarsinnaasariaqartut sungiusaammik sulilluni ilinniagaqarnermi, soorluttaaq naatsorsuutigineqartoq sungiusaammik sulinerup aamma ilinniarfimmi teoriimik ingerlatsinerup akornanni sunniivigeqatigiittoqartarnissaa. Pineqartoq ataqatigiissitsisoqarnissaa ilanngullugu ersersinneqartussaavoq sungiusaammik suliffeqarnissamut pilersaarusionsi, tak. § 29.

Imm. 2-mut

Aalajangersakkami imm. 2-p assigaa ingerlatitseqqinnerullunilu Inuussutissarsiuutinik ilinniartitsinermut inatsimmi § 17, imm. 2-mik, nalunaarneqarlunilu ilinniakkamut qitiulluinnartumik atugassarititaammat ilinniagarineqartut imaaliinnarlutik naammassinnissinnaasasut suliffeqarnermi pisariaqartitsineranut sulisussanik piginnaangorsarsimasunik. Aalajangersagarlu ilaatigut siunnerfeqarpoq ilinniagassat imarisaasa malinnaatitaasunik aaqquissuussaajuaannartussaasut, taamalu nutaanngilisuussanatik suliffeqarnerit ineriartortuarnerannut atasunik. Kiisalu aamma ilinniakkat imarisaasa naammassisartussaavaat suliffeqarnermi piginnaanerit ujartorneqartuutut. Ilinniartitaanerillu taamaasillutik siunnerfiguaannassavaat suliffeqarnermi ineriartortuarnerup malinnaavigineqarnissaa. Ilanngullugulu aamma oqaatigineqassaaq piginnaanerit qanoq ittunik suliffeqarnermi pisariaqartitsisoqarnera qulaajaavigineqartuaannartussaasoq, piginnaanerit pisariaqartinneqartut pillugit nalilersuinerit missiliuusianillu suliffeqarnermeersunik tunngaveqartuaannaqqullugit.

Imm. 3-mut

Imm. 3 allannguuteqanngitsumik ingerlatitseqqinneruvoq Inuussutissarsiuutinik ilinniartitsinermut inatsimmi § 17, imm. 3-mik. Aalajangersakkami erseqqissarneqarpoq ilinniartitaanerit imaat aamma ilusilersorneqartussaammata ilinniagaqartut pisariaqartitsinerinik isiginiaaviummik, fagitigut aamma inuttut ineriartortarneq eqqarsaatigalugit.

Imm. 4-mut

Imm. 4 allannguuteqanngitsumik ingerlatitseqqinneruvoq Inuussutissarsiuutinik ilinniartitsinermut inatsimmi § 17, imm. 4-mik. Aalajangersakkami Naalakkersuisut pisinnaatinneqarput ilinniakkanut ilassutitut siunertanik aalajangersaasinnaanermik, tamanna pisariaqartinneqassappat. Aalajangersakkami aallaavigineqarpoq taanna atortinneqarsinnaasoq itisilerutaasunik maleruagassiornernut, ilassusiussanik imm. 1-3-mi pineqartut imaannik. Tamanna assersuutigalugu pisinnaavoq nalunaarummik suliaqarnikkut, ilinniartitaanerit pilersaarusionsiartut pillugit, tak. § 5, imm. 2 imaluunniit malittarisassiornikkut ilinniartitaanerit imaannut atasunik, tak. § 20, imm. 2.

§ 21-imut

Aalajangersagaq naleqqussaalluni iluarsissutitalimmik ingerlatitseqqinneruvoq Inuussutissarsiutinik ilinniartitsinermit inatsimmik § 18-imik. Taamaakkaluartoq pisinnaatitsissutitut aalajangersagaq aalajangersakkami atuuttumiittoq imm. 2-mi ingerlateqqinneqanngilaq, pisinnaatitsissut ilaareermat § 6-imi.

Aalajangersagaq oqariartuuteqarpoq siunertamik pingaarnermik ilinniakkat imarisaat aqunneqartartut ilinniartitaanernik pilersaarusiaticigut, akuerineqartussanik naalakkersuisoqarfimmit sulianut oqartussaasunit. Taaguutigineqartumut “ilinniartitaanermut pilersaarutit” aamma § 5, imm. 2-mut oqaaseqaataasuni nalunaarneqareersutut oqaatigineqassaaq, taakkunani aamma ilaasussaammata sungiusaammik sulinermik ingerlatsisoqartussaappat taakkua imarisassaat. Taamaasillunilu taamaallaat pineqanngillat ilinniakkat ilinniartitsinermit ingerlanneqartartut fagini aqqissuunneqarneri. Tamatuma saniatigut innersuunneqassaaq § 36, imm. 1, malittarisassanik aalajangersaasoq ileqquusussanik ilinniartitaanermut pilersaarutit tunngaviusumik qitiusumik ilinniartitsinermit forständerimit suliarineqartarmata.

§ 22-mut

Aalajangersagaq ataatsimut ingerlatitseqqinneruvoq Inuussutissarsiutinik ilinniakkanut inatsimmi § 19-imik. Aalajangersakkap pingaarnertut siunertaraa aalajangiutissallugu atuartitsineq ataatsimut isigisumik ingerlanneqartussaammata, tunniussisussaammallu ilinniagaqartunut pisariaqartunik ataatsimut isigisunik aamma immikkut ilinniakkamut sammisunik piginnaaneriligassanik. Taamaakkaluartoq oqaatigineqassaaq ataatsimut isigisumik oqarnermi immikkoormata sungiusaammik sulinermi aamma ilinnarfimmi atuartitsinermit ilinniakkani assigiinngitsuni sammineqartussat. Tamatuma saniatigut oqaatigineqassaaq nr. 1-4 tamakkiisuunngitsumik imaqarmata, ataatsimut piginnaanerisassanut aamma immikkut sammisani piginnaanerusussanut tunngasut eqqarsaatigalugit, kisiannili allassimasuni erseqqissarniarneqaannarmata siunertaasut ilaat, atuartitsinermit tunngavigineqartussat.

Nr. 1-imut

Nr. 1-imi erseqqissarneqarpoq ataatsimut isigisutut anguniakkatut, ilinniartitaanerit ilinniagaqartunut tunniussaqaassasut tunngavissanik suliaasaqarfimmi ingerlatsisinnaanissamut, ilinniakkami siunnerfiusumut. Tamatumani aamma ilaapput piumasaaqatit, ilinniakkap ullutsinnut naleqquttuunissaanik, teknologinut atornerqartunut atasuni ilinniakkami pineqartumut attuumasuni. Aalajangersagaq taamaasilluni oqariartorpoq piginnaasat ilinniagaqartup katersugassai – ilinniagassai – imaaliinnarluni atorsinnaasuussasut atorfinni ilinniakkami siunnerfigineqartuni.

Nr. 2-mut

Nr. 2-mi erseqqissarneqarpoq ilinniartitaanerup ilinniartumut tunniutissagai tunngavigisassat nammineerluni ilinniakkamik ingerlatitseqqissinnaalertussat, imaalillugu ilinniagaqartarneq unitsinneqassanngitsoq ilinniakkap naammassineratigut.

Nr. 3-mut

Tamatuma saniatigut siunnersuutigineqarpoq Naalakkersuisut pisinnaatinneqassasut malittarisassiornissamut ilinniartit siunnersuisarnikkut - ilitersuisarnikkut pisussaaffii pillugit, tamatumani aamma siunnersuisarnerit annertussusissaannik, siunnersuisartut qanoq ittunik piginnaaneqarnissaannik, siunnersuisarnerit imassaannik il.il. Nr. 3-mi erseqqissarneqarpoq ilinniagaq aamma ilinniagaqartumut inuttut ineriartornermik tunniussaqaassasoq, taakkualu paasineqartussaallutik piginnaanertut fagitigut angusassat saniatigut piginnaanerineqalertussatut, inooqatigiit akornanni naleqqussarsinnaanermik suliffeqarnermi, ilinniagaqartulli kinaassusianik siuarsaasussamik.

Nr. 4-mut

Nr. 4-mi erseqqissarneqarpoq aamma ilinniagaq fagitigut piginnaaneriligassat saniatigut aamma ilinniartup inuiaqatigiinni ilisimasasaanik tunniussiviussasoq, aamma inuiaqatigiinni aaqqissuussinerit atuuttuusut, suliffeqarnermi inuiaqatigiinnilu ataatsimut isigisumik. Aalajangersakkallu ilutigisaanik qularnaarniartussaavaa ilinniakkap siammasissuseqarnissaa, faginullu tunngasuinnaannginnissaa.

§ 23-mut

Aalajangersagaq ataatsimut ingerlatitseqqinneruvoq Inuussutissarsiutinik ilinniartitsinerut inatsimmi § 20-mik, taamaattoq imaalillugu imm. 2-mi oqaaseqatigiit aappaat siunnersuummi immikkoortutut nutaatut 3-tut immikkoortinneqarluni.

Imm. 1-imut

Aalajangersagaq siunnerfiusunik oqariartuutitut ippoq, ilinniagaqartunik atuartitsinermik aaqqissuussinermut atatillugu isiginiaasoqassasoq ilinniagaqartup nammineq inuttut pisariaqartitsinerinik. Tamatumani siunnerfiupput ilaatigut ilinniagaqartut fagitigut assigiinngitsuni inissisimasarnerisa isiginiarneqartarnissaat, aammalu assersuutigalugu pineqarsinnaallutik inuttut nammineq unammilligassat. Atuartitsinerup assigiinngiiaartumik aaqqissuunneqarsinnaanerata taamaattoq akornusissanngilaa siunertaasut fagini ataasiakkaani sammineqartuni naammassineqartarnissaat piffissaliussaasut iluanni. Taamaattumik ilassusiisoqarpoq oqaatsimik “sapinngisamik” aalajangersakkamut atuuttumut sanilliullugu.

Imm. 2-mut

Aalajangersagaq sammisarpoq ilinniartunut ilitersuisarnernik ilinniarfimmi pineqartumi ilinniakkamik ingerlatsisunut. Aalajangersagaq taamaasilluni samminngilaq ilinniakkanut siunnersuisarnernut inuussutissarsiutinullu siunnersuisarnernut.

Imm. 3-mut

Tamatuma saniatigut siunnersuutigineqarpoq Naalakkersuisut pisinnaatinneqassasut malittarisassiornissamut ilinniarfiit siunnersuisarnikkut - ilitersuisarnikkut pisussaaffii pillugit, tamatumani aamma siunnersuisarnerit annertussusissaannik, siunnersuisartut qanoq ittunik piginnaaneqarnissaannik, siunnersuisarnerit imassaannik il.il.

Pisinnaatitsissut oqaaseqatigiit imm. 3-mi aamma atorneqarsinnaapput aalajangersagaliornernut, siunnersuisarnerup aamma ataatsimut isigisuunissaa pillugu.

Tamanna isumaqarpoq siunnersuisarnermi aamma sammeneqartassasut suli ilinniagaqalersimangitsut ilinniarfimmi pineqartumi, kisiannili immaqa qinnuteqarnissamik isumaliuteqartut.

§ 24-mut

Aalajangersagaq annerusutigut ingerlatitseqqinneruvoq Inuussutissarsiutinik ilinniartitsinermit inatsimmi § 21-imik.

Aalajangersagaq ingammik pisariaqarpoq inuussutissarsiutinut tunngaviusumik ilinniakkani, ilinniakkani pineqartuni fagit assigiit ilinniartitsissutigineqartarmata. Tunngaviusoq, tassa ilinniakkap ingerlanerani faginic immikkoortunik annertusiartortumik sammisaqartarnek inuussutissarsiutinik ilinniakkani tamani atuuppoq.

§ 25-imut

Aalajangersagaq ilaannakuusumik ingerlatitseqqinneruvoq Inuussutissarsiutinik ilinniartitsinermit inatsimmi § 22-mik.

Aalajangersagaq siunnersuummi § 6-imut atatillugu isiginiarneqassaaq, ilinniartitaanernut ataatsimut tunngasumik.

Pisinnaatitsissulli taanna taarsiullugu siunnerfeqarpoq erseqqissaanissamik Naalakkersuisut malittarisassiorsinnaanerannik, ilinniakkami immikkoortunut ataasiakkaanut, faginut tunngasuni. Aalajangersagaq atorneqarsinnaavoq malittarisassanik aalajangersaanissanut, inuussutissarsiutinik ilinniartitsinerni faginut ataatsimut tunngasuni, assersuutigalugu faginut tunngaviusunut atatillugu nalunaarusiornikkut. Naatsorsuutigineqarmalli ilinniartitaanerit aqunneqassasut nalunaarutisigut ilinniakkat assigiinngitsut akimorlugit aqqissuussaasutigut ilinniartitaanernut pilersaarutitut tunngatillugu, aallaaviuvoq aalajangersagaq taamaallaat immikkut ittutigut atorneqartarumaartoq. Aalajangersagaq isumaqarpoq Naalakkersuisut siumoortumik mattutereersinnaanngikkaat ilinniakkat imaasigut aqutsinermit nalunaarusiortarsinnaaneq, pisariaqalersinnaammat assersuutigalugu inuiaqatigiinni

pisariaqartitsinerit naliliivigineqarpata pisariaqartoq ilinniakkanik immikkut imaqartunik ingerlatsisoqalernissaa.

§ 26-mut

Aalajangersagaq tamakkiisumik ingerlatitseqqinneruvoq Inuussutissarsiutinik ilinniartitsinermut inatsimmi § 23-mik, aalajangersarneqarpullu fagit tunngaviusut, immikkoortuni fagit aamma fagit immikkut ittut suuneri. Siunnersuummi erseqqissaasoqarpoq matumani pineqarmat pisussaaffiit iliuuserineqartussat.

Imm. 1-imut

Fagit tunngaviusut qularnaarisussaapput ilinniakkat ilinniagaqartunik piginnaaneqalersitsisarnissaannik § 22, nr. 2-4-mi immikkut erseqqissaatigineqartuni.

Imm. 2-mut

Immikkoortut iluanniittut fagit ilinniagaqartunik piginnaaneqalersitsisassapput ilinniakkat pineqartut imarisaanni, puigunnikkaluarlugit inuussutissarsiutini siammasinnerusunik piginnaanerit pisariaqartinneqartut. Ilutigisaanik fagit pineqartut ilinniagaqartunik piginnaaneqalersitsisassapput § 22, nr. 1-2-mi aallaaviusutut naatsorsuutigisaasunik.

Imm. 3-mut

Fagit immikkut sammisassat - specialefag - qularnaarissapput ilinniartitaanerit ilinniagaqartunik piginnaaneqalersitsisarnissaannik naatsorsuutigisatut aallaaviusunut, erseqqissaatigineqartunut § 22, nr. 1-2-mi, piginnaanernilli immikkut pigisariaqartunik eqikkaanerullutik ilinniakkanut pineqartunut naleqqussagaasunik.

§ 27-mut

Aalajangersagaq annerusutigut ingerlatitseqqinneruvoq Inuussutissarsiutinik ilinniartitsinermut inatsimmi § 24-mik. Soorlu nassuiaatitut oqaaseqaatini kapitali 5-imut aallarniutaasuni, faginik qinigassanik inuussutissarsiutinut ilinniakkani tamani ilaasoqannigilaq. Pisuni ilinniakkani faginik qinigassanik ilaasoqarfiusuni fagit neqeroortigineqartut ilinniagaqartut soqutigisaannik naapigiaasussaapput. Tassa imaappoq, neqeroortoqarsinnaasoq faginik isumassarsiorsinnaassutsimik imaqartunik, immikkuullarissumik imaaliinnarluni ilinniakkamut pineqartumut atasuunnigikkaluartunik. Ilutigisaanik neqeroorteqarsinnaavoq faginik qinigassanik, ingerlaqqiffiusumik ilinniagaqalersinnaanermut isumaqartunik, matumani aamma qaffasinnerusumik ilinniagaqarsinnaanermut, kiisalu fagit qinerneqarsinnaasut siunnerfeqartut najukkani aalajangersimasuni piguinnaanernik immikkut pisariaqartitsinerusuni peqarfiusuni.

§ 28-mut

Aalajangersagaq kinguneqartitsilluni iluarsiiissusikkamik Inuussutissarsiuutinik ilinniartitsinnermut inatsimmi § 25-mik ingerlatitseqqinneruvoq. Aalajangersagaq ilutigisaanik immikkoortunik arlaqartuni immikkoortitigaalerpoq.

Aalajangersakkap malippai ilaatigut siunnersuummi tunngaviusutigut ileqquusut, qitiusumik ilinniartimmi forständeriusup pisussaaffigilgai ullumikkut siulersuisuni imaluunniit ataatsimiititaliami inissisimagaluartut.

Imm. 1-imut

Aalajangersakkami aqqissuussisoqarpoq suleqatigiittoqarnissaanik sungiusaammik suliffissanik aqqissuussisarnermik ataqatigiissaarviup aamma forständerip akornanni, taamalu akuersissutissat forständerimit pisassallutik, sungiusaammik suliffissanut ataqatigiissaarinermik aqqissuussiviup inassuteqaataanik tunngaveqartunik.

Aalajangersakkami imm. 1-imut tunngatillugu oqaatigineqassaaq suliffeqarfiit arlaqartut isumaqatigiissuteqaqataasinnaammata ilinniagaqartup ataatsip sungiusaammik suliffeqarluni ilinniagaqartarnissaanut. Tamanna pisariaqartinneqarpoq ilinniartitaanerit ilaasa ingerlassinnaanissaanut, suliffeqarfiit tamarmik pisariaqartunik atortorissaruteqartannimmata, imaluunniit naammattunik suliassaartannimmata, pisariaqartinneqartunik ilinniagaqartup ilinniakkamik naammassillugu ingerlatsisinnaasarnissaanut. Aalajangersakkallu paasineqarnissaaniippoq forständerip akuersisinnaatitaanera suliffeqarfinnik ilinniakkamik ingerlatsiviusussanik.

Imm. 2-mut

Aalajangersakkami oqaaseqatigiinni siullerni oqaatigineqarpoq lærlingit ilinniagaqarnissamut isumaqatigiissuteqartoqarsimassasoq imaluunniit ilinniakkamut isumaqatigiissuteqartoqassasoq. Pineqartoq kingulleq atorineqartarpoq isumaginninnermut aammalu peqqinnissaqarfimmi suliassaqarfinni, siulliullugulu pineqartoq - lærlingit – ilinniagaqartarlutik inuussutissarsiuutinik tunngaviusunik ilinniartitsiviusut sinnerini, lærlingip suliffeqarfimmut atasumik ilinniartuunissamik erseqqissaatitut, suliffeqarfiit aamma lærlingip ilinniagaqarnissaanut akisussaasuusut. Inuussutissarsiuutinik ilinniartitsinerni allani piunasaqaataasarpoq sungiusaammik suliffeqarnissamut isumaqatigiissuteqartarneq, suliffeqarfiup aamma ilinniagaqartup akornanni, ilinniagaq suliffeqarfimmi sungiusaammik sulinertaqarsimatillugu.

Tamatununga atatillugu oqaatigineqassaaq sungiusaammik suliffissamut isumaqatigiissuteqarnissamik piunasaqaat aamma atuummat inuussutissarsiuutinik ilinniartitsinerni ingerlanneqartartuni § 9, imm. 1, nr. 2 naapertorlugu, taamaallaallu isumaqartumik ilinniakkamut tiguneqarfiusumi piunasaqaataanngitsoq lærlingit isumaqatigiissuteqareersimanissaq imaluunniit ilinniakkamut isumaqatigiissuteqareersimanissaq piffissami tiguneqarfiusumi.

Ilutigisaanillu oqaatigineqassaaq lærlingitut isumaqatigiisummik imaluunniit ilinniakkamut isumaqatigiisummik suliaqartoqartussaangimmat ilinniagaqartunut ilinniarfimmi sungiusaammik sulinermik ingerlatsisunut, suliffeqarfimmut piffissap ilinniagaqarfiusussap sinneranut isumaqatigiisuteqartoqartinnagu. Isumaqatigiisummi suliffeqarfiup aamma ilinniagaqartup akornanni atsiorneqartumi, ilinniagaqartup ilinniarfimmi namminerimi sungiusaammik sulisimamera piffissami ilanngaataasussaavoq, merit-eqaatasussaavoq.

Imm. 3-mut

Aalajangersakkallu assigilerpaa imm. 4, Inatsisartut inatsisaanni nr. 6, ulloq 16. juni 2016-imeersumiittoq.

Aalajangersagaq siunertaqarpoq erseqqissaaniarnermik ilinniarbitaanermik ingerlatsivimmi sungiusaammik sulineq tassaasoq periarfissaq kingulleq, taamalu allamik periarfissaqannginnermi aatsaat atorneqartussa, inuussutissarsiutinik ilinniakkanut atasumik suliffeqarfimmi sungiusaammik sulinissaq piumasaammat. Ilanngullugulu aalajangersakkami ersippoq, ilinniarbitaanermik ingerlatsiviusumi sungiusaammik sulisitsisoqarnissaa neqeroortigineqarsinnaanngitsoq illoqarfimmi allami – najugaqarfiginngisami sungiusaammik suliffissamik neqeroortigineqarsimagaluartumut.

Imm. 4-mut

Imm. 4 isigineqassaaq immikkoortumut 3-mut atasumik, tassani ersimmat ilinniagaqartup illoqarfimmi allami sungiusaammik suliffissaq innersuuneqartoq tigunggikkuniuk piumasaqaateqarsinnaanngimmat suliffeqarfimmi sungiusaammik sulisinnaanerup ilinniarfimmi sungiusaammik sulinermik taarserneqarnissaa.

Aalajangersagaq siunnersuutigineqartoq siunertaqarpoq periarfissaqartitsinissamik immikkut akuersissuteqartoqarsinnaaneramik, pissutsit immikkut ittut ilinniagaqartup pisuussutiginnisaasa tamanna pisariaqalersissappagu. Tamatumani assersuutigalugu tassaasinnaavoq angajoqqaap kisimiittup inuussutissarsiutinik ilinniakkamik ingerlatsisup aqqissuussinikkut periarfissaqarfiginngippagu illoqarfimmi allani sungiusaammik sulinissaminik ingerlatsinissani, assersuutigalugu piffissaq sungiusaammik suliffiusussaq imatut sivilissuseqarpat periarfissaqartitsisoqarani meeqqat nooqataasut illoqarfimmi pineqartumi meeqqanik paaqqinnittarfinni paarineqartarsinnaanerannut.

Immikkut akuersissuteqarneq aamma pisariaqalersinnaavoq atorneqartariaqalerlunilu ilinniagaqartup illoqarfimmut allamut sungiusaammik suliartornissaq periarfissaqarfiginngippagu, ilutigisaanillu isumaginninnermik oqartussat uppersarsarpassuk pissutsit immikkut ittut atuuttut, ilinniagaqartullu taamaattumik sungiusaammik suliffissamik neqeroortut itigartittariaqaraa. Tamatumunnga atatillugu tunngaviusutut aallaaviuvoq immikkut akuersissuteqarsinnaanermut tunngaviusut ilinniagaqartumik namminerimik pissuteqannginnerat.

Imm. 5-imut

Aalajangersagaq naleqqussaalluni iluarsiissutitalimmik ingerlatitseqqinneruvoq Inuussutissarsiutinik ilinniartitsinermik inatsimmi § 25, imm. 3-mik. Tassani allaaserineqarput kina aalajangiisusasaanerseq sungiusaammik suliffissamik nunani allani akuersissuteqartoqarsinnaanersaq pillugu, Kalaallit Nunaanni tamakkiisumik ilaannakuusumilluunniit sungiusaammik sulinermik ingerlatsisoqarnissaanut taarsiullugu, tamannalu naapertuulluni sungiusaammik suliffissanik akuersissuteqartarnernut.

§ 29-mut

Aalajangersagaq ingerlatitseqqinneruvoq Inuussutissarsiutinik ilinniartitsinermik inatsimmi § 26, imm. 1-mik aamma imm. 3-mik, imm. 1-imi allannguuteqartumik. Inuussutissarsiutinik ilinniartitsinermik inatsimmi § 26, imm. 3 aalajangersakkami imm. 2-tut ilanngunneqarpoq.

Imm. 1-imut

Aalajangersagaq maanna aalajangersakkamut atuuttumut sanilliullugu allannguuteqartinneqarpoq siunnersuummi tunngaviusut naapertorlugit, qitiusumik ilinniarfinni forständerip oqartussaaffigilerai pisussaaffiit ullumikkut siulersuisuni ilinniakkanulluunniit ataatsimiititaliani inissisimasuusut. Taamaattumik qitiusumik ilinniarfiit forständerii taakkuulerput ataatsimut isigisunik sungiusaammik suliffissanik akuersisartut, tamatumunnga atatillugu sungiusaammik suliffissanut ataqatigiissaarisarnermik ingerlatsisunit suliaasimasunik, tak. § 33, imm. 2, nr. 2.

Imm. 2-mut

Aalajangersakkami Naalakkersuisut pisinnaatinneqarput nalunaarusiornikkut sungiusaammik suliffissat ataatsimut isigisunik minnerpaamik sunik imaqartussaaneri malittarisassiussagaat, assersuutigalugu ilinniartut ataasiakkaat immikkut sungiusaammik sulinissaannut pilersaarusiortarnerit pillugit, aamma suliffeqarfiup, ilinniagaqartup ilinniarfiullu attaveqatigiittarnissaat pillugit. Tamatumunnga atatillugu Naalakkersuisut malittarisassanik aalajangersaasinnaapput sungiusaammik suliffissat akuerineqartarnerannut, tamatumani aamma sungiusaammik sulilluni ilinniarneqartartut akuerineqartarnerannut.

§ 30-mut

Aalajangersagaq ingerlatitseqqinneruvoq Inuussutissarsiutinik ilinniartitsinermik inatsimmi § 26, imm. 2-mik.

Imm. 1-imut

Aalajangersagaq ingerlatitseqqinneruvoq Inuussutissarsiutinik ilinniartitsinermik inatsimmi § 26, imm.2-mi oqaaseqatigiinnik siullernik, allaaserinnillunilu sungiusaammik suliffeqarnissami pilersaarutit minnerpaamik sunik imaqartarnissaannik.

Imm. 2-mut

Aalajangersagaq ingerlatitseqqinneruvoq Inuussutissarsiutinik ilinniartitsinernik inatsimmi § 26, imm. 2, oqaaseqatigiit aappaannik. Tamanna aalajangersakkami ersippoq. Ataatsimut isigisunik sungiusaammik suliffeqarnissamut pilersaarutit tunuliaqutaraat qularnaarneqassammat ataqatigiissitsisoqarnissaa, ilinniagaqartup ilinniarfimmi ilinniagaasa aamma sungiusaammik sulinermigut ilinniagaasa akornanni, tassuunalu sungiusaammik suliffimmi ilinniagaqartup pissarsiassaannik.

§ 31-mut

Aalajangersagaq ingerlatitseqqinneruvoq Inuussutissarsiutinik ilinniartitsinermik inatsimmi § 27-imik.

Imm. 1-imut

Aalajangersagaq allannguuteqanngitsumik ingerlatitseqqinneruvoq Inuussutissarsiutinik ilinniartitsinermik inatsimmi § 27, imm. 1-imik. Aalajangersakkami sammineqarput ilinniagaqartup pisinnaatitaanera uppersaasinnaanermut piginnaasanik ilinniakkamik ingerlatsinermi pigilersimasaminik, ilinniarfimmi namminermi aamma sungiusaammik suliffigisamini. Tamatumunnga atatillugu aalajangersakkami ersippoq ilinniagaqartoq pisinnaatitaasoq uppersaasiisoqarnissaannik ilinniakkami ilinniagaqartup sammisimasaannik. Soorlu takuneqarsinnaasoq tamanna pinngitsoorani isumaqanngilaq naammassillugu ingerlanneqarsimasuinnarnik, tassami ilinniagaqartup aamma ilinniakkamik taamaatitsinermi pisinnaatitaaffigimmagu uppersaasiisoqarnissaa ilinniakkami naammassisimasat pillugit. Ilinniartitaanermik ingerlatsivimmi namminermi ilinniagassat naammassineqareerpata ilinniarfiup uppersaasat suliarissavaa, sungiusaammillu sulineq naammassineqareerpat suliffeqarfiup sungiusaammik suliffiusimasup sungiusaammik sulisimanermut oqaaseqaat suliarissallugu. Suliamik ilinniarsimasutut allagartaq - svendebrevi - imaluunniit ilinniarsimanermik uppersaasat suliarineqassaaq tunuliaqutaralugit sungiusaammik suliffimmiit oqaaseqaat aamma ilinniarfimmiit uppersaasat aamma misilitsinnermit uppersaasat.

Imm. 2-mut

Aalajangersakkami imm. 2-mut atatillugu oqaatigineqassaaq qitiusumik ilinniarfiup suliaassarimmagu nalilersuisarnermut pilersarusiornissaaq, tassanilu takuneqarsinnaassallutik ilinniagaqartunik nalilersuisarnermut malittarisassat, kiisalu soraarummeertarnermut imaluunniit svendeprove-mik nalilersuisarnermut malittarisassat. Ilangullugulu allannguutinik tunngaveqartumik iluarsiiisuteqartoqarpoq, nalilersuisarnermut pilersarusiaq

ilinniartitaanermut pilersaarutip ilaatut brancheudvalgiimit imaluunniit qitiusumik ilinniarfimmi siulersuisunit suliarineqartarunnaarmata. Nalilersuiner Mullu pilersaarut naalakkersuisoqarfimmit oqartussaasumit akuerineqartussaavoq, oqartussaasut ilinniartitaanernut pilersaarutini akuersissuteqarnerannut atatillugu, tak. siunnersuummi § 5, imm. 2.

Imm. 3-mut

Aalajangersagaq siunnersuummi ileqqut atorneqartut tunngavigalugit iluarsaataavoq, qitiusumik ilinniarfimmi forständerip pisussaaffiit ullumikkut siulersuisuni ataatsimiititaliamiluunniit inissisimasut oqartussaaffigilermagit. Tamanna tunngavigalugu qitiusumik ilinniarfimmi forständerimut aalajangigassaatinneqalerpoq sungiusaammik sulilluni ilinniarneq svendeprøvimik naggaserneqartassanersoq.

Imm. 4-mut

Imm. 4-mi allannguuteqanngitsumik ingerlatseqqinneqarpoq Inuussutissarsiutini ilinniartitsiner Mnut inatsimmi §27, imm. 4. Aalajangersakkami Naalakkersuisut pisinnaatinneqarput malittarisassiornissamut nalilersuisarnermut pilersaarutini aamma uppersaatit ilusilersornissaannut. Malittarisassani pineqarsinnaapput nalilersuisarnermut piunasaqaatit nalinginnaasut, aamma ilinniakkamik naammassisimasunut pappialaatit uppersaatit qanoq toqqortarineqartarnissaat, tak. imm. 1, tamatumani aamma misilitsinnerit ingerlanneqarsimasut, soraarummeernerit aamma svende-tut naammassiner mi misilitsinnerit. Tamatuma saniatigut malittarisassani sammineqarsinnaapput uppersaatit ilusilersorneqartarnissaat, tamatumani aamma tamakkua pisortani oqartussaasunit puineqartunit akuerineqartassanersut, soorluttaaq maleruagassiortoqarsinnaasoq kikkut piginnaatinneqarnersut malittarisassanik saqqummiinissanut.

Imm. 5-imut

Aalajangersagaq ingerlatitseqqinneruvoq Inuussutissarsiutini ilinniartitsiner Mnut inatsimmi § 27, imm. 5-imik, atortuulersinneqartumik Inatsisartut inatsisaanni nr. 3, ulloq 4. juni 2012.

Aalajangersagaq inaarutaasumik nalilersuinerit pillugit Naalakkersuisut malittarisassiorsinnaanerannik pisinnaatitsinissaq siunertaallunilu, tassunga ilanngullugit soraarummeertarneq aamma uppersaasiorneq. Taassuma saniatigut, inaarutaasumik nalilersuisarneq uppersaasiortarnerlu pillugit malittarisassani suut ilanngunneqarnissaannik aalajangersagaq tamakkiisumik imaqanngilaq.

Soraarummeertarnerit misilitsittarnerillu pillugit malittarisassiornermut tunngatillugu aalajangersagaq taamaallaat atorneqarsinnaavoq, aammalu soraarummeernerit misilitsinnerillu ingerlanneqarnerini atatillugu malittarisassiornissaq taamaallaat siunertaalluni, oqaluttarissanik allaganngorlugillu soraarummeernerit misilitsinnerilluunniit pineqarnersut apeqqutaatinnagu aammalu eqimattakkaarlu soraarummeernernut tunngatillugu malittarisassat atorneqarsinnaapput.

Kisiannili ilinniartitsinernut ataasiakkaanut tunngatillugu soraarummeeriaatsit pillugit apeqqut nalunaarummi killilersorneqassanngilaq, tassa soraarummeeriaatsimik misilitseriaatsimilluunniit toqqaaneq ilinniartitsinermut pilersaarutini ilinniartfiit nammineq suliarisaanni tassunga taarsiullugu allassisassammat. Assersuutigalugu soraarummeernerit svenditut misilitsinnernut ilaanerat pillugu apeqqummut tunngatillugu tamanna aamma atuuppoq.

Tassunga tunngatillugu misilitsinnerit imatut paasineqassapput misilitsinnerit atorlugit inaarutaasumik nalilersuinerit, taakkulu ilinniartup soraarummeernerit ilinniagaqarnermulluunniit uppersaataani allanneqassapput, misilitsinnernili pineqartoq tassaavoq assersuutigalugu piffissap qiteqqunnerani misilitsinnerit imaluunniit terminimi misilitsinnerit, taakkunani angusat ilinniartup soraarummeernerit ilinniagaqarnermulluunniit uppersaataani allassimassanatik.

Soraarummeertarnerit misilitsittarnerillu pillugit nalunaarutip suliarineqarneranut atatillugu aalajangersakkap salliutillugu atorneqarnissaa eqqarsaataavoq, taannalu malittarisassanik tamanut atuuttunik ilinniartinnit ilinniartunillu soraarummeernernut misilitsinnernullu atatillugu isiginiarneqartussanik imaqassaaq. Soraarummeernernut atatillugu ilinniartut eqqunngitsuliorlutik ikiorneqarneranni akornusersuillutilluunniit iliuuseqarneranni soraarummeernerit peersitsisarnerit pillugit malittarisassiornermi aalajangersagaq aamma atorneqarsinnaavoq aammalu soraarummeernernut takkutitngitsoornerit kingunissaat pillugit malittarisassiorortoqarsinnaalluni.

Aammattaq censorit censorinillu toqqaasarnerit pillugit malittarisassiorortoqarsinnaavoq. Taassuma saniatigut soraarummeernernik soraarummeernernilu angusanik nalunaaruteqartarnek pillugu malittarisassiornerit aalajangersagaq atorneqarsinnaavoq, tassunga ilanngullugit soraarummeernermi angusanik toqqorsisarnek, aammalu soraarummeernerni kukkunernut amigaatinullu tunngatillugu, assersuutigalugu soraarummeernermi tunngaviit imaluunniit soraarummeernermik naliliinerit pillugit, qisuariaateqarnissamut periarfissat pillugit malittarisassiorortoqarsinnaavoq.

Kapitalimut 6-imut

Kapitali 6 annertuutigut allannguuteqartinneqarpoq, maanna malittarisassanut atuuttunut sanilliullugu, takukkit nalinginnaasunik oqaaseqaatini tamanni pillugu nalunaarsorneqartut. Tamatumani pingaarnersut pissutaavoq inatsisini maleruagassat ingerlatsivinnut tunngasut killiliussaasut inuussutissarsiutinik ilinniartitsinernik suliaasaqarfimmi ingerlateqqinneqannginnerat. Kiisalu aamma kapitalimi tassani ilanngussisoqarpoq aalajangersakkamik nutaamik sungiusaammik suliffeqartarnermi ataqatigiissaarinerik aaqqissuussineq nutaq pillugu.

§ 32-mut

Aalajangersagaq pingaarnerusutigut tamatigut ingerlatitseqqinneruvoq Inuussutissarsiutinik ilinniartitsinermut inatsimmi § 28-mik, taamaattoq imaalillugu imm. 5 Naalakkersuisut pisuni immikkut ittuni qitiusumik ilinniartinnut peqqussuteqarsinnaanerat ilinniakkamik aalajangersimasumik neqerooruteqartoqarnissaanik ingerlatseqqinnerani. Tamatumunnga atatillugu nalinginnaasumik oqaaseqaatit innersuunneqassapput.

Imm. 1-imut

Imm. 1-imi siunnersuutigineqarpoq qitiusumik ilinniartitit ingerlatsineranni suliassat pingaarnertit tassaasut inuussutissarsiutinik ilinniartitsinernik neqerooruteqarneq. Ilutigisaanik ilinniartitit peqataassapput ilinniartitaanertigut suliassanik naammassisaqartarnerni, inuiaqatigiinni pisariaqartitsinerit eqqarsaatigalugit, sulisussanik piginnaanngorsarsimasunik pisariaqartitsineq naammaginartumik naammassiumallugu. Kiisalu aamma naatsorsuutigineqarpoq qitiusumik ilinniartitit piareersimassasut suliffeqarnermi unammilligassat iliuuseqarfigisarneranni.

Imm. 2-mut

Imm. 2-mi erseqqissarneqarpoq ilinniartitaanernik ingerlatsiviit Naalakkersuisut akuersissuteqareernerisigut aamma neqeroorutigisinnaagaat ilinniarnertuunngorniartarnermik ilinniartitsinerit, tamannalu maanna aamma ingerlanneqareerpoq qitiusumik ilinniartitit ilaanni.

Imm. 3-mut

Imm. 3-mi siunnersuutigineqarpoq qitiusumik ilinniartitit ilinniartitaanertigut ingerlatsinerit saniatigut aammalu ingerlatsinernik suliassanik isumaginnittuunerup saniatigut allaffissornikkut suliassanik aalajangersimasunik isumaginnittarnissaat, assersuutigalugit ilinniagaqartut nalunaarsortarneri, suliassanik isumaginnittarnerit il.il.

Imm. 4-mut

Aalajangersagaq annertunerusutigut ingerlatitseqqinneruvoq Inuussutissarsiutinik ilinniartitsinermi inatsimmi § 28, imm. 4-mik, taamaattorli imaalillugu aalajangersakkami maanna innersuussisoqarluni ilinniartut ineqarfii pillugit Inatsisartut inatsisaannut, taarserlugu ilinniartut ineqarfii pillugit Namminersornerullutik Oqartussat nalunaarutaat nr. 18, ulloq 1. november 2007-imeersoq, ilinniartunut ineqarfiinut tunngasut maanna Inatsisartut inatsisaatigut nr. 42, ulloq 12. december 2019-imeersukkut, kingusinnerusukkullu allannguuteqartukkut aquunneqalernikummata.

Aalajangersakkami pineqarput ilinniartut ineqarfiinik ingerlatsinerit. Aalajangersakkap kinguneraa qitiusumik ilinniarfiit ilinniartut ineqarfiinut tunngasunik ingerlatsinerminni Inatsisartut inatsisaanni ilinniagaqartunut atatillugu aalajangersakkanik malinnittussaanerat.

Tamatumalu saniatigut qitiusumik ilinniarfiit ilinniartut ineqarfiinik ingerlatsisuusinnaalerput, isertitsissutaasartunik suliaqarlutik, assersuutigalugu pikkorissartitsisarnernut atatillugu, ilinniartut ineqarfiinik atorneqanngitsunik peqarsimatillugu. Tamanna isumaqarpoq atuisunut atatillugu, tassalu pikkorissariartunut pisussaaffeqartoq nioqqutigineqartunik imaluunniit kiffartuussinernik atuisussaanerat. Kiisalu aamma ilinniarfiup immikkoortissinnaassavai ilinniartut ineqarfiinut atatillugu suliat ilinniarfiup suliaanit allanit. Aammattaaq aningaasarsiutigalugit isertitsissutaasunik suliat, tassalu pineqarput ininik pikkorissartartunut attartortitsisarneq, tassaassaaq pissusissamisuuinnartumik ingerlatsiviup suliaasa ilaat. Malittarisassat suliniutinut aningaasarsiutaasussanut immikkut inatsisitigut aaqqissuussivigineqanngillat, kisiannili pisortani ingerlatsinerup nalinginnaasup ilagalugu, tassa isertitsissutaasartunik suliaqarneq, aningaasartuutissanut missingersuusiortarnermut malittarisassani nalunaarsuivigineqartoq.

§ 33-mut

Aalajangersagaq nutaajuvoq sammisaqarlunilu sungiusaammik suliffissanik pilersitsisarnernik ataqatigiissaarinernik, nunami tamarmi eqqumaffigineqartumik sungiusaammik suliffissanut apeqqummik, tak. aamma tamanna pillugu nalinginnaasumik oqaaseqaatit. Aaqqissuussineq siunertaqarpoq suliassanik assigiinngitsunik arlaqartunik sungiussaammut suliffissanut tunngatillugu suliaqarnissanik, tamatumani minnerunngitsumik immikkut suliffeqarfinnut orniguttarluni sungiusaammik suliffissanik sapinngisamik amerlanerpaanik pilersitsisoqartarnissaanik suliaqarnermik, qitiusumik ilinniarfinni ilinniagaqartartut sungiusarfigisartagassaannik, tak. aalajangersagaq imm. 1-imiittoq. Suliffeqarfinnut orniguttarluni sulinermi minnerunngitsumik suliffeqarfinnut inuussutissarsiutini pineqartuniittunut saaffiginnittarnerussaaq, lærlinginik taakkua ilinniagaqartunik atorfinitsitsisarnissaat siunertaralugu. Kiisalu aamma ataqatigiissaarinernik aaqqissuussinermi matumani suliaqartoqarsinnaavoq sungiusaammik sulisartunut pitsaassusissat ineriartortinneqarnerannik, sungiusaammillu sulisarnerit pillugit suleqatigiinnermik, aammalu imm. 2-mi pineqartunik suliassanik suliaqarnermik ingerlatsisoqarluni.

Imm. 1-imut

Aalajangersakkami pineqarput sungiusaammik suliffissanut ataqatigiissaarinernik aaqqissuussinernup qitiulluinnartunik suliassai. Aalajangersagarlu ilanngullugu sanilliullugu isiginiarneqassaaq qitiusumik ilinniarfiup pisussaaffiinut § 38-mi, qularnaassallugit pisariaqartinneqartut sungiusaammik suliffiusussat.

Imm. 2-mut

Aalajangersakkami nalunaarneqarpoq sungiusaammik suliffissanut ataqatigiissaarinermik aaqqissuussinerup ilaatinneqalernera tunngaviusutut forstanderip aalajangiisartutut oqartussaaitaanerani, apeqqutini inuussutissarsiutininik ilinniartitaanerni sungiusaammik suliffeqartitsisarnernut atasuni. Aalajangersakkamilu ilanngullugit aamma pineqarput immikkuullarinnerusunik pisussaaffiit, soorlu sungiusaammik suliffissanut ataqatigiissaarinermik aaqqissuussinerup forstanderimut inassuteqaateqartartuunera.

Ilutigisaanillu aalajangersakkamit oqaatigineqarsinnaagunarpoq pineqartut pissutsit pisariaqartitsiviusut ilisimasaqarnissaanik paasisimasaqarnissanillu inuussutissarsiutininik ilinniartitaanerni pisariaqartunik aaqqissuussinernik. Tamatumani pineqartut arlaqarput, apeqqutit suliffeqarfinnik oqaloqateqartarnermiittut, suliffeqarfinni sungiusaammik sulisitsisarnernit eqqarsaatigalugit, ataqatigiissitsisarnernit ilinniagaqartup sungiusaammik sulinikkut ilinniagassaanic, ilinniakkami anguniagaasunut atasunik. Tamakkualu saniatigut aamma paasisimasaqarneq ilinniagaqartut piumassuseqassusiannut qanorlu atugaqarnerannut, inuunerinnerannut, aamma naliliineq naatsorsuutigineqarsinnaanersoq ilinniagaqartut ilikkagaqarsinnaassuseqassasut ilikkartariaqakkaminnik, - tamakkuussapput ilanngunneqartariaqartut sungiusaammik suliffissanut ataqatigiissaarinermik aaqqissuussinermik suliani.

§ 34-mut

Aalajangersakkap annerpaatigut assigaa ingerlatitseqqinnerullunilu Inuussutissarsiutininik ilinniartitsinermik inatsimmi § 29-mik, sammisaqartunik qitiusumik ilinniarfiit nalinginnaasunik ilinniartitsinerup atuartitsinerullu saniatigut ingerlatsinernek aamma allanik suliaqarnissamut pisussaaffiinek.

Imm. 1-imut

Imm. 1-imi siunnersuutigineqarpoq periarfissaliissut qitiusumik ilinniarfiit taaneqartunik ilinniartitsinerit saniatigut allanik ingerlatsisarnissaannut, ilinniartitsinerup nammineq avataaniittunik. Tamatumani ilaatigut pineqarsinnaapput kiffartuussinernik immikkut ittunik nioqquteqartarnerit, siunnersortutut sullissinikkut, nalilersuisarnernik suliaqartarnikkut aamma ilisimasanic nioqquteqartarnikkut, suliaasaqarfinni aalajangersimasuni, ilinniarfimmi qitiusunik ingerlatanut attuumassuteqartunik.

Imm. 2-mut

imm. 2, ilaatigut isumaqarpoq malitassatut pingaarnertut landskarsip aningaasaliissutaanic atuisoqartassanngitsoq allatigut ingerlatsinernek. Aalajangersakkallu aamma kingunerisaa kiffartuussinerit aamma nioqqutigisat qitiusumik ilinniarfiup aamma suliffeqarfiit allat akornanni unammilleqatigiiffiusumik ingerlanneqartassasut. Tamanna aamma atuuppoq qitiusumik ilinniarfiup nammineq iluani. Ilinniartitaanernik ingerlatsiviit allatigut suliniutininik ingerlatsinerat nalilivigineqarsimappat unammilleqatigiinnerunngitsumik ingerlanneqartutut,

taava suliassaq Unammilleqatigiinnermut ataatsimiititaliamut suliassanngortinneqarsinnaavoq.

Imm. 3-mut

Imm. 3-mi siunnersuutigineqarpoq Naalakkersuisut pisinnaatinneqassasut nalunaarusiornikkut aalajangersagaliussasut ersarinnerusunik qitiusumik ilinniarfiit allatigit ingerlatsisarnerat pillugu. Tamatumunnga atatillugu killiliinernik pilersitsisoqarsinnaavoq, allatigit ingerlatsinerit qanoq ittuusinnaaneri eqqarsaatigalugit, ilinniartitaanermik ingerlatsivinnit ingerlanneqartussatut kissaatigineqanngitsut. Kiisalu aamma killissanik aaqquissuussisoqarsinnaavoq nalorninaataasinnaasuni, allatigit suliniutit ilinniarfiup nalinginnaasumik pingaarnertut ingerlataannut aningaasartuutaqqunagit. Aalajangersagaq siunnersuutigineqarpoq tunuliaqutaralugu Naalakkersuisut periarfissaqarnissaat inatsisitigit peqqussusiorsinnaanermut, sunniutaasinnaasunik siunertaanngitsunik pinaveersaartitsisinnaajumalluni, nutaanik periarfissanik ammaassinikkut, allatigit suliniutinik ingerlatsisinnaanermik, naak tamanna aamma kiffartuussinernut peqqussutitsigit aaqquivigineqartarsinnaagaluartoq. Ilutigisaanik Naalakkersuisut periarfissaqassapput akiliuteqartitsisarnermi atugassarititaasunik aqutsinissamut.

§ 35-mut

§ 35 ilaannakuusumik ingerlatitseqqinneruvoq Inuussutissarsiutinik ilinniartitsinermik inatsimmi § 38-mik, imaalillugu imm. 1 nutaajulluni, maannali atuuttuusut imm. 2 aamma imm. 3 siulersuisunut tunngasut ingerlateqqinneqaratik.

Imm. 1-imut

Aalajangersagaq nutaajuvoq. Naalakkersuisut pisinnaatitaanerat atorfinitsitsisarnermik soraarsitsisarnermillu qitiusumik ilinniarfimmi forständerimik erseqqissarneqartoq ersersitsivoq ilinniartitaanermik ingerlatsivik qitiusumik pisortat allaffissornikkut ingerlatsisuusut ilitersuisinnaassusiisa iluaniittuusoq. Aalajangersagaq ilutigisaanik qularnaarivoq ersarissunik naalakkiisarnerni aqqutinik aamma attavigisassanut aqqutinik, nukittorsaallunilu forständerip naalakkersuisoqarfinni oqartussaasunut ilumoortuunissaanik. Tamatumunnga atatillugu naatsorsuutigineqarpoq Aningaasaqarnermut Sulisoqarnermullu Aqutsisoqarfiup akulerunneqarnissaa sukkulluunniit atuuttumik tamanna pillugu kaajallaasitaliortarnermi.

Maanna forständeriusunut tunngatillugu, siulersuisunit atorfinitsitaasimasunut, taakkua Inatsisartut inatsisaata atortuulerneratigit aalajangersakkap iluaniilissapput, tak. tamanna pillugu nalunaarneqartut nalinginnaasunik oqaaseqaatini. Tamatuma assigaa atorfinitsitsisarnermut soraarsitsisarnermullu pisinnaatitaaneq aamma forständerinut tunngatillugu atuummat, forständerinut Inatsisartut inatsisaata atortuulernerani atorfeqartuusunut.

Imm. 2-mut

Aalajangersagaq ingerlatitseqqinneruvoq Inuussutissarsiutinik ilinniartitsinernut inatsimmi § 35, imm. 5, oqaaseqatigiit aappaannik. Aalajangersakkami ersippoq Naalakkersuisut forständerinik atorfinitsitsinerannut atatillugu naatsorsuutigineqartoq pineqartut piginnaanernik pigisaqartuusut ilinniarfinnik ingerlatsisuunissamut piumasarineqartunik. Tamatumani siullertut pingaarnertullu pineqarput forständerip pisariaqartunik inuussutissarsiornermi misilittagaqartuunissaa aammalu ilinniagaqarsimassutsikkut tunuliaqutaqarnissaa ilinniartitaanernut ilinniarfiup neqeroorutigisaanut atatillugu. Ilutigisaanillu ilanngunneqarsinnaavoq pineqartup aqutsinikkut suliaasaqarfimmi misilittagaqartuunissaa.

Imm. 3-mut

Aalajangersagaq ingerlatitseqqinneruvoq Inuussutissarsiutinik ilinniartitsinerit pillugit inatsimmi § 38, imm. 1, nr. 1-imik, allaaserineqarlunilu forständerip suliaasaanik qitiusunik, ilaatigut imaqartunik pisariaqartunik perorsaanikkut atuartitsisarnikkullu ilinniarfimmi ineriartortitsisuunissamik. Tamatumunngalu atatillugu aalajangersakkap kingunerisaa forständerip akisussaana ilinniartitsisut atuartitsinissamik piareersaasarnissaannut ilinniagaqartut ilikkagaqartarnissaannik siunertaqartunik.

Ilutigisaanik forständerip akisussaaffigai ulluinnarni ilinniarfiup ingerlanneqarnera, qularnaassallugulu ilinniarfiup isumannaatsumik ingerlanneqarnissaa.

Ilanngullugulu forständerip pisussaaffigaattaq qularnaassallugu ilinniartitaanermik ingerlatsiviup aquneqarlunilu ineriartortinneqarnissaa ilinniarfimmu siunertaasunik periusissiaasunillu Naalakkersuisunit peqqussutigineqarsimasunik tunngaveqartunik.

Imm. 4-mut

Aalajangersakkani allaaserineqarput forständerip akisussaaffii Naalakkersuisut tungaannut. Tassuuna aalajangersagaq paasineqassaaq naalakkersuisoqarfittut sulianut oqartussaasutut. Aalajangersagarlu ilanngullugu imaqarpoq ilumoortuunissamik pisussaaffimmik, forständerip pisussaaffii eqqarsaatigalugit Naalakkersuisut anguniagaannik piviusunngortitsinissamut.

Imm. 5-imut

Siunnersuummi § 35, imm. 5 tunngaviligaavoq isiginiarlugit paatsuugassaannigitsunik naalakkisarnermi aquteqarnissaanik, aammalu qularnaariniarnermik forständerip pisariaqartunik oqartussaaffeqarnissaanik aqutsinissamut ilinniarfimmilu sulisunik ilitersuisarnissamut. Tamatumunnga atatillugu naatsorsuutigineqarpoq Aningaasaqarnermut Sulisoqarnermullu Aqutsisoqarfiup tamanna pillugu kaajallaasitaliornermi peqataatinneqarnissaa.

§ 36-mut

Aalajangersagaq tunngaviusutigut nutaajuvoq, kisiannili katitsigaalluni aalajangersakkanit arlaqartunit Inuussutissarsiutinik ilinniartitsinermi inatsimmiittunik, nalunaarsuillunilu forständerip suliassaanik aalajangersimasunik. Ilanngullugulu tamanna pillugu innersuussisoqarpoq siunnersuummi nalinginnaasunik oqaaseqaatinut, tassani ersimmat forständerip suliassatut tigusussaagai siulersuisuusimasut suliaat, ilinniartitaanernik pilersaarutitut tunngatillugu, piginnaanngorsarfiusunik ilinniartitaanernik neqerooruteqartarnek, ilinniartitaanertigut suliniutaasartut sinneri, isertitsissutaasinnaasunik ingerlatsisarnek il.il.

Taamaasilluni forständeri pisussaaffilerneqarsinnaavoq suliassat sinnerinik, pisortani oqartussaasut ilitsersuisinnaatitaanerannik tunngaveqartunik.

Imm. 1-imut

Aalajangersakkami pineqarput forständerip pisussaaffii ilinniartitaanernut pilersaarutitik suliqartarnermi, ilinniartitaanernut suliani pineqartunut. Aalajangersagaq tunngaveqarpoq Inuussutissarsiutinik ilinniartitsinermit inatsimmi § 5, imm. 2, § 7, imm. 1, § 18, imm. 1 aamma § 36, imm. 2-mik. Forständeri pisussaataavoq tamatumunnga atatillugu ilisimasariaqartunik illuatungiusunit naleqquttunit piniartarnissamik, tamatumani ingammik eqqarsaatigineqarsinnaapput ilinniakkanit naammassisunik sulisussamittut tigooraasartut, ilinniagaqartut kattuffii il.il.

Aalajangersagaq aqqissuussineruvoq ileqquusunik ilinniartitaanernut pilersaarusanik suliqartarnermi, suliassaq isumagineqartussa qitiusumik ilinniarfinni ulluinnarni aqutsisuusunit.

Imm. 2-mut

Aalajangersakkami nr. 1 annertunerusutigut ingerlatitseqqinneruvoq Inuussutissarsiutinik ilinniartitsinermit inatsimmi § 35, imm. 2, oqaaseqatigiit aappaannik.

Aalajangersakkap kinguneraa forständerip isummerfigisassagaa ilinniartitaanerit piginnaaneqarfiulersartut suut ilinniartitaanermit ingerlatsiviup neqeroorutigisassanerai, aammalu isummerfigisassallugit ilinniartitaanernut attuumassutilinnik ingerlatsinissat allat, assersuutigalugit pikkorissartitsisarnermit ingerlanneqartussat. Aalajangersakkami naatsorsuutigineqarpoq forständeri eqeersimaartuusoq aammalu aallarnisaasuulluni naleqquttunik aamma pisariaqartunik ilinniartitaanernut attuumassutilinnik suliniutinik pilersitsisarnermi.

Aalajangersakkami nr. 2 oqaasertaligaavoq Inuussutissarsiutinik ilinniartitsinermit inatsimmi § 36, imm. 3, nr. 5-ip oqaasertaligaaneramik tunngaveqartumik, uanili ilusiligaanermigut forständerimut sammisuulluni. Pineqarpoq tigussaasumik aalajangiisarnermit pisussaaffik, forständerimit tigummineqartoq ilisimasamik pigineqartunik aallaaveqartumik ilinniakkamut

pineqartumut atatillugu, forstanderillu tamatumunnga atatillugu aamma avataaniit ilisimasalinnit siunnersorneqarnissaa atorsinnaavaa, ilinniakkamut pineqartumut atasumik. Tamatumani assersuutigalugu pineqarsinnaavoq qanoq annertutigisumik siusinnerusukkut ilinniagarisimasap kinguneqarsinnaanera ilinniagaalersup sivikillineqarsinnaaneranut, fagini aamma piginnaasani imminnut qaleriaattut pissutigalugit, siullermik ilinniagaqarnermi ilaasimasunik.

§ 37-imut

Aalajangersakkap assigaa inuussutissarsiutinik ilinniartitsineramik inatsimmi § 40, qitiusumik ilinniartitsineramik aningaasalersuinermit tunngasoq.

Imm. 1-imut

Imm. 1 aalajangiussivoq qitiusumik ilinniartitsineramik ingerlatsinera aningaasalersorneqassasoq landskarsimit tapiissutitsigut, aamma taamaattoqarsimappat allatigut isertitsissutaasartunik ingerlatsinikkut. Allatigut isertitsissutaasartunik ingerlatsisoqarsimasinnaanerani pineqarput ingerlatsinerit siunnersuummi § 34 naapertorlugu pisut.

Imm. 2-mut

Aallaavioq aalajangersakkami imm. 2-mut atatillugu tassaavoq Inatsisartut allanik akuleruffigineqaratik tapiissutissat annertussusissaat aalajangersinnaammattigit, taamalu tunngaviusutigit aqussinnaallugit qitiusumik ilinniartitsineramik ingerlatsineraanni killiliussassat. Tamanna isumaqarpoq ilutigisaanik Inatsisartut aalajangersinnaammata tapiissutissat qanoq aaqquissuussamik tunniunneqartassanersut, tamatumani aamma taxameteri atorlugu tapiissuteqartarnermik aaqquissuussisoqassanersoq, killiliussanik ersarinnerusunik aningaasanut inatsimmi aalajangersaanikkut, tak. aamma matumani nalinginnaasumik tamanna pillugu oqaaseqaatit. Tamatumunngalu atatillugu aamma Inatsisartut kiffaangissuseqarput aalajangersinnaallutillu siunissami taxameteri atorlugu aaqquissuussineq qitiusumik ilinniartitsineramik aningaasalersuinermit atatillugu atorineqassanngitsoq.

Kapitali 7-imut

Kapitali annertunerusutigit imaqarpoq aalajangersakkanik Inuussutissarsiutinik ilinniartitsineramik inatsimmi kapitalimik 7-imik, sammisaqartumik sungiusaammik suliffissanik isumaginnittarnermik aamma sungiusaammik suliffissat - praktikkerfissat - akuersissutigisarnerannik. Kapitali isigineqassaaq atasumik siunnersuummi kapitalimut 8-mut, siullertut pingaarnertullu atugassarititaasunut ilinniartup suliffiullu akornanniittunik imaqartunut.

§ 38-mut

Aalajangersagaq imaqarpoq aaqqissuussinermut naleqqussaalluni iluarsiiisutitalinnik Inuussutissarsiutinut ilinniartitaanerni inatsimmi § 43-mik ingerlatitseqqinnermik. Aallarniutigalugu oqaatigineqassaaq aallaavittut ilinniagaqartut namminneq ataasiakkaarlutik pisussaaffigimmassuk nammineerlutik ilinniarfissaminnik imaluunniit sungiusaammik suliffissaminnik pissarsiniartarnissartik, soorluttaaq suliffeqarfiit soqutigisarigaat namminneq lærlinginik ilinniartussarsiortarnissartik. Aalajangersagarlu taamaattoq imaqarpoq qitiusumik ilinniarfiit pingaarnertut pisussaaffiinik, sungiusaammik suliffissanik ilinniarfimmuut pisariaqartunik amerlassusilinnik ingerlaavartumik pissarsiniartarnissamik.

Imm. 1-imut

Aalajangersakkami imm. 1-imi aalajangiunneqarpoq ilinniarfiit pisussaaffeqartut sungiusaammik suliffissanik pissarsiortarnissamik, kiisalu suliffeqarfinnut orniguttarnissaq sungiussaammik suliffissanik pilersitsisoqarsinnaaqullugu. Innersuussinermi § 33-mut pineqarpoq suliassaq naatsorsuutigineqartoq qitiusumik ilinniarfinni sungiusaammik suliffissanut ataqatigiissaarinnermik aaqqissuussinerit isumagisassaat.

Aalajangersakkami nalunaarneqarpoq ataatsimut pisussaaffik qitiusumik ilinniarfiit sulissuteqartarnissaannik pisariaqartunik amerlassusilinnik sungiusaammik suliffissanik pilersitsisoqartarnissaanik. Aalajangersakkalli ilinniagaqartoq pisussaaffianik arsaanngilaa, ilinniartup pisussaaffigimmagu nammineq qularnaarniassallugu ilinniarfissaqarnissani imaluunniit sungiussaammik suliffissaqarnissani ilinniakkaminut atatillugu.

Imm. 2-mut

Aalajangersagaq kinguneqartitsilluni iluarsiiisusikkamik ingerlatitseqqinneruvoq Inuussutissarsiutinik ilinniartitsinermut inatsimmi § 43, imm. 2-mik.

Aalajangersakkami pineqarpoq ersarissumik pisinnaatitsineq Naalakkersuisut nalunaarummik suliaqarnermikkut malittarisassanik aalajangersaasinnaanannut ilinniartitaanernik ingerlatsiviit suleqatigiinnissaannik paasisitsiniaasarnernik, siunnerfigalugu sungiusaammik suliffissanik suli amerlanerusunik pilersitsisoqartarnissaanik, sungiussaammillu suliffissat pioreersut pitsaannerusumik iluaqutigineqarnissaannik. Aqutsineq taanna aamma ingerlanneqarsinnaavoq Naalakkersuisut ilitersuisussaataitaneranniit, kisiannili aalajangersakkap attatiinnarneqarnissaa siunnersuutaavoq, qularnaarumallugit pisarsinnaasut aqutsinerup soqutigisaqartunik Namminersorlutik Oqartussat aaqqissuussinerisa avataaniittunik sunniiviginnessiinnaanera.

Imm. 3-mut

Aalajangersagaq allannguuteqanngitsumik ingerlatitseqqinneruvoq Inuussutissarsiutinik ilinniartitsinermut inatsimmi § 44, imm. 3-mik, inatsisip 2012-imi allannguutaani ilaasumik.

Aalajangersakkami siunnerfiuvoq ersarissumik pisinnaatitsinissamik Naalakkersuisut suliffeqarfinnik sungiusaammik suliffiusussatut akuersissuteqartarnissaannik

ilinniartitaanernut atatillugu, qitiusumik ilinniarfinnut imaluunniit inuussutissarsiutinut ilinniarfiit oqartussaaffiannut ilaangitsuni, nalinginnaasumik oqaaseqaatini eqqaaneqartutut ilinniakkanut assersuutigalugu Danmark-imi inuussutissarsiutinik ilinniarfinni neqeroorutaasartunik. Danmark-imi inuussutissarsiutinik tunngaviusunik ilinniakkanut atatillugu faginit tunngasumik ataatsimiititaliamik pilersitsisoqarnikuvoq imaluunniit ilisimasalinnik aaqqissuussinermik, akuersissuteqartarnermik isumaginnittartunik Danmark-imi sungiusaammik suliffissanik, danskit ilinniakkanik aaqqissuussaannut atasuni. Aalajangersakkap kingunerisaanik Naalackersuisut akuersissutigisassavaat Kalaallit Nunaanni sungiusaammik suliffissat pineqartunut, aamma inuussutissarsiutinik ilinniakkani Kalaallit Nunaanni neqeroorutaasanngitsuni.

§ 39-mut

Aalajangersagaq ilaatigut ingerlatitseqqinneruvoq Inuussutissarsiutinik ilinniartitsinermut inatsimmi § 44-mik.

Imm. 1-imut

Imm. 1 isigineqassaaq tunuliaqutaralugu siunnersuummi § 28, imm. 1, tassani atuarneqarsinnaammat sungiusaammik suliffeqartarnek suliffeqarfimmi imaluunniit suliffeqarfinni arlaqartuni ingerlanneqartassasoq, sungiusaammik suliffeqartarnermut ataqatigiissaarinermik aaqqissuussinermi inassuteqarnermik tunngaveqartumik qitiusumik ilinniarfimmi forstaderimit akuerineqarsimasuni.

§ 39, imm. 1-imi ersippoq suliffeqarfimmik sungiusaammik suliffissatut akuersissuteqarneq pisassasoq nalileereerluni suliffeqarfik pineqartoq sungiusaammik sulisitsinermik naammassisaqarsinnaanersoq. Akuersissuteqartoqarnissaani tamatumunnga atatillugu aallaaviusussaavoq suliffeqarfimmik naliliisimaneq, tamatumani ilanngullugu suliffeqarfiup suliassaqarfisaa, sanilliunneqartumik ilinniakkap suussusianut. Tamatuma saniatigut nalilersuinermi pissutsit ilanngullugit naliliivigineqartariaqartut ilanngunneqartassapput. Aallaaviusariaqarpoq suliffeqarfiup piumasarineqartut naammassisinnaanera, sungiusaammik ilinniartitsiviusinnaasutut pilersaarusanik aallaaveqartumik. Kingullermi isiginiarneqartassaaq suliffeqarfiup sungiusaammik suliassat ilaanni ingerlatsiviusinnaanera.

Imm. 2-mut

Aalajangersakkami imm. 2 pisariaqartunik iluarsisusikkamik ingerlatitseqqinneruvoq Inuussutissarsiutinik ilinniartitsinermik inatsimmi § 44, imm. 2-mik.

Aalajangersakkami Naalackersuisut pisinnaatinneqarput nalunaarusiornikkut malittarisassanik aalajangersaanissamut, suliffeqarfiit sungiusaammik suliffiusinnaasutut akuerineqartarneri pillugit. Aalajangersakkami sammineqarsinnaapput sulianik ingerlatsisarnermi piffissalersuinerit, soorluttaaq nalunaarummi malittarisassanik aalajangersaasoqarsinnaasoq oqartussaaffimmik ingerlatitseqqissinnaaneq, inuussutissarsiutinik ilinniarfinni

ilinniagaqartunut atatillugu. Aalajangersakkallu ilanngullugu malitsigaat sulianik ingerlatsisarnerni Pisortat ingerlatsineranni suliassat suliarineqartarnerat pillugu Inatsisartut inatsisaanni aalajangersakkat malinneqartussaani.

Aalajangersagaq allanngortinnagu ingerlatitseqqinneruvoq Inuussutissarsiutinik ilinniartitsinermut inatsimmi § 44, imm. 3-imik, inatsisaammik allannguinermi 2012-meersumi ilanngunneqartoq.

Ilinniartitsinernut qitiusumik inuussutissarsiutinulluunniit ilinniarfiit pisinnaatitaaffiit ilaanngitsunut tunngatillugu suliffeqarfinnik sungiusaammik ilinniarfiusartunik Naalakkersuisut akuersisinnaanerannik erseqqarissumik pisinnaatitsinerup ilanngunneqarnissaa aalajangersakkami siunertaavoq, tamannalu nalinginnaasumik oqaaseqaatini oqaatigineqartut ilinniarnernut assersuutigalugu Danmarkimi inuussutissarsiutinut ilinniarfinnit neqeroorutigineqartut pineqarput. Danmarkimi inuussutissarsiutinut ilinniarfinnut tunngatillugu immikkut ilisimasallit akuersisartuupput sungiusaammik suliffinnut tunngatillugu. Kalaallit Nunaanni suliffeqarfinnik sungiusaammik suliffiusartunik Naalakkersuisut aalajangersakkap kingunerisaanik akuersisinnaapput, aamma inuussutissarsiutinut ilinniarnernut Kalaallit Nunaanni neqeroorutigineqanngitsunut tunngatillugu.

§ 40-imut

Aalajangersagaq annerusutigut allannguuteqanngitsumik Inuussutissarsiutinik ilinniartitsinermik inatsimmi § 45-mik ingerlatitseqqinneruvoq.

Aalajangersakkami pineqarput pisinnaatitaaffiit naammagittaalliuteqarsinnaanermut sungiusaammik suliffissatut akuersissutigineqarsimasut pillugit.

Kapitali 8

Soorlu kapitalimut 7-imut oqaaseqaatini eqqaaneqareersoq kapitalimi sammineqarput ilinniagaqartut pisinnaatitaaffii aamma pisussaaffii, soorluttaaq kapitali aamma imaqartoq aalajangersakkanik suliffeqarfiit pisinnaatitaaffiit aamma pisussaaffiit. Kapitalimi sammineqarput ilaatigut ileqqussat tunngaviusut inuussutissarsiutinik tunngaviusumik ilinniakkamik naammassillugu ingerlatsinissami aallaaviusutut naatsorsuutigineqartut tamatumunnga isumaqatigiissuteqartoqarsimanera. Ilanngullugulu naatsorsuutigineqarportaaq ilinniagaqartup eqqortittassagai qaqugukkut takkuttarnissamut pisussaaffiit aamma ileqqorissaarnissamik ilinniarfimiinnermi malittarisassat. Ilanngullugulu kapitalimi pineqarput aalajangersakkat akissarsianut aamma suliffeqarnermi atugassarititaasut, kiisalu aamma ilinniakkap naalineqarsinnaanera aamma sivitsorneqarsinnaanera. Ilanngulluguttaaq allaaserineqarput pissutsit assigiinngitsut unioqqutitsisoqartillugu pisussaaffinnut tunngasut,

tamatumani aamma atorunnaarsitsisinnaaneq kiisalu suliffeqarnermi ajoqusersinnaanermut sillimmasiisarneq.

§ 41-mut

Aalajangersagaq suliareqqitatut ingerlatitseqqinneruvoq Inuussutissarsiutinik ilinniartitsinermit inatsimmi § 46-mik, taassuma oqaasertalerneqarneratut inatsimmik allannguinermit Inatsisartut inatsisaatigut nr. 6, ulloq 16. juni 2016-imeersukkut.

Imm. 1-imut

Aalajangersakkap imm. 1-iani erseqqissaatigineqarput ileqqussat tunngaviusut, inuussutissarsiutinik tunngaviusunik ilinniakkamik naammassisaqartarnermi, eqqaassanngikkaani ilinniarfimmi namminermit suliffeqarnermi sungiusaammik ingerlatsisoqartarnerani piumasaqaataamat lærlingitut isumaqatigiissuteqartarneq imaluunniit ilinniakkamat isumaqatigiissuteqartarneq, ilinniagaqartup aamma suliffeqarfiup imaluunniit suliffeqarfiit arlaqartut akornanni, taamalu ilinniakkami suliffeqarfimmi sungiusaammik ingerlatsisoqarnissaa naammassineqarsinnaalluni.

Ilanngullugulu aamma oqaatigineqassaaq Naalakkersuisut akuerisinnaammatigit inuussutissarsiutinik ilinniagassat lærlingitut isumaqatigiissuteqarnissamik imaluunniit ilinniakkanut isumaqatigiissuteqarnissamik piumasaqaateqarfiunngitsut. Taamaattumik imm. 6-mi ersippoq lærlingitut isumaqatigiissuteqartarneq aamma ilinniakkamat isumaqatigiissuteqartarneq inuussutissarsiutinik ilinniakkanut pineqartunut atuutinngimmat. Assigisaanik atuuppoq inuussutissarsiutinik ilinniakkanut ilinniartitaanermik ingerlatsivimmi sungiusaammik sulinermit ingerlatsiviusuni, tak. § 13.

Ilanngullugulu aamma ilisimatitsissutigineqarsinnaavoq taaguut "lærlingitut isumaqatigiissut" aamma "ilinniakkamat isumaqatigiissut" aallaaveqarmata Inuussutissarsiutinik ilinniakkanut inatsimmi taakkuninnga atuinernik, aalajangiivigineqarnikuusunik sulisitsisuniit piumasaqaatinik tunngaveqartunik. Taamatut kissaateqarneq erseqqissaassuteqarnermut tunngasuvoq, lærlingit siullertut pingaarnertullu suliffeqarfimmut atasuusarnerannik, tassalu taamaasillutik annikinnerusumik ilinniartitaanernik ingerlatsivinnut atasuusarnerinik, taamaattumillu naatsorsuutigineqarluni taaguut "lærlingitut isumaqatigiissut" tamatuminnga erseqqissaasuusoq.

Imm. 2-mut

Aalajangersagaq ingerlatitseqqinneruvoq Inuussutissarsiutinik ilinniartitsinerit pillugit inatsimmi § 46, imm. 2-mi oqaaseqatigiinnik siullernik aamma aappaannik. Aalajangersakkamit oqaaseqatigiinni siullerni erseqqissarneqarpoq ilinniakkami immikkoortut tamarmik, matumani aamma assersuutigalugu taamaattoqassappat svendetut

misilitsinnissaq ilinniartitaanermut isumaqatigiissummiissaaq, imaluunniit lærlingitut isumaqatigiissummiissalluni.

Aalajangersakkami oqaaseqatigiit aappaat sanioqqutsisinnaanermut aalajangersagaavoq oqaaseqatigiinni siullerniittumik.

Aalajangersakkami aallaavittut naatsorsuutigineqarpoq qitiusumik ilinniarfik imaluunniit inuussutissarsiutinik ilinniarfik akulerunneqartussaasoq, immikkut sanioqqutsinissamik aalajangersinnaaneq taamaallaat nalunaarutigineqarsinnaammat qitiusumik ilinniarfimmiiit qinnuteqarnermik tunngaveqartumik. Tamatumunnga atatillugu aalajangiisuvoq ilinniarfiup qularnarpallaanngitsumik nalunaarnikkut assersuutigalugu ilinniarfimmi atortulersuutinut pigineqartunut tunngasutigut il.il. uppersarsinnaassagaa ilinniagaqartup sungiusaammik sulinissaq amigaataasoq ilinniarfimmi sungiusarnertut ingerlassinnaagaa. Aalajangersakkallu ilutigisaanik oqaatiginiarpaa sungiusaammik sulinissap ilaa suliffeqarfimmi naammassillugu ingerlanneqarsinnaassasoq.

Imm. 3-mut

Aalajangersagaq ingerlatitseqqinneruvoq Inuussutissarsiutinik ilinniartitsineq pillugu inatsimmi § 46, imm. 2, oqaaseqatigiit pingajuinik.

Aalajangersagaq siunertaqarpoq killiffiusunik qulaajaaniarnermik, ilinniagaqartut ilinniakkamut isumaqatigiisuteqanngitsut eqqarsaatigalugit, ilinniagaqarnerstiuteqarsinnaaneq ilinniagaqarnerstiutinut aalajangersakkanik tunngaveqartumik qulaajaavigiumallugu.

Imm. 4-mut

Aalajangersakkami imm. 4 tunngaveqarpoq suliffeqarfiit arlaqartut ilinniartumut ataatsimut – lærlingimut – isumaqatigiisuteqartarnerannik, taaneqartumik ataqatigiisitsilluni isumaqatigiisummik. Tamanna isumaqarpoq suliffeqarfiit isumaqatigiisuteqartut tamarmik akisussaaffigisaraat ilinniagaqartup ilinniakkaminik naammassisaqarnissaa, aallaavigalugit tamatumani piumasaqaataasut, sungiusaammik suliffeqarnissamut atatillugu. tamatumunngalu atatillugu periarfissaassaaq isumaqatigiissummi kinaassusiliisinnaaneq suliffeqarfiup sorliup ilinniarfimiinnissaq aamma sungiusaammik sulinissaq akisussaaffigissaneraa.

Imm. 5-imut

Aalajangersakkami imm. 3-mi pineqarpoq suliffeqarfiup periarfissaa ilinniagaqartup suliffeqarfimmi allami ilinniakkaminik ingerlatsigallarsinnaaneranut, tunngaveqartumik allami suligallarnissamut isumaqatigiisuteqarnermik. Pisuni taamaattuni akisussaaffik sungiusaammik sulinerup ingerlanneqarsinnaaneranut ilinniakkami piumasaqaataasunik tunngaveqartumik taamaallaat suliffeqarfimmi ataatsimi inissisimasinnaavoq. Aallaavittullu imaassalluni suliffeqarfik ilinniagaqartumik allami inissiigallartoq akisussaassalluni.

Imm. 6-imut

Aalajangersakkami imm. 6 isigineqassaaq ilinniakkani tamani sungiusaammik sulisitsisoqartannginneraniit. ilinniagaqarli Naalakkersuisunit akuerineqassappat, taava akuersineq pissaaq tunuliaqutaralugit ilinniarfinniit nassiunneqartut ilinniagassanut pilersaarutit. Taakkunani erseqqissarneqassaaq ilinniakkami sungiusaammik suliffeqartarneq ilaanngitsoq, soorluttaaq tamatumunnga tunuliaqutaasut nassuiarneqassasut, tak. siunnersuummi § 21. Ilinniakkani pineqartutut ittuni pissutsit imm. 1-5-imi eqqaaneqartut soorunami isiginiarneqarsinnaanngillat.

§ 42-mut

Siunnersuummi § 42 tamakkiisumik ingerlatitseqqinneruvoq Inuussutissarsiutinik ilinniartitsinermut inatsimmi § 47-mik.

Imm. 1-imut

Imm. 1-imi allaaserineqarput malittarisassaaq tunngaviusoq ilinniagaqartut isiginiassagaat ilinniarfimmiit aalajangersagaasut malittarisassat ilinniakkamik naammassisaqarnissamut, tassaniittut piffissani pineqartuni takkuttarnissamut piunasaqaatit, ileqqorissaarnissamut malittarisassat, suliaassiisutaasunik tunniussisarnissat il.il. Ilangullugulu malittarisassanik pineqartunik unioqqutitsisarnerit fagitigut kingunerisaasa saniatigut sunniuteqarsinnaapput ilinniagaqarnersiuteqarnermut, taakkunani ilaatigut aallaaviummat ilinniakkamik ingerlatsineq.

Imm. 2-mut

Imm. 2 pisinnaatitsissutitut aalajangersagaavoq, tassuunalu Naalakkersuisut nalunaarusiornikkut malittarisassanik aalajangersaasinnaapput ileqqorineqartussanik periaasissatut ilinniagaqartunik ilinniarfimmu ilinniariaqqusisarnerni. Tamatumani ilaatigut pineqarsinnaapput ilinniariaqqusinerup ilusissai, matumani aamma piffissalersuinerit aggersaanerni, ilinniarfimmi qaqugukkut allartittoqarnissaa tunngavigalugu. Pisinnaatitsissut atorneqarsimanngilaq.

§ 43-mut

Aalajangersagaq annerusutigut ingerlatitseqqinneruvoq Inuussutissarsiutinik ilinniartitsinernut inatsimmi § 48-mik, tassanilu pineqarput apeqqutit takkuttarnissamut piunasaqaatinik aamma ileqqorissaarnissamut piunasaqaatinik malinninnginnermut tunngasut.

Imm. 1-imut

Aalajangersagaq ersersitsisuuvoq atsikkutigiisaartumik ileqqoqarnissamik, imatut paasillugu pineqaatissiisuteqarneq aallartinneqassanngitsoq, pineqaatissiinissami siunertaasoq aaqqiissutissarsineqarsinnaappat akornusiinnginnerusumik alloriaateqarnikkut. Ileqqoq

pineqartoq aamma isumaqarpoq pineqaatissiissutaasinnaasut aallartinneqassanngimmata, ilinniagaqartumik ajoqusiissutaasussa q pineqaatissiinikkut, naapertuutinngippat unioqqutitsinerup annertussusianut sanilliullugu. Taamaattumik ilinniarfiup aallarniutigissavaa pineqaatissiissutissaq akornusiinnginnerusoq, alloriartoqannginnerani ilinniakkamik ingerlatsinermit peqataaqqusiunnaarnissamut. Ilinniagaqartullu pisuni periarfissaraa aalajangiineq naalakkersuisoqarfimmut oqartussaasumut naammagittaalliutigissallugu. Kiisalu aamma aalajangersakkami oqaaseqatigiit aappaanni ersippoq taamaallaat qitiusumik ilinniarfimmi ulluinnarni pisortaasoq aalajangiisinnaasoq. Taanna aamma pisussaavoq takkuttartussaannermut malittarisassat atortinneqarnerannik isumaginnittusoq, aammalu ileqqorissaarnissamik malittarisassanik eqqortitsisoqarneranik isiginiaasussa. Tamatumunngalu atatillugu oqaatigineqassaaq oqaaseqatigiit kingullit aalajangersakkanut maanna atuuttunut sanilliullugit taamaallaat "forstanderimik" eqqartuimmat, rektorimik, qitiusumik ilinniarfimmi pisortamik assigisaanilluunniit pinnani, tak. aamma § 3-mi assigisaanik allannguat. Tamatumunnga pissutaavoq qitiusumik ilinniarfimmi aalajangiisuusumik atorfimmut taaguut tassaammat "forstanderi" pineqaranilu assersuutigalugu "rektor", ilinniarnertuunngorniarfinni atorpeqartoq.

Imm. 2-mut

Imm. 2-mi siunnersuutigineqarpoq Naalakkersuisut pisinnaatinneqarnissaat malittarisassiornissamut, aqutsisunik ilinniagaqartut ilinniartitsinermut atatillugu ingerlatsinerannik. Tamatumani pineqarput malittarisassiornissat takkuttartussaannermut, ileqqorissaannermut, napparsimalluni peqanngittarnerit uppersarnerqartarnissaannik, pineqaatissiissutaasartussanut, tamatumani aamma atuartitsinermit peersitaasannermut, kiisalu aamma peersitaanerit suliarineqartarnerinut. Tamatumunnga atatillugu naatsorsuutigineqarpoq malittarisassanik suliaqarneri atsikkutigiissaartumik periaaseqarnissaq eqqaaneqareersoq isiginiarneqassasoq.

§ 44-mut

Aalajangersagaq pisariaqassusia naapertorlugu iluarsiiissusikkamik ingerlatitseqqinneruvoq Inuussutissarsiutinik ilinniartitsineranut inatsimmi § 49-mik, pineqarlutillu piumasaqaatit qitiusut lærlinginut isumaqatigiissutini aamma ilinniagaqarnermut isumaqatigiissutini.

Imm. 1-imut

Imm. 1-imi allaaserineqarput piumasaqaatit ilusissaat, isiginiagassaasut lærlinginut isumaqatigiissusiortarnerni imaluunniit ilinniagaqarnermut isumaqatigiissusiortarnerni. Ilutigisaanik malugeqquneqassaaq kontrakti isumaqatigiissutaasoq imaluunniit isumaqatigiissut immersugassatut suliaasumi suliarineqartassamat. Immersugassaq tusarniaassutigineqarsimassaaq ilinniarfimmut ilinniagaqartup attavigisaanut aammalu kattuffinnut susassaartunut, assersuutigalugit sulisut peqatigiiffiisa kattuffianut imaluunniit sulisitsisut peqatigiiffiannut, akuerisaassallunilu naalakkersuisoqarfimmit oqartussaasumit.

Imm. 2-mut

Imm. 1-imi oqaatigineqarpoq naalakkersuisoqarfiup oqartussaasup immersugassaliaa akuerisaasoq allannagortinneqarsinnaanngitsoq. Tamatumani pissutaapput inatsisitigut isumannaatsumik ingerlatsisoqarnissaa, ilinniagaqartumut taamatullu suliffeqarfimmut tunngatillugu.

Imm. 3-mut

Aalajangersagaq isumaqarpoq ilinniagaqartup minnerpaamik ilisimatinneqartussaananeramik akissarsiassaminik, ilinniagaqartup pisinnaatitaaffigisaminik, akissarsiat ersarissumik nalunaarneqarsimassammata lærlingitut isumaqatigiissummi imaluunniit ilinniagaqarnermut isumaqatigiissummi.

Imm. 4-mut

Aalajangersakkap immikkoortuani 3-mi siunnersuutigineqarpoq pisinnaatitsissutitut aalajangersakkap atuuttuusup Naalakkersuisut pisinnaaneranun erseqqissaasinnaanermik imm. 1-imi aamma 2-mi eqqaaneqartunik piumasaqaatinik, malittarisassiorsinnaanermillu kontraktit isumaqatigiissutigineqartullu nalunaarsorneqartarsinnaanerannik ingerlateqqinneqassasoq.

§ 45-mut

Aalajangersagaq ingerlatitseqqinneruvoq Inuussutissarsiutinik ilinniartitsineranut inatsimmi § 50-*imik*.

Imm. 1-imut

Aalajangersagaq isumaqarpoq naak ilinniagaqartut sungiusaammik sulinermi nalaani isumaqatigiissutit naapertorlugit sungiusaammik sulineranut akissarsiaqarnissamut pisinnaatitaagaluartut, ilinniagaqartut aamma periarfissaqassasut immikkut ittunik ilinniagaqarnersiutinut tapiliussanik pisartagaqarnissamut, tak. ilinniagaqarnersiutit pillugit malittarisassat. Tamanna isumaqarpoq ilinniagaqartup assersuutigalugu aamma akiliunneqarsinnaaneramik angalanissamut, kisiannili ilinniagaqarnersiutinuunngitsoq.

Imm. 2-mut

Imm. 2-mi erseqqissarneqarpoq malittarisassat ilinniagaqarnersiuteqarnermut aamma atuuttuusut ilinniagaqartunut ilinniarfimmi ilinniakkamik ingerlatsisunut. Tamanna tunuliaqutaralugu ilinniagaqartut pissutsit atuuttut tunngavigalugit aamma ilinniagaqarnersiutinik pisartagaqarsinnaapput, sungiusaammik sulinerup ilinniarfimmi ingerlanneqarfisani. Aalajangersakkami qularnaarneqarpoq pisinnaatitsineq ilinniagaqartut ilaasa akissarsiaqarsinnaanerak ilinniagaqarnersiutinut taarsiullugu.

§ 46-mut

Aalajangersakkap assigaa Inuussutissarsiutinik ilinniartitsineq pillugu inatsimmi § 51.

Imm. 1-imut

Aalajangersakkami imm. 1 erseqqissaavoq isumaqatigiissuteqarneq pingaarnertut tunngaviusoq suliffeqarnermi. Taamaattoq tamanna naleqqussagaavoq innersuussinikkut ilinniakkami siunertaasoq anguneqartussaasoq. Tamatumalu saniatigut aalajangersagaq ersersitsisuuvoq suliffeqarnermi illuatungeriit akornanni isumaqatigiissutit maleruagassallu Inatsisartut inatsisaanni aalajangersarneqartunut naapertuuttut atuuttuusut ilinniagaqartunut inuussutissarsiutinik ilinniartitaanerni, tamatumanilu aamma avatangiisinut malittarisassat atuuttut aamma. Ilinniagaqartup atugaanut atatillugu aqutsineq taamaasilluni tassaavoq ilinniagaqartup aamma sulisitsisuata akoranni isumaqatigiissutit iluanni aaqqissuussinerusoq.

Imm. 2-mut

Imm. 2-mi erseqqissarneqarpoq sungiusaammik suliffeqarfimmi suliffeqarneq taamaallaat ilinniagaqarnermik siunnerfeqartussaasoq, qularnaarisussamik ilinniagaqartup piginnaaneqalernissaanik, ilinniagaanut atatillugu atorsinnaasunik. Taamaattumillu suliffeqarfiup taamaallaat pisuni immikkut illuinnartuni ilinniagaqartoq suliassittarsinnaavaa ilinniagaqarneranik siunertaqanngitsunik. Tamannalu taamaammat taamaallaat pisarsinnaavoq tunngaveqartumik ilinniakkami anguniakkat anguneqarsinnaanerannik. Ilinniagaqartoq suliassinneqartaruni imm. 2-mi eqqaaneqartunik pissutsinik eqqortitsiviunngitsumik, taava ilinniagaqartoq pissutsit atuuttuusut tunngavigalugit suliamik sungiusaammik suliffissanut ataqatigiissaarivimmut suliassanngortitsisinnaavoq, tak. § 53, imm. 1.

§ 47-imut

Aalajangersagaq iluarsisassanik iluarseereernikkut ingerlatitseqqinneruvoq Inuussutissarsiutinik ilinniartitsinermit inatsimmi § 52-mik, forstanderimillu pisinnaatitsilluni ilinniagaqartup piffissami ilinniagaqarfigisassaani naannerulersitsisinnaanermik, suliani ataasiakkaani, ilinniagaqartup piginnaaneriniq nalilersuinikkut. Aallaaviusut ilisimasat misilittakkallu immikkut ittut, soorlu misilittakkat ilinniarsimassutsikkullu aallaaviusut pissutaasinnaapput ilinniagaqartup annertunerusunik pissarsiaqannginnissaanut piffissap nalinginnaasup iluani ilinniagaq ingerlanneqarpata.

Aalajangersagaq sanilliunneqassaaq siunnersuummi § 14, nr. 2, tassani erseqqissarneqarmat Naalackersuisut malittarisassiorsinnaasut ilinniakkap ilaanik ingerlatsinnginnissamut. Siunnersuummi § 14, nr. 2-mi oqaasertaliussat taamaasillutik isiginiarneqartussaapput ataatsimut isigisumik aalajangersakkatut, tassani Naalackersuisut periarfissinneqarmata ilinniakkanik immikkut aaqqissuussanik suliqarsinnaanermik, inunnut immikkut misilittagaqartunut imaluunniit immikkut piginnaaneqartunut. Kiisalu Naalackersuisut § 14,

nr. 2-mi aalajangersakktat tunngavigalugit malittarisassiorsinnaapput ilinniariikkat allat kingunerisaannik ilinniakkap sivikillineqarsinnaanernik inuussutissarsiutinik ilinniartitaanerni tamarmiusuni atuuttussanik, aalajangersagarli una taamaallaat inuussutissarsiutinik ilinniartitsinerni tunngaviusuni atuuttuulluni.

§ 48-mut

Aalajangersagaq iluarsisassartaanik iluarseeernikkut ingerlatitseqqinneruvoq Inuussutissarsiutinut ilinniartitaanerni inatsimmi § 53-imik.

Imm. 1-imut

Imm. 1-imi nalunaarneqarput pissutsit tunngaviusut ilinniagaqartup aamma suliffeqarfiup isumaqatigiissuteqarsinnaanerannut, sungiusaammik sulinissap sivitsorneqarsinnaaneramik, taamalu piffissamik ilinniagaqarfiusussamik tamarmiusumik sivitsuisinnaaneq.

Nr. 1

Nr. 1-imik aalajangiunneqarpoq sivitsuineq atorneqarsinnaasoq ilinniagaqartup nappaammik pissuteqartumik piffissap ilinniagaqarfiusussap tamarmiusup 10 %-ia sinnerlugu peqanngissimaneratigut.

Nr. 2

Nr. 2 taamaallaat attuumassuteqarpoq ilinniagaqartup piffissaq ilinniarfimmi ilinniagaqarfiusoq uteqqissappagu.

Nr. 3

Sulinngiffeqartarnermut - orlov – aalajangersakkamut nr. 3-miittumut atatillugu sulinnngiffeqarnissamik akuersissuteqartoqarpat sivitsuisinnaaneq isummerfigisariaqarpoq, ilinniagaqartup aamma suliffeqarfiup akornanni isumaqatigiissuteqarnermut atasumik. Tamatuma saniatigut ilinniarfik akulerunneqartariaqarpoq sulinnngiffeqarnissamik akuersissuteqarnermi, taamaaliornikkut ilinniakkamik ingerlatsinerup pisussanut allanut naapertuuttumik aaqqissuunneqarnissaa isumagineqarsinnaaqullugu.

Nr. 4

Nr. 4 sammisuuvoq aaqqissuussinernut ilinniagaqartup piffissap ilaannaani suliffigisagaanut atasumik, imaluunniit ilinniagaqartup sulisitsisumut isumaqatigiissuteqarfigisaanni piffissani ersarinnerusumik aalajangiunneqartuni sulisannginnissamik. Tamatumani assersuutigalugu pineqarsinnaavoq ilinniagaqartoq timersornermik ingerlatsisuusoq, imaluunniit ilinniagaqartoq allanik sunngiffimmini soqutigisaqartoq, ilinniagaqartup suliffiullu isumaqatigiissutigisaanik ilinniagaqartup peqataaffigisagasaanik.

Imm. 2-mut

Aalajangersakkami aalajangiunneqarpoq ilinniagaqartup aamma suliffeqarfiup aallaaviusutut taamaallaat piffissamik ilinniagaqarfiusumik sivitsuisinnaanerat atuuttuussasoq piffissap peqanngiffiusup annertoqataanik. Isumaqatigiissuteqarnermi pineqarsimappat piffissaq peqanngiffiusumiit sivisunerusoq, sivitsuineq taamaattoq akuersissutigineqartussaassaaq. Aalajangersagaq naleqqussagaavoq, taamalu forstanderi aamma sungiusaammik suliffissanut ataqatigiissaarivik siulersuisunik aamma ataatsimiititaliamik taarsiillutik, aalajangersakkanut atuuttunut atatillugu. Akuersissuteqarneq taamaasilluni qitiusumik ilinniarfimmi forstanderimit isumagineqartussaavoq, sungiussaammik suliffissanut ataqatigiissaarisumit inassuteqaammik tunngaveqartumik. Tamatumunnga atatillugu naatsorsuutigineqarpoq forstanderip isiginiassagaa qitiusumik ilinniarfiup sivitsuineramik ilinniarfimiinnissanut aggersunut naleqqussaansaa.

Imm. 3-mut

Imm. 3-mi aquneqarput apeqquiti ilinniagaqartup aamma suliffeqarfiup akornanni akerleriissutaasunut tunngasunut atatillugu aalajangiinernik imaqartut, piffissap ilinniagaqarfiusup iluani peqanngittarnermi atugassarititaasut pillugit ingerlatinneqartarnissaat. Suliat taamaattut qitiusumik ilinniarfimmi forstanderimit aalajangiivigineqartarput, sungiusaammik suliffissanut ataqatigiissaarisumit inassuteqaammik tunngaveqartumik. Taamaattoq forstanderip aamma sungiusaammik suliffissanut ataqatigiissaariviup suliamut pulaneranni minnerpaamik piunasaqaataassaaq illuatungeriit arlaata tamatuminnga piunasaqaateqarsimanissaa. Taamaassimappat taava qitiusumik ilinniarfimmi forstanderip sungiusaammik suliffissanut ataqatigiissaarineramik aaqqissuussinermit inassuteqaammik tunngaveqartumik piffissamik ilinniagaqarfiusussamik sivitsuisinnaavoq, piffissamit peqanngiffiusimasumit sivikinnerusumik imaluunniit sivisunerusumik.

§ 49-mut

Aalajangersagaq aaqqissuussinernut iluarsiiisutitalimmik ingerlatitseqqinneruvoq Inuussutissarsiutinik ilinniartitsineramik inatsimmi § 54-imik.

Aalajangersagaq pilersitsivoq periarfissamik, qitiusumik ilinniarfimmi forstanderip pisuni immikkut ittuni ilaanngitsunilu siunnersuummi §§ 47-48-mi pisuni pineqartuni, sivitsuisinnaangorlugu imaluunniit sivikinnerulersitsisinnaangorlugu piffissamik ilinniagaqarfiusussamik. Assersuutigalugu tamatumani pineqarsinnaapput piginnaanerit amigaateqartut, imaluunniit ilinniagaqartup inaarutaasumik soraarummeernermi angusinngitsoornera, aatsaallu piffissami kingusinnerusumi soraarummeeqqissinnaanera. Tamatuma saniatigut imaattoqarsinnaavoq ilinniagaqartoq ilinniakkap ilaani piginnaanertigut unammilligassanik ersersitsisoq, isumaqassananilu pinngitsaaliissummik naammassisitsiniaanissaaq. Aalajangiisuussaarli piffissamik sivitsuinerup ilinniartitaanerit aaqqissuussaananerannut naleqquttumik inissinneqarsinnaanissaa. Matumanilu aamma

pineqartup aalajangersagaq katersiviusoq pisartunut nalinginnaasunut atasunik, siunnersuummilu sivitsuisinnaanermik imaluunniit sivikilliliisinnaanerup ilinniakkamik ilaanngitsunut atuuttoq.

§ 50-imut

Aalajangersagaq tassaavoq Inuussutissarsiutinik ilinniakkanut inatsimmi § 55-imik ingerlatitseqqinneq, imaqarlunilu tunngaviusunik ileqqunik lærlinginut isumaqatigiissusiortarnerni aamma ilinniagaqartunut isumaqatigiissusiortarnerni.

Imm. 1-imut

Imm. 1-ip kinguneraa lærlinginut isumaqatigiissut aamma ilinniagaqartut isumaqatigiissutaat illuatungeriit akornanni isumaqatigiissuteqartarnerni ileqquusut nalinginnaasut naapertorlugit tassaammata inatsisitigut pituttuisuusunik isumaqatigiissutit, ilinniartup nammineq aamma suliffeqarfiup nammineq akornanni, ilutigisaanillu atorunnaarsinneqarsinnaanngitsaq.

Imm. 2-mut

Imm. 2-mi sakkukillineqarpoq imm. 1-imi atorunnaarsinneqarsinnaanngitsumik nalunaarneq. Tamatumani pissutaavoq atorunnaarsitsisinnaannginneq atuuttanngimmat sungiussaammik suliffeqarnerup qaammataani siullerni pingasuni, - piffissaasumi misiliiffittut taaneqartumi – tassanilu illuatungeriit siumoortumik nalunaaqqaaratik isumaqatigiissummik atorunnaarsitsisinnaallutik. Piffissaq misiliiffiusoq taamaasilluni piffissaavoq illuatungeriit imminnut misissuataarfissaat, naliliiffissaallu atorfeqarnissaq qaammatit pingasut sinnerlugit pissusissamisussanersoq, taamalu atorunnaarsinneqarsinnaajunnaassanersoq. Kiisalu aamma atorunnaarsitsisoqarsimappat atorunnaarsitsinermut atatillugu piumasarineqanngilaq pissutaasumik nalunaaruteqartoqarnissaa. Piffissaq misiliiffiusoq, qaammatit pingasut siulliit naatsorsorneqartarput ilinniagaqartup suliffeqarfimmi sungiussaammik sulilluni aallartinneraniit. Peqannginneq ilinniarfimmiinnermik pissuteqartoq piffissami miliiviusumi ilaasannngilaq.

Imm. 3-mut

Imm. 3-mi pineqarpoq imm. 2-mi piffissami misiliiviusumik sivitsuisinnaaneq. Takuneqarsinnaavoq ilinniagaqartup pissutsinik § 48, imm. 1-imi pineqartunik pissuteqartumik assersuutigalugu napparsimaguni, ilassutitut ilinniarfimmi atuaruni, sulinngiffeqaruni, piffissami sivikillisami sulisaruni imaluunniit sulinissamit sulinngiffeqartaruni, qaammammit ataatsimit sivisunerusumik, taava piffissaq misilitsiffiusoq sivisorneqartussaasoq peqanngissimanerup sivisoqataanik. Taamaasilluni aalajangersagaq taamaallaat naleqquttuusaaq atussallugu peqannginneq piffissap misilitsiffiusup qaammatinik 3-nik sivisussusillip suliffeqarfimmiiffiusup ilinniartumut iluani pisimappat.

§ 51-imut

Aalajangersagaq tamakkiisumik ingerlatitseqqinneruvoq Inuussutissarsiutinik ilinniakkanut inatsimmi § 56-imik, pineqarlutillu nalinginnaasunik pisussaaffinnik sumiginnaanerni pisussaaffiit, illuatungeriinnit atorneqarsinnaasut.

Imm. 1-imut

Nalinginnaasumik pisussaaffinni tunngaviusarpoq, imm. 1-ip malitsigisaanik, illuatungeriit aappaata pisussaaffigisani unioqqutippagit, illuatungiusup aappaata isumaqatigiissut atorunnaarsissinnaagaa. Tamatumunnga atatillugu suut pingaaruteqarnersut naliliivigisariaqarput pisumi namminermi naliliinikkut. Taamaattorli sulisitsisup pisussaaffimminik naammassinnginnera akissarsiaqartitsinissaq eqqarsaatigalugu pisussaaffimmik annertuumik unioqqutitsinertut isigineqassaaq. Tamatumalu saniatigut akuerisaanngitsumik malunnaatilimmik sivisussusilimmik ilinniagaqartup peqanngittarneri taassuma tungaaniit pisussaaffinnik unioqqutitsinertut isigineqassaaq.

Imm. 2-mut

Aalajangersakkami imm. 2 oqariartorpoq malittarisassanik aalajangersaanermik tunngaveqartumik inatsisilerinermi periaatsinik “eqqunngitsunik aallaaveqarneq” illuanilu “aallaaviusut tunngaviit sequmittut”. Malittarisassanik atuineq pisariaqarpoq pisunik namminernik naliliinernik atuuttuusunik tunngaveqartunik. Aallaavigisat eqqunngitsut tamatumunnga atatillugu paasineqassapput pisutut atorunnaarsitsisuusumit illuatungiusumit kukkusumik tunngavilimmik isumaqatigiissuteqarnermi naatsorsuutigisaqartoqarsimanagera, kisiannili kingunerinnerusukkut pissusiusimangitsutut ersertumik. Taamaattoq ilutigisaanik piumasarineqarpoq ersarissasoq illuatungiusup atorunnaarsitsisup isumaqatigiissuteqarsimanaviangikkaluarnera, taassuma ilisimasimagaluarunigit pissusiviusut piffissami isumaqatigiissuteqarfiusumi atuuttuusut. Tamanna assersuutigalugu tassaasinnaavoq ersarissisoq sulisitsisup lærlingimut isumaqatigiissutip atsiorneqarnerata nalaani naatsorsuutigisimagaluaraa ilinniagaqalersussap aalajangersimasunik naatsorsuutigisaminik piginnaaneqarnera, kingusinnerusukkut ersertumik taamaangitsoq. Taamaattoq ilutigisaanik uppersararneqarsinnaassaaq sulisitsisup isumaqatigiissuteqarsimanaviangikkaluarnera pissusiviusut ilisimasimagaluarunigit.

Aalajangersakkami innersuunneqarput naatsorsuutigisat imaluunniit ilimagisat aserortut, pissutsit immikkut ittut lærlingit isumaqatigiissusiornermi imaluunniit ilinniagaqarnermut atatillugu isumaqatigiissummiittut kingusinnerusukkut allanngornerisigut. Taamaattoq ilutigisaanik ersarittariaqarpoq pissutsit pineqartut aalajangiisuusumik sunnuteqarsimassammata isumaqatigiissuteqarnermi kontraktiionermiluunniit. Tamatumunnga atatillugu aalajangiineq pisariaqarpoq pisumik namminermik naliliinernik tunngaveqartunik. Tamatumani assersuutigalugit pineqarsinnaavoq ilinniagaqartoq lærlingit isumaqatigiissuteqarenermi misigisaqartoq suliffeqarfiup nutaamik piginnittoqalerneranik, suliffeqarfiup pissusianik ileqquinillu allannguisumik, pissutsillu imaalerlutik sungiusaammik

tassani suliffeqarnissaq naleqqukkunnaarluni ilinniagaqartup ilinniagaanut atatillugu. Tamatuma saniatigut eqqaaneqarsinnaapput pissutsit nalinginnaasumik naliliinermik tunngaveqartut aallaavigalugit lærlingip isumaqatigiissuteqarfisai, upperalugu suliffeqarnerup pineqartumi lærlingi tunissagaa piginnaanernik immikkut pisariaqartunik, sulisitsisumut suliassanut allattorsimaffimmik tunniunneqartumik tunngaveqartunik. Kingornagulli allannguinerit suliassat allassimaffiannik aalajangiisuullutik lærlingip isumaqatigiissummut atsiorneranut.

Soorlu ersittoq, malittarisassamik atuisuinnaanermi piumasaqaataavoq kinaassusersiunngitsumik - objektiviusumik - tunngaveqartunik naliliinerit ersersippaat nassuerutigisariaqartoq eqqunngitsunik imaluunniit allanngortunik aallaaveqartoqarsimasoq lærlingitut isumaqatigiissummik ilinniakkamulluunniit isumaqatigiissummik atsiuinermi. Kiisalu aamma piumasarineqartariaqarpoq isumaqatigiissutaasumik atorunnaarsitsiniartup naapertuilluartumik siumoortumik paasisinnaasimangikkai pissusiviusut isumaqatigiissummik atsiuinermi, imaluunniit naatsorsuutigereersinnaasimangikkaa isumaqatigiissuteqarnissamut tunngaviusut allannguuteqarumaartut.

Aalajangersagaq aamma tunngavilersuutigineqarsinnaavoq illuatungiusup aappaanit imaluunniit allaat illugiinniit.

Imm. 3-mut

Imm. 3 aalajangersaavoq qisuariarnissamut piffissamik illuatungiusumut pisussaaffimmik sumiginnaasoqarsimaneramik oqariartortumut, imm. 1 aamma 2 naapertorlugit, siunnerfigalugu lærlingitut isumaqatigiissutip ilinniakkalluunniit atorunnaarsinneqarnissaa. Qaammammik ataatsimik qisuariarnissamut piffissaqartitsineq tassaavoq isumaqatigiissutaasumik atorunnaarsitsiniartup kingusinnerpaamik qaammatip qaangiunnerani ilisimasaqalernermit imaluunniit atorunnaarsitsinissamut tunngaviusunik paasinnissimasariaqaraluarnermiit saaffiginnissimasussaanera illuatungiusumut atorunnaarsitsinissamik siunertaqartumik. Nalinginnaasumik eqqummaarittussaanertut paasineqassaaq illuatungiusoq isumaqatigiissutip atorunnaarsinneqarnissaanik kissaateqartup eqqummaarissimagaluaruni, pisuni pisutut ittuni pissusissaasumik, paasisimasariaqaralarai aallaavigineqartut tunngaviusut eqqunngitsueneri, kingusinnerpaamik qaammatip qaangiunneratigut, atorunnaarsitsinissarlu atortuutillugu, taamaanngippat illuatungiusup atorunnaarsitsinnaanermut periarfissani annaassammagu. Tamatumunnga tunngavilersuutaavoq pineqartup taamaaneratigut akuerisimassammagit aallaavigineqartut eqqunngitsut. Naatsorsuutigisaasimagaluartut ajutoorsimanerinit tunngatillugu piffissaliinissaq naatsorsorneqartussaavoq piffissamiit atorunnaarsitsisutut illuatungiusup ilisimannereersimaffissaraluanit aallaaviusut naatsorsuutigisat allanngorsimasut.

Imm. 4-mut

Imm. 4-mi erseqqissarneqarpoq pissutsit kingunerisaanik ilinniagaqartup ilassutitut ilinniarfimmi atuartinneqarnissaa pisariaqalersimappat tamanna

tunngavigineqarsinnaanngitsoq atorunnaarsitsinissamut, tamannalu aamma atuulluni pisuni ilassutitut atuartinneqarnissap assersuutigalugu oqaatigineqarfigisaani naatsorsuutigineqanngitsutut oqaatigisariaqartuni. Aalajangersagaq atuuppoq faginik ataasiakkaaginnarnik pisaqarfiusuni imaluunniit ilinniarfimmiiinnermi ilinniarfinniinnerniluunniit arlaqartuni. Ilinniagaqartoq akuerineqanngippat soraarummeernermut pisussamut ilaanissamut, imaluunniit misilitsinnernut arlaqartunut ilaanissamut, taava tamanna kinguneqarsinnaavoq lærlingitut isumaqatigiissutip atorunnaarneranik imaluunniit ilinniakkamut isumaqatigiissutip atorunnaarneranik, tak. siunnersuummi § 52.

§ 52-imut

Aalajangersagaq annertunerusutigut ingerlatitseqqinneruvoq Inuussutissarsiutinik ilinniakkanut inatsimmi § 57-imik. Aalajangersagaq tunngasuuvoq ilinniartunut atuartinneqarnermiit mattunneqartunut, pissutsinik § 43-mi eqqaaneqartunik tunngaveqartumik, tassa imaappoq takkuttarnissamik ileqqorissarnissamillu malittarisassanik malinninnginnermik, imaluunniit ilinniagaqartup soraarummeernernut imaluunniit misilitsinnernut marloriaq sinnerlugu peqataareersimanerani angusinani, immikkullu akuerineqaqqissinnaanerani qitiusumik ilinniarfiup forständerianiit. Pisuni taamaattuni lærlingitut isumaqatigiissut imaluunniit ilinniakkamut isumaqatigiissut atorunnaassaaq. Aalajangersagaq siunnerfeqarpoq erseqqissaanissamik sulianik namminernik ingerlatsisoqartanngimmat lærlingitut isumaqatigiissutip imaluunniit ilinniakkamut isumaqatigiissutip atorunnaarsittarneranut, ilinniarfiup ilinniagaqartoq atuartitsinermut peqataajunnaarsikkaangagu, imaluunniit ilinniagaqartoq ilinniakkaminik naammassisaqarsinnaanngikkaangat, tassami atorunnaarsitsineq taamaallaat tunngaveqartarmat ilinniakkap naammassinissaanut piginnaaneqannginnermik. Lærlingitut isumaqatigiissutip imaluunniit ilinniakkamut isumaqatigiissutip atorunnaarnera taamaattumik aalajangiinerusanngilaq. Kisiannili ilinniagaqartup naammagittaalliutigisinnaavaa atuartitsinermiit peqataajunnaartitaanini.

§ 53-imut

Aalajangersagaq iluarsiiissusikkamik ingerlatitseqqinneruvoq Inuussutissarsiutinik ilinniartitsinernik inatsimmi § 58-imik, pineqarpullu aalajangiisarnerit isumaqatigiinngissutaasunik ilinniagaqartup aamma sungiusaammik suliffiusup suliffeqarfiup akornanni. Aalajangersakkami imm. 2 siulersuisut aamma ataatsimiititaliap akulerunneqartarneri taamaattumik ingerlateqqinneqanngillat. § 53 ilanngullugu isigineqassaaq siuliani nalunaarneqartunut atatillugu, ilinniagaqartup piffissami sungiusaammik suliffiusumi suliffeqarfimmut atasuusarnera pillugu. Taamaattumillu ilinniagaqartup aamma suliffeqarfiup sungiusaammik suliffiusup akornanni

isumaqatigiinnngissutaasut annerusutigit akkerleriissutit suliarineqartarneri pillugit sulisitsisup sulisullu akornanni suliassaallutik, assersuutigalugulu ingerlatsivimmi ajornartorsiutitut isigineqartussaanaatik.

Imm. 1-imut

Aalajangersakkamit ersippoq sungiusaammik suliffissanut ataqatigiissaarinermik ingerlatsivik anguniagaqartassasoq illuatungeriit isumaqatigiinnissaannik, ilinniagaqartup aamma sungiusaammik ingerlatsiviusup suliffeqarfiup akornanni isumaqatigiikkunnaartoqartillugu. Tamatumunnga atatillugu killeqarpoq qanoq annertutigisumik qitiusumik ilinniarfik akulerussinnaasarnissaa suliani pineqartuni, annertunerpaatigit suliassaasuni illuatungeriinni, pisariaqarpallu immaqa illuatungeriit peqatigiiffiisa kattuffiisalu akulerunneqarnerisigit.

Imm. 2-mut

Aalajangersakkami aalajangiunneqarpoq isumaqatigiinnngissutaasoq akissarsianut imaluunniit suliffeqarnermi atugassarititaasunut tunngasuusimatillugu apeqqut suliffeqarnermi eqqartuussiveqarnermut suliassanngortinneqarsinnaasartoq, illuatungeriit peqatigiiffinnik ilaasortaaffeqarsimagaangata. Taamaangippat apeqqutit suliassaasut eqqartuussivinnut aalajangigassanngorlugit suliaritinneqartariaqassapput.

Imm. 3-mut

Aalajangersagaq oqariartuuteqarpoq nalinginnaasumik inatsisigit ileqquusut naapertorlugit taarsissuteqartoqarnissaanik apeqqutit eqqartuussivinnit aalajangiivigineqartartut. Qitiusumik ilinniarfimmi aalajangikkat maalaarutigineqarsinnaanngimmata allaffissornikkut pisortani oqartussaasunut, sungiusaammik suliffiusup suliffeqarfiup imaluunniit ilinniagaqartup piumasaaqatigisai taarsiiffigineqarnissamik annaasani aalajangiinernik tunngaveqartunik qitiusumik ilinniarfimit aalajangerneqartuni eqqartuussivinnut taamaallaat suliassanngortinneqarsinnaapput. Tamatumunnga atatillugu pineqarput qitiusumik ilinniarfiup ataatsimut isigisunik aalajangiisarneri, tassami qitiusumik ilinniarfik aalajangiisinaanermut pisinnaatitaanngimmat pissutsini § 53, imm. 1-imi aamma 2-mi pineqartuni pissutsini.

§ 54-imut

Aalajangersagaq tamakkiisumik ingerlatitseqqinneruvoq Inuussutissarsiutinik ilinniartitsinernik inatsimmi § 59-imik.

Imm. 1-imut

Imm. 1-imi aalajangiunneqarpoq ilinniagaqartup ilinniakkamut isumaqatigiissuteqarsimasup imaluunniit lærlingitut isumaqatigiissuteqartoq - kontraktoqartoq - suliffimmi ajoqusersinnaanermut sillimmasiisarnermut ilaasuusoq, inatsimmi nr. 1528, ulloq 21. december 2010-meersumi sulitilluni ajoqusersinnaanermut sillimmasiisarneq pillugu

peqqussummi kingusinnerusukkut allannguuteqartumi. Tamanna taamaallaat atuuppoq ilinniarfimmiinnermi, ilinniakkamut pisariaqartumik ingerlatsinnermut atatillugu. Ilinniagaqartoq pisuni pineqartuni sulisitsisup sulitilluni ajoqusersinnaaneq pillugu sillimmasiinerata iluaniissaaq.

Imm. 2-mut

Imm. 2-mi erseqqissarneqarpoq ilinniagaqartup ajoquserneri ilinniarfimmiinnermi allatigullu ilinniarfinni ilinniagaqarnerni imm. 1-imi pineqanngitsuni ilaasartut sulitilluni ajoqusersinnaanermut sillimmasiissutaasartui, ajoquserneq suliffimmut assingusunik pissuteqarsimassappat. Ajoqusernerit taamaattut Namminersorlutik Oqartussat sulitilluni ajoqusersinnaanernut sillimmasiinerisa iluaniissapput. Aalajangersagaq taanna siunnersuummi atatiinnarneqarpoq, pissutigalugu ilinniagaqartut nalinginnaasumik sulitilluni ajoqusersinnaanermut sillimmasiisarnertit iluaniikkajunngimmata, tak. peqqussummut pineqartumut atatillugu imm. 1-istik oqaaseqaatit.

§ 55-imut

Aalajangersagaq tamakkiisumik ingerlatitseqqinneruvoq Inuussutissarsiutinik ilinniartitsinernik inatsimmi § 60-istik, Naalackersuisunullu pisinnaatitsissutaalluni inatsisitigut atugassarititaasunik ilinniagaqartup sulisitsisullu akornanniittunik aqutsinissamut. Tamatumunnga atatillugu nalunaarummik suliaqartoqarsimanngilaq, pisinnaatitsissummik pineqartumik tunngaveqartumik. Aalajangersagaq isumaliutigineqarsinnaavoq atorneqartussatut, siunnerfigalugu ilaatigut aaqqiissutissanik aaqqissuussisinnaaneq suliffeqarfiup sungiusaammik suliffiusup aamma ilinniagaqartup akornanniittartunik, ilinniagaqartup pisussaaffeqarnernut sungiusaammik suliffiusumi ileqqorissaarnissamik malitassanik malinninnissamik suliaassanik suliaqarnerni, sungiusaammik suliffiup pisussaaffianut oqaaseqaateqarnissamik sungiusaammik sulisimaneq pillugu, aammalu ilinniagaqartup suliffimmi akerleriittoqartillugu qanoq inissisimasarnissaanik il.il.

Kapitali 9-mut

Kapitali 9 nutaajuvoq, kinguneqarlunilu siunnersuuteqarnermik ersarissunik aalajangersagaqarnissaanik nakkutilliisarnernut aamma pitsaassusissanik ineriartortitsinernut.

§ 56-imut

Aalajangersakkami pineqarput Naalackersuisut qulaaniit nakkutilliisuunerat, ulluinnarni naalackersuisoqarfimmit oqartussaasumit isumagineqartussaq. Nakkutilliineq aammattaq aaqqissuunneqarsinnaavoq taaneqartutut immikkoortumi nakkutilliineq. Tamanna paasineqassaaq pisortat pisinnaatitaanerattut aamma pisussaanerattut ingerlatsivinnik il.il.

nakkutilliisarnissamik, pisortat oqartussaasut suliassaqarfiini, imaluunniit oqartussaaffiini aalajangersimasuni, tamatumani aamma inatsisit eqqortinneqartarnerannik pisortaasunit aqunneqartut.

Imm. 1-imut

Aalajangersakkami erseqqissarneqarpoq nakkutilliinermi ilaasut ilinniartitaanerit immikkoortui tamarmik, tamatumani aamma misilitsittarnerit soraarummeersitsisarnerillu, aamma immikkoortut qitiusumik ilinniarfiit avataanni pisartut, assersuutigalugit sungiusaammik sulisarnerit.

Naalackersuisut nakkutilliineri tunngaviusumik namminneq ingerlatsinerisigut pisarput, Naalackersuisuni paasissutissanik peqaleraangat ilimanaateqarsinnaasooq pissutsinik atuuttoqartoq pisariaqartitsiviusunik akuleruttoqarnissaanik. Taamaasilluni pisariaqanngilaq imaluunniit naammannani naammagittaalliortoqarsimanera.

Imm. 2-mut

Naalackersuisunut pisussaaffik qularnaassallugu ingerlaavartumik pitsaassusissanik ineriartortitsisoqartuaannarnissaa naammassisanillu nalilersuisoqartarnissaa, isigineqassaaq Naalackersuisut akisussaaffiata ilaatut nakkutilliisarnissamik, atuartitsinermik, misilitsittarnernik aamma soraarummeersitsisarnermik, tak. imm. 1.

Aalajangersagaq ilaatigut qularnaarisussaavoq nalilersuisarnermik aqqissuussisarnerit nutaaliaasut akuutinneqalernissaannik perorsaanikkut qitiusumik ilinniarfinni ileqqusuni. Aalajangersagarlu ilanngullugu periarfissaqartitsivoq ilinniartitaanernik ingerlatsivinni immikkoortut sulluunniit tamarmik peqataanissaannut nalilersuisarnermik ileqquliussassani, assersuutigalugit aamma ilinniartitsisut atuartitseriaasiini, suleriaasiini aamma piginnaasaanni. Nalilersuisarnermik aqqissuussinernik ineriartortitsinerit ilanngullugu aqputaasinnaapput ilinniartitseriaatsit pitsaassusissaannik qularnaariartuaarnerni.

Imm. 3-mut

Aalajangersakkamiittoq ilitsersuisusnaanermut pisussaaffik perorsaanermi aamma allaffissornermi pissusissamisoortumik inissisimammata, qitiusumik ilinniarfiit ingerlatsiviillu taakkua ataanniittut naalackersuisoqarfimmit oqartussaasumit ilitsersorneqartartussaammata, forstanderilu Naalackersuisunit atorfinitsitaalluni.

§ 57-imut

Aalajangersagaq nutaajuvoq, attaveqaqatigiinnermullu tunngasuulluni.

Imm. 1-imut

Aalajangersakkami ersippoq paasissutissat ilinniakkanut, ilinniagaqartunut aamma sulisunut tunngasuusinnaasut. Kiisalu immikkuullarissumik aalajangersarneqarpoq paasissutissanik piniartarneq nakkutilliinermut kisitsisinillu paasissutissanik suliaqartarnermik tunngavilimmik pisartog.

Naalackersuisut naliliisarnerannik tunngaveqartarpoq paasissutissat ilinniakkanut, ilinniagaqartunut aamma sulisunut tunngasut pisariaqarnersut nakkutilliinissamut kisitsisinillu paasissutissanik suliaqarnissanut. Naliliinerni taamaattuni isiginiarneqassaaq atsikkutigiiisaarisarneq nukiit sakkullu atorveqartussat tamarmiusut isiginiarlugit suliaqarnermi paasissutissanillu ingerlatitsisarnerni, ilinniarfiit pisariaqanngitsunik nukinnik atuinnginniassammata.

Imm. 2-mut

Matumani pineqarpoq pisinnaatitsinermik aalajangersagaq, tamatumalu kingunerisaanik Naalackersuisut nalunaarusiornikkut aqutsisinnaallutik pissutsini imm. 1-mi pineqartuni ersarinnerusumik. Tamatumani assersuutigalugu pineqarsinnaapput pulaarluni orniguttarnerit qanoq ittuusinnaaneri, nakkutilliisarnerit akuttussusissaat il.il.

Imm. 3-mut

Imm. 1-imi aalajangersakkap siunertaraa ersarissumik pisinnaatitsissuteqarnissaq elektroniskiusumik attaveqaasersortarnermut qitiusumik ilinniarfiit aamma Naalackersuisut akornanni. Tamannalu isigineqassaaq ingerlatsiviit akornanni digitaliusumik ingerlatsinermut nalinginnaasumut atasumik.

Aalajangersakkamillu tunngaveqartunik pineqartut saniatigut piumasaqaatinik aalajangersaasoqarsinnaavoq digitaliusumik atsiortarnermut, inatsisiliornikkut digitaliusumik atsiortarneq eqqunneqassappat.

Kapitali 10-mut

Kapitali nutaajuvoq ilisarititseqqillunilu periarfissamik misileraasinnaanernut, atorunnaarsinneqartumik Inuussutissarsiutinik ilinniartitsinermik inatsisip atortuulerneratigut.

§ 58-imut

Matumani pineqarpoq misileraanermut aalajangersagaq, pineqarluni periarfissaq pisuni immikkut ittuni Inatsisartut inatsisaanni aalajangersakkanik ataasiakkaanik sanioqqutsisinnaanermut.

Aalajangersakkap ilaatigut assigaa siusinnerusukkut atuuttuusimasoq § 51, Inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit

Inatsisartut peqqussutaanni nr. 2, ulloq 31. maj 1999-imiittumiittoq, atorunnaarsinneqartoq 1. januar 2011-mi. Aalajangersakkami eqqaaneqartutut pineqarput taamaallaat sanioqqutsisinnaanermut periarfissaagallartut, taamaattumillu ataavartumik allannguisoqassappat inatsimmik allannguisoqartariarluni.

Aalajangersakkami aamma ilaapput perorsaanikkut ineriartortitsinermik suliat, aallaaveqartut kissaateqarnermik Inatsisartut inatsisaat siunnerfiunngitsunik akornusiissanngitsaq, perorsaanikkut ineriartortitsisoqarnissaani. Misileraalluni sulineq aamma perorsaanikkut ineriartortitsineq tassaasinnaapput allaffissornikkut, aqqissuussaaniikkut imaluunniit perorsaanikkut suliat. Ilutigisaanillu aalajangersakkami ersippoq Inatsisartut inatsisaanik sanioqqutsineq misileraanerit siuarsarumallugit ingerlanneqartut ilinniartunut attorneqartartunut pitsaanngitsunik sunniuteqassanngitsut. Ilinniagaqartut immikkut akuersisinneqartarsinnaanerat Inatsisartut inatsisaannik sanioqqutsisinnaanermik siunertaasut naammassiniarumallugit nammineq immikkut isumaqarnaviannigillat, ilinniagaqartut pisinnaatitaaffitik ilinniakkamik ingerlatsinermi tunngaviusut tunuartissinnaanngimmatigit.

Kapitel 11-imut

Kapitali 11 allannguuteqanngitsumik ingerlatitseqqinneruvoq Inuussutissarsiutinut ilinniartitsinermik inatsimmi kapitalimik 9-mik, imaqarlunilu ataatsimut isigisunik ileqqussanik, taaneqartunik “aningaasanut inatsimmi pikkorissarnerit”, tassaasut pikkorissarnerit aningaasanut inatsimmit aningaasalersorneqartut. Kapitali tamatuma saniatigut imaqarpoq aalajangersakkamik ingerlatitseqqinnerusumik atuuttumik inatsisit inissisimanerannik, tak. aamma kingullermik allannguutit kapitalimi Inatsisartut inatsisaatigut nr. 6, ulloq 6. juni 2016-imeersukkut.

Siunertaavoq pikkorissartitsisarnerni piginnaanngorsartitsisarnernilu tapiiffigineqartartuni inunnik inuussutissarsiutinik ilinniartitsinerit iluanniittunik, taamaattoqanngikkaluarpata taakkua inatsimmi pisinnaatitaanerup avataaniissagaluarmata. Pineqarmata tapiissutit inuussutissarsiutinik ilinniartitsinerit iluanniittut toqqaannartumik Inuussutissarsiutinik ilinniartitsinernut inatsimmut atasuuvoq, tamannalu inatsimmi allannguuteqartinneqanngilaq. Taamaasillunilu Inuussutissarsiutinik ilinniartitsinermi inatsisip kinguneraa taamaallaat pisinnaatitsisoqarmat tapiissuteqartoqartassasoq pikkorissartitsinernut inuussutissarsiutinik ilinniartitsinerit iluanniittunut, taamaammallu tapiissuteqartarneq pikkorissartitsisarnernut assersuutigalugu meeqqat atuarfianni ilinniartitsisunut aamma perorsaasunut inatsimmi pisinnaatitsinerit avataaniillutik, taamaammallu eqqaaneqareersutut malittarisassanik atuuttooreersunik ingerlatitseqqinnerulluni.

Aalajangersakkat pisinnaatitsippat tapiissuteqartoqarsinnaaneranik pikkorissartitsinernut taaneqartunut AMA kursus (sulisitsisut sulisoqarnermut akitsuutaanniit pikkorissartitsinerit)

aamma pikkorissartitsisarnerit allat PKU-kursus-inik taaneqartartut (Suliniut suliamik ilinniagaqanngitsunik piginnaanngorsaanerit).

AMA tassaavoq inuussutissarsiutinik ilinniartitsinerni ilinniaqqinneq, sulisitsisunut kommuninulluunniit periarfissiisoq angalanernut aamma najugaqarnernut pikkorissartitsinermut atatillugu aningaasartuutissanut matussutissanik qinnuteqarfigisinnaasaat, pikkorissartut ilinniaqqittarnerannut atasumik. Tamanna isumaqarpoq pikkorissartartut ingerlaavartumik piginnaasassaminnik pissarsisarsinnaanerannik, suliffeqarnermi / suliffeqarfinni ujarorneqartartunik.

PKU-mi aallaaviuvoq qularnaarisarneq periarfissanik, inuit suliffeqartut inuussutissarsiutini nalorninartorsiorsinnaasuni ingerlatsisarsinnaanerannik piginnaasaminnik ineriartortitsinernik, suliffissaarussinnaaneq annikinnerutikkumallugu, sulisussanillu inuussutissarsiutini ineriartortitsiviusuni sulisussanik pisariaqartitsineq ujartuinerlu ikiorserumallugu, inuussutissarsiutini ineriartorfiusuni / siuariartorfiusuni soorlu sanaartornermi, takornariartitsinermi aamma ataatsitassarsiornermi, kiisalu aamma ulluunerani paaqqinnittarfeqarnermi aammalu ulloq unnuarlu angerlarsimaffinni kommuniniittuni. PKU-mi aningaasaliissutaasartuni siunnerfiusut pingaernerit taamaasillutik tassaapput suliamik ilinniarsimangitsut, suliffissaaleqisut imaluunniit suliffeqartut inuussutissarsiutini nalorninartorsiorsinnaasuni, kiisalu inuit pikkorissaqqinnissamik pisariaqartitsisut suliffissani siunissami annertusiartortitsiviulersussani.

Piginnaasanik ineriartortitsisarneq ingerlanneqartarpoq PKU-mik pikkorissartitsinertigut assigiinngiaartorpassuartigut, ataatsimut isigisumik ilisarnaateqartut qitiusumik ilinniartitsinertigut ineriartortinneqartarmata ingerlanneqartarlutillu. Taamaattoq aamma pikkorissartitsisarnerit pineqartut neqeroortartunit allanit ingerlanneqarsinnaasarput. Pikkorissartitsinerit nalinginnaasumik modul-inut aqqissuussanik ingerlanneqartarput. Aningaasartuutit tamarnik nunatta karsianit akilerneqartarput. Tamakkualu aamma ingerlanneqartarput siunnerfilersugaasutut sulilernissamut piareersaanertut.

Malittarisassanit tamatumunnga atuuttunit takuneqarsinnaavoq periarfissaqartoq suliffeqarnermi ingerlatsisartunik, inuussutissarsiutinillu ilinniartitsinerni aqqissuussisartunik allanik akulerussisoqartarsinnaasoq, siunnerfigalugu siammasinnerusumik pisariaqartitsinernillu aqunneqartunik suliniuteqarfiusuni neqerooruteqartarnissat. Tamatumunngalu atatillugu nunap immikkoortuinut atasumik killiinernik pilersitsisoqarsimangilaq, tapiissuteqarfiusartunik pikkorissartitsisarnernik ingerlatsisarnerni, kisiannili naatsorsuutaavoq pikkorissartitsinerit tapiiffigineqartartut pingaarnertut maani nunami ingerlanneqartarnissaat.

Naatsorsuutigineqarpoq nalunaarusiornikkut aalajangersaasoqarnissaa pikkorissartitsisarnernut akuerisaasunut tapiissuteqartarneq annertunerpaatigut angalanernut aningaasartuutitut najugaqarnernullu aningaasartuutitut atorneqartarnissaat, taamalu pinnagit

pikkorissarnernut aningaasartuutit ullormusiallu. Taamaattoq aamma naatsorsuutigineqarpoq aalajangersaasoqassasoq nalunaarusiami periarfissaqassasoq ullormusiaqartitsisinnaanermut instruktøriusunut atasunik, pikkorissartitsinerni tapiiffigineqarsinnaasuni, ullormusiat sulisitsisup aningaasartuutigisarmagit. Suliassaqarfimmi tassani allaffissornikkut aqutsineq pivoq Namminersornerullutik nalunaarusiaatigut nr. 21, 1. juli 2008-meersukkut, pikkorissartitsisarnernut inuussutissarsiutinillu ilinniartitsinerni tapiissuteqartarnej pillugu aaqqissuussinerusumi.

§ 59-imut

Aalajangersakkap annertunerusutigut assigaa Inuussutissarsiutinik ilinniartitsinernut inatsimmi § 61.

Imm. 1-imut

Aalajangersagaq ingerlatitseqqinneruvoq Inuussutissarsiutinik ilinniartitsinermi inatsimmi § 61, imm. 1-imik. Aalajangersakkap imm. 1-iani aalajangiunneqarpoq Inatsisartut taakkuusut aalajangersaasartut inuussutissarsiutinik ilinniartitsinerni pikkorissartitsisarnernit qanoq annertussuseqarnissaannik, tunngavigalugit aningaasanut inatsisikkut aningaasaliissutit immikkoortinneqartut. Aalajangersakkap kinguneraa periarfissaqarmat tapiissutinik assigiinngitsunik pikkorissartitsinernut assigiinngitsunut akiuteqartoqartarsinnaanera.

Aalajangersakkap kinguneraa aalajangiisuummat pikkorissartitsinernut tapiissuteqartarnermi pikkorissarnernit inuussutissarsiutinut siunertanik imaqarnersut.

Ersarinnerusunik piumasaqaatit pikkorissartitsisarnernut tapiiffigineqarsinnaasunut, tamatumani aamma pikkorissarnernit sivilissusissaannut, tapiissuteqarsinnaanermi atugassarititaasunut, tapiissutit akilerneqararannut, tapiissutit annertussusissaannut allanullu suli nalunaarusiornikkut aalajangersarneqartassapput, tak. § 60, imm. 2 aamma Inuussutissarsiutinut pikkorissartitsisarnernut tapiissutit pillugit Namminersornerullutik Oqartussat nalunaarutaat nr. 21, ulloq 1. juli 2008-meersoq.

Imm. 2-mut

Aalajangersagaq ingerlatitseqqinneruvoq Inuussutissarsiutinik ilinniartitsinernit pillugit inatsimmi § 61, imm. 2. Naak tapiissutit taamaallaat angalanernut najugaqarnernullu aningaasartuutitut matussusiisaraluartut, inuussutissarsiutit ilaannut siuarsaavigineqartussatut kissaatigineqartunut aamma tapiissuteqartoqarsinnaavoq ilassutaasussanik angalanermut najugaqarnernullu aningaasartuutitut. Tamatumani ingammik pineqarput pikkorissartitsinermut akiliutaasumut matussutissat. Aalajangersakkami siullertut pingaarnertullu pineqarput inuussutissarsiutit ineriartortitsiviusussatut nalunaarutigineqareersimasut.

Imm. 3-mut

Aalajangersakkami imm. 3-p kinguneqartitsilluni ingerlatitseqqinneruvoq Inuussutissarsiutinik ilinniartitsinerit pillugit inatsimmi § 61, imm. 3-mik, oqariartorlunilu malittarisamik pingaarnermik, qitiusumik ilinniartit taakkuusut pikkorissartitsinerinik eqqartorneqartunik ingerlatsisuusartut. Ilutigisaanik ilanngussisoqarpoq imm. 4 aamma imm. 5-imut innersuussinermik, erseqqissaatigiumallugu imm. 4 aamma imm.5-imi sakkukinnerulersitsineq.

Imm. 4-mut

Aalajangersagaq iluarsissusikkamik ingerlatitseqqinneruvoq Inuussutissarsiutinik ilinniartitsinerit pillugit inatsimmi § 61, imm. 4-mik. Pineqarpoq aalajangersagaq Inatsisartunit 2008-mi upernaakkut ilanngunneqartoq, taamanikkut inatsisaasumi, siunnerfigalugu periarfissamik pilersitsisoqarnissaa pikkorissartitsinerit allanit ingerlanneqartartut tapiissuteqarsinnaanermik. Tamatumani pineqarsinnaapput tapiissutissat pikkorissartitsinerit najukkani namminerni ilitersuisarnermik qitiusumik ingerlatsivinnit imaluunniit namminersortunit neqeroorutigineqartartut. Kingullernut tunngatillugu pikkorissartitsinerit assiliartalersuisarnerit imaluunniit elektroniskiusunik ingerlatsinerit suliani, imaluunniit pikkorissartitsinerit motorinik ilisimasaqarnissanut il.il. pineqarput. Aalajangersakkanik sakkukilliliinerit naatsorsuutigineqarput annertusisamik eqaallisaassasut ineriartortitsillutillu, pikkorissartitsinerit pitsaassusissaannik inuussutissarsiutinik ilinniartitsinerit suliaqarfimmi, naatsorsuutigineqarmat tamatumuuna pikkorissarnerit pisariaqartitsinerit aqunneqalernissaat.

Imm. 5-imut

Imm. 5-imi Inuussutissarsiutinik ilinniartitsinerit pillugit inatsimmi § 61, imm. 5 immikkut inunnut ataasiakkaanut pikkorissartitsinerit taaneqartut iluarsissusikkamik kinguneqartitsilluni ingerlateqqinneqarput.

Tapiissutit pikkorissarnerit pineqartunut peqataanermi amerlanertigut suliffeqarfimmi aalajangersimasumi pisariaqartitsinerinik aallaaveqarajupput. Ieqquuvoq suliffeqarfiup qitiusumik ilinniartitsinerit saaffiginnittarnera, tassanngaaniillu saaffiginnissut naalakkersuisoqarfimmut oqartussaasumut ingerlatinneqartarluni, tamanna tunuliaqutaralugu suliami aalajangiisartunut, immaqalu taava aningaasaliissutitut tapiissutissanik akuersissuteqartartunut. Pikkorissarnerit taamaattut tamanut ammasumik neqeroorutigineqartanngillat, amerlasuutigut nunatta avataani ingerlanneqartaramik.

Imm. 6-imut

Imm. 6 tassaavoq ingerlatitseqqinneq Inuussutissarsiutinik ilinniartitsinerit pillugit inatsimmi § 61, imm. 5-imi. Tassani pineqarpoq aalajangersagaq Inatsisartut Inuussutissarsiornermut ataatsimiititaliaata saqqummiunniikuusa allannguutissatut siunnersuutitut, inatsimmik 2008-mi allannguinnermut atatillugu. Aalajangersagaq erseqqissaavoq tapiissuteqartoqarsinnaanngitsoq sulisut sinniisaannik - tillidsmandinik - pikkorissartitsinerit, imaluunniit taamaattuni peqataanissanut. Tamatumani pissutaavoq naatsorsuutigineqanngimmat pikkorissarnerit

taamaattut piginnaangorsarnissami piumasagaatinik naammassinnittuusartut, inuussutissarsiutini aalajangersimasuni ataatsimulluunniit inuussutissarsiutit isigalugit.

§ 60-imut

Aalajangersagaq ingerlatitseqqinneruvoq Inuussutissarsiutinik ilinniartitsinerit pillugit inatsimmi § 62-imik.

Imm. 1

Aalajangersagaq § 59-imut atasumik isigineqassaaq, tassani ersimmat taamaallaat tapiissuteqartoqartartoq pikkorissartitsisarnernut inuussutissarsiutinik ilinniartitsinernut suliassaqarfimmi. Taamaattumik pisariaqarpoq ilinniarfiit atuisut akiliutissaannik akileeqqusisarsinnaaneri.

Imm. 2-mut

Aalajangersakkakut periarfissiisoqarpoq nalunaarusiortoqarsinnaanera, aalajangersaasunik malitassanik pikkorissartitsisarnernut tapiissuteqartarnerni. assersuutigalugu pineqarsinnaapput malittarisassat salliutitsisut pikkorissartitsinernik piginnaasatigut ineriartortitsiviusunik, tamatumani aamma ilinniaqqittarnermik. Aammattaaq pineqarsinnaavoq periarfissiisoqarnissaa tapiissuteqarsinnaanermik pikkorissartitsinernut inuttut ineriartornissamik pingaartitsisunut, tamanna nalilernerqarsimappat aalajangiisuusutut fagitigut ineriartortitsinissamut inuussutissarsiutinik ilinniartitsinerit iluanni. Pikkorissartitsinerit taamaattut naatsorsuutigineqarput ingerlanneqartartussatut aallaaveqartunik inunnut namminernut pineqartunut ineriartortitsinissamut pilersaarutini, suliffissaaleqisut imaluunniit piginnaangorsaaqqinnerit modulikkaartunik aaqqissuunneqarneranni.

Allaffissornikkut aqutsinerup qanoq ittuunera apeqqutaatinnagu taamaallaat periarfissaqassaaq tapiissuteqartoqarsinnaanera aningaasanut inatsimmi aningaasaliissutaasuni inissaqarallartillugu.

Malittarisassiorsinnaatitaanerup peqataasut akiliutissaannut atatillugu saniatigut ersarissumik pisinnaatitsisoqarpoq Naalakkersuisut malittarisassiorsinnaanerannut tapiiffigineqarsinnaanermut qinnuteqaateqartarnernut, assersuutigalugit skemat qinnuteqarfissat aalajangersimasut atorlugit. Skemat pineqartut qularnaassavaat qinnuteqartut paasissutissanik pisariaqartunik nassiussaqaartarnissaat, atorneqartussanik qinnuteqaatinik suliaqarnerini, nalilersuisoqarsinnaaqqullugu tapiissuteqarnissamut pikkorissarnernut pineqartumut atatillugu pissutissaqarnerisoq.

Tamatumalu saniatigut pisinnaatitsissut aamma imaqarpoq tapiissutissanik aqutsinissamut pisussaaffimmik, tapiissutit aqunneqarsinnaammata aningaasaliisartunit malittarisassat

aalajangersarneqartut naapertorlugit, periarfissaqartikkumallugu najugaqarnermut aningaasartuutit matussutissaannik tapiissuteqarsinnaaneq, ullormut annertussusissanik aalajangersaasimanikkut. Tamatumunngalu atatillugu immikkoortitsisoqarsinnaassaaq ilinniartitit pikkorissartitsinissamut tapiiffigineqarnissamik qinnuteqaataannik aamma inuit ataasiakkaat nunatta avataani pikkorissarnissanut qinnuteqaataannik. Kiisalu aalajangersagaq aamma imaqarpoq pisinnaatitsinermik malittarisassiornissamut, siunertaqartunik tapiissuteqartarnerit siunertaasa nalunaarsorneqarnissaannik, tapiisarnermi atugassarititaasunik aamma tapiissutissat annertussusissaannik. Ilutigisaanik Naalakkersuisut pineqartut assigisaannik malittarisassiorsinnaapput inuit ataasiakkaat pikkorissarnissamut qinnuteqaataannut atuuttussanik.

Kapitali 12-imut

Kapitali 10 imaqarpoq aalajangersakkamik ataatsimik, ingerlatitseqqittumik Inuussutissarsiutinik ilinniartitsinerit pillugit inatsimmi kapitalimik 10-mik.

§ 61-imut

Aalajangersagaq annertunerusutigut ingerlatitseqqinneruvoq Inuussutissarsiutinik ilinniartitsinerit pillugit inatsimmi § 63-imik.

Imm. 1-imut

Matumani pineqarpoq maalaartarnermut aalajangersagaq, tassanilu ersilluni aalajangiinernik Inatsisartut inatsisaannik tunngaveqartunik ingerlatitseqqittoqarsinnaasoq.

Aalajangersakkap kingunerisaanik ilinniagaqartut maalaarutaat, tassani pineqarsinnaallutik ilinniartitit pineqaatissiissutaa ilinniagaqartup atuartitsinermit ilaajunnaarsinneranik, imaluunniit ilinniagaqartup maalaarutaa ilinniakkamik sivitsuinermik sivikinnerulersitsinermilluunniit, naammagittaalliutigineqarsinnaasoq Naalakkersuisunut. Tamanna tunngaviummik isumaqarpoq naalakkersuisoqarfimmut suliani oqartussaasumut. Tamatuma saniatigut assersuutigalugu naammagittaalliutit sungiusaammik suliffissap akuerineqarsinnaanginneranik, tak. § 28, imm. 1, aamma pisortani oqartussanut suliamik ingerlatsisunut ingerlatseqqinneqarsinnaavoq.

Soorlu takuneqarsinnaasoq, aalajangersagaq ingerlatsinernik aqqissuussinerit allannguuteqarnerisa kingunerisaannik annertuutigut forständerip aalajangiisarneranik imaqassaaq.

Aamma siunnersuummi aalajangersakkani oqaaseqatigiit aappaanni ersippoq taamaallaat fagitigut aalajangiinerit Naalakkersuisunut naammagittaalliutigineqarsinnaangitsut.

Taamaasilluni tamatumani siullertut pingaarnertullu paasineqassaaq pineqarmata karakteriliisarnerit, tamatumani aamma misilitsittarnerit aamma soraarummeertarnerit, fagitigut ilisimasat taakkunani naatsorsuutigineqarmata ingerlatsivinni namminerni inissisimasutut.

Ingerlatsivinni aalajangiinerit tamarmik (aamma eqqartuussinikkut aalajangiinertut taaneqartartut) taamaasillutik naammagittaalliutigineqarsinnaapput aalajangersakkami oqaaseqatigiit siulliit naapertorlugit. Tamatumani pineqarsinnaapput ilinniarfimmi tiguneqarnissaq, mianersoqqusinerit aamma ilinniarfimmiit peersitaanerit il.il. Kiisalu aamma ilinniagaqarnersiutit pillugit aalajangiinerit § 34, imm. 2-mik tunngaveqartut, Inatsisartut inatsisaanni nr. 12, ulloq 22. november 2011-meersumi, allangortinneqartut Inatsisartut inatsisaanni nr. 16, ulloq 6. juni 2016-imeersumi (Ilinniagaqarnersiutinut inatsit), naammagittaalliutigineqarsinnaapput Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfimmu, Ilinniagaqarnersiuteqarnermut inatsimmi § 34, imm. 4 naapertorlugu.

Taamaasilluni pineqassapput naammagittaalliutit imaluunniit maalaarutit aalajangiivigineqartussat inatsisinik naliliinernik tunngavilimmik, assersuutigalugu tunngasinnaasunik aalajangiineq pisimanersoq inatsit atuuttoq naapertorlugu, matumani aamma pisortat ingerlatsineranni malittarisassat tunngaviusussallu naapertorlugit.

Imm. 2-mut

Aalajangersakkap assigaa Inuussutissarsiutinik ilinniartitsinerit pillugit inatsimmi § 63, imm. 2. Aalajangersakkami Naalakkersuisut pisinnaatinneqarput ersarinnerusunik malittarisassiornissamut nalunaarusiornikkut, maalaaruteqartarfiit aamma maalaarutit killilerneqarnerannik, ileqqussanillu maalaaruteqartarneri. Aalajangersagaq atorineqarsinnaavoq naammagittaalliuteqartarfiliormut, maalaarutitik suliaqartartussamik aalajangiisartussamillu, allaffissornikkut inaarutaasumik suliatut.

Kapitali 13-imut

Kapitalimi pineqarpoq piffissaq atortuulersitsiviususaaq aamma Inatsisartut inatsisaannik atuuttumik atorunnaarsitsinissaq aamma allaffissornikkut malittarisassat, kiisalu ikaarsaariarnermi malittarisassiorneq.

§ 62-imut

Imm. 1-imut

Imm. 1-imi siunnersuutigineqarpoq Inatsisartut inatsisaat atortuulissasoq ulloq 1. januar 2025. Piffissaliinermili isiginiarneqarput piareersaateqarnissanut pisariaqartitsinerit, minnerunngitsumik sungiusaammik suliffissanut ataqatigiissaarinermik aqqqissuussinermik,

allanillu suliniutaasinnaasunik aqutsinermik aaqqissuussinerup nutaap atortuulernissaanut atasunik.

Imm. 2-mut

Aalajangersakkami imm. 2-mi pineqarpoq Inatsisartut inatsisaannik atuuttumik atorunnaarsitsinissaq.

Imm. 3-mut

Aalajangersagaq siunnerfeqarpoq qularnaarinissanik allaffissornikkut malittarisassat arlaqartut ingerlatiinnarneqarnissaannik. Tamatumani assersuutigalugu pineqarput Namminersorlutik Oqartussat nalunaarutaat qitiusumik ilinniartfinni inuussutissarsiutinullu ilinniartfinni faglærerinik pædagogikumimik ilinniartitsineq nr. 6, ulloq 5. juni 2015-imeersoq, Inersimasunik ilinniartitsinerit pillugit Namminersorlutik Oqartussat nalunaarutaat nr. 9, ulloq 9. maj 2016-imeersoq, aamma Inuussutissarsiutinut pikkorissartitsisarnernut tapiissutit pillugit Namminersornerullutik Oqartussat nalunaarutaat nr. 21, 1. juli 2008-meersoq.

Taamaattoq aamma aalajangersakkami ersippoq allaffissornikkut aalajangersagaasut malittarisassat arlaqartut atorunnaarsinneqassasut, tamatumani ataatsimut pissutaasut taakkua siunnersuutip inatsisitigut aaqqissuussaananut naapertuutinnginneri. Taamaattumik atorunnaarsinneqassaaq naammassisassanut isumaqatigiissuteqartarnernut nalunaarut, pissutigalugu Inuussutissarsiutinik ilinniartitsineq pillugu inatsimmi aalajangersakkat naammassisassanut isumaqatigiissuteqartarneq pillugu ingerlateqqinneqanngimmata siunnersuummi aqutsinikkut aaqqissuussineq nutaaq pissutigalugu. Tamannali taamaattoq atuutinngilaq aalajangersakkami nr. 2-mi eqqaaneqartumut Inuussutissarsiorneq piginnaasallu ineriartortinnissaat pillugit Namminersornerullutik Oqartussat nalunaarutaannut, tunngaviusumik ingerlatiinnarneqarsinnaasumut. Taamaattoq nalunaarut pineqartoq ukiuni kingullerni 10-ni atorfeqarsimanngilaq, taamaammallu atorunnaarnissaa siunnersuutaalluni. Tamanna aamma atuuppoq Peqqissaanermi ikiortit ilinniartitaanerit pillugu Namminersornerullutik Oqartussat nalunaarutaat nr. 11, ulloq 6. marts 2001-imeersumut. Kiisalu siunnerfiuvoq aalajangersagaq aalajangersakkap ingerlateqqissanngikkai allaffissornikkut peqqussutit Inuutissarsiutinik ilinniartitsinermut inatsimmit atortinneqartut.

§ 63-imut

Aalajangersakkani pineqarput forständerit, piffissami siunnersuutip atortuulerriffissaani qitiusumik ilinniartfinni atorfeqartut, taamaattumillu nalunaartartuullutillu naalagaqalersussat oqartussaasunik nutaanik. Tamatumunnga atatillugu innersuunneqassapput siunnersuummi nalinginnaasunik oqaaseqaatini immikkoortumiittut 2.2.-mi. Tamatumunnga atatillugu nalinginnaasunik oqaaseqaatini ersippoq, forständerit pineqartut atorfeqarnertik ingerlatiinnassagaat atugassarititaasut allannguuteqanngitsut iluanni. Kiisalu matumani

aamma pineqanngilaq sulisitsisut paarlaannerat, suliffeqarfinnik allanut tunniussisarnermut inatsimmiit isigigaanni, forstanderi suli Namminersorlutik Oqartussani atorfeqassammat.

Ilanngussaq 1

Tusarniaanermut akissutinut atatillugu allakkiat

Siunnersuut tamanut ammasumik tusarniaassutigineqarsimavoq Namminersorlutik Oqartussat tusarniaasarnermut quppersagaatigut piffissami 18. december 2023 - 18. januar 2024, piffissamilu aamma tassani tusarniaavigineqartartunut ukununga tusarniaassutigineqarsimallunissaq:

Kommune Kujalleq

Kommuneqarfik Sermersooq

Qeqqata Kommunia

Avannaata Kommunia

Kommune Qeqertalik

Sulisitsisut (GE)

SIK

NUSUKA

IMAK

AK

NPK

Inuiaat pisinnaatitaaffii pillugit siunnersuisoqatigiit

Inuit pisinnaatitaaffii pillugit Institutti

ILI ILI

Avalak

ASG

MIO

Innarluutillit Illersuisuat

Nuuk Internationale Friskole

Knud Rasmussenip Højskolia

Sulisartut Højskolia

Avannaani Ilinniarnertuunngorniarfik/Nordgrønlands Gymnasium

Qeqqani Ilinniarnertuunngorniarfik/Midtgrønlands Gymnasiale Skole

Kalaallit Nunaanni Teknikimik Ilinniarfik (KTI)

Campus Kujalleq

INUILI

Imarsiornermik Ilinniarfik

NI-Nuuk

Peqqissutsimik qitiusumik Ilinniarfik / Center for Sundhedsuddannelser
Kalaallit Nunaanni Qitiusumik Ilinniarfiit (KNQI)
Ilisimatusarfik
Perorsaанermik Ilinniarfik
Savaatilinnigorniарnеrmiк Ilinniarfik / Fåreholderskolen
Eqqumiitsuliornermiк Ilinniarfik / Kunstskolen
Isiginnaartitsisartutut Ilinniarfik / Skuespillerskolen
Nunami Tamarmi Qitiusumik Ilitsersuisarfik / Center for National Vejledning
Villads Villadsen-ip Efterskolia
Maniitsup Efterskolia

Piffissap tusarniaaviusup naanerani tiguneqarsimapput tusarniaavigineqartunit akissutit tulliuuttut: IMAK, IK/ASG, Villads Villadsen-ip Efterskolia, Sulisitsisut, KNQI, Niuernermik Ilinniarfik (NI), SPS, Inuili, Avannaata Kommunia aamma SIK.

Tusarniaanerup kingunerisaanik siunnersuummi ataasiakkaatigut allannguuteqartitsisoqarpoq. Taamaasilluni “nutaaliornikkut” ilanngunneqarpoq § 1, imm. 2, nr. 3-mi, KNQI-ip tusarniaанermi oqaaseqaataata kingunerisaanik. Taamaasilluni еrsersinneqarpoq inuussutissarsiutinik ilinniarfitsinermik suliassaqarfimmi aamma pineqarmata nutaanik pilersitsisarnerit, nutaaliorneq piviusunngortinneqarsinnaasunik. Tamatuma saniatigut aamma § 12-imi kukkuneq iluarsivigineqarpoq, taanna aamma KNQI-mit oqaaseqaatinik tunngaveqartumik.

IMAK nalunaarpoq tusarniaassutigineqartunut oqaaseqaatissaqarani, taamaapporlu aamma IK/ASG-mut, Villads Villadsen-ip Efterskolianut aammalu INUILI-mut. Taamaasillunilu tusarniaанermit akissutigineqartunit pineqartunit tunngaveqartumik paasinarpoq inatsisiliornikkut iluarsaassinissamik pisariaqartitsisoqarsimasoq, illuatungilersorneqanngitsorlu qitiusumik ilinniarfiit aqunneqarnerannut atatillugu inatsisitigut allannguuteqartitsinissaq.

Paarlattuanik tusarniaavigineqartut siulersuisut imaluunniit siulersuisut sinniisuisa atorunnaarsinneqartussatut siunnersuutigineqartut pillugit nalunaartarput siunnersuut piviusunngortinneqartariaqanngitsuq, minnerunngitsumillu innersuunneqartarluni inatsimmi atuuttumi naammassineqarsimangitsut pissutsinik allanik pissuteqartartut, tamatumani aamma angusaasartut misissuinerup kingunerisaanik еrsersinneqartartutut naammaginangitsiginngitsut. Tamatumani ingammik pineqarput tusarniaанermit akissutigineqartut Sulisitsisunit, SIK-mit, KNQI-mit aamma NI-mit. SIK-ip taamaattoq angusaasarsimasut amigaateqarneri isummorsorfigisimanngilai. Avannaata Kommuniata ilanngullugu aamma nalunaarpaa iluarisimaarneqartoq Perorsaанermik Ilinniarfiup siulersuisuini sinniisoqarnertik, aammalu Perorsaанermik Ilinniarfimmi siulersuisut nalunaarlugu siulersuisut ingerlaannartariaqartut.

Tamatumunnga atatillugu oqaatigineqassaaq siulersuisoqarneq nammineq immikkut siunertaanngimmat, aqutsinikkut aaqqissuussineq isigisariaqarmat qitiusumik ilinniarfinnut atasumik, taamalu inuiaqatigiit siulersuisoqarnermik aaqqissuussinermiit qanoq ittunik pissarsiaqartarneranniit.

Kiisalu aamma imaappoq, tusarniaanermiit akissutigineqartut pineqartut siunnersuummik nammineramik isummersorfiginninnernik imaqaannginnerummata, annerusutigulli siunnersuutip pilierartorerata tunuliaqatarisaanik, aammalu naalackersuisoqarfimmik oqaloqateqartarnermik. Kiisalu aamma oqaaseqaateqartoqartarpoq sungiusaammik suliffissat malunnaatilissuarmik appariarsimanerannut, tamannalu annersutigut ilinniagaqartumi pissutsinut annerusumik tunngassuteqartoq, imaannanilu siulersuisut suliassaminnik naammassinnittannginnerannik pissuteqarluni Inatsisartut inatsisaanni atuuttumik § 43, imm. 1-imik, suliaqartoqartussaammat suliffeqarfinnut nammineranut orniguttarluni sungiusaammik suliffissanik pilersitsisoqarnissaanik aaqqissuussisoqartarnissaanik.

Taamaasilluni Sulisitsisut tusarniaanermut akissutigisaat siunnersuummut namminermit tigussaasutigut isummersornerunngilaq, kisiannili annerusutigut periaatsini pissutsinut tunnganerulluni, aamma qitiusumik allaffissuarmut attaveqarnermut tunngasuni.

Sulisitsisut aallarniutigalugu ujartorsimavaat nalunaarusiami inassuteqaatit, siunnersuummut nalinginnaasumik oqaaseqaatini eqqaaneqartut, inatsimmik atuuttumik nalilersuisoqarnissaa pillugu.

Oqaaseqaat siunnersuummut toqqaannartumik tunngasuunngitsoq, isiginiarneqassaaq Implement taamaallaat piumasaqaatinut immikkut nalunaarsukkat naapertorlugit qinnuigineqarnikummat nalunaarusiornissamik paasissutissanik tigussaasunik tunngaveqartumik, kisitsisinik paasissutissanik piviusunik tunngaveqartumik, tassuunalu paasineqarsinnaammat aaqqissuusseqqinneq 2011-imeersoq sutigulluunniit isumalluarnernik naammassisaqarfiusimangitsoq.

Kiisalu ilanngullugu Sulisitsisut nalunaarpaat siulersuisut ilinniarfinnik aningaasaqarnikkut aqutsiniarnerannik ajornarnerulersitsimmat Naalackersuisoqarfiup oqartussaasup Aningaasaqarnermut Ataatsimiititaliamut ilassutitut aningaasaliissutissanut qinnuteqaammik nassiussinera akuersissutigeqqullugu aningaasaliissutaasimasunit 3 mio. kr.-inik ilanngaasoqassasoq, tamanna pillugu siulersuisunik imaluunniit forstanderimik oqaloqateqaqqaarani.

Tamatumunnga atatillugu oqaatigineqassaaq aningaasaliissutinik aqutsiniarneq ajornartunngortinneqarmat assersuutigalugu qaammatinut siullernut pingasunut missingersuusianik malitseqartitsinermi qitiusumik ilinniarfik matumani pineqartoq nalunaarmat naatsorsuutigineqartoq atuinikinnerusoqassasoq ukiup naanerani 3 mio. kr.-inik annertussusilinnik, qitiusumillu ilinniarfik taanna missingersuusianut atatillugu

oqaaseqaatigisaminik allannguilluni, Naalackersuisoqarfiup ilinniarfimmu saaffiginnereerneratigut kinguninngua atuinikinnerussutaasuniit 2 mio. kr.-it aaneqarnissaat pillugu ilassutitut aningaasaliissuteqarnikkut. Ilanngullugulu aamma oqaatigineqarsinnaavoq matumani pineqarmat qitiusumik ilinniarfik ukiuni arlaqartuni missingersuusianik annertuumik sanioqqutsisarsimasoq atuinikinnerussutaasutigut. Soorlu Deloitte-ip nalunaarusiaani immikkoortumi 3.1-imi atuarneqarsinnaasoq aningaasaliissutaasunut sanilliullugu annertuumik nikingassuteqarpoq, - negativiusunik aamma positiviusunik, ersersitsissutaasunik aqutsinikkut naammattumik eqquutitsinnginnernik, - taamalu aningaasaqarnikkut aqutsinerup amigaateqarneranik. Tamanna tamatumunnga atatillugu pissusissamisunnigilaq, ilinniarfiup akileraartartut akilersugaannik aningaasaliissutinik tigungminniinnarnissaanut, naammattumik aqutsisoqannginneratigut aningaasaliissutinik annertusiartortunik katersorneqartunik. Inatsisartut aningaasaliissutaanni paarlattuanik siunertaavoq aningaasaliissutaasut atorfissaannut atorneqartarnissaat. Ilanngullugulu aamma eqqaaneqarsinnaavoq aamma ajornakusoorsinnaammat erseqqissumik aalajangersarsinnaanera qitiusumik ilinniarfiup aningaasaliissutinik qanoq annertussusilinnik pisariaqartitsisinnaanera, qitiusumik ilinniarfik assersuutigalugu eqqaaneqartut ilinniarfik pineqartoq pequtinik Danmark-imiit 1 mio. kr.-inik nalilinnik pisiortortoq, ukiup 2023-p naanngitsiarnerani. Kingornatigut paasineqarpoq, aningaasartuutit affaata missaaniittut 2024-imi aatsaat nalunaarsorneqartussaasut.

Kiisalu aamma Sulisitsisut oqaatigaat ilinniartitaanernik ineriartortitsiniartarneq ajornaatsuinnaasimangitsoq, naalackersuisoqarfiup susasaqartup qularnaarsinnaanngimmagu aningaasartuutinik allanngortitsiviunngitsunik suliniutissat aningaasanut inatsimmut ilanngunneqartarsinnaaneri, aningaasaliissutaareersut iluanni ilinniakkanik nutaanik ineriartortitsisoqarsinnaatillugu.

Tamatumunnga atatillugu oqaatigineqassaaq oqaaseqaataasoq paatsoorsimanernik pissuteqarsimassasoq, tassami arlaqartunik assersuutissaqarmat aningaasaliissutit oqimaaqatigiinnerannik allanngortitsinngitsunik arlaqartunik ilinniakkanik aningaasanut inatsimmi pilersitsisoqartarmat. Ilutigisaanillu inatsisit malittarisassallu allat tunngavigineqartussat ilanngullugit isigineqarneqartussaaneri. Tamatumunnga atatillugu Inatsisartut inatsisaanni ersippoq Naalackersuisut ilinniagassanut pilersaarutit akuersissutigisartussaagaat, ilinniakkanut pineqartunut atasunik naammassillugit suliarineqareersimasut. Tamanna tunuliaqutaralugu ajornakusoorpoq ilinniartitaanertigut nutaanik ingerlanniakkat sukkanerutinniarneqarsinnaaneri, assersuutigalugu ilinniartitaanissanut nutaassanut isumaliutaasut naammattunik allaaserineqarsimangitsut tunngavigineqarsimappata, pisortanit aningaasaliissutaasut naammattunik allaaserisanik tunngaveqartinnagit atorneqarsinnaanngimmata.

Tamatumunnga atatillugu pingaaruteqarpoq erseqqissassallugu Deloitte-ikkut nalunaarusianni ersimmat ilinniarfiit annertunerusutigut amigartunik aningaasaliiffigineqartarsimangimmata missingersuusianik tunngaveqartunik, tamannalu

aamma Campus Kujallermut atatillugu atuummat. Campus Kujallermi siulersuisut aamma arlaleriarlutik oqaatiginiartarpaat ilinniarfimmum aningaasaliissutit amigartut akuersissutigineqartartut. Paarlattuanik nalilerneqarput ukiuni amerlasuuni Campus Kujallermi aningaasaliissutaasunik atuivallaarsimanermik pissuteqartoq ilinniarfiup aningaasatigut aqunneqarneranik naammattumik aallussisoqarsimannginneranik, matumani aamma ilinniarfimmi atorfeqartunut arlaqartunut millioninik akissarsiaqartitsisarnertigut. Ilanngullugu oqaatigineqassaaq Campus Kujallermut aamma ilisarnaataammat ukiuni amerlasuuni malunnaatilissuarnik atuivallaartarsimaneq unittutut immat 2023-mi, Naalackersuisoqarfiup missingersuusiat malitseqartinneqartarnerannik suliamik siulersuisuniit tiguserata kingornagut.

Sulisitsisullu pineqartut saniatigut innersuussivoq qitiusumik ilinniarfinnut ilinniartunut inissiatinik nutaanik peqalersimasunut, ingerlanneqarnissaannut aningaasaliissutissanik isumannaariviusimanngitsunik.

Naallu aamma oqaaseqaataasooq taanna nammineq siunnersuummut attuumassuteqanngikkaluartoq oqaatigineqassaaq apeqqut aningaasaliissutaasut ilassuserneqarsinnaanerat suliaqarfiup pineqartumut atatillugu tunngaveqarsinnaammat aningaasartuutissanut missingersuusianut tunngasunik ilinniarfinnut ataasiakkaanut oqaaseqartitsisarnermik, tamatumani ilanngullugu nalilerneqartarmat allatigut aningaasalersuinissamut periarfissaqarnerooq.

Sulisitsisullu pineqartut saniatigut aamma oqaatigaat Naalackersuisoqarfiup akisussaasup isumagisimanngikkaa taxameteri atorlugu akiliutaasartut akinut akissarsianullu iluarsiiuserneqartarnissaat, aamma AI 2024-mut atatillugu. Tamatumunnga oqaatigineqassaaq Naalackersuisoqarfiup qularnaartuarsimammagu taxameteri atorlugu akiliutaasartut ukiut tamaasa akinut akissarsianullu iluarsiiuserneqartarnerat. Ilanngunneqassaarlu ilutigisaanik akinut akissarsianullu iluarsiiussiisarneq ingerlanneqartarmat missingersuusianik nalilersuinerneq tunngaveqartunik, qitiusumik ilinniarfiit peqataanissaannik aallaaveqartuusumik. Kiisalu AI 2024-mut aningaasaliissutissat qularnaarneqarsimapput aammalu konto pingaarneq (Konto pingaarneq 40.91.31 10,4 mio. Kr.inik amerlineqarmat AI 2023-mut naleqqiullugu), tamannali aningaasanut inatsimmi naqinneqarsimasumi konto pingaarnermi oqaasertaliussat kukkunikkut ilanngunneqarsimanngimmata, ilassutitut aningaasaliissutinut inatsimmi ilanngunneqarmata.

Ilanngullugulu Sulisitsisut nalunaarsimavaat Implements-ip nalunaarusiaani ersittoq ilinniarfiit tamarmik periusissiaqarnerat, naak ilinniarfiit tamakkerlutik periusissianik tunngavilimmik ingerlatsisannikkaluartut. Tamatumunnga atatillugu oqaatigineqassaaq tamanna kinguneqarsimanngimmat ersittunik uuttortarneqarsinnaasunilluunniit naammassisaqartarsimanernik inuussutissarsiutinik ilinniartitaanernut inuiaqatigiinnullu ataatsimut iluaqutaasunik.

Sulisitsisut ilutigisaanik Implements-ip nalunaarusiaani oqaatigineqartumut naammassisassanut isumaqatigiissutini unammilligassanut atatillugu nalunaarpoq tamanna ilaatigut pissuteqartoq Naalackersuisoqarfiup oqartussaasup assigiinngiaartunik nalunaartarsimaneranik taakkua qanoq suliarineqartarnissaat pillugu. Tamatumunngalu taamaallaat oqaatigineqassaaq inatsisit atuuttut naapertorlugit pisussaaffiummat naammassisassanut isumaqatigiissuteqartarneq.

Tamatumalu saniatigut Sulisitsisut nalunaarsimavaat Naalackersuisoqarfimmi oqartussaasumi sulisut taarseraannerujussuat kinguneqarsimammat siulersuisut aamma ilinniarfiit ataatsimiinnerit tamaasa aallaqqaataaniit aallartittariaqartarnerannik, periusissiani anguniakkanut, ilinniartitaanerit ineriartortinneqarnerannut, naammassisassanut isumaqatigiissutinut aammalu ilinniarfiit aaqqissuussaanerannut atatillugu.

Oqaaseqaatigineqartoq taanna aamma toqqaannartumik siunnersuummut tunngasuunngilaq. Taamaakkaluartorli oqaatigineqassaaq qitiusumik ilinniarfiit periusissianik tunngavilinnik anguniagaat inuussutissarsiutinik ilinniartitsinerit pillugit inatsit atuuttoq naapertorlugu siulersuisut ataasiakkaat nammineq aalajangersartarmassuk, Naalackersuisoqarfik akulerunnagu.

Assigisaanillu siulersuisut aamma akisussaaffigaat ilinniarfinni ilinniartitaanerit ineriartortittarneri aammalu ilinniarfiit aaqqissuussaaneri.

Tamatumunnga tapiliullugu innersuunneqarsinnaapput inuussutissarsiutinik ilinniartitsinermut inatsimmi maanna atuuttuusumi § 35, imm. 1, oqaaseqatigiit siulliit aamma oqaaseqatigiit aappaat. Taakkunani ersippoq siulersuisut qitiusumik ilinniarfiit oqartussaasorimmatigit qullerpaat, aamma ilinniarfiit ingerlanneqarnerannik pingaarnertut akisussaasuullutik, matumanissaaq ilinniarfiit ilikkagassatigut - fagitigut - aningaasaqarnermikkullu ingerlanneqarnerannut, pisussaaffigimmassullu ilinniarfinnut aningaasaliissutaasut aqunneqarnissaat, sapinngisamik annertunerpaamik ilinniarfinni anguniakkanut iluaqutaasunik. Ilanngullugulu aamma ersippoq siulersuisut ilanngullugu akisussaaffigimmassuk ilinniarfimmuut atatillugu aalajangersakkat eqqortinneqartarnissaat, akisussaaffigalugulu ilinniarfiup ingerlatsinera ataatsimut isigisumik, naammassisassanullu isumaqatigiissutit naammassineqartarnissaat.

Ilutigisaanik inuussutissarsiutinik ilinniartitsinermut inatsimmi atuuttumi § 35, imm. 2-imi ersippoq siulersuisut pingaarnertut qulequttatut malittarisassat ilinniarfiup ingerlanneqarnerani atuuttussat aalajangersartaraat, tamatumani aamma anguniakkat periusissiallu ilinniartitaanernut aammalu tamatumunnga atasunik ingerlatsinernut. Kiisalu aamma inuussutissarsiutinik ilinniartitsineri inatsimmi atuuttumi § 35, imm. 3, oqaaseqatigiit aappaanni aamma immikkoortoq 4-mi ersilluni siulersuisut ilinniarfimmi forständerimit inassuteqarneq tunngavigalugu aalajangersaaffigisaraat ilinniarfiup inuussutissarsiutinik piginnaanngorsarfiusunik ilinniartitsinerit, aamma ilinniartitaanerit

iluanni suliniutissat allat, kiisalu aamma aningaasatigut isertitsissutaasussanik ingerlatsinissat, ingerlatassallu naleqquttut allat, aammalu siulersuisut ilinniarfiup forstanderianit inassuteqaataasut tunngavigalugit ilinniarfimmi ukiumoortumik pilersaarutit aalajangersartaraat.

Taamaattumik siulersuisut qimarratigisinnaanngilaat akisussaaffitsik, suliat pineqartut suliarinissaannik, assersuutigalugu innersuussinikkut allaffissuarmi qitiusumi sulisut taarseraannerat.

Sulisitsisullu tamakkua saniatigut nalunaarpaat pisariaqartitsisoqartoq aaqqissuussinermik eqaannerusumik siulersuisunut ilaasortassanik toqqaasarneq eqqarsaatigalugu, assersuutigalugu siulersuisut namminneq ilassusertarnerisigut. Tamatumunnga atatillugu oqaatigineqassaaq Sulisitsisut ullumikkut siulersuisuni ilaasortassat amerlanersaat toqqartarmatigut, tamannali taamaakkaluartoq inuussutissarsiutinik ilinniartitsinerni uuttorneqarsinnaasunik iluaqutissanik kinguneqarsimanani.

Sulisitsisut ilanngullugu nalunaarpaat sungiusaammik suliffissat akuerisaasut amerlassusiat ukiuni kingullerni pingasuni qaffariaateqarsimasut, naak ilinniartuusut amerlassusiat ikileriarfiusimagaluartoq. Sulisitsisut tamatumunnga tapiliullugu nalunaarpaat KTI-mi aamma NI-mi ilinniartussat tiguneqartartut 568-iniit 769-inut 2011-imiit 2022-mut amerleriarsimanerat. Tamatumalu saniatigut Sulisitsisut nalunaarpaattaaq sungiussaammik suliffissat atorineqartut amerlassusiat piffissami pineqartumi 515-iniit 601-inut amerleriarsimanerat.

Oqaaseqaatigineqartup ataatsimut takunngitsuusaartut ippaa pissusiviusoq, tassalu inuiaqatigiit kalaallit siulersuisoqarluni aaqqissuussinerup 2011-imi eqqunneqarneraniit nunatsinni sungiusaammik suliffissat 20 %-ii annaasimammatigut. Erseqqarissumik Implements-ip misissuinerani kisitsisit Kisitsisinik naatsorsueqqissaartarfimmeersut ersersippaat ukiut 10-t kingulliit iluanni sungiusaammik suliffissat 22 %-it misserpiaanik appariaateqarsimasut, 2012-imi 950-iniit 2021-imi 743-nut. Pitsaanngitsup tungaanut ingerlaneq taanna ingerlaannartutut isikkoqarpoq. 2022-imi ukiumut lærlingit ilinniagaqartut 743-upput, tassalu ukiup siulianut sanilliullugu appariaat 5 %. 2012-imiit lærlingit amerlassusiat 207-inik ikileriaateqarsimapput. Tamatuma saniatigut lærlingit ukioqqortunerulersimapput. 2012-imi lærlingit 60 pct.-ii 25-it inorlugit ukioqarput. 2022-mi kisitsit taanna 40 %-imut appariarsimavoq.

Taamaasilluni aaqqissuusseqqinneq 2011-imeersoq aqutsinikkut maanna atuuttumik periaaseqarnermik imaqartoq pitsaanngitsup tungaanut sunniuteqarfiusimavoq, sungiusaammik suliffissaqartitsinermut tunngatillugu. Ilutigisaanillu paasinarpoq ersarissumik siulersuisut pisussaaffigisaat suliffeqarfinnut orniguttarluni sungiusaammik suliffissanik pilersitsisarnissaq, tak. inuussutissarsiutinik ilinniartitsinermut inatsimmi § 43, imm. 1, sutigulluunniit piviusunngortinneqarsimanngitsoq.

Sulisitsisut ilutigisaanik nalunaarpaat qitiusumik ilinniarfiit qinnutigisimagaat ilinniarfinni tamani sungiusaammik suliffissanik pilersitsiortortoqarnissaa, tamannali piviusunngortinneqarsimanngitsoq. Sulisitsisullu tamatumunnga atatillugu eqqoriarpaat sulisussat qassit pisariaqartinneqassanersut qitiusumik ingerlatsivinni pineqartuni, ilutigisaanillu qanoq aningaasalersuinissaq apeqquserlugu.

Oqaaseqaat aallarniutigalugu isigineqartariaqarpoq tapersiissutitut siunnersuummi aalajangersakkamut sungiusaammik suliffissanut ataqatigiissaarivimmik pilersitsisoqarnissaanik. Tamatumunngalu tapiliullugu oqaatigineqassaaq siunnersuummut nalinginnaasumik oqaaseqaatini immikkoortoq 3-mi nassuiaavigineqarmata sungiusaammik suliffissanut ataqatigiissaarivimmik pilersitsinermi aningaasartuutissat, aqqutissiuussisussamik sungiusaammik suliffissanik pilersitsiortortoqarnissaanik, siulersuisuusut naammassisinnaasimanngisaannik. Ilutigisaanillu siunnersuummut nalinginnaasunik oqaaseqaatini ersippoq, ataqatigiissaariviit pineqartut qitiusumik ilinniarfinni namminerni inissisimassasut, imaluunniit pilersinneqarlutillu ingerlanneqassasut ataatsimoortunik immikkoortunilluunniit ingerlatsivittut qitiusumik ilinniarfinnik kiffartuussisusutut, ilinniarfinni ataasiakkaani “qitiusunik” immikkoortunik pilersitsinertaqanngitsunik.

Sulisitsisut aamma isumaqarput eqqunngitsoq siulersuisut ilinniarfiit ineriartortitsinerannut sunniuteqarsimannginnerat, aamma ilinniakkat inuussutissarsiutinillu ineriartortitsinerit ataqatigiinnerannut, tassami siulersuisut peqataaffigisimammattigit ilinniartussanik tiguisarnerit aqqissuunneqartarneri, ilisimasanut katersivittut ilinniartoqarfiusartuni pisariaqartitsinernut atasumik, peqataasimallutillu aqqissuussamik ilinniarfiit sungiusaammillu ingerlatsiviusartut suleqatigiinnerannut. Tamatumunnga atatillugu uteqqinneqassaaq paasissutissat pigineqartut tamaasa tunngavigalugit oqaatigisariaqarmat siulersuisunik aqqissuussineq sutigulluunniit tunniussaqaarsimagaluarunik allatigulluunniit inuussutissarsiutinik ilinniartitsinernut tunniussaqaarsimanngitsut ersiutilinnik, kisiannili taamaallaat inuussutissarsiutinik ilinniartitsinerit ajorseriartissimammattigit sungiusaammik suliffissat ikiliartornerannik kinguneqartumik, ilinniartitaanerit pitsaassusissaasa appariaateqarfiunerinik, inuusuttuaqqanut siunnerfiusunut sunniuteqarfiunngitsunik, aningaasaliissutit qaangerneqartarnerisigut malunnaatilissuarnik, sulisuusullu ilaasa millionimik akissarsiaqartinneqartarnerannik. Akissarsianut atatillugu pineqarput pissutsit akissarsiaqartitsinikkut atuussimasut ukiumut 2022-imi 1 millionimiit 1,8 mio. kr.-it sinnerlugit akissarsiaqartitsisoqarneranik. Eqqaaneqartutut akissarsiaqartitsinerit pineqartut arfinillit Campus Kujallermi sulisuusunut tunngasimapput, tassanilu siulersuisuusut arlaleriaqalutik oqaaseqartarsimallutik ilinniartitaanermik ingerlatsivimmut aningaasaliissutaasartut amigartut tunniunneqartartut.

Kiisalu aamma Sulisitsisut saqqummiussaqaarput isumaliutissiissutinik pitsaassusilersuisarnernut aamma nakkutilliinernut tunngasutigut, taakkualu isigisariaqarlutik siunnersuummi pitsaassusilersuinerit nakkutilliinerillu pillugit aalajangersakkanik

tapersersuinertut. Sulisitsisullu taamaakkaluartoq ilutigisaanik oqaaseqarput Naalackersuisoqarfik oqartussaasoq ilaannikkuinnaq aaqqissuussaannigsumik nakkutilliinermik ingerlatsisartooq aningaasaqarnermut malitseqartitsisarnermut, naak Sulisitsisut isumaqatigigaluaaraat tamatuma siulersuisut akisussaaffiannik pisussaaffiannigikkaa.

Tamatumunnga atatillugu innersuussisoqassaaq immikkoortumi 4.1-imi nalunaarneqartunut Deloitte-ip nalunaarusiaani immikkoortumi siullermi, tassani ersimmat akisussaaffik aningaasaqarnermut, missingersuusiat malitseqartinneqartarnerannut ilinniarfinni ataasiakkaani siulersuisuniimmata, ingerlatsiviit oqartussaasuini qullerpaani, tak. Inuussutissarsiutinik Ilinniartitsineq pillugu inatsimmi § 35, imm. 1, aamma § 37, imm. 1.

Sulisitsisut tamatumunnga atatillugu siunnersuutigaat siulersuisoqarnermik aaqqissuussineq peernagu qitiusumik ilinniarfiit aaqqissuunneqassasut namminersortutut inatsisit iluanni, ingerlatsivittut imminnut pigisutut Namminersorlutik Oqartussat avataanni, tassuunalu qitiusumik ilinniarfiit suli annerusumik namminersortilerlugit akisussaaterlugillu.

Sulisitsisulli taamaakkaluartoq oqaatiginngilaat qanoq suli annerusumik namminersortitsilerneq aningaasaqarnikkut aqutsinerup pitsaanerulernissaanut aqutissiuussissagaluarnersoq, sungiusaammik suliffissat amerlanerulernissaanut, ilinniartitaanerit suli pitsaassusilersorneqarnissaanut aamma inuusuttuaqqat immikkut sullisissallugit siunnerfiusut sutigut sullinneqarsinnaanersut. Tamatumalu saniatigut suli ajornarnerulissagaluarpoq pisortani oqartussaasut ingerlatsivinnik annaassiniartarnissaat aningaasaqarnermik nakkatuuuleraangata, soorlu assersuutigalugu Campus Kujallermi pissutsini pisimasunisut, naalackersuisoqarfiup oqartussaasup suliassanik tiguisariaqarsimaneratigut ilinniarfiup ingerlaannarsinnaanera qularnaarneqarsimammat aatsaat. Tamatumunngalu tapiliullugu eqqaasitsissutigineqassaaq ingerlatsiviit imminnut oqartussaaffigisut akiliisinnaajunnaarsinnaanerat, tamannali atuutinngimmat pisortat ingerlatsiviinut.

Sulisitsisut qitiusumik ilinniarfinnik namminersortunngorsaanerit taarsiullugu periarfissatut tikkuarpaat seminareqartitsisinnaaneq, illuatungeriit tamarmik akulerunneqarlutik pitsaassusilersukkanik eqikkaanissanut Implements-ip nalunaarusiaa Deloitte-illu misissuina tunuliaqutaralugit, ilaatigut tunngavigalugu isumaqarnermik siulersuisunik atorunnaarsitsineq sipaarutissarsissutaassasoq imaluunniit ajornartorsiutit sammineqartut aaqqiissutissarsiffigissagaat.

Tamatumunnga tunngatillugu nalunaarneqassaaq qitiusumik ilinniarfiit aqunneqarnerannik aaqqissuussinerit pillugit allanguutissat siunertaqannigimmata sipaarutissarsiornernik, kisiannili taamaallaat siunertaqarmata inuussutissarsiutinik ilinniartitsinerit naammassisaqarfiulluartunik ingerlanneqalernissaannik, minnerunngitsumik suliassanik kivitsisarnermi siulersuisunit isumagineqartarsimannigitsunik. Inuussutissarsiutinik ilinniartitsinerit nammineq iluanni ineriartornerit kingunerisaannik erseqqissarneqassaaq

pineqarmata ajornartorsiutit imaannaanngitsut, ikiorsiivigineqarsinnaanngitsut seminareqarnikkut isumasioqatigiissitsinikkut, kisiannili inuussutissarsiutinik ilinniartitsinerit iluanni aaqqissuussaanerit allannguuteqartinneqarnissaannik pisariaqartitsiviullutik, aqutseriaatsimik toqqaannarnerusumik iliuuseqartitsiviusartumik pilersitsinikkut.

Aammalu eqqaaneqartutut tusarniaanermi akissutinik KNQI-mit kattuffiusumit qitiusumik ilinniartitsinerit pisortaasut ataatsimoorfianniit ilinniartitsinerit ingerlatsinerit aningaasaliissutaanniit ingerlanneqartumit tiguisoqarpoq.

KNQI aallarniutigalugu oqaaseqarpoq siunnersuut utertinneqaqqullugu innersuunneqarlunilu Sulisitsisunit tusarniaanermi akissutaasumut ingerlatsisusut akornanni oqaloqatigiittoqarnissaannik pisariaqartitsinerit, siulersuisoqarnermik aaqqissuussinerup atorunnaarsinneqarnissaanut taarsiullugu.

Tamatumunngalu atatillugu innersuunneqassapput Sulisitsisut tamanna pillugu oqaaseqaataannut atatillugu oqaatigineqareersut. Paasinnineq aaqqissuusseqqinnerup 2011-imeersup kissaatigineqarsimasutut angusaqarfiusimannginnera pillugu taamaasilluni seminareqartitsinikkut suliarineqarsinnaanngilaq. Unammilligassat piulersimasut pisariaqartitsippot tunngaviusutigit allannguuteqartitsinissannik, inuussutissarsiutinik ilinniartitsinerit suliaasaqarfimmi namminerit, aqutsinikkut aaqqissuussinerit nutaamik pilersitsinikkut, toqqaannarnerusumik ilinniartitaanerit politikkip naalakkersuinikkut ilinniartitaanerit anguniakkanut tamatumani periusissianut siunertanullu toqqaannartumik atassuserneqarneratigit aaqqissuussaasumik. Matumani pineqarput inuiaqatigiinniit isigisumik ajornartorsiutinik piusunik aaqqissuussinerit, sungiusaammik suliffissatigit aamma inuusuttuaqqanut immikkut sullinneqarnissamik pisariaqartitsisunut tunngasutigit, matumani aamma qularnaarumallugu sungiusaammik suliffiusartussat amerlanerulersinneqarnissaat, aningaasaqarnikkullu aqutsinerup naammassisaqarfiusumik qularnaatsumillu ingerlanneqalerneratigit aammalu ilinniartitaanerit aqunneqarnerisa pitsaassusissaasa nakkutigineqarnerisalu qularnaarneqarnerisigit.

KNQI-imit tusarniaanermi akissutaasut ilanngullugu immikkoortitigaapput arfinilinnut, taakkunanilu siullermi sammineqarluni suleriaasiusoq siunnersuutip pinngornerani, siunnersuut nammineq pinnagu. Immikkoortumi pineqartumi oqaatigineqarpoq isorinnineq periaasiusumik Implements-ip nalunaarusiaani, tamatumani aamma suleqatigiissitaq malinnaatitaasooq inuussutissarsiutinik ilinniartitaanerit inatsisip nalilersuivigineqarnerani aatsaat nalilersuinerit nalunaarusiamik tigusaqarmat ulloq 25. oktober 2023.

Naak oqaaseqaataasooq siunnersuummut namminerit tunnganngikkaluartoq ilisimatitsissutigineqarsinnaavoq Implements-ip nalunaarusiaa agguanneqarsinnaasimanngimmat Naalakkersuisunut saqqummiunneqareersinnagu, tamannalu 23. oktober 2023 pilluni.

Ilutigisaanik KNQI isumaqarpoq nalunaarusiamit paasineqarsinnaasoq “pissutsit amerlasuut ajunngitsumik ingerlasuusut maanna aqutsinermik aaqqissuussinerup iluani”.

KNQI-p ilanngullugu tikkuarpai Implements-ip nalunaarusiaani oqaaseqaataasut KNQI-p oqaatigisaatut paasineqarsinnaasut Inatsisartut inatsisaanik atortuulersitsineq kukkusumik ingerlanneqarsimasutut, Inatsisartulli inatsisaat nammineq kukkunngitsoq. Kiisalu aamma KNQI-p tikkuarpaattaaq qitiusumik ilinniarfiit arlaqartut periusissianik anguniakkanillu suliaqartarsimaneri, pissutsillu taamaassimanerat siulersuisut ilinniarfinnut akisussaaffimminnik naammassinnissimanerisut isigisariaqartut.

Tamatumunnga oqaatigineqassaaq ajornakusoormat KNQI-p isummersuutai malissallugit, pissutsit ilutigisaannik paasinarmat ukiut 10-t iluanni nunatsinni sungiusaammik suliffissat 20 %-iinik annaasaqarsimasugut, ilutigisaanillu paasineqarluni assut malunnaatilinnik aningaasartuutissanut missingersuusiasartut qaangerneqartarsimasut, amerliartuinnartunillu naammagittaalliuteqarluni ilinniartitaanerit pitsaassusissaannut atasunik, kiisalu inatsimmik namminermik unioqqutitsineq sanioqqunneqarsinnaanngitsoq 2019-imi pisimalluni.

Paasissutissanik katersisoqarsimanngilaq oqariartunngitsunik siulersuisoqarnermik aaqqissuussineq kukkunerusimasooq atorsinnaasimanngitsorlu, soorluttaaq tunngavissaqanngitsoq naatsorsuutigissallugu suleqatigeeriaatsinik allannguinerit ajornartorsiutinik aaqqiissutaasinnaaneri.

KNQI-p siuliani pineqartut saniatigut nalunaarpaa ernummatigineqartoq Naalakkersuisoqarfimmi oqartussaasumi inuit ikittunnguit mattullutik allannguutissanik suliaqarsimaneri. Tamatumunnga atatillugu naqissuserlugu erseqqissarneqassaaq tamanna paatsoornermik pissuseqarsimassamat, tassami siunnersuut Naalakkersuisut oqartussaassusertik naapertorlugu aalajangiussarimmassuk.

Assigisaanik KNQI-p innersuussimavai oqaaseqaataasut Implements-ip nalunaarusiaaniittut, inatsisit atuuttut imaqarnerat naleqquttunik siulersuisut qanoq katitsigaanissaat pillugit, piginnaasanut naleqquttunut piumasaqaataasunut tunngatillugu, kisiannili ulluinnarni pissutsini ajornakusoortinneqarsinnaammat piginnaanerit piumasaqaataasut tamakkiisumik naammassineqarsinnaaneri. Tamatumunnga atatillugu KNQI isumaqarpoq siulersuisut imminnut ilassusersinnaanerannik periarfissaasoq ilanngullugu atorneqarsinnaasoq oqaloqatigeeqqinnissanut siulersuisoqarnermik aaqqissuussinerup ingerlateqqinneqarnissaa pillugu. KNQI tamatumunnga tapiliullugu aamma innersuussisimavoq Implements-ip nalunaarusiaani oqaatigineqartumut siulersuisut amigartunik ilisimasaqarnerannik ilinniartitaanikkut politikkimi anguniakkat suunerannik, ajornartorsiutini qitiusut suunerinik oqaloqatigiinnernut atasumik. KNQI-p aamma ilanngullugu nalunaarpaa oqaloqatigiinnerup amigaataanerata ineriartortitsisoqarnissaa ajornakusoortikkaa, ilinniartitaanertigut nutaanik suliniutinik aallartitsisarnissanut, ilanngullugulu oqaatigalugu soqutiginarsinnaagaluartoq

nalilersuisoq arlaannaannulluunniit atanngitsoq tamatumunnga atasunik inassuteqarsimagaluarpat.

Tamatumunnga oqaatigineqassaaq pissutsit matumani pineqartut siunnersuummut namminermt tunngasuunnginnerat. Naalackersuisoqarfiullu oqartussaasut ilanngullugu tikkuarsimavaa ilinniartitaanernik nutaanik aallartitsisarnermi aallaaviusarmata piumasaqaatit atortussanut aningaasaliissutissanullu tunngasut naammassineqarsimanissaat. Isornartorsiutaasartut annerusutigut ilinniartitaanerit pioreersut pitsaassusissaannut tunngasuusarsimapput. Innersuussutigineqartunut tunngatillugu apeqqummut Sulisitsisut oqaaseqaatai assigalugit innersuussutigineqarput. Piumasaqaatinut immikkut nalunaarsukkani allaqqavoq, nalunaarusiortoqassasoq piviusunik nalunaarsukkanik paasisutissanik paasisimasanik, kingornatigut aallerfigineqarsinnaasunik. Nalunaarusiami piumasaqaatit immikkut nalunaarsukkat atorunnaarsippaat, pingaarnertut siunertarineqarmat nalilersussallugu Inatsisartut inatsisaanni siunertarineqartut piviusunngorsimanersut innersuussutigineqartut iluarsartuunnagit.

Isumaliutissiissutit KNQI-mit saqqummiunneqartut tamatuma saniatigut aamma allanngortissinnaangilaat pissusiviusut, inuussutissarsiutinik ilinniartitsinerni paasineqarsimammata unammilligassat assut annertuut, pisariaqartitsisoqarneralu toqqaannarnerujussuarnik tigussaannerujussuarnillu allannguisoqarnissaanik inuussutissarsiutinik ilinniartitsinerni aaqqissuussinerit atuuttut allanngortinneqarnissaanni. Pineqartut tamakkua pisariaqanngitsumik kinguarsarneqartariaqanngillat sulii aammaarluni isumasioqatigiissitsinertigut aammalu oqaloqatigiinnertigut aqutseriaaseq iluatsinngitsoorsimasoq pillugu.

Kiisalu aamma KNQI-p Sulisitsisutulli innersuussimaa ajornartorsiut aningaasaliissutini akinik akissarsianillu iluarsisannnginnermut tunngasoq, kontumi pingaarnermi 40.91.31 Suliniutit aallaavigalugit tapiissutit AI 2024-imi, kiisalu aamma aningaasaliissuteqanngitsoq qitiusumik ilinniartinnut pingasunut ilinniartut ineqarfiinik nutaanik ingerlatsisoqalernerani. Tamatumunnga atatillugu innersuunneqassapput Sulisitsisut saqqummiussaannut atatillugit oqaaseqaatigineqartut siulianiittut. Tamatumunnga atatillugu ilaatigut oqaatigineqarpoq AI 2024-imi aningaasaliissutini qularnaarneqarmata taamalu aningaasaliissutit tamarmiusut 10,4 mio. kr.-inik qaffanneqarmata.

Kiisalu aamma KNQI-mit nalunaarneqarpoq sungiusaammik suliffissanut atasunik ajornartorsiutaasunut atatillugu kissaatiginartoq inunnut tunngasunik piumasaqaatinik ilanngussisoqartalernissaa pisortat aamma suliffeqarfiit Namminersorlutik Oqartussanit pigineqartut eqqarsaatigalugit, taakkua suliariumannittussarsiuussisarneranni lærlinginik sulisitsisarneq eqqarsaatigalugu, pingaartinneqassasut aaqqissuussinerit Smiley-ordningimik taaneqartut, sungiusaammik suliffissanut atatillugu akisussaaffiit qitiusumik ilinniartit taamaallaat akisussaaffinngortinneqassasoq, Majoriamilu taamaallaat ornigulluni siunnersuisarnerit isumagineqartalissasut, aammalu lærlinginik ilitersuisarneq pillugu

ilitsersuut 28. august 2017-imeersoq atorunnaarsinneqassasoq, kiisalu aamma aningaasanut inatsisikkut aningaasaliissuteqartoqassasoq sungiusaammik suliffeqarnermut ilitsersuisarnermullu qitiusumik ingerlatsivissamut.

KNQI taamaakkaluartuq nalunaarsuisimanngilaq siulersuisut qanoq aaqqissuussinermikkut inatsimmi atuuttumi § 43, imm. 1-imi pineqartut naammassisarniarneraat suliffeqarfinnut ornigulluni sungiusaammik suliffissanik pilersitsisoqartarnissaanik suliassat, aamma innersuunneqartut Sulisitsisut oqaaseqaataanni. Assersuutigalugu pineqarsimasinnaapput siulersuisuni ilaasortat suliffeqarfinnut saaffiginnittarsimasinnaaneri, sungiusaammik suliffissanik pisariaqartunik pilersitsisoqartarnissaa pillugu.

Naak KNQI oqaaseqaateqaraluartuq ilinniartitaanernut siunnersuisoqatigiit pilersinneqarnissaannut ilalersuineramik, ataatsimut ingerlatsiviup apeqqusersorpai aqutsinikkut aaqqissuussinissat siunnersuutigineqartut, piviusorsiortuunngitsutut nalilerlugu siunnersuisoqatigiit pineqartut isumasioqataasarsinnaaneri inuussutissarsiutillu sammiviini assigiinngitsuni ilisimasassanik peqarsinnaaneri, qitiusumik ilinniartinnit ilinniartitaanertigut neqeroorutaasut eqqarsaatigalugit.

Tamatumunnga atatillugu oqaatigineqassaaq nunamut tamarmut atuuttumik ilinniartitaanernut siunnersuisoqatigiit ilinniartitaanerni fagitigut pitsaassusissanik qularnaarisartussat saniatigut sukkulluunniit inuussutissarsiutit sammiviinut - branche-nut – aamma faginut ataasiakkaanut sammisunik naapeqatigiittartunik panel-inik taaneqartunik pilersitsisoqartarsinnaammat, suliffeqarnermi pisariaqartitsinerit ilinniartitsinerillu imminnut naapertuuttuutikkumallugit, inuussutissarsiutillu sammiviini pitsaassusissat assigiinngitsut naapertuuttuutikkumallugit. Taakkua saniatigut pisussaaffik siunnersuummi § 36, imm. 1-imi ilaavoq, taamaasillunilu ilinniartitaanerni pilersaarutunik suliaqartarnerit ilinniakkanut namminernut ataasiakkaanut susasaqartut naleqquttut isumasiortarlugit pisassallutik, aaqqissuussinerullu taamaattut isumasioqatigiittarnerit - sparring - eqquilluartoqarnissaa aqqutissiuuttassavaat. Kiisalu aamma ataatsimut isigisumik ingerlaannartumillu soqutigisaqartunik isumasiuoqartarsinnaavoq inuussutissarsiutit sammiviini namminerni.

Taamaattumik paatsuisoqarsimassaaq naatsorsuutigigaanni inuussutissarsiutini suliffeqarnermi pisariaqartitsinerit taamaallaat siulersuisut aqqutigalugit suussilersorneqarsinnaasut, tamannalumi aamma ilalersorneqarpoq siulersuisoqarluni aaqqissuussinernit misilittagaalersunit. Siulersuisoqarlunilu aaqqissuussineq maanna atuuttusoq aamma Implements-ip nalunaarusiaani oqaatigineqartutut ilisarnaateqarpoq peqatigiiffimmit ataasiinnarmit sinnilinnik sinniisoqartitsinerinik. Tamatumunngalu atatillugu oqaatigineqassaaq aamma pissutsinik paatsuuinerulluinnassasoq naatsorsuutigissallugu ilinniartitaanernik ingerlatsiviusut kattuffinnit assigiinngitsunit ingerlatarineqartussaasut, tassami kattuffiit / peqatigiiffiit taamaallaat tunniusseqataasartussaammata paasissutissanik / isummanik minnerunngitsumik ilinniagassat ilusilersornerinut, tamannarpiarlu siunnersuutip matuma siunnerfigaa.

Taakkualu saniatigut qitiusumik ilinniarfiit inuussutissarsiutinik ilinniartitsinermik suliassa qarfiit ilagaat inuussutissarsiutinut atuuttunut taamaallaat sammisuunatik. Kiisalu aamma oqaatigineqassaaq suliassa qarfiit pineqartut unammilligassanik immikkut misigisa qarfiusannginneri, ilinniagaqalersussanut atatillugu, taakkualu inuussutissarsiutini ilinniakkaminnut atasumik sungiusaammik suliffissarsiniartarneranni.

KNQI-ip aamma ilanngullugu oqaatigisimavaa siulersuisut aamma forstanderip akornanni isumasioqatigiittarnerit pitsaasut annaaneqassasut. Naalakkersuiso qarfiup suliassa qarfimmut akisussaasup taamaakkaluartoq misilittakkat naapertorlugit apeqqusertarsimavaa isumasioqatigiittarnerit matumani pineqartut qanoq pitsaassuseqartigisarneri, assersuutigalugumi misigineqartarsimapput pissusiusut, ulluinnarni aqutsisuusut ilisimasarsimammassuk millionnilinnik atuivallaartorsinnaanera aningaasanut ukiup aallartilaaginnarneranilu, pissutsilli siulersuisunut apuunneqartarsimanatik, aatsaalli qisuariartoqartarluni Naalakkersuiso qarfiup akisussaasup siulersuisut oqaaseqaateqarnissaat qinnutigigaangassuk. tamatumunngalu ilaliullugu oqaatigineqassaaq eqqartuussissuserisut misissuineranni 2019-imi inatsisinik unioqquutissisimaneq pillugu aalajangiunneqarmat, pineqartoq tamanna pisimasoq paasissutissat pingaaruteqartut siulersuisunut saqqummiunneqarsimanninnerisigut ulluinnarni ingerlatsisuusuniit. Assigisaanik naliliiso qarpoq missingersuusianik saneqqutsinerit Naalakkersuiso qarfiup oqartussaasup Deloitte-kkut suleqatigalugit misissuiffigisariaqartarsimasaat annertunerusutigut pissuteqarsimasut siulersuisut aammalu ulluinnarni ingerlatsisuusut pissusissamisunngitsumik suleqatigeeriaaseqarnernik. Tamannalu aamma atuuppoq pissutsini Campus Kujallermi sulisut arlaqartut millionimik akissarsiaqarsimanerannut tunngasumik suliarni, sulisullu allat piffissaq suliffiususaaq ataallugu sulisarsimaneranni, ilutigisaanik ilinniarfik aningaasaliissutinik atuivallaarnernik tullerriaartunik angusaqartarsimasoq.

KNQI-p tamatuma saniatigut nalunaarpaa suliffeqarnermi illuatungeriinnik oqaloqateqartarnertigut, - paasillugu kattuffiit / peqatigiiffiit siulersuisunut ilaasortassanik toqqaasartut, nalilerneqartoq siulersuisoqarnermik aqqissuussinermi allaasunik sakkussaqassanersoq. KNQI-p tamatumunnga atatillugu eqqaavaa siulersuisut katitsigaanerat allanngortinneqarsinnaasoq, matumani aamma proffessionaluinerusumik ingerlatsisoqarnissaanik piunasaqaatinut sammisumik aammalu siulersuisut namminneq illassuserarnerisigut, naalakkersuinermik suliqartunit akuleruffigineqannginnissap ilinniagassanik neqerooruteqartarnermi atorneratigut, ersarinnerusunik nalilersuinikkut siulersuisunik atorunnaarsitsinerup qanoq ittunik sipaaruteqarfiusinnaaneranik, imaluunniit sipaarutaasut allatigut “nerineqaannarnerisigut”. Soorlu Sulisitsisut saqqummiussugaasa oqaaseqarfigineqarneranni nalunaarneqartut qitiusumik ilinniarfinni aqutsinermik aqqissuussinerit allannguutissaannut siunnersuutitsigut siunertaanngimmat sipaarniuteqarniarneq, taamaallaalli qularnaarniarneqarluni inuussutissarsiutinik ilinniartitsinerit naammassisaqarfiusumik aqqissuunneqartarnissaat, minnerunngitsumillu

suliassat siulersuisuusunit isumagineqartarsimanngitsut naammassisaqarfiusumik sularineqartalernissaat. Aningaasaqarnermut tunngasunut allanut atatillugu innersuussisoqassaaq tamanna pillugu immikkoortumi 3-mi oqaatigineqareersunut, siunnersuummi nalinginnaasunik oqaaseqaataasuni.

Siulersuisoqarnermik aaqqissuussinerup iluarsaateqqinneqarsinnaaneranut tunngatillugu nutaamik aqutsinikkut aaqqissuussinerup pilersitsinani oqaatigineqassaaq, siulersuisussanik toqqartuisarneq siulersuisullu katitsigaaneri ataatsimut suliffeqarnermi kattuffinniit ingerlanneqartarmat, Naalakkersuisoqarfik oqartussaasoq avaqqullugu. Tamatumalu saniatigut inatsit maanna atuuttusoq aalajangersagartaqareermat siulersuisuni ilaasortanut piginnaasatigut piumasaqaatinik, siulersuisunilu ilaasortat ataasiakkaat aamma eqqarsaatigalugit, tamatumani aqutseriaatsimi tassani angusaasartut allannguuteqartissimanngilai.

Ukiuni kingullerni 10-ni inuussutissarsiutinik ilinniartitsinerni misilittagaasut tunuliaqutaralugit paasinarpoq pineqartut ajornartorsiutit aaqqiissutissarsineqarsinnaanngitsut oqaloqatigiinnikkut siulersuisut qanoq katitsigaanerinik aaqqissuussinissanik, tassami aaqqissuussaanikkut aqutseriaatsimi aaqqissuusseqqittoqartariaqarmat, suliniutinik ingerlatsisoqarnissaanut sammisumik aqutseriaaseqarnikkut.

Kiisalu aamma KNQI oqaaseqaateqarpoq sungiusaammik suliffissanik ajornartorsiuteqarnermut atasunik, nalunaarneqarmat aamma GUX-imi ilinniagaqartut appariaateqarsimasut, aammalu GUX-imi ilinniakkaminnik ingerlatsisut appariaataat inuussutissarsiutinik ilinniakkani appariaataanniit qaffasinersut. KNQI ilutigisaanik innersuussivoq ukioqatigiiaat ilutigisaanik ikiliortornerannut.

KNQI-ip oqaaseqaatimini isummersorfiginngilai sungiusaammik suliffissat annaasat, aammalu inuussutissarsiutinik ilinniakkat ilaat ingerlanneqartarmata sungiusaammik suliffeqarani. Ilanngulluguttaaq oqaatigineqassaaq ilinniarnertuunngorniartartut ilinniarnertuunngorniartartut Kalaallit Nunaanni 2008-miit 200-ut missaanniit 2020-imi 300-ut missaannut qaffariaateqarsimanerat. Taakkualu saniatigut piffissami matumani pineqartumi ilinniagaqarsineqarsinnaaneq Danmark-imi ilinniagaqalernissamut piareersarnermi ammaanneqarsimavoq. Kiisalu aamma oqaatigineqassaaq Kalaallit Nunaanni eqqaaneqareersutut sungiusaammik suliffissat 20 %-init amerlanerusut annaaneqarsimammata, siulersuisoqarnermik aaqqissuussinerup eqqunneqarnerata kingornagut.

Pineqartullu saniatigut KNQI isumaqarpoq ilisimallugu sungiusaammik suliffissat amerlanerusut, taakkualu inuttalernerq ajortut ilinniagaqartussanut tunngasunik peqquteqartunik. KNQI tamatumunnga atatillugu innersuussivoq oqartoqartartoq ilinniagaqalersussat “suliffeqarnissamut piumasaqaatinik tunngaviusunik peqanngitsut”, tamatumani ilu aamma ilinniagaqalertussat piffissamik eqquisinnaanngitsut, napparsimanermit

nalunaartannigitsut, ilinniagaqartussallu akisussaassuseqartariaqartut eqeersimaartumik suliffimmi peqataanissamut. Ilutigisaanik KNQI-p nalunaarutigaa sulisitsisut ilinniagaqalersussat nammineeirlutik saaffiginnittartut tigujumanerusaraat taakkua piumassutsimik takutitsigaangata.

KNQI tamatumunnga atatillugu erseqqissaateqannigilaq isumaliutissiissutit tunngavilersorneqartut pissutaasarsimanersut siulersuisut suliffeqarfinnut sungiusaammik suliffissanik pilersitsinissamik siunnerfeqartumik saaffiginnittarsimannginnerannut, pisussaaffigisamittut, Inatsisartut inatsisaanni maanna atuuttumi § 43, imm. 1 naapertorlugu.

KNQI-p ajornartorsiummik isiginninnera taamaasilluni aallaaveqarsorinarpoq naatsorsuutigisanik ilinniagaqartunut sungiusaammik suliffissat ikileriarsimanerat ilinniagaqartunik namminernik pissuteqartoq. Tamatumunngalu atatillugu nalilerneqarpoq KNQI-p qitiusumillu ilinniarfinni namminerni pisortaasut sinniisuffigissaat akisussaaffimmik ilinniartuniititsisut, tassuunalu ajornartorsiummik piusumik qimarratiginnittut Inatsisartut inatsisaanni § 43, imm. 1-imi pisussaaffiup isumaginissaanik.

Eqqaaneqareersutut aalajangersakkamut pineqartumut nassuiaatitut oqaasertaliussani ersippoq minnerunngitsumik qitiusumik ilinniarfinnut aqutsisoqarnikkut aaqqissuussinerup nutaap siulersuisuliinermik imaqartup eqqunneqarnerani suliffeqarnermi illuatungeriinnik inuttaqartunik naatsorsuutigineqartoq siulersuisut suliffeqarfinnik oqaloqateqartarnermikkut anguniassagaat sungiusaammik suliffissanik amerlanerusunik pilersitsiortortoqartarnissaa. Tassalu tamanna pisimannigilaq, KNQI-llu tamatumunnga tunngavilersuutigalugu ilinniagaqartut namminneq pisuussutigigaat, minnerunngitsumik sungiusaammik sulilernissaminnut piareersimannginnermikkut.

Apeqqummut tamatumunnga ajornartorsiutaasumik allaanerusumik aallaaveqarsimasinnaanissaat immaqa naatsorsuutigineqarsinnaasimagaluarpoq, matumani aamma piumassuseqarnerunissaat namminneq iluminnut isiginiaanissamut nalilersuinissamullu namminneq siulersuisutut naammattunik suliniuteqarsimanerlutik, suliffeqarfinnut tunngavigisaminnut orniguttarnikkut sungiusaammik suliffissanik pisariaqartunik pilersitsiortornissamut.

Ilanngullugulu aamma aningaasartuutissat missingersuusiasat saneqqunneqartarnerannut KNQI oqaaseqarpoq tamanna kinguneqartarsimasariaqaraluartoq siulersuisut pineqartut taarserneqartarnerannik, sakkussaasumik inatsimmi Naalakkersuisunut atugassiissutigineqarsimasumik. KNQI taamaattumik isumaqarpoq aningaasartuutissanut missingersuusianik qaangiisarsimaneq – sinniisarsimaneq – qitiusumik ilinniarfiit ilaanni kinguneqartariaqannigitsaq aqutsinermut aaqqissuussinerup tamarmiusup allanngortinneqarnissaanik.

Tamatumunnga oqaatigineqassaaq inuussutissarsiutinik ilinniartitsinerni unammilligassat atuuttut imatut annertussuseqarmata, pissutsit aaqqiissutissarsineqarsinnaanatik siulersuisut ataatsit taarserneqarnerinnaasigut. Siusinnerusumi oqaatigineqareersutut matumani pineqarput ajornartorsiutit tunngaviulluinnartut aqutsinikkut aaqqissuussinerit allatut aaqqissuuteqqinneqarnissaannik pisariaqartitsiviusut, sukkanerujussuarmik tigussaanagerusumillu aqutseriaaseqalernissamik kinguneqartussamik.

Qitiusumik ilinniarfiit Deloittes-ip nalunaarusiaanut oqaaseqaataannut tunngatillugu oqaatigineqassaaq “nalunaarusiaq” misissuinerusooq “immikkoortoq siulleq” aamma immikkoortut aappaat” Naalakkersuisut misissuinerisa ilagimmagu aallarnerneqartoq aningaasanik aqutsinikkut mianersuaalliortoqalermat, ilinniartitaanikkut ingerlatsiviit ilaasa pisortat nalilinnik pigisaannik minnerunngitsumik 2023-imi atuinerannut tunngatillugu. Misissuineq itisuumik suliaasooq eqqaaneqartoq nammineq tunngaviunngilaq aalajangiinnermut aqutsinermik aaqqissuussinerup nutaap eqqunneqarnissaanik. Tamanna ersereersimavoq misissuinerit piviusunngortinnginneranni nalunaarusiortoqannginneranilu, inuussutissarsiutinik ilinniartitsinernik ingerlatsivinni annertuunik ajornartorsiuteqartoqartoq, aamma minnerunngitsumik Implements-ip nalunaarusiaani saqqummersutigut, aaqqissuusseqqinneq 2011-imeersoq ataatsimut isigisumik angusaqarfiusimanngissoq, allaallumi killup tungaanut sammisunik kinguneqarsimasooq suliaasaqarfinni arlaqartuni, tamatumani aamma sungiusaammik suliffissanut atatillugu ajornartorsiummut atasunik. Misissuineq nammineq imaluunniit nalunaarusiaq misissuinnermut tunngaviusimasooq isertuussaasimangillat. Kiisalu aamma Campus Kujallermi siulersuisut ilisimatinneqarput nalunaarusiami angusaasut arlaqartut pillugit allakkatigut ulloq 8. november 2023, siunnerfigalugu ilinniartitaanermik ingerlatsiviup taassuma aningaasaqarneranik pitsaanagerusumik paasinnittoqarsinnaaqqullugu.

Iternga tikillugu aningaasaqarnikkut ingerlatsinerup nalilersuivigineqarnera Naalakkersuisut Deloittes suleqatigalugu aallartitaat ukiup 2022-2023-ip nikinnerani aningaasaliissutinik arlaleriartunik qaangiisoqartareerneratigut taamaasilluni aallartinneqanngilaq siunnerfigalugu siulersuisoqarnermik aaqqissuussinerup peerneqarnissaa, kisiannili taamaallaat aningaasartuutissanut missingersuusianik qaangiisarnernut pissutaasut ersarissaavigiumallugit, pinngitsoorumallugulu siunissamut isigisumik aningaasaliissutinik qaangiisoqartarunnaarnissaa. Misissuinerlu aamma ikiorsiissutaasussaavoq siulersuisut missingersuusianut malitseqartitsisarnerannut ajornartorsiorfiusumut. Nalilersuinerit ilaatigut kinguneraat Naalakkersuisoqarfiup oqartussaasup qitiusumik ilinniarfinnik suleqateqarnermik qaninnerusumik ingerlatsilerneru, aamma Campus Kujallermut tunngatillugu qaammatikkaartunik missingersuusiat malitseqartinneqartarnerat, siulersuit naammassisinnaasimanngisaa, siulersuisut ilaatigut ilisimatitsissutigisimammassuk aningaasartuutissanut missingersuusiat malitseqartinneqartarnerannik periaaseqartoqannginnera, - imaluunniit kultureqartoqannginnera.

KNQI-mit ilanngullugu aamma oqaatigineqarpoq nalinginnaasunik oqaaseqaatini nalunaarneqartoq Deloitte-ip maluginiarsimagaa qitiusumik ilinniarfiit arlaannaalluunniit ingerlatsinissamut amigartunik missingersuusiat tunngavigalugit aningaasaliivigineqartarsimanngitsut, nalilersuinerup nammineq oqaasertaanut naapertuutinngitsoq. Tassani ersippoq nalilerneqartoq ilimanartutut KTI aammalu ilaatigut Perorsaanermik Ilinniarfik aamma Inuili aningaasaliissutinik naammassisaqarluarsinnaanermik tunngavilimmik aaqqissuussinerit piviusunngortinneqareerneranni pisariaqartitsisuusut aningaasaliissutit ilassuserneqarnissaannik. Tamannali naapertuuppasinngilaq KTI-p 2023-imi malunnaatilinnik atuinikinneruneranut.

Nassuiaatit oqaasertaliussani oqaaseqaatit isiginiarneqassapput Campus Kujallermi siulersuisunit oqariatuutaasunit aallaaveqartunik, ilinniartitaanermik ingerlatsiviup ukiuni amerlasoorsuarni atuinerusarsimanera amigartunik missingersuusiortarnermik pissuteqartoq, nalilersuinermilli sulianit ersersinneqarluni pissutsit taamaannginneri. Tamatumalu saniatigut Perorsaanermik Ilinniarfik aamma KTI assigisaanik unammilligassaqaarsimanngillat atuinerusarnermut atasunik, Campus Kujallermi atuuttuusunik. Tamanna aamma atuussimavoq Inuili-mut tunngatillugu 2023 tikillugu. Tamanna tunuliaqutaralugu oqaaseqaatigineqartut nalinginnaasunik oqaaseqaatini immikkut erseqqissaavigineqanngillat.

Kiisalu aamma KNQI inatsimmi oqaasertap allannguutissaanik saqqummiussaqaarpoq, “inuusuttut tamarmik” taarserneqarnerannik “tamarmik” § 1, imm. 2, oqaaseqatigiinni siullerni. Tamanna siunnersuut atortinneqanngilaq, erseqqissarumallugu kissaatigineqartoq inuusuttut amerlanerusut inuussutissarsiuutinik ilinniakkanik ingerlatsinissamut piginnaanngorsarneqartarnissaat, taamalu pissutsit maanna atuuttut illuatungilerumallugit.

Ilanngullugulu KNQI siunnersuuteqarpoq ”nutaaliornikkut” ilanngunneqassasoq § 1, imm. 2, nr. 3-mi, taannalu ilanngunneqarpoq. Taamaasilluni ersersinneqarpoq inuussutissarsiuutinik ilinniartitsinerni aamma nutaaliorneq pineqarmat, ilaatigut isumassarsianik nutaanik piviusunngortinneqarsinnaasunik pilersitsisarnertigut.

Tamatuma saniatigut siunnersuutigineqarpoq § 12-ip oqaasertalernera allanngortinneqassasoq, tamannalu naapigiarneqarpoq. Siunnerfiuvoq maanna atuuttumi Inatsisartut inatsisaanni § 10, imm. 1-ip ingerlatiinnarnissaa, taamaattumillu “qitiusumik ilinniarfiit” taarserneqarluni “ilinniarfiit” atorlugu.

Tamatuma saniatigut KNQI-p apeqqutigisimavaa pitsaassusilersuinerit qanoq ineriartortinneqarnerat ingerlanneqassanersoq aningaasartuutit qaffannagit. Tamatumunnga oqaatigineqassaaq aalajangersakkami siunnerfiummat tullerriiaarisarneq suliassanik, taamalu pitsaassusissanik ineriartortitsineq pissusissamisoorumik ilinniartitaanerni neqeroorutini ilaatinneqassalluni.

KNQI ilutigisaanik siunnersuuteqarpoq § 56, imm. 3 forständerimut peqqussuteqartarneq allanngortinneqassasoq imaluunniit erseqqissarneqassasoq. Tamanna ilanngunneqanngilaq, matumani pineqaannarmat erseqqissaat pissusioreersunik nalinginnaasumik ilitersuisussaataitanermik, atorfeqarnermi ilaareersumik.

Tamatumalu saniatigut KNQI-p innersuussimavai nassuiaatini oqaasertaliussat Inatsisartut inatsisaanni 2011-imeersumi maanna atuuttumi, taamanikkut oqaasertalerneqartut ilinniartitaanertigut suliniutinik siammarterinissamik pisariaqartitsineramik tunngaveqartunik. KNQI nalunaarpoq suli isumaqarlutik tamanna atuuttusoq. KNQI tamatumunnga atatillugu ilaatigut aperivoq tamatumunnga kina pikkorinnerussanersoq pisariaqartitsinerit atuuttut takusinnaanissaannut, DIH-mi peqqissaasut ningiuanniit, kommunimi angerlarsimaffinni kiffartuussinermut ningiuusumiit, entreprenørimiit, sanasut naalagaanniit imaluunniit nerisitsisarfimmi kantinami ningiuusumiit. Apeqqulli paatsuuineramik tunngaveqarsorinarpoq, tassami suliassat suli ingerlaqqittumik siammasissumik suliarineqartuassammata, matumanilu taamaallaat aqutseriaaseq pineqarluni. Tamatumunngalu atatillugu eqqaaneqarsinnaavoq ukiup kingulliup ataatsip Naalakkersuisoqarfimmiit Campus Kujallermut missingersuusianik malitseqartitsisarnermik ingerlatsiviusumi aningaasaqarnikkullu ingerlatsinerup aqqeqqinneqarfigisaani, suliassat suli siammasissumik ilinniarfimmi namminerimi ingerlanneqarsimmata. Tamannalu assiliaq ataatsimut suli atuutissaaq. Tamatumalu saniatigut ajornarluinnarpoq isiginngitsuusaassallugu siulersuisoqarnermik aqqissuussinerup sutigulluunniit iluatsissimannginnera - naammassisaqarfiusimannginnera, imaluunniit pitsaasunik ineriartornikkut inuussutissarsiutinik ilinniartitsinerne kinguneqarsimannginnera, Inatsisartut inatsisaata atortuulersinneqarnerani siunnerfiusimagaluartut.

Niuerneramik Ilinniarfik (NI), eqqaaneqartut maanna imminut taaguusernikuusooq ”Greenland Business School”, tusarniaanermut akissuteqarpoq ilinniarfiup siulersuisunit suliaasut isikkoqartunik, aamma Campus Kujallermi siulersuisuusunik. NI, Campus Kujallertulli ukiuni amerlasuuni aningaasartuutissanut missingersuusianik qaangiiuarsimavoq.

NI aamma inassuteqarpoq siunnersuut taamatut isikkoqartoq utertinneqassasoq, - tunuartinneqassasoq, innersuullugit periaaserineqarsimasutut pineqartut NI-p isumaa naapertorlugu siunnersuutip pilierartorerani. NI-p eqqaavaa tamatumunnga atatillugu peqataatinneqarsimannginnertik siulersuisutut, aammalu siunnersortinit avataaneersunit nalunaarusiani inassuteqaatigineqartut suliat ingerlaneqarneranni allanngortinneqartarsimasut unnerlugit, imaluunniit ilanngunneqartarsimanngitsulluunniit. Taamaattumillu NI-p kaammattuutigaa seminareqartitsisoqarnissaa, inassutigineqartunik Implements-imeersunik aamma Deloitte-meersunik oqalliffiusussamik, aalajangiinissanut tunngaviusussat pitsaassusilersorneqarsinnaaqqullugit. NI ilanngullugu isumaqarpoq nalunaarusiaq assilissamik Naalakkersuisoqarfiup saqqummiussaaniit allaanerusumik ersersitsisuuq.

Tamatumunnga atatillugu oqaatigineqassaaq Implements namminiivilluni aalajangiimmat Implements-ip nalunaarusiaani suut sammineqarnissaannik, tamatumunngalu

Naalackersuisoqarfik oqartussaasoq annerusumik suliassaqsarimalluni ataqatigiissaarineramik, kisitsisinik paasissutissanik katersineramik aammalu pitsaassusilersuineramik. Kiisalu Implements-ip nalunaarusiorneranut atatillugu suleqatigiinnik malinnaatinneqartussanik pilersitsisoqarsimavoq qitiusumik ilinniarfinniit sinniisoqartumik, suliat malinnaavigineqarnissaat siunnerfigalugu. Nalunaarusiap inaarutaasup ingerlatsisunut allanut agguaanneqarsinnaannginneranut, matumani aamma avataani soqutigisaqartunut allanut 2023-ip ukiaa sioqqullugu pissuteqarpoq nalunaarusiaq suli Naalackersuisunut saqqummiunneqanngimmat nutserneqarsimalluni. Pissutsit Implements-ip nalunaarusiaaniittut ersersissimavaat siulersuisoqarnermik aqqissuussineq sutigulluunniit ataatsimut isigisunik pitsaasunik ineriartortitsiviusimangitsoq inuussutissarsiutinik ilinniartitsinerit namminneq iluanni, Inatsisartut inatsisaata pilersinneqarnerani naatsorsuutigisaasutut, tamannalu Naalackersuisoqarfimmut oqartussaasumut Naalackersuisunulluunniit tutsinneqarsinnaanngilaq. Aamma taamaappoq NI ukiuni amerlasuuni piginnaaneqarsimanginnerani missingersuusiat saneqqunnagit ingerlatsisussaannermut. Naalackersuisut misissuisitsineranut immikkoortumik 1-imik aamma 2-mik kinguneqartunik, oqaatigineqassaaq misissuineq atassuteqarsimangimmat aqutseriaatsinut. Tamatumunnga atatillugu innersuunneqassaaq KNQI-p tusarniaanermi akissutaasa oqaaseqarfigineqarnerat.

Ilanngullugulu NI-p nalunaarpaa ukiuni amerlasuuni kissaatigineqartoq oqaatigineqartarsimammatt inatsisit nalilersuivigineqarnissaannik, taamalu ilaatigut pisariaqartutigit naleqqussaannissat qularnaarneqarlutik. Siusinnerusukkullu oqaatigineqareersutut pineqarput pissutsit tunngaviulluinnartut unammilligassallu annertuut, piunasaqarfiusut suliniutissanik annikitsutigit naleqqussaanerunngitsut aqutsinikkut aqqissuussineramik atuuttumik, kisiannili aqqissuusseqqinnissamik aqutseriaasiusunik, assut sukkanerusumik suliassat allannguinnissallu aqqissuunneqartaqqullugit. Siulersuisoqarnermik aqqissuussineq iluatsissimangilaq, tunngavissaqaranilu naatsorsuutigissallugu iluatsissinnaanissaa, ajornartorsiutillu annikitsuinnartigit iluarsisarnertigit allanngortinneqarsinnaanatik.

Kiisalu aamma NI saqqummiussuivoq isumaliutinik arlaqartunik, inatsisitigit aalajangersakkanut tunngasutigit innersuullugu eqqartuussissuserisunut suliaasoq 2019-imeersoq NI-mut tunngasoq, aamma ullumimut nalilersuinerit pillugit Implements-imit suliarineqarsimasut. NI-p tamatumunnga atatillugu uteqqippai suliat matoqqasumik ingerlanneqarsimasutut isumaqarfigineqartut, aningaasaqarnerlu pillugu nalunaarusiaasoq ullualunnguit tikillugit isertuunneqarsimasoq. NI tamatuma saniatigit nalunaarpoq ilisimaneqartoq aqutsisunik suleqatigiinnik pilersitsisoqarsimasoq Naalackersuisoqarfimmi oqartussaaffimmik tigumminnittumi, taassumali katitsigaanera oqartussaaffigisaalu ilisimangikkitik. NI-p tamatumunnga atatillugu innersuuppai KNQI-mit tusarniaanermi akissutigineqarsimasut. Nalilerneqarpoq NI-p qitiusumik ilinniarfiit tusarniaanermi akissutigisaat ataqatigiissaarsimagai KNQI-ip akissutaanut atasumik, eqqaaneqareersutut atsioqataasimasumut.

Tamatumunnga atatillugu innersuunneqassapput KNQI-mit tusarniaanermi oqaaseqaatigineqartunut akissutaareersut pissutsini pineqartuni, matumani aamma suleqatigiissitamik malinnaatitsisumik pilersitsisimanermut tunngatillugu qitiusumik ilinniartinniit peqataaffigineqartumik, siunnerfigalugu Naalakkersuisunit aningaasaqarnermut tunngasutigut misissuisitsinerit malinnaavigineqarnissaat, nalunaarusiamik kinguneqartumik, taakkualu aqutseriaatsit naleqqussarneqarnissaannut atasuusimanninnerat. Ilanngullugulu aamma ilisimatitsissutigineqarsinnaavoq suliniutinik suliaqartitsisarnerni nalinginnaasumik periaaserineqartartutulli suleqatigiissitanik aqutsisunik pilersitsisoqarsimanera, siunnerfigalugu Implements-ip suliaasa ataqatigiissaarneqarnissaat kisitsisillu paasissutissat pitsaassusilersorneqarnissaat, matumanissaq ikiuukkumalluni paasissutissanik suliaqarnerni kiisalu akiligassat nutserinerillu isumagineqarnissaanni.

NI-p eqqartuussissuserisut suliaannik taaneqartumut innersuussinerat paasineqarpoq NI-p inatsisunik sanioqqutsisimanera 2019-imeersoq matumani pineqartoq, - tassani NI atortussatigut akuersissutitaqaranilu aningaasaliissutitsigut akuersissuteqarfiunngitsumik neqeroorsimammat qaffasinnerusumik ilinniartitaanerit marluk suliariumannittussarsiuullugit, kingornagullu oqariartorluni inatsisitigut tunngavigineqartut pissusissamisoorsimasut. Eqqartuussissuserisulli misissuinerisa taamaakkaluartoq uppersarsimavaat ersarilluinnartumik inatsisunik unioqqutitsisoqarsimasoq, kisiannili taamanikkut Naalakkersuisuusut qanoq iliuuseqarsinnaasimannngitsut NI-p siulersuisuinut tunngatillugu, taakkua NI-mi ulluinnarni ingerlatsisuusunut eqqissisarneqarsimammata pisut pissusissamisoortut. Taamaattumik mianersuaalliorujussuarluni ingerlatsinermik siulersuisut tungaanniit pisoqarsimasut taaneqarsinnaassanani, kisiannili pisunut eqqumasoqarsimanninneratut taasariaqarluni. Siulersuisullu tamatumunnga annertunerusumik suliamut atatillugu iliuuseqarsinnaasimannngillat, eqqaassanngikkaanni ulluinnarni ingerlatsisuusut pikkorissartinneqarsimaneri.

NI-p ilanngullugu uparuartorsimavaa Naalakkersuisut aalajangererat Naalakkersuisoqarfiup oqartussaasup inassuteqarnera tunngavigalugu, nalunaarusiamik tunngaveqartunik aqutseriaatsinik allannguissamik imaqqanngitsumik.

Tamanna KNQI-mit tusarniaanermi akissutaasut oqaaseqarfigineqarneranni saqqummiunneqareersutut paatsoornermik tunngaveqarsimavoq, tassami siunnersuutip pilerneru Naalakkersuisut pissaasutut aalajangererannik tunngaveqarmat. Ilutigisaanillu erseqqissarlugu oqaatigineqassaaq Naalakkersuisut aalajangererat pisimammat paasinninnermik tunngaveqartuni aqutsinermut inatsit atuuttoq sutigulluunniit angusaqartitsiviusimannngitsaq imaluunniit ilorraanut sammisunik ineriartortitsiviusimannngitsaq inuussutissarsiutinik ilinniartitsinerit iluanni, Inatsisartut inatsisaata pilernerani naatsorsuutigineqarsimagaluartutut.

NI-p ilanngullugu siunnersuutigaa aallartitsisoqassasoq sanilliussilluni misissuinermik misissuivigiumallugu inatsisip pilersinneqarnerani anguniagaasimasut inatsisip atortinneqarneranut naapertuuttuunersut.

Tamatumunnga atatillugu oqaatigineqassaaq tamatuma kingunerissammagu siulersuisoqarnerup ingerlaqqinnissaa, taamalu ajornartorsiutit 2011-imi aaqqissuusseqqinnerup pilersissimasaasa aaqqiissutissarsineqarnissaat kinguarsarneqalissalluni. NI-p nalilersuineri qanoq ikkaluarpataluunniit naliliisoqarpoq inuiaqatigiit kalaallit inooqataaffigisinnaanngikkaat aqutseriaaseq ataatsimut isigisumik inuussutissarsiutinik ilinniartitsinermik suliassa qarfimmik ajornerulersitsiviusimasoq, ilinniagaqartunut sungiusaammik suliffissat ikileriarnerannik kinguneqartunik, ilinniakkani pitsaassusissat ajornerulernerannik kinguneqartunik, inuusuttuaqqanik immikkut sullisissallugit siunnerfiusunik suliniuteqarfiumngitsumik, annertuunik malunnaatilinnillu aningaasaliissutit sinnerlugit atuisarsimanerit, sulisuusullu ilaasa millioninik akissarsiaqartarsimanerat. Imaapporlu paasissutissanik tunngavissaqanngitsoq siulersuisoqarnermik aaqqissuusinerup ingerlateqqinnissaanut, taamatullu suliniuteqartoqarsinnaanera siuarsarneqassanngitsoq. Maanna unammilligassat atuuttut isiginiarlugit naatsorsuutigisariaqarpoq iliuusaasariaqartut pisariaqartut maannangaq suussusilersorneqartariaqartut, iliuusissallu kinguarsarneqaqqissanngitsut.

Tamatumalu saniatigut NI-p ujartorsimavai ilinniartitaanernut atatillugu periusissiaq aammalu ilinniartitaanermut politikikkut anguniakkat, tamatumunngalu atatillugu iluarisimaarnertik oqaatigalugu ilinniartitaanernut periusissiassamik nutaamik suliaqartoqarnera. NI-p matumani ilutigisaanik Naalackersuisoqarfimmik oqartussaasumik oqaloqateqartarnertik isornartorsiorpaa, neriuutigalugulu Naalackersuisoqarfiup nukissat pisariaqartut immikkoortikkumaarai niuernikkut suliassa qarfiup ineriartortitsiviunissaanut.

Tamatumunnga atatillugu oqaatigineqassaaq Naalackersuisoqarfik akisussaasoq piareersimammat ilinniartitaanermik ingerlatsivinnik oqaloqateqartarnissamut Naalackersuisoqarfik suliassa qarfiisa iluani, kisiannili aamma pisariaqartitsilluni inatsisini naapertuutinngitsut tikkuartornissaannut. Tamanna ilaatigut kinguneqarsinnaavoq naammassisassanut isumaqatigiissuteqartarnerit siuarsaaviginnginnerisigut, taakkua malittarisassat atuuttut naapertorlugit aaqqissuusaaanngippata.

Kiisalu aamma NI-mit tusarniaanermi akissummi ersippoq ilinniartitaanermit siunnersuisoqatigiinnik pilersitsisoqarnissaa tapersorsorneqartoq, kisiannili tamatuma ilinniarfiit ataasiakkaat siunnersorneqarnissamik pisariaqartitsinerat naammassisinnaanngikkaa. Tamatumunnga atatillugu innersuussisoqassaaq KNQI-p tusarniaanermi akissutaanut apeqqutip assingani oqaaseqaataasunut. Tamatumunnga atatillugu ersippoq sukkuulluunniit inuussutissarsiutit sammiviini fagitigullu immikkuullarissuni suliani ilinniagaqarsimasunik sulisussatut tigusisartut akornanni isummersortartunik pilersitsisoqartarsinnaanera, suliffeqarnermi atugaasunut ilinniartitaanerit

naleqqussarneqartaqqullugit, aammalu qulaajarneqartaqqullugit imaluunniit pitsaassusilersorneqartaqqullugit inuussutissarsiutit sammiviiniittut apeqqutit isummersuutillu. Taakkualu saniatigut ilaavortaaq pisussaaffik siunnersuummi § 33, imm. 1-imi, taamaasillunilu ilinniartitaanernut pilersaarutinik suliaqartarnerni ilinniakkanut ataasiakkaanut soqutigisaqartut isumasiorneqaaqqaartassasut siunnersuisinneqarlutillu apeqqutini sulianut naleqquttuni, tamatumalu isumasioqatigiittarnerit eqqornerusumik naleqqunnerusumillu ingerlatittassavaa. Taamaattumik paatsuuisoqarsimassaaq naatsorsuutigineqarpat suliffeqarnermi illuatungeriit pisariaqartitaat taamaallaat suussusilersorneqartassasut siulersuisut aqqutigalugu, tamannalumi ilalersorneqarpoq aamma siulersuisoqarnermik aqqissuussinerniit misilittakkanit.

Kiisalu aamma NI isumaqarpoq siulersuisut atorunnaarsinneqarnerat annertusisanik pisariaqartitsiviulissasut inatsisilerinikkut, fagitigut aamma suliassanik suliaqartarnertigut Naalackersuisoqarfimmi namminermit, qitiusumik ilinniarsiit ilalersorumallugit.

Tamatumunngalu tapiliullugu NI-mit innersuunneqarput suliassat arlaqartut isumaqarfigineqartut Naalackersuisoqarfimmit suliarissallugit ajornakusoortussasut isigineqartut. Tamatumunngalu atatillugu NI-p ilaatigut eqqaavai ilinniagareriikkat ilaannik nuussisarnerit ilinniakkamik naannerulersitsiviusartut, ilinniagaasussanut pilersaarutinik suliaqartarnerit aamma ilinniartitaanerit, pitsaassusissalersuisarnerit, aningaasanik aqutsineq, pisortaaqartut isumasioqatigiittarneri aamma susassaqartunik allanik akulerussisarnerit.

Tamatumunnga atatillugu oqaatigineqassaaq matumani pineqarmata suliassat ulluinnarni ilinniartitaanermik ingerlatsivimmi pisortaaqartut suliarineqartussat, tamatumalu kingornagut siulersuisunut inassuteqaatitut ingerlatinneqartartut. Pineqarput suliat ulluinnarni pisortaaqartut suliassaareersut Naalackersuisoqarfik peqatigalugu, aqqissuusseqqinneq sioqqullugu suliassaarsimasut. Imaapporlu Naalackersuisoqarfik isigisariaqarmat periarfissarissaarnerusutut NI-mik ilalersuisarnissamut, assersuutigalugu aningaasanik aqutsinerup tungaatigut, siulersuisunut sanilliullugu, tamannalumi assersuuserneqarluarpoq Naalackersuisoqarfiup oqartussaasup Campus Kujalliup aningaasaqarnermik aqutsinerani peqataalerneratigut, siulersuisunut taarsiullugu, ilinniartitaanermit ingerlatsiviup Niuernermit ilinniarsiit avittagaannut. Ilanngullugulu pissutsit imaapput NI-p ukiuni amerlasuuni aningaasaliissutaasut iluanni ingerlatsiniaraluarneq eqqortissinnaasimangikkaa. Taamaattumillu naliliisoqarpoq Naalackersuisoqarfiup suliassanut akisussaasup piginnaasat pisariaqartinneqartut pineqartunut tamaasa pigigai.

NI uteqqiilluni aammaarluni isornartorsiivoq Naalackersuisoqarfillu oqaloqatigiittoqannginnerarlugu. NI-p tamatumunnga atatillugu eqqaavaa NI akuerineqarsimangitsoq naammassisassanut isumaqatigiissusiornermi, aningaasaliissutinik allannguinngitsunik ilinniartitaanernut siunnersuutaasut akuerineqarsimangitsut, oqaluuserianeqarsimangitsut inuusstuaqqat immikkut sullinneqartussasut siunnerfiusut, suliffeqarnermiit ilinniagaalersussanut nutaanut kissaatit oqaluuserianeqarsimangitsut,

matumani ingammik nakorsat allattaannut ilinniartitaanissaq nutaaq, ilinniarfimmilu ataatsimeeqatigiittoqartarsimangitsoq.

Tamatumunnga atatillugu oqaatigineqassaaq naammassisassanut isumaqatigiissutissap akuerineqarnissaanut tunngaviusutut aallaaviummat taassuma suliarineqarsimanissaa Namminersorlutik Oqartussat qitiusumik ilinniarfinni naammassisassanut isumaqatigiissutit pillugit nalunaarutaat nr. 26, ulloq 23. december 2010-meersoq naapertorlugu, tamannalu pisimanani. Kiisalu aamma ilinniagaalersussanik nutaanik aallartitsisoqarsinnaanerani piumasaqaataavoq tunngaviusunik aaqqissuussinernut malittarisassat malinneqartarnissaat, ilinniagaalersussanut pilersaarusiak akueritinneqarnerisigut, tamannattaarlu aamma pisimangilaq, eqqartuussissuserisut 2019-imi suliaannut atasumik, NI- mit siusinnerusukkut innersuunneqartutut. Naalakkersuisoqarfillu akisussaasoq pineqartumik siulersuisuniit tigusaqarsimangilaq, nakorsat allattaannik ilinniartitaanermut atatillugu. Kiisalu aamma oqaatigineqassaaq Naalakkersuisoqarfiup akisussaasup aammattaaq ilisarinnangimmagu oqaloqatigiittoqannginneranik piumassuseqannginnermillu oqariartorneq NI-meersoq, ilutigisaanillu maluginiarlugu pilersaaruteqarmat ilinniarfinnik ataatsimeeqateqartarnissanik, aamma Niuernermik Ilinniarfimmik.

Naalakkersuisoqarfiullu akisussaasup ilanngullugu arlaleriarluni nassuiaateqarfigisarpai piumasaqaataasut pisortanit akileraatit atorlugit aningaasalersukkanik ingerlatsisarnernut atatillugu piumasaqaataasut, aningaasaliissuteqartarnerni namminerni aammalu sammineqartunut atasumik piumasaqaataasut. Tamatumunnga atatillugu piumasaqaataavoq aningaasartuutissat assersuutigalugu akuerisaasunut ilinniartitaanernut aningaasalersorneqarsinnaangimmata Inatsisartut siumoortumik aningaasanut inatsisikkut aningaasaliissutitaqanngitsunik assigisaanilluunniit aaqqissuussinertaqanngitsunik, takuuk ataatsimut pissutsit maleruarneqartussat Inatsisartut inatsisaanni nr. 26, ulloq 28. november 2016-imeersumi, kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaat, tamatumalu saniatigut aamma malittarisassat Aningaasanut inatsisip aaqqissugaanera aamma allaffissornikkut aningaasanut inatsisip suliarineqarnerata ingerlasarnera pillugit Namminersorlutik Oqartussat nalunaarutaat nr. 44, ulloq 27. november 2020-meersoq.

Paasissutissanut aningaasaliissutissanut tunngavilersuutigineqartussanut tunngatillugu Inatsisartut inatsisaanni atuuttumi ersippoq Naalakkersuisut ilinniartitaanernut pineqartut atatillugu pilersaarusiak naammassillugit suliaasut akuersissutigisussaagaat. Tamannalu tunuliaqutaralugu ajornakusoorpoq periaatsit perrassarneqarsinnaanerak nutaanik ilinniartitaanernik pilersaarusiortarnerni, assersuutigalugu ilinniartitaanissatut suliniutaalersinnaasutut isumaliutitut allassimasunik tunngavilinnik, pisariaqartunillu allaaserinertaqanngitsunik erseqqissagaasunik, pisortanit aningaasaliissutissanut atasuni.

NI-p ilanngullugu aamma nalunaarpaa Naalakkersuisoqarfiup oqartussaasup suliat ingerlanneqarnerat tamaat atorsimammagu siulersuisut aningaasatigut aqutsinerlunnerarlugit missingersuusianillu malinnaatitsisoqannginnerarlugu, NI-lu ingammik assersuutitut

atorneqartuarsimasoq ukiuni kingullerni atuinikinnerusarsimanerit annertuut kingunerisaannik. NI-p tamatumunnga atatillugu oqaatigaa Deloittes-imit tamanna ilalersorneqanngivissoq.

Tamatumunnga atatillugu taamaallaat innersuussisoqassaaq Deloittes-ip nalunaarusiaani immikkoortumut 3.1-imut, tassani ersimmat annertuutigut malunnaatilinnik nikingassuteqartartoq aningaasaliissutaasunut sanilliullugu, - negativiusunik aammalu positiviusunik, - oqariartortunik aqutsinikkut eqquisinnaassuseqannginnermik. Naammaginartumillu aningaasaqarnikkut aqutsisoqannginneranik. Inatsisartut aningaasaliissutaat atorneqartussaapput aningaasartuutissanut missingersuusianik tunngaveqartunik aningaasaliissutaasunut, tamannalu aningaasanik aqutsinermi qitiulluinnarpoq.

Taamaattumik pissutsit imaapput NI-p oqariartuutaa akuersaartumik eqqortunngitsaq. Tamatuma saniatigut oqariartuutip takutippaa tunngaviusunik aningaasaliisarnermi ileqqunik ilisimasaqannginneq.

Ilanngullugulu NI-p nalunaarpaa Deloittes-ip nalunaarutaani ersittoq qitiusumik ilinniarfinit arfineq marluusunit pingasut missingersuusiatigut amigartunik suliaqartartut, tamannalu NI-p isumaa naapertorlugu pingaaruteqartunik sunniuteqartoq pitsaasumik aningaasaqarnikkut aqutsisinnaassutsimut.

Tamatumunnga atatillugu nalunaarneqassaaq misissuinermit annertuujusumit ersimmat naliliisoqartoq ilimanaateqartutut KTI aamma ilaatigut Perorsaanermik Ilinniarfik aamma Inuili naammassisaqarluarsinnaassutsimi periarfissanik tamakkiisunik piviusunngortitserernermi pisariaqartitsisuusut aningaasaliissutitsigut ilassusiinissamik. Pineqartulli taamaakkaluartoq tassaapput ilinniartitaanertigut ingerlatsiviit ataatsimut isigisumik aningaasaliissutinik uteqqiasunik sinniisanngitsut, NI-mut aammalu Campus Kujallermut atatillugu atuuttuusimasunik, taakkunanimi ileqquunerusimappat qaqutigoortuunngitsaq aningaasanut ukiuusup sanioqutsivigineqartarnera.

Ilanngullugulu aamma NI saqqummiussaqqarpoq isumaliutissiissutinik siulersuisut atorunnaarsinneqarnerisa kingunerisassaannik, annertusisanik ilassutitut aningaasaliissuteqartarnissanik ilinniarfinit, pineqarmata siulersuisut katillugit 35-inik inuttaqartut aqutsisoqatigiinniit peerneqartussat. Kiisalu aamma NI isumaqqarpoq suliaassat ulluinnarni aqutsisuniittut annertuseriaateqarnissaat atorfeqarnermi atugassarititaasut allannguuteqarnerinik kinguneqassasut.

Tamatumunnga taamaallaat nalunaarneqassaaq aqutsinermut peqqussutaasooq atuuttuusooq pilersinneqarnermini Danmark-imi inuussutissarsiutinut ilinniarfinni isumassarsiorfeqarnermik tunngaveqarsimammat, taakkua ingerlatsiviummata imminnut pigisut, pisortat ingerlatsiviisa avataanniittut. Kalaallit Nunaannili misilittagaalersut

tassaapput tamanna arriitsunik eqartunillu aqutseriaatsinik kinguneqarsimasoq, ajornartorsiortunik sukkasuumik periartarnissanut pissusiviusunut inuiaqatigiinni ullumikkut atuuttunut sanilliullugu. Taamaattumillu pisariaqartitsisoqaaqqissaarpoq pisariillisagaaneruumik toqqaannarneruumillu aqutseriaatsimik, sukkaneruumik iliuseqarsinnaasussamik pissusiusuni unammilligassanut, tamannalu siunnersuummut tunngaviulluni.

Ulluinnarni aqutsisuusunut sulisuusunullu allanut tunngatillugu oqaatigineqassaaq ulluinnarni aqutsisut sulisullu sinneri suli malitaqassammata atugassarititaasunik atorfinittarnermi il.il. sukkuulluunniit Namminersorlutik Oqartussani sulisuusunut atuuttunik. Taamaattumik naatsorsuutigineqanngilaq aqutsinikkut aqqissuussineq nutaaq kinguneqassasoq suliffeqarnermut atatillugu isumaqatigiissutini allannguutininik.

NI-p pineqartut saniatigut aamma isummersorfigisimavaa ulluinnarni aqutsisuusut isumasioqatissaqartannginneri, siulersuisunik atorunnaarsitsinissamut atatillugu. Tamatumunnga atatillugu aamma Avannaata Kommuniata oqaatigaa inuussutissarsiutit assigiinngitsut sinniisaat siulersuisuni ilaasortaasarnerat iluaqutissartaqartoq, soqutigisanik assigiinngitsunik suleqateqartoqartarmat. Avannaata Kommuniata assersuutigalugu Perorsaanermik Ilinniarfimmi sinniisoqarnertik naammagisimaarpat.

Tamatumunngalu atatillugu innersuussisoqassaaq KNQI-p tusarniaanermi akissutaanut apeqqummi pineqartumi isummersuutigineqartunut. Tamatumunnga atatillugu oqaatigineqarpoq sukkuulluunniit inuussutissarsiutit sammiviinut sammisunik aamma faginut aalajangersimasanut sammisunik ilinniagaqartunik suliffeqarfiit tiguisartut akornanni panelimik pilersitsisoqarsinnaasoq, siunnerfigalugu ilinniartitaanerit suliffeqarnermi pisariaqartitsinernut naapertuussarneqartarnissaat, imaluunniit inuussutissarsiutit sammiviinut tunngasunik apeqqutit eqqartorneqartut pitsaassusilersorumallugit. Taakkua saniatigut ilaavoq siunnersuummi pissusaaffik § 36, imm. 1-imiittoq, ilinniartitaanernut pilersaarutininik ilinniakkanut ataasiakkaanut sammisunik suliaqarnermi soqutigisaqartunik isumasiuisarnissanik, tamatumami isumasioqateqarneq ersarinnerulersillugulu naleqqunnerulersittarmagu. Taamaattumik aamma paatsuuineruvoq naatsorsuutigissallugu ilinniagassatigut pisariaqartitsinerit taamaallaat suussusilersorneqarsinnaasut siulersuisutigut, tamannalumi aamma misilittagaqarfigineqarluni ilalersuutaasunik siulersuisoqarnerup maanna aqqissuussaaneratigut, ataatsimut angusaqarfiusimannngitsup, inuiaqatigiinni unammilligassat atuuttut eqqarsaatigalugit.

NI-ip pineqartut saniatigut Perorsaanermik Ilinniarfittulli aamma Avannaata Kommuniatulli apeqquserpaa qitiusumik ilinniarfiit ingerlanneqarnerat angerlaanneqarniarmat, ilaatigut Naalakkersuisoqarfimmi aningaasaqarnermut immikkoortumut unammilligassaqartitsilersussamik.

Soorlu aamma KNQI-p tusarniaanermi akissutaanut oqaaseqaatini siulianiittuni nalunaarneqartutulli suliassat suli siammasissumik ingerlanneqartussaapput, matumani taamaallaat pineqarmat toqqaannarnerusumik aqutseriaaseqarneq. Assersuutigalugulu suli naatsorsuusiortarneq siammasissumik sumiiffinni ingerlatsiviusuni namminerni ingerlanneqartussaavoq, tamannalumi aamma nalinginnaasumik ingerlatsinermut aamma atuulluni. Taamaasilluni suliassanik ingerlatsinermi qitiusumut katersuineq pineqangilaq.

Tamatuma saniatigut NI-p uparuartorpaa qitiusumik ilinniarfiit pulatinneqarnissaat Namminersorlutik Oqartussat allaffissuaqarnerannik aaqqissuussiviup iluanut, ilinniarnertuunngorniarfittulli, tassami NI isumaqarmat qitiusumik ilinniarfinnut atatillugu annertunerujussuarmik pisariaqartitsisoqartoq inuiaqatigiinni ineriartornerup malinnaaviginissaanik, aamma suliffeqarnermut inuussutissarsiortunullu attaveqarnissamik. Tamanna aamma Perorsaanermik Ilinniarfiup tusarniaanermi akissutaani uteqqinneqarpoq, oqaatigineqarluni ilisimasassat pingaaruteqartut qitiusumut katitsinerinikkut annaaneqartarnissaat.

Tamatumunnga atatillugu innersuussisoqassaaq KNQI tusarniaanermi akissutaanut apeqqummi tassani oqaaseqaatigineqartunut, tassani akissutigineqarmat pisariaqartitsinerit siulersuisut kisiisa aqutgalugit suussusilersorneqarsinnaangitsut, tamannalumi aamma ilalersorneqarluni misilittakkanit maanna siulersuisoqarnermik aaqqissuussinermi. Aqutseriaasissamik aaqqissuussineq nutaaq siunnersuutigineqartoq annertunerujussuarmik qularnaarisussaavoq fagitigut piginnaanerit ilinniartitaanerit iluanni qularnaarneqartarnissaannik, ilaatigut periarfissatigut inuussutissarsiutit sammiviinut faginillu sammisunik suliffeqarfiit ilinniagaqartunik tigusisartut akornanneersunik panelinik pilersitsisarnertigut, suliffeqarnermi pisariaqartitsinermut ilinniakkat naleqqussartarnerisigut, imaluunniit inuussutissarsiutit sammiviinut sammisut apeqqutit pitsaassusilersortarnerisigut. Kiisalu aammaarluni innersuunneqassaaq pisussaaffik siunnersuummi § 36, imm. 1-imiittoq, taanna malillugu ilinniagassanut pilersaarusiart ilinniakkanut ataasiakkaanut namminernut sammisut soqutigisaqartunik isumasiuisarluni pilersaarusiorneqartartussaammata, tamatumuunalu isumasiuinerit eqqornerulersittassavai naleqqunnerulersillugit. Ilutigisaanik oqaatigineqassaaq inuussutissarsiutinik ilinniartitsinerit ilisarnaatigisarmassuk taarseraattunik periaaseqartarnerit, namminneq periarfissaqartitsisartut kattuffinnik susassaqartunik inuussutissarsiutinillu aalajangersimasunik ingerlaavartumik attaveqarsinnaanermut, tamanna siulersuisutigut pisariaqangimmat.

Ilanngullugulu aamma NI-mit oqaatigineqarpoq siulersuisunik atorunnaarsitsinerup assigissagaa nunat tamalaat akornanni akuerisaasarnernup peerneqarnera. Tamatumunnga taamaallaat oqaatigineqassaaq oqaaseqaat taanna paatsuuinerimik pissuteqarsimassasoq, nunat tamalaat akornanni akuerineqartarneq siulersuisoqarnermik aaqqissuussinermik qanorluunniit ittumik piumasqaateqarfiunngimmat. Taamaasilluni soqanngilaq ESG15-mi (European Standards and Guidelines/Europamiut assigiissaarinerannik aaqqissuussinermi), Kalaallit

Nunaanni malinneqartumi nalunaarneqartunik siulersuisoqartussaananeramik, pitsaassusissatigut akuerisaanissamut, imaluunniit nunat tamalaat akornanni nunatut akuerisaanissamut.

Naggasiullugulu NI-p tusarniaanermi akissummini oqaatigaa soqutiginnassasoq takussallugu ilinniartitaanernut periusissiasaq nutaaq qanoq ittunik imaqarumaarnersoq, sanilliullugu matumunnga siunnersuummut, NI-p isumaa naapertorlugu suli annerusumik qitiusumut eqiteriffiusumut.

Tamatumunnga atatillugu innersuussisoqassaaq siusinnerusukkut eqqaaneqareersunut, qitiusumut suliassanik eqiterineq pineqanngimmat, kisiannili aqutseriaatsip toqqaannarnerulersinnissaa pineqarmat, sulialli suli siammasissumik ingerlanneqartussaallutik.

Tamanna aamma oqaatigineqassaaq Perorsaanermik Ilinniarfiup siulersuisuisa tusarniaanermi akissutaanut atatillugu, aamma aallarnerneqartumut ernumanermik oqariartuuteqarnermik qitiusumik ilinniartinnik aqutsinerup qitiusumut katersorneqarneramik. PI-mi siulersuisut ilutigisaanik kaammattuutigaaq isumaliutigeqqullugu najukkani namminerni aqutsineq, aamma inuussutissarsiutit sammiviini assigiinngitsuni siulersuisoqartitserneq.

Tamatumunnga atatillugu tamanna pillugu NI-p oqaaseqaataanut siuliani nalunaarneqartut innersuunneqassapput. Tamatumunngalu tapiliullugu uteqqinneqarsinnaavoq piffissami sumiluunniit inuussutissarsiutit sammiviinut sammisunik aamma faginut immikkut aalajangersimasunut sammisunik suliffeqarfiit ilinniagaqartunik tiguisartut akornanneersunik panelinik pilersitsisoqartarsinnaammat ilinniakkat naleqqussarumallugit suliffeqarnermi pisariaqartitsinernut namminernut, qulaajarumallugillu imaluunniit pitsaassusilersorumallugillu inuussutissarsiutit sammiviinut tunngasut apeqqutit.

PI-mi siulersuisut ilanngullugu tusarniaanermi akissummi oqaatigaaq naak immikkoortuni arlaqartuni pissutsit Implements-ip nalunaarutaaniittut isumaqatigigaluarlugit, aamma siunnersuummut oqaaseqaatiniittut, taamaattoq siunnersuut isumaqatiginnikkitsik. Tamanna PI-mit tunngavilerneqarpoq namminneq isumaqannginnamik Naalakkersuisut nakkutilliisussaanertik naammassisimagaat eqqortillugu, qitiusumik ilinniartit inatsisitigut pisussaaffii eqqarsaatigalugit ilinniakkat pitsaassusissaasigut aamma aningaasaqarnikkut. Perorsaanermik Ilinniarfiup ilutigisaanik oqaatigaaq Naalakkersuisut atorsimangikkaat siulersuisunik taarsiinnaanermik periarfissarititaasoq, taakkua akisussaaffitik naammassinngikkaangatigit.

Tamatumunnga atatillugu oqaatigineqassaaq aamma Deloittes-ip nalunaarusiaani immikkoortumi 1-imi ersittutut, aningaasaqarnermut atatillugu akisussaaffik, matumanissaaq missingersuusianik malitseqartitsisarnerit, ilinniartinnik ataasiakkaani namminerni pineqartuni siulersuisut akisussaaffigaaq, taakkua ilinniartitaanermik ingerlatsivimmi qullersaallutik oqartussaataammata, tak. Inuussutissarsiutinik ilinniartitsineq pillugu inatsimmi § 35, imm. 1, aamma § 37, imm. 1.

Naalackersuisoqarfiup akisussaasuusip nakkutilliisarnerani taamaattumik pineqarput suliassaqarfiup immikkoortup pineqartup ataatsimut isigisumi nakkutigineqarnera, tamatumani naammassisaqarsinnaassuseq siulersuisoqarnermik aaqqissuussinerup ajornarnerulersillugu. Ilutigisaanik naliliisoqarpoq matumani pineqartut tassaasut aaqqissuussaanikkut tunngaviusutigullu ajornartorsiutit, aqutsinermik aaqqissuussinerup nammineq iluaniittut, taamaallaallu siulersuisut taarserneqarnerisigut aaqqinneqarsinnaanngitsut.

Kiisalu aamma Perorsaaneramik Ilinniarfimmi siulersuisut nalunaarsimavaat isumaqaratik Naalackersuisut naammattumik atorsimangikkaat suliassat suliarineqartarnerannik aqutsineq, aammalu naammassisassanut isumaqatigiissutisigut politikikkut anguniakkanik ersarissunik aalajangersaasarneq. Tamatuma saniatigut isumaqartoqarpoq Naalackersuisut annertunerujussuarmik naammassisassatut isumalluarnerup ilinniarfinnut aamma taakkua siulersuisuinut paaseqatiginnissutigisarsinnaasimagaluaraa, suliassat naammassineqartarneri eqqarsaatigalugit, aningaasaqarnikkut aqutsinermi aamma pitsaassusissanik qularnaarisarnerni.

Tamatumunnga taamaallaat innersuunneqassapput inatsisitigut qitiusumik ilinniarfinnut killiliussat, inatsisini Naalackersuisut nalinginnaasunik ilitsersuisinnaatitaanerisa avataanni inissisimasut, tak. aamma innersuussinerit siulianiittut Inatsisartut inatsisaanni atuuttumi § 35, imm. 1-imut aamma § 37, imm. 1-imut, taamaasillunilu siulersuisut qitiusumik ilinniarfiup qullersatut oqartussaasoralugit, Naalackersuisuunngitsut. Taamaasillunilu ilaatigut § 35, imm. 1-imi ersippoq siulersuisut ilinniarfiup ingerlanneqarnerani pingaarnertut aqutsisuusut, tamatumani aamma ilinniarfimmi fagitigut aningaasaqarnikkullu ingerlatsinermut, suliassaralugulu ilinniarfimmu aningaasaliissutit annertunerpaamik ilinniarfiup siunertanut atorneqarnissaat. Ilanngullugulu aalajangersakkami ersippoq siulersuisut akisussaasuusut ilinniarfiup ataatsimut ingerlatsineranut, aamma ilinniarfiup naammassisassanut isumaqatigiissummiittunik naammassisaqarnissaanut. Taamaattumillu ingerlatsinermut malittarisassat atuuttut tunngavigalugit killeqarpoq Naalackersuisut qanoq akulerutsigisinnaaneri ilinniarfiup suliassaminik naammassiniaaneranut.

PI-mi siulersuisut ilanngullugu oqaatigaat isumaqatigalugu ilinniartitaanernut siunnersuisoqatigiinnik pilersitsisoqarnissaa, taamaattoq siulersuisut peernagit. Tamanna siuliani NI-p siulersuisuisa aamma KNQI-p tusarniaanermi akissutaanut atatillugu oqaaseqarfigineqarpoq.

Kiisalu aamma PI-mi siulersuisut nalunaarpaat PI sungiusaammik suliffissanut ataqatigiissarineramik aaqqissuussereersimasoq, tak. siunnersuummi § 33, ilinniarfinni namminerni ingerlanneqartussanik, taamaattumillu tamanna siulersuisuni suliassat pingaarnersaattut isigineqanngitsoq. Tamatuma saniatigut oqaatigineqarpoq sungiusaammik suliffissat oqaluserineqarneranni unammilligassaqalersinnaasooq, ilinniagaqartut annertuumik amerleriaateqassappata.

Tamatumunnga taamaallaat oqaatigineqassaaq aaqqissuusseqqinnerup 2010-meersup iluani qitiusut ilagimmassuk suliffeqarnermi illuatungeriit peqataatinneqarnissaat siulersuinik pilersitsisarnerni, tamannalu nammineq sungiusaammik suliffissat amerlanerulernissaannut aqquissuusseqataassasoq. Naatsorsuutigisaasoq tassaasimavoq siulersuisunik suliffeqarnermi illuatungeriinnik inuttaqartumik suliffeqarfinnik oqaloqateqartarnernik tunngaveqartumik sungiusaammik suliffissat ilungersuutigineqarnerulernerannik nammineq kinguneqarumaartoq.

Eqqaaneqareersutut minnerunngitsumik taamanikkut isumalluarnerup kinguneqannginnera tunngaviusimavoq siunnersuummi § 30-ip saqqummerneranut, aammali inatsisissami suliniutit allat pilernerannut, assersuutigalugu; Inatsisartut inatsisaata nr. 17, 27. november 2020-meersup, Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaa.

Avannaata Kommuniata tusarniaanermi akissutaani – Perorsaanermik Ilinniarfimmi siulersuisuni siulittaasumit nassiunneqartumi, nalunaarneqarpoq PI-mi siulersuisut akissutaanisulli isumaqatigineqartoq ilinniartitaanernut siunnersuisoqatigiinnik pilersitsisoqarnissaa, taamaattoq siulersuisut peernagit. Tamanna siuliani oqaaseqarfigineqarpoq NI-p aamma PI-p siulersuisuisa aamma KNQI-p tusarniaanermi akiussutaasa oqaaseqarfigineqarneranni.

Avannaata Kommuniata ilanngullugu kaammattuutigaa siulersuisut, forständerit aamma Naalakkersuisut naapeqatigiissasut Implements-ip nalunaarutaa pillugu, inatsisinik allanngortitsinngikkaluarluni.

Soorlu aamma siuliani ilaatigut Sulisitsisut tusarniaanermi akissutaata oqaaseqarfigineqarnerani nalunaarneqareersoq inuussutissarsiutinik ilinniartitsinerit iluanni ineriartornerup kingunerisaanik paasinarsisoq ajornartorsiutit annertuut oqaloqatigiinnerinnakkut aaqqiissutissarsineqarsinnaanngitsut piunerat, kisiannili aaqqissuusaaikkut allannguinerik pisariaqartitsiviusut inuussutissarsiutinik ilinniartitsinerit iluanni, aqutseriaatsimik iliuseqarfiunerussamik pilersitsinikkut.

Tamatumunnga atatillugu Avannaata Kommuniata aamma nalunaarpaa periarfissaasimagaluartoq siulersuisut piginnaasaasa annertunerulersinneqarnissaat, qitiusumillu ilinniartit tamaasa eqqornagit Campus Kujallermi pissutsinik atuuttunik peqquteqartunik.

Tamatumunnga atatillugu naliliineruvoq nalorninaateqarsimangitsoq Naalakkersuisut imaluunniimmi aamma Inatsisartut isumalluarnerat qitiusumik ilinniarfiit suliassaminnik isumaginnissinnaassusiat, tamatumani aamma aningaasaqarnikkut aamma pitsaassusissatigut qularnaarisarnissat, tamatumalu saniatigut inatsisitigut aalajangersarneqareersimapput piginnaasatigut piumasaqaataasut siulersuisunut tamarmiusunut ilaasortanullu ataasiakkaanut

namminernut. Soorlu aamma PI-mi siulersuisunit oqaatigineqartoq ilutigisaanik naliliineruvoq matumani pineqartut aaqqissuussaaniikkut ajornartorsiutit tunngaviusut, aqutsinermik aaqqissuussinermiittut nammineq, siulersuisut tunuartinnerinnaasigut aaqqinneqarsinnaanngitsut.

Avannaata Kommuniatalu PI-mit aamma NI-mit tusarniaanermi akissutitulli apeqquuserpaa qanoq pissusissamisoortiginersoq qitiusumik ilinniarfinnik ingerlatsinermik “angerlaassineq”, isumaqarlutillu tamanna ilaatigut Naalakkersuisoqarfimmut unammilligassaqaqtitsilissasoq.

Tamatumunnga oqaatigineqassaaq soorluli aamma KNQI-p tusarniaanermut akissutaanut atatillugu siulianiittuni oqaatigineqareersutut suliassat suli siammasissumik ingerlanneqartussaani, matumanilu taamaalaat pineqarmat toqqaannartumik aqutsineq.

Avannaata Kommuniata ilutigisaanik oqaatigaa Perorsaanermik Ilinniarfimmik suleqateqarneq kinguneqarsimasoq malunnaatilinnik annertussusilinnik meeqqat meeqqerivinniitinneqartarnerannut akiliutinik appaasoqarsinnaasimasoq kommunimi isertaqartut immikkoortut ilaannut, tamannali aqutseriaatsimut attuumassuteqartinneqarsinnaaganngilaq. Tamatumalu saniatigut nalorninaateqarpoq oqaaseqaatigineqartup qitiusumik ilinniarfiit angusaannut qanoq atassuteqarnera, ilinniagaqartunut atatillugu aammalu suliffeqarnermi ilinniarsimasunik pisariaqartitsinernut atatillugu.

Avannaata Kommuniata aamma nalunaarsimavaa iluaqutissartaqartikkitsik inuussutissarsiutit assigiinngitsut siulersuisunut ilaasortassanik toqqaasarneri, soqutigisaqartut assigiinngitsut suleqatigiinnerannik kinguneqartarmat.

Tamatumunnga atatillugu innersuunneqassapput KNQI-p aamma NI-p tusarniaanermi akissutaannut oqaaseqaatit, taakkunani ilaatigut oqaatigineqarmat paatsuinerusoq naatsorsuutigissallugu ilinniartitaanermi pisariaqartitsinerit annertussusiat taamaallaat nalilersorneqarsinnaasoq siulersuisutigut, tamannalumi aamma siulersuisoqarnermik aaqqissuussinerup nammineq takutereepaa.

SIK-mit oqaatigineqarpoq siulersuisut ingerlaqqittumik ilinniartitaanermut ingerlatsiviit aningaasaqarnerat, aningaasartuutissanut missingersuusiortarnerat ukiumoortunillu aningaasaliissutinik atuisarneq suliarisariaqaraat, isumaqaramik siulersuisut suliassanik pineqartunik isumaginnilluarnerusinnaasut. SIK-p tamatumunnga tunngavilersuutigaa suliffeqarnermi illuatungeriit pissutsinik ilisimannilluartuunerat, suliffeqarnermi namminermi aammali aningaasaliissutit sumut atorneqarnissaanni, SIK-lu ilinniarfinni siulersuisuni arlaqartuni sinniisoqarluni.

Tamatumunnga oqaatigineqassaaq suliffeqarnermi kattuffiit, tamatumanissaaq SIK-mit sinniisut Campus Kujallermi aamma NI-mi siulersuisuni angusaqarsimagunangitsut

anigaasaliissuteqartartunit naatsorsuutigineqartunik. Iisimaneqartutut suliaasaqarfik taanna ukiuni amerlasuuni anigaasaliissutinik millionilikkaanik qaangiisarsimavoq, tamatumunnaa ukiuni amerlasuuni atuinerusarsimalluni akissarsiaqartitsisarnikkut 1,8 mio. kr.-it angullugit ukiumut annertussuseqartunik sulisunut arlaqartunut tunngatillugu. Tamakkualu saniatigut nunatta sungiusaammik suliffissat 20 %-iinit amerlanerusut annaasimavai maanna inatsisit siulersuisoqartitsisut iluanni. Ilutigisaanillu apeqquuserneqarsinnaavoq nammineq siulersuisuni ilaasortaataitaqarneq innersuunneqartoq, tunngavilersuutitut siulersuisut ingerlaannarnissaannut.

SIK-p ilutigisaanik oqaatigaa isumaqatiginagu aqutseriaasissatut aaqqissuussineq siunnersuutigineqartoq qitiusumik ilinniarfiit naammassisaqarfiunerusumik aqunneqalernerannik kinguneqarsinnaasoq.

Tamatumunnga atatillugu innersuunneqassapput angusarineqarsimasut Naalakkersuisoqarfiup oqartussaasup suligasuartarsimaneratigut Campus Kujallermi ajornartorsiornermut atatillugu 2023-imi ingerlanneqarsimasut, Campus Kujalliup ukiuni amerlasuuni anigaasarnermigut torinnigitsumik ingerlatsereerneratigut suliaasimasut, ilinniarfiup ajornartorsiuulerneranik tunngaveqartunik ingerlanneqarsimasut, aammalu innersuunneqarsinnaallutik siulersuisoqarluni aaqqissuussinerup naammassisinnaasimanngisai sungiusaammik suliffissanik pilersitsisarnissat.

SIK-p tamatuma saniatigut oqaatigaa sukkulluunniit oqaluuserineqarsinnaammat kikkut siulersuisuni ilaasortaannissaat, ilutigisaanillu siunnersuutigalut ilinniarfinni tamani ilinniartut siulersuisuni sinniisoqalernissaat. Tamatumunnga oqaatigineqassaaq tamanna siunnersuutip siunertaata avataaniimmat, matumani siunertaammat aqutsinikkut aaqqissuussinermik siulersuisoqarfiunngitsumik pilersitsinissaq, sukkanerusumillu aammalu naammassisaqarfiunerusumik aqutsinikkut aaqqissuussinissaq. Ilutigisaanillu oqaatigineqassaaq NI aamma Campus Kujalleq siulersuisuminni ilinniartunit sinniisoqartitsisimmata, tamannali nammineq kinguneqarsimarpasinngilaq anigaasaqarnikkut naammassisaqarfiunerusumik pitsaanerusumilluunniit ingerlatsinermik.

SIK ilanngullugu ilalersuorpassippoq sungiusaammik suliffissanut ataqatigiissaarinermik aaqqissuussinissanut, anigaasaliissutilli tamatumunnga amerlineqarnissaannik kissaateqarluni.

Tamatumunnga atatillugu innersuussisoqassaaq siunnersuummut oqaaseqaatini immikkoortoq 3-mut, tassani nassuiaavigineqarmata anigaasaqarnermut tunngatillugu isumaliutaasut naatsorsuinerillu, sungiusaammik suliffissanut ataqatigiissaarivimmik pilersitsinissamut tunngatillugu.

Kiisalu aamma SIK oqaaseqaateqarpoq siunnersuummi aalajangersakkanut ataasiakkaanut, SIK-lu aamma isummorsorluni aalajangersakkanut allannguuteqartinnagit ingerlateqqinneqartunut Inatsisartut inatsisaanni atuuttumeersunik. Aallarniutigalugu SIK-p

innersuuppaa siunnersuummi § 4, siunnersuisoqatigiit aamma ataatsimiititaliat, nalunaarlutillu siulersuisoqarnermik aaqqissuussineq atuuttoq ingerlaqqittariaqartoq, nalilernerqarmat tamanna pitsaanerpaajusoq ilinniarfiit aningaasaqarnerannik aqutsinermi, aammalu aningasat qanoq atorneqartarnissaannut. Ersareqqissaanngilaq sooq oqaaseqaatit imaqaarnersut siunnersuummi § 4-mut ilassutissanik, aamma oqaaseqaat isumaqaarnersoq allanngortitsisoqassanngitsoq nunamut tamarmut ilinniartitaanernut siunnersuisoqatigiiliornissamik. Tamatuma saniatigut innersuussisoqassaaq siuliani nalunaarneqareersunut maannamut siulersuisoqarnermik misilittagaasut pillugit, ilaatigut aningaasaqarnikkut aqutsineq sungiusaammillu suliffissat eqqarsaatigalugit.

Kiisalu aamma SIK-mit inassutigineqarpoq siunnersuummi § 10, imm. 2-mut atatillugu, ilinniartitaanernut isersinnaaneq ilinniagaqalersinnaanerlu pillugit, Saviminilerinermik Ilinniarfik Nuummiittoq KTI-mut Sisimiuniittumut nuunneqassasoq. Oqaatigineqartut taakkua paatsoornermik pissuteqarsimassapput, aalajangersakkami tassani aqunneqanngimmata ilinniartitaanerit nunatta suatungaani inissisimanissaat.

Kiisalu aamma SIK innersuussivoq siunnersuummi § 11-imut, tassani pineqarluni tiguneqarsinnaasut amerlassusissaasa aalajangersaavigisarnerat ilinniakkani aalajangersimasuini, ilinniarfiit naammassisinnaasaannik tunngaveqartartunik, imaluunniit ilinniartitaanernut suliffissaaleqiffiusunut imaluunniit naammattunik sulisusaqarfiusunut. SIK tamatumunnga atatillugu nalunaarpoq inuusuttuaqqat immikkut sullinneqartussatut siunnerfiusut tassaasut siunnerfiusut pingaartillugit sullittariaqartut. Tamatumunnga oqaatigineqassaaq siunnersuummi § 11 atassuteqanngimmat inuusuttuaqqanut immikkut sullinneqartussanut, siunnersuummut immikkut nassuiaatitut oqaaseqaataasuni eqqaaneqareersutut maanna siulersuisoqarluni aaqqissuussinerup iluani puiguinnarneqarsimasunut.

Tamatuma saniatigut SIK-p innersuussimavaa siunnersuummi § 11, nalunaarlunilu ilinniarfinni sungiusaammik sulisitsisarneq eqqunneqartariaqartoq misiligutitut aaqqissuussamik qitiusumik ilinniarfinni tamani, pisariaqarpallu ilinniagaareersut nuunneqarsinnaanerannik aaqqissuussisoqartariaqartoq innuttaasunut inersimasunut atatillugu. Tamatumunnga oqaatigineqassaaq siunnersuummi § 13 taamaallaat nalunaarmat periarfissamik aalajangiisinnaanernumut ilinniakkami sungiusaammik sulinissap ilinniarfimmi sungiusaammik sulinertut ingerlanneqarsinnaanerani, tamatumanilu aallaaviulluni siulersuisut tamatumunnga ilinniartitaanernut pilersaarummi ilanngussinissaat, ilinniakkami pineqartumi namminermi, tassani malittarisassat atuuttut naapertorlugit. Assigisaanik atuuppoq ilinniakkanut ilinniagareriikkat ilanngullugit ingerlanneqarsinnaasuni.

Ilanngullugulu aamma SIK nalunaarpoq ilalersoritsik siunnersuummi § 17, Inuussutissarsiutinik Ilinniartitsinermut inatsimmi atuuttumi § 14-imik ingerlatitseqqinnerusoq. Oqaaseqaatit immikkut oqaaseqarnissamik pisariaqartitsinngilaq.

Tamatuma saniatigut SIK innersuussivoq siunnersuummi § 18-imut nalunaarlunilu ilinniutissat tamarmik akeqanngitsuusariaqartut, ilaqutariit piginnaannginnerit eqqarsaatigalugit. Aalajangersagaq iluarsiiussikkamik ingerlatitseqqinneruvoq Inuussutissarsiutinik ilinniartitsinermut inatsimmi § 18-imik, oqaaseqaallu imm. 3-mut tunngasimassalluni, tassani ersimmat ilinniagaqartut pisussaaffilerneqarsinnaasut killeqartumik namminneq ilinniutissanik pisariaqartunik pissarsiniartarnissamik. Aalajangersagaq sanilliunneqassaaq maleruagassamut pingaarnermut imm. 1-miittumut, tassuunalu ilinniartitsineq akeqanngilaq, taamaallaallu killeqartumik ilinniartut pisussaaffilerneqarsinnaallutik nammineq ilinniutissanik pissarsiniarnissamut. Minnerunngitsumik tassaniippoq akinik nalilersuisarneq, taannalu ilinniagaqartunik oqimaarsartitsisussaananani. Taamaattumik naatsorsuutigineqarpoq aalajangersagaq isiginiaasuusoq ilinniartup akiliisinnaassusianik.

SIK aamma siunnersuummi § 33-imut sungiusaammik suliffissanut ataqatigiissaarinnermut aaqqissuussiveqalernissamut atatillugu nalunaarpoq sungiusaammik suliffissanik pissarsiniartarneq sineriak tamakkerlugu ingerlanneqartariaqartoq, illoqarfinni immikkut toqqakkani kisimi pinnani. Oqaatigineqassaaq aalajangersagaq killilersuinngilluinnarmat illoqarfinnut aalajangersimasunut.

SIK ilanngullugu innersuussivoq siunnersuummi § 37-imut qitiusumik ilinniarfiit aningaasalersorneqarnerannut, oqaatigalugu ammasumik taxameteri atorlugu akiliuteqartitsisarneq oqallisigisariaqartoq. Tamatumunnga oqaatigineqassaaq aalajangersagaq taxameteri atorlugu akiliutissannik aalajangersaasanngimmat, tamatumunngalu atatillugu inatsisissamut nassuiaatitut oqaaseqaatini ersilluni Inatsisartut killiliivigineqanngitsumik aningaasanut inatsisikkut aalajangersinnaagaat qanoq tapiissuteqartarnerit aaqqissuunneqassanersut, matumanissaaq aamma taxameteri atorlugu aaqqissuussinermi, tassanilu atugassarititaasut aamma maleruagassat aalajangersarneqartussaallutik.

SIK innersuussivoq siunnersuummi § 38-imut qitiusumik ilinniarfiit sungiusaammik suliffissannik isumaginniuttussaanerannut, oqaatigalugu pingaaruteqartoq taakkua naammattunik amerlassuseqarnissaat.

Tamatumunnga oqaatigineqassaaq matumani pineqarmat iluarsiiussikkamik ingerlatitseqqinneq Inuussutissarsiutinik ilinniartitsinermi inatsimmi § 43-mik, qitiusumik ilinniarfiit maanna aaqqissuussinerup iluani kivissinnaasimannngisaat.

Kiisalu aamma SIK-p nalunaarppaa ilalerneqartoq siunnersuummi § 54, ilinniartut ilinniagaqarnissaminut isumaqatigiissuteqartut imaluunniit lærlingitut isumaqatigiissuteqartut suliitilluni ajoqusersinnaanermut sillimmasiissutit iluaniittussaanerat, tamannalu immikkut oqaaseqarfigissallugu isumaqassanngilaq.